

4

*[Faint, illegible handwriting]*

82

D

24

10  
8



Ex Bibliotheca  
majori Coll. Rom.  
Societ. Jesu

~~10 8 D. 31~~

824.26

23

14. 14. 14.

D E  
ABASSINORVM  
R E B V S,

*Déque Aethiopia Patriarchis*  
IOANNE NONIO BARRETO,

&  
ANDREA OVIEDO,

LIBRI TRES:

P. NICOLAO GODIGNO

Societatis IESV Auctore.

*Nunc primum in lucem emissi.*



*Officiu Cardini*



LVGDVNI,

Sumptibus Horatij Cardon.

M. DC. XV.

SVPERIORVM PERMISSV.



Miss Conner

Gr. 1888






ILL<sup>MO</sup> AC REV<sup>MO</sup>

**D. FERNANDO**

MARTINIO MASCARE-  
gnæ Algarbiorum Episcopo,

NICOLAUS GODIGNVS  
*felicitem precatur.*

 MOR me magis, quàm  
res alia perpulit, vt rem  
offerrem tibi granditate  
tua parum dignam. Ignos-  
cédum Amori, qui vix videt quid de-  
ceat. Si Patronum huic operi quære-  
rem, reperire nollem alium, quàm te,  
in quo summa sunt omnia, quæ ad pa-  
trocinandum valent, Generis ampli-  
tudo, Vitæ sanctitas, Rerum sciëntia, A-  
nimi mansuetudo, Comitas in officiis,

\* 2 ad

ad beneficiendum Propensio , & si  
quid est aliud, quod hanc partem com-  
mendet. Sed mihi tantum in animo  
est, hoc breui munusculo voluntatem  
testari in te meam ; & apertum facere,  
quod, credo, non ignoras, tantum me  
addictum esse rebus tuis, quantum qui  
maximè. Vale.

LECTO



## LECTORI S.

**V**Erè à sapiente quodam dictum est, nihil esse tam firmum, ac tam constans, quod sit omnino à criminatione tutum; adeo in dissidia proclivis est natura mortalium. Quis crederet hac tempestate, quando Abassinorum omnia tantopere sunt per orbem nota, reperiri posse, qui gentem illam assereret à Romana fide neque modò esse, neque umquam fuisse alienam? Repertus tamen est, qui tanta utrumque contentione defendat, ut ne pro aris quidem ac focis agere queat contentiosius. Quid de hominis animo dicam, non habeo. Laudare factum non possum; quia poterat is, nec difficile, vera veròque scribere, si vel modicam adhibere vellet in perquirenda veritate diligentiam, qua adhibita rem faceret nec indecoram sibi, nec perniciosam aliis. Ego cum Ioannis Nonij Barreti, & Andreae Oviedi Aethiopia Patriarcharum res gestas statuissem mandare literis, nonnihil dubitavi, an esset opera curare, quae essent ab hoc auctore scripta; ac pane decreueram nullam eius habere rationem, memor dixisse Augustinum, quae à veritate non veniunt, plerumque cadere nullo impellente, ac se ipsa subvertere. Fuere tamen, qui ex Seneca monerent, Rem falsam & inanem, nisi coarguatur, habere nonnumquam fidem; multòsque esse

\* 3 homi

*homines iudicij parum firmi, qui nihil audiant le-  
gántve, quod non credant, nisi refutatum sciant: his  
ab scriptore verace medendum esse. Hac mihi cau-  
sa, cur ex plurimis, quæ de Abassinorum moribus  
falsò scripta sunt, pauca selegi, quæ referrem ac re-  
fellerem. Id tu, Lector, ex sequentibus planius in-  
telliges. Interim vale.*



---

CLAVDIVS AQUAVIVA, SOCIETATIS IESU PRÆPOSITUS GENERALIS.

**C**V M opus de *Abassinorum rebus, deque Æthiopia Patriarchis Ioanne Nonio Barreto, & Andrea Onicio, à P. Nicolao Godigno, nostra Societatis sacerdote conscriptum, tres eiusdem Societatis, quibus id commisimus, recognouerint, & in lucem edi posse probauerint; facultatem concedimus, vt typis mandetur, si sis, ad quos pertinet. ita videbitur. In quorum fidem has literas, manu nostra subscriptas, & sigillo nostro munitas dedimus Romæ 3. Nouembris 1614.*

CLAVDIVS AQUAVIVA.

---

*Facultas R. P. Prouincialis Societatis IESV in Prouincia Lugdunensi.*

**A**NTONIVS SVFFREN Prouincialis Societatis Iesu, in Prouincia Lugdunensi, iuxta Priuilegium eidem Societati à Regibus Christianissimis Henrico III. 10. Maij. 1583. Henrico IV. 20. Decembris 1606. & Ludouico XIII. nunc regnante, 14. Februar. 1611. concessum, quo Bibliopolis omnibus prohibetur, ne libros ab eiusdem Societatis hominibus compositos, absque superiorum permissione imprimant, permittit HORATIO CARDON Lugdunensi Bibliopolæ, vt librum de *Abassinorum rebus, deque Æthiopia Patriarchis Ioanne Nonio Barreto, & Andrea Onicio, P. Nicolao Godigno Societatis nostra Auctore, ad sex primos annos imprimere, ac libere diuendere possit. Datum Lugduni j. Iulij 1615.*

SVFFREN.

---

APPROBATIO.

**I**OANNES CLAVDIUS DEVILLE, in sacra Theologia Magister, & diuini verbi Prædicator in S. Pauli huiusce ciuitatis Canonicus, & in hac Lugdunenſi diœceſi à Dn. Dionyſio Simone de Marquemôt, Illuſtriſſimo & Reuerendiſſimo Archiepiſcopo, Librorum cenſor designatus: Eidem facimus, nos Tractatum hunc *de Abaſſinorum rebus, deque Ethiopia Patriarchis Ioanne Nonio Barreto, & Andrea Oniedo; P. Nicolao Godigno Societatis Ieſu Auctore*, perlegiſſe, in quò nihil fidei Catholicæ contrarium animaduerſum. Lugduni apud S. Paulum Calend. Iulias. M. DC. XV.

IOANNES CLAVDIUS DEVILLE.

---

R. D. D. *Thoma de Meſchatin la Faye*, huius libri imprimendi facultas.

**T**HOMAS DE MESCHATIN LA FAYE, Comes, Canonicus, & Camerarius Eccleſiæ Lugdunenſis, Vicarius Generalis in Archiepiſcopatu Lugdunenſi. Tractatus qui inſcribitur, *de Abaſſinorum rebus, deque Ethiopia Patriarchis Ioanne Nonio Barreto, & Andrea Oniedo, libri tres: Auctore P. Nicolao Godigno Societatis Ieſu*, vt in lucem edatur, facultatem concedo, Lugduni 8. Iulij 1615.

MESCHATIN LA FAYE.

---

C O N C E S S I O.

**L**ibrum hunc *De Abassinorum rebus, deque Ethiopia Patriarchis Ioanne Nonio Barreto, & Andrea Oniedo, P. Nicolao Godigno Societatis Iesu Auctore*; Ego Iacobus Daueyne Regis Procurator typis mandari, tum demum in lucem exponi consentio.

DAVEYNE.

---

**T**ractatus hic *De Abassinorum rebus, deque Ethiopia Patriarchis Ioanne Nonio Barreto, & Andrea Oniedo, P. Nicolao Godigno Societatis IESU Auctore*, vt HORATIO CARDONE Bibliopolâ lucem videat permittimus: simul ne quis citra factam ei ab ipso potestatem denuo excudat interdiciamus. Lugduni 12. Iulij 1615.

SEVE.

\*

5





# IND. LIBR. ET CAP.

9. *Vbi sit Abassini Imperatoris sedes.* p. 49.
10. *Qualis Abassini soli conditio.* p. 58.
11. *Quid de Abassini soli natura & fertilitate ve-  
re sentiendum* p. 66.
12. *Quales Abassinae gentis mores.* p. 71.
13. *Quae sit apud Abassinos Reipubl. gubernandae  
ratio.* p. 79.
14. *Qua ratione in Iudicum vitam & mores apud  
Abassinos inquiri dicatur.* p. 84.
15. *De Latino quodam Senatu, qui apud Abassinos  
esse dicitur, deque aliis ad Imperij administra-  
tionem pertinentibus.* p. 89.
16. *Quae scelera, quibus pœnis in Abassia punian-  
tur.* p. 94.
17. *De puerorum institutione & usu literarum  
apud Abassinos.* p. 102.
18. *Quo tempore veri Dei religio in Aethiopia ca-  
perit.* p. 113.
19. *Qualis Abassinorum in sacra propensio.* p. 119.
20. *Quibus ceremoniis dicatur uti Imperator certis  
quibusdam anni diebus* p. 126.
21. *Quanta Abassini pietate templa veneren-  
tur.* p. 130.
22. *De Abassinorum festis, & aliis ad sacra perti-  
nentibus.* p. 134.
23. *Quibus argumentis ostendi videatur num-  
quam Abassinos à vera Christi fide decessisse.*  
p. 141.

# INDEX LIBRORVM

24. *Quomodo Abassini ab heresis suspitione videantur defendi.* p.150.
25. *Auctorum testimoniis probari videtur Abassinorum fides.* p.155.
26. *Vnde videatur ortum ut Abassini, apud nos schismatici habeantur.* p.158.
27. *Abassinos à recta fide defecisse.* p.164.
28. *In quibus prius erroribus Abassini fuere, in iisdem adhuc persistere.* p.170.
29. *Qua argumenta pro tuenda Abassina gētis religione proposita sunt, nullam vim habere.* p.176.
30. *Neque Abassinorum errores aptè excusari, neque eorum fidem auctorum testimoniis rectè probari.* p.183.
31. *Commentitias esse causas, ex quibus orta fingitur deserta religionis in Abassinos infamia.* p.189.
32. *Sintne ulli in Abassia sacrorū Antistites.* p.195.
33. *Sintne vllæ apud Abassinos religiosorum familie.* p.199.
34. *An præter religiosum Magni Antonij ordinem aliquis alius in Abassia sit.* p.206.
35. *Qua sacramenta, qualisque eorum vsus apud Abassinos sit.* p.212.
36. *Qualia apud Abassinos Ordinis, & Matrimonij sacramenta* p.219.

LIBER

## LIBER SECVNDVS

De Ioanne Nonio Barreto Patriarcha.

Seriem capitum hanc habet.

1. *Vbi & quibus parentibus natus Ioannes, quomodo à pueritia institutus.* p. 228.
2. *Melchior Nonius Barretus in Societatem à Deo præmittitur, ut Ioanni fratri viam aperiat.* p. 230.
3. *Alfonſus Barretus fratrum motus exemplo Societatem amplectitur, & egregiis facinoribus tyrocinium illustrat.* p. 234.
4. *Ioannes imposito ſtudiis ſine religioſe vitæ deſiderio pulſatur.* p. 242.
5. *Melchior ut Ioannem ad ſocietatem pertrahat, illum conuenit, irritò ſucceſſu.* p. 245.
6. *Ioannes litantem Fabrum per quietem videt, & à Deipara monitus Conimbricam petit.* p. 253.
7. *Ioannem Faber prius inſtructum ac probatum in Societatem cooptat.* p. 255.
8. *E' Luſitania in Africam mittitur Ioannes, & Septem rem Chriſtianam egregie promouet.* p. 260.
9. *Ioannes cum ſociis Tituanum ingreſſus captiuorum commoda impenſè curat.* p. 265.
10. *Ioannes & ſocij circa captiuos iuuandos ſacerdotis Contrerie exemplum imitantur. Oppreſſus*  
*mor*

# INDEX LIBRORVM

- morbo Camer Septam repetit.* p.269.
11. *Profecto Camera, Ioannes Tituani remanens in iisdem persistit caritatis operibus.* p.273.
12. *Suam quoque infidelibus operam Ioannes impendit.* p.280.
13. *Ioannes in Lusitaniam rediens, Aethiopia Patriarcha designatur.* p.285.
14. *Quamobrem missi in Aethiopiam Patriarcha.* p.290.
15. *Qua de Patriarcha Ioannis & sociorum missione à nouo auctore scripta sunt.* p.295.
16. *Quantum à vero absit superior narratio.* p.301.
17. *Quomodo Ioannes se gesserit, postquam Patriarcha creatus est.* p.308.
18. *Legatione missa exploratur quo animo sit Abbasinus Imperator ad recipiendum Patriarchas, & socios.* p.314.
19. *Qualis fuerit Imperatoris Claudij in Romanam Ecclesiam, & ad recipiendum Patriarcham animus.* p.327.
20. *Patriarcha cum Ouiedo Episcopo & aliis sociis Olisipone in Indiam soluit.* p.330.
21. *A Mosambico Patriarcha Goam peruenit, & ibi manet, misso in Aethiopiam Ouiedo.* p.334.
22. *Vitæ præsentis præclaris virtutum operibus exercita finem Patriarcha imponit.* p.338.

LIBER

LIBER TERTIVS

*De Patriarcha Andrea Ouiedo, & Sociis.*

Seriem capitum hanc habet.

1. *De ingressu Ouiedi in Societatem, & in virtutibus progressu.* p. 344.
2. *Creatus Andreas Episcopus & Noni Patriarcha successor mira prabet submissionis animi exempla.* p. 347.
3. *Andreas Eborensem diocesim, Henrici principis rogatu, cum fructu & exemplo instruat.* p. 350.
4. *Ex Lusitania Goam, inde in Aethiopiam Ouiedus proficiscitur.* p. 356.
5. *De ingressu Andrea in Aethiopiam, de accessu ad Imperatorem, & quae inter illos gesta.* p. 360.
6. *Quid postea inter Ouiedum & Claudium actum, de quo morte Claudij, atque eius successore.* p. 364.
7. *Sauit in Andream Adamas, cumque in exilium eiicit.* p. 367.
8. *Abasinos suos Adamas persequitur, & Andream iterum in exilium mittit.* p. 369.
9. *Tertium Andreas cum Catholicis exilio mulctatur, & variis modis affligitur.* p. 373.
10. *Gravi bello scelerum suorum poenas luit Imperator*

# IND. LIBR. ET CAP.

rator Adamas, Andreas cum sociis diuinitus  
seruatur. p.379.

11. Quid in Imperio, quid Oniedo acciderit mor-  
tuo Adama. p.382.

12. Iubetur Andreas à Pio V. Pontifice maximo  
Æthiopiam relinquere, & ad Iaponios ac Sinas  
proficisci. p.385.

13. Oniedi Patriarchæ circa suum ex Æthiopia e-  
xitum responsio. p.388.

14. De quibusdam Andrea Patriarchæ virtutibus.  
p.394.

15. De aliis Andrea virtutibus, & obitu. p.400.

16. Quales Andrea socij, quomodo vitam fini-  
erint. p.406.

17. & ult. De Francisco Lupio, Patriarchæ socio,  
qui omnium postremus diem obiit. p.411.

DE





D E  
 ABASSINORVM  
 R E B V S  
 LIBER PRIMVS.

*A quo tempore res Abassinorum nobis  
 probè cognita.*

C A P V T . I .



E rebus Abassinorum nihil reperio separatim dixisse veteres, præter ea, quæ de orientali Æthiopia, cum vel terrarum orbem describerent, vel de Æthiopicis populis priuatim agerent, communiter & promiscuè tradiderunt. Recentiores aliqui non pauca scripserunt, quæ ad soli cœlique naturam, ad instituta civilia, ad mores, ad religionem spectant. Ex his unus, cæteris recentior, parum abest, quin & ipsi cœlo cœlituum domicilio Abassiam præferat. Nihil eius solo apud hunc auctorem amœnius, nihil auri & argenti, nihil gemmarum & metallorum feracius, nihil eius aura benignius & salubrius, nihil gente humanius, nihil moribus suavius, nihil urbibus pulchrius, nihil statu-

A            tis

tis æquius, nihil Imperio moderatius. Præ vna Abas-  
 sia viles apud illum sunt reliquæ gentes oræque ter-  
 rarum. Id nos quàm verum sit, cum erit opus, dete-  
 gemus. Sed antequam de regionis natura, & gentis  
 moribus proponam aliquid, lectorem moneo, tantam  
 in hoc Abassinorum Imperio factam esse per hosce  
 annos rerum mutationem, adeoque & externis & do-  
 mesticis bellis omnia esse concussa, vix ut vlla nunc  
 appareant vestigia eius magnitudinis, quæ superiori-  
 bus seculis dicitur fuisse. Rerum caducarum ista con-  
 ditio est, quo attolluntur altius, eo profundius ruunt.  
 Illud quoque sit compertum, si quid erit de hac gen-  
 te scriptum, quod videatur dignum fide, id nobis esse  
 patefactum opera Lusitanorum, ab eo ferè tempe-  
 re [centum hodie & decem circiter anni sunt] cum  
 Petrus Couillanius, ad res Indicas & Preteianis ter-  
 ras explorandas cum Alfonso Payua à Ioanne secun-  
 do Lusitanorum Rege missus, illas adiit Abassinorum  
 regiones: quamquam & tunc quidem, & multorum  
 postea decursu annorum, cum iëto inter Abassinum  
 ac Lusitanum fœdere, aliquot vtrique ex gente lega-  
 ti vltro citròque commearunt, rebus nondum planè  
 exploratis, multa sunt ab iisdem Abassinis magnificè  
 narrata, vulgo credita, & à quibusdam ex nostris me-  
 moriæ tradita, quæ falsa esse certò postea deprehendi-  
 mus. Inde factum, ut Damianus Goëz, & Ioannes Bar-  
 rius, aliique, alioquin diligentes, & amantes veritatis  
 auctores, non pauca hoc de genere scripserint, quæ  
 longè à vero distare, nullus ferè Lusitanorum igno-  
 rat. Damianum & alios ea tempestate fefellit Zaga-  
 zabus, quem ad Ioannem Regem Abassinus Impe-  
 rator oratorem misit. Hic enim non contentus res  
 suas nimium exaggerare, & in maius attollere, pluri-  
 ma



ma insuper commentus est, quæ homines sinceri, ac minimè mali, cùm à veritate abhorreere ne suspicari quidem possent, pro veris accepta posteritati commendarunt. Sed cuiusmodi illa essent, anni insequentes patefecerunt. Itaque etsi ab eo, quo dixi, tempore, aliquam habere cœpimus Abassini Imperij cognitionem; id tamen nō ante nobis probè cognitum, quàm & Ioannes Bermudius Patriarcha, de quo postea nonnihil referam, à Romano Pontifice ex Italia missus, illuc iisset; & Stephanus Gama, Dux Lusitanus, cum armata militum manu ad easdem terras ex India traiecisset; & multi postea ex nostris diu ibidem commorantes per se paulatim singula fuissent experti. Ab anno quidem nati Christi 1560. quo religiosi Societatis Iesu in Abassiam sunt ingressi, sic omnia Lusitanis patuere, vt non secus ea, quàm propria & domestica norint; adeoque res constant, vt si quis nūc de Abassinorum Imperio scribat quidquam, aut proferat, quod vel leuiter à vero deflectat, illicd coargui possit falsitatis. Cæterum vt leuis animi est, facile credere cuiquam dicenti, præsertim cùm ea dicuntur, quæ dicentis exigunt auctoritatem; ita profectò ingenij maligni est, ac planè inuidi, iis negare fidem, qui vitæ suæ ratione probantur, idque veluti iure suo sunt assècuti, vt veraces existimentur. At quæ summo Pontifici, & Lusitano Regi causa fuerit mittendi in Æthiopiam Patriarchas, aliquanto altiùs altero libro repetendum erit. Sufficerent quidem ea, quæ Ioannes Petrus Maffei, & scriptores alij hac de re non ita pridem fideliter tradiderunt; nisi nuper extitisset, qui licentius, quàm par erat, contrariam illis ingressus viam, quæ erant extra omnem posita controuersiam, nec vulgo tantùm sine difficultate credita, sed planè

explorata, non vertit in dubium, quod videri tolerabilius poterat, sed argumentis partim debilibus, partim captiosis falsa esse ostendere conatus est. Longè sanè latèque parentem offerebat locus hic rixandi campum, si quem reperisset rixarum amantem. Sic enim auctor iste veritatem deseruit, ut iusto in opere pauca quædam, in quibus aliquod apparet veri vestigium, innumeris commentis commacularit. Deceptum ab aliquo credo; quia verosimile non est, ea voluisse ex libidine fingere, ex quibus ignorare non poterat, nihil se, præter iustissimam proborum hominum indignationem, & quod est consequens, nonnullam dedecoris notam comparaturum. Quomodo cumque tamen res habeat, ait ipse, quæ de Abassinorum tam sacris, quàm profanis rebus, deque tota eorum Monarchia literarum monumentis commendavit, ea se magna ex parte à quodam eiusdem gentis homine, atque ex quibusdam eius scriptis fideliter accepisse: quem hominem, quod videlicet Abassinus esset, non dubitarit credere, rerum istiusmodi esse peritissimum, & ab omni alienum mendacio. Quasi æquum sit, ut Pontificiis diplomatis, & regiis literis, & gravissimis scriptoribus, qui summo labore ac diligentia rei veritatem inuestigarunt, & locupletissimis testibus, quorum multi, quo tempore res istæ memoriæ mandantur, adhuc in viuis sunt, vnius fides sit anteferenda. Cuius autem spiritus afflatu sua homo ille fuderit oracula, quæ hic auctor tanta suscepit veneratione, ut nihil ipsis iudicaret in terris verius, satis cognosci potest ex quodam eius opusculo de militari & monastico equitum magni Antonij ordine, Valentini edito, quo in opusculo nihil ferè est, quod commentitium non sit. Qua de re cum à viro gravi argueretur,

gueretur, hoc tantum habuit quod responderet, sua illa commenta nemini posse officere, esseque longè ab iis diuersa, quæ sunt ab illo alio auctore tradita, quibus multorum fama læditur, existimatio polluitur, auctoritas violatur. Idem ipse Abasinus visus nobis Romæ est, & cognitus; de quæ hisce rebus familiariter rogatus, ita se purgauit, ut in hunc alium auctorem omnem culpam deriuarit. Non est inficiatus, quædam se de Æthiopico imperio, de quæ gentis moribus, & ecclesiasticis ritibus illi dedisse, quæ etsi vera non essent, nemini tamen crederet iniuriosa; eum tamen multas de suo addidisse fabulas, quarum ipse nec auctor fuerit, nec suasor. Quin potius mirari se vehementer, quonam pacto eius professionis homo, tes tales ausus sit in vulgus prodere, quæ sine grauissima omnium ordinum offensione legi non possunt. Et quod sibi quoque, suæque existimationi maxime ab illo fuerit incommodatum, questum se in Hispania esse per supplices literas apud regem, & tantæ licentiæ inuidiam deprecatum. Nos igitur auctorem hunc, quem nouum appellabimus, & similes alios, qui superioribus annis leuitate quidem pæne pari, sed animo fortassis candidiore, nonnulla de Abasinis prodidere priscis fabulis similia, quantum instituti nostri postulabit ratio, apologetico magis quam historico more (sic enim opus est) falsitatis, ubi oportebit, damnabimus. Quæ tamen fidei nostræ non nocebunt, ea nos etsi futilia erunt, ac vana, & forsitan etiam noxia, non multum curabimus. Aliorum ea cura esto. Parcam nomini ob reuerentiam Ordinis: quamquam non credo, quæ sunt à quibusdam priuatis hominibus perperam acta, aut dicta, ea in ordinis totius ignominiam redundare, aut eius no-

mini & dignitati quidquam obesse; cùm nemo nesciat, haud vllam esse tam sanctam in terris societatem, quæ ab hisce aduersis rerum euentibus immunis sit. Et verò si scriptoris huius nomen proderem, illud me ab omni religione explueret, quòd nec primus id facerem, nec primus demonstrarem, qua fide scripserit. Satis id ante me vulgatum ab aliis: ex quibus vnus est Fernandus Guetterius, vir probitatis & modestiæ singularis; cùmque rebus aliis valde præstans, tum in hisce barbararum gentium recentioribus historiis multorum cum fructu diligentissimè versatus. Is cùm de huius auctoris libro esset admonitus, vidissetque in eo quàm indignè & iniuriosè Pontificum, & Regum, & aliorum excellentium hominum auctoritas tractaretur; iusto stimulatus dolore, abstinere non potuit, quin calamum arriperet, & in ipsum auctorem distringeret stilum; quæque ille fictè in lucem protulit, non leui testimoniorum & rationum pondere obrueret. Fecit, vt debuit. Mihi etiã, qui Ioannis & Andreæ Patriarcharum historias, cùm quibus Æthiopica ista coninncta sunt, scribere constitui, necessariò in eundem stringendus stilus est. Sed neque agam hostiliter, neque aliquid dicam, quod alio fine, quàm aperiendæ veritatis dictum velim. Quinetiam quammaximè opto, ne quod mihi verbum per imprudètiã excidat, vnde quisquam meritò offendi queat. Sciens certè & volens neminem, ne leuiter quidem, pungam: tantùm vbi opus & fas erit, ius meum tuebor; id verò est, vt non solum scribam vera: sed eorum quoque, quæ cum nostris pugnant, falsitatem aperiã. Cæterùm de Abassinorum religione, de Patriarchis Nonio, & Ouiedo, eorùmque sociis, ac demum de re tota, quæ circa

rem

rem Æthiopicam versatur, nihil ponam pro certo, nisi quod vel ex iuratis testibus, vel ex eorum hominum, quibus etiam iniuratis abrogare fidem nefas est, liceris & narratione mihi constiterit.

---

*In quo terrarum loco Abassia sit, & unde illi  
hoc nomen.*

## CAPUT II.

**I**Nter eas Africæ partes, quibus veteres Geographi Æthiopiæ nomen indiderunt, ea videtur esse præcipua, quæ ad Orientem Solem propius accedit, & Æthiopiam sub Ægypto iidem veteres appellauere. Dicta est à multis India, ob eam causam, quod varij olim populi ex iis plagis, quas Indus interfluit gregatim profecti, fixam ibi posuere sedem. Pars autem hæc, & in diuinis libris, & apud sacros scriptores multas sortita est appellationes, quas hic referte instituti mei non est. Quod quidam voluere, omnem Æthiopiam ad Abassiam pertinere, omnesque Æthiopes, tam Hesperios, & Eoos, quam qui inter hos medij sunt, quique priscis Geographis fuerunt ignoti, Abassinos dici, id quidem in falsis oportet numerare. Certum est, neque Madianiticam Æthiopiam, de qua loco alio locutus sum; neque Hespericam, quæ per interiorem Libyam funditur; neque illam, quæ Zanzibaris terras continet, neque eam demum, ad quam Congi, Angolæ, cæteraque Guinææ ac vicinarum prouinciarum regna pertinent; quamque intætam prisci reliquere, Abassiz nomine censer: sed illam solum, quæ sub Ægypto est, & eos dumtaxat cõ-

A 4 plecti

plectitur *Æthiopes*, qui orientales *Africæ* incolunt regiones. At neque populos omnes, qui in hac *Æthiopia* degunt, rectè *Abassinos* dici, sed eos tantum, qui illi Principi, quem nunc *Præteiannem* vulgo appellamus, iure subduntur, reperi à quibusdam scriptoribus observatum; quod num verum sit, nihil attinet in præsentia decernere. Constat, istam, de qua nunc agimus, *Æthiopiam* hisce limitibus circumscribi. Ab Oriente fretum habet *Erythræum*; cuius ferme in faucibus incipiens, indeque à gradu circiter decimo usque ad vndeagesimum versùs *Boream* porrecta, in insulam, & eiusdem nominis maritimam urbem definit, quam *Suaquenum* recentiores Geographi, *Aspidem* veteres appellarunt. Ab Occidente celsis definitur montium jugis, longissimo tractu propter *Nili* fluentia procurrentibus. Latera binis hinc inde terminantur lineis. Vna ab *Suaqueno* ad eam insulam, quæ olim *Meroe* dicta est, in arcticum polum recto tramite deducitur. Altera ab occidua *Nili* parte versùs *Austrum* exiens eò usque protenditur, donec *Auixæ* regnum, quo nullum ibi est à Septentrionibus remotius, arcuato cursu pertingit. Hinc rursus in Orientem egrediens ad *Adelum* se fundit; id *Saracenorum* regnum est, cuius caput urbs *Ara*, quæ novem ab *Æquatore* gradibus ad polum arcticum recedit; uniuersa pæne regio à quatuor, quibus clauditur, lateribus, leucas colligit prope septuaginta supra sexcentas. Quidam septingentas, & amplius; octingentas numerant alij, sed quod posui à peritioribus Geographis magis probatum. De *Abassix* vocabulo à multis quæsitum scio. Satis constat, non ita eam veteres nominasse. Sunt ex recentioribus, qui sentiant corruptum accepisse nomen  
ab

ab vrbe regia, dicta Ptolomæo Auxume, cuius ciuem fuisse ferunt Regina Candacis Eunuchum illum, in Actis Apostolicis Philippi Diaconi baptismo celebrem. Alij ab Abato, nonnulla literarum mutatione, ortam volunt Abassie vocem. Aiunt verò Abaton terræ plagam significare, auro, argento, gemmis, rebûsque aliis pretiosis abundantem, ciuium nobilitate & præstantia insignem, ædificiis illustrem, & omnium optimarum rerum copia affluentem. Talem demum eam regionem esse dicunt, quam Abassiam vocamus. Aliis placet Arabica, Turcica, & Æthiopica lingua idem Abassiam esse, ac gentem liberam, quæ nulli umquam externo Principi seruerit, nullius fuerit armis subacta, nullius tyranni sub imperium missa. Hos & proximè superiores ex imperitia linguarum, & earum rerum, quas Abassie attribuunt, falsitate facile possem refutare, si vellem: sed pretium non est. Ortum credo ab Ægyptiis nomen. Illi, ut Strabo ait, Abases vocant habitatas regiones, locis desertis & incultis circumseptas, quales istas esse, in quibus Abassia est, Strabo idem affirmat. Vero igitur similis, hanc nominis huius esse originem, sicut non paucis placet. Quando verò apud ipsam gentem usurpari cœperit, ignoro; nec vllum auctorem reperi, qui hac de re probabile quidpiam scriptum reliquerit.

---

*Quàm latè patere dicatur Abassini Principis Imperium.*

C A P V T III.

**N**Ouus auctor, cuius illæ duæ sunt, quas nuper recensui, de Abassie nomine sententiæ, inter

A 5 extre

extremas mediæ, prodigiosa tradit de Abassini Imperatoris potentia. Rarè enim scètur communia, qui sponte discedit à recto. Ait ergo omnium Africano-  
rum Regum esse primum; nulli Asiatico secundum;  
regnum multitudinem superare Regem Persarum;  
opibus & copiis Regem Sinarum; magno esse æqua-  
lem Chamo; latius, quàm Moscovitam dominari;  
Imperatore Turcarum esse maiorem, eumque habere  
beneficiarium: denique quotquot per orbem vni-  
uersum maximi & potentissimi Principes sunt (vnum  
dumtaxat auctor excipit) imperio, diuitiis, omni ge-  
nere copiarum cedere Abassino. Quamquam verò  
huius Imperatoris potentia iam olim summa fuit,  
esse tamen his temporibus multo maximam; eo quòd  
Alexander I I I. sic Imperatorem quemdam no-  
minat, quem anno dicit obiisse millesimo sexcentesi-  
mo sexto, & qui nunc regnat Zeras Chaureatus, præ-  
ter eam regnum multitudinem, quam à maioribus  
acceperunt, Rege Adeliacie victo, multa alia sibi re-  
gna subiecerint. Ergo Imperatorem Abassinum,  
præter ipsam Æthiopiam, cuius tantam ait esse lon-  
gitudinem, ac tantam ferme latitudinem, quanta est  
Europæ totius, vastos insuper per oram maritimam  
possidere tractus terrarum. Per eam enim partem, qua  
Bonæ-spei promontorium in mare procurrat, à flumi-  
ne Spiritus sancti, quod à Lunæ montibus exiens  
tendit in meridiem, usque ad Aromata (cui promon-  
torio Guardafu hodie nomen est) leucis extendi plus-  
quam octingentis. Extra fauces Erythræas ad par-  
tem occiduam, ubi est Babelmandel (ita locum ap-  
pellant) ab vrbe Zeila, Aualite olim dicta, usque ad  
Aromata, leucas habere centum viginti. Tandem ad  
Oceanum Meridianum ab ortu in occasum, leucas  
colligere



colligere octoginta. Plurima item per illas Africæ regiones habere regna, quæ pulsis Saracenis habitatoribus vi & armis occuparit. In his Doaram esse, quo in regno leucæ numerantur longitudinis nonaginta, quinquaginta latitudinis: esse Magadoxum longum leucis plusquam ducentis, quâ triginta, quâ quinquaginta latum: esse Gorgam, cuius in longitudine plus octoginta leucæ sunt, in latitudine viginti: esse Sibar longum leucas sex & quinquaginta, latum viginti esse Turutum centum triginta, & aliquot amplius leucas in longitudinem continens, quoad latitudinem aliis regnis par. Adhæc, plurimos esse reges potentissimos idolorum addictos superstitionibus, qui tributa Abassino pendant; partim, quod ab eo armis domiti, sub eius venerint ditionem; partim quod ad res suas tuendas magnum sibi esse videant in huius Monarchæ amicitia & societate præsidium: neminem enim ausurum bello laceßere, cui Æthiopicus fauceat Imperator. Inter eos verò reges, qui eiusdem Abassini amicitiam donis ac tributis ambiunt, numerari Beafaranum, Medranum, Baramensensem, Ialofum, Sofalensem, Barbisinum, Sapensem, & præter complures alios, illum Monamotapæ clarissimum æquè, ac potentissimum Imperatorem, cuius ditioni præter vastissimas illas regiones, quæ ad Bonæ spei promontorium, qua ex parte se Lunæ montes in sublime erigunt, longè latèque diffunduntur, innumeræ parent aliæ, leucas pæne octingentas immenso intervallo per oram maritimam complexæ. Denique reges illos, quibus diuisa est insula Madagascar, S. Laurentij vulgo dicta, cui nulla vniuerso in mari videtur esse magnitudine æqualis, vt sibi tanti principis beneuolentiam concilient, eiusque fauore ab hostium armis

armis securi sint, illius se imperio sponte submittere, & tributa soluere. Hæc auctor ille, & alia multo plura, quæ referre piget. Vix autem dici potest, quantum omnia abhorreant à vero. In geographicis descriptionibus, in situ terrarum, in iplis regionum nominibus, tota denique in re apertissimi sunt errores, quos facio missos, quod à quouis, vel mediocriter harum rerum perito, facillimè deprehendi possunt; & mihi abs re esse videtur, in hisce refutandis operam perdere. Qualis quidem Abassini Imperatoris hac tempestate potentia sit, quando auctor iste tantam esse dicit, quanta antea numquam fuit, inde colligatur, quod eò deuenierit, ut non ab externis tantum, sed nec à suis etiam tutari se ac sua queat. Anni enim aguntur amplius quinquaginta, cum & aduersus vicinos Saracenos, ac Turcas, & aduersus Galos ( gens Nigritarum est ipsi iure subiecta ) imperium detrectantes, & in prouincias vi & armis irruentes, ab Lusitano Règè implorat auxilium, sine quo certum est extremum adesse Imperio periculum. Sed hac de re plura dicentur postea, ubi patebit in eas esse angustias redactum, ut parum ablit, quin prouinciis omnibus spoliatur; cum iam ex iis, quas prius habebat, non paucas amiserit.

---

*Quinam Abassini Imperij fines.*

C A P V T I V.

**Q**Uæ hîc proponam, ea nobis tradidit Ioannes Gabriel. Vnus hic est de primariis Lusitanis, qui in Abassia versantur, quique iam illic Lusitanorum legioni

legionibus cum summo imperio præfuit, expertus bello vir, fidèque, auctoritate, & consilio domi, ac militiæ clarus, nec morum tantum vitæque exemplo spectabilis, ac religiosè pius, sed multarum etiam peritus linguarum; & iis in rebus, quæ sinceræ fidei sunt, tantum eruditus, quantum est satis, ut cum doctissimis Abassæ monachis, in quibus rerum diuinarum putatur esse scientia, cum certa victoriæ spe de religione congregiatur. Dignus tandem homo, cuius hic laudes hoc elogio commendemus, quod & transferendis à Lusitano idiomate in Abassinum libris, fidei morumque doctrinam continentibus, assiduam valdeque vtilem Romanæ Ecclesiæ operam nauat; & eiusdem Ecclesiæ auctoritatem apud illas Æthiopum gentes omni ope tuetur; & matrem habet singulari vitæ sanctimonia insignem, quæ iam semel pro Romana fide publicè palamque prædicata, ac defensa, leonibus fuit obiecta; quamquam ab iis diuino munere intacta è cauea exiit, & vegetior corpore, & veritatis studio inflammator. Tradidit hic Gabriel, Abassinum Imperium sex & viginti regna, quatuordecim distributa regionibus, antiquo iure completti: ea verò vna includi linea, quæ ab Septentrione versus Austrum, per vicina Rubri maris littora ad Oceanum ducitur; indeque modico in Occasum flexu, loca pertingit regno Melindi præxima; ex quibus ab Austro rursus in Septentrionem flectens ad Cairum, quam Memphim olim fuisse nonnulli volunt, terminatur. Octo priora regna ab iniula Suaqueno alia post alia excurrunt, versus Solis occasum. Primum ex his quidam Tigrain, alij Tigrim appellant; longè latèque patet, & tractus continet iustæ magnitudinis septendecim, quorum cuique suus est præfectus, à quo

quo in bello æquè & in pace publicæ res administrantur. In hoc regno loca maritima tenent Turcæ; proximam continentem Saraceni; interiora Ethnici promiscuè, & Christiani. Miserè viuunt ob inopiam rerum. Nigro colore sunt & deformes. Nulla his in tota hac Æthiopia gens viuendi ratione & moribus peior. Tigrim excipit Dancali, sic aliud regnum vocant, quod ab ortu Solis, Rubri maris fluctibus aluitur; & inde tractu terræ perbreui, & infœcundo, versùs Occidentem extenditur. Incolæ Mauri genere, secta Mahumetani sunt, Abassino Imperatori vectigales. Sequitur Angote; aliud regnum est quod ab Eoa plaga Tigrim contingit, à mari remotius. Quartum regnum Boa dicitur; quintum Amara; sextum Leca. Ista quatuor solos Christianos habent incolas. Septimum peramplum est, septemdecim continens tractus, in quibus habitant partim Christiani, partim Ethnici, Abagamedri vocant. Sequitur deinde Dambea, duos tantùm habens tractus; & permixtos cum Ethnicis Christianos. Ab altero Dancalis latere versùs Erythræas fauces, secundùm maritimam oram, procurrit Aucaguerle, quod Oari fluuio irrigatur. Mauri habitant Abassino Imperatori re nulla subditi. Adelum sequitur gradibus ab Æquatore ad arcticum polum distans duodecim; vrbs in eo nunc Zeila, quondam, vt dixi, Aualites, mercatorum frequentia, in hoc etiam orbe, clara. Totum regnum Mauris incolitur, Abassino Principi infestissimis. Ex eo ille prodiit Gragna Mahumetanus Rex, qui cùm iam ferè totam hanc Æthiopiam armis subegisset, ab Lusitanis postea multis victus præliis, & ad extremum captus, præscisso ab ceruicibus capite, meritas nequitie suæ pœnas persoluit. Post hoc est Dahali, quod

quod regnum versùs Mombazam ad Æquátorem tendit. Incolæ partim Christiani, partim Saraceni, Abassino pendunt stipendia. Inde sequitur Oecie, quod intorsum vergit, & Abassino subiicitur, Mahumetanis parker, & Ethnicis habitatum. Sequuntur deinde Arium, Fatagar, Zingerum. Hoc Ethnorum est, duo priora Christianorum. Decimum sextum vocant Rozanagum; Christiani habitant, Abassini imperio neutiquam subiecti. Hinc alia rursus in Septentrionem ab Austro funduntur regna. Roxa decimum septimum est, quod colunt Ethnici. Goma vocatur, quod huic propinquum, Ethnicos, & Christianos Imperatori obedientes mixtim habens. Ad eam partem, qua Monomotapa est, Nerea vergit, regnum per amplum; incolæ, & Christiani, & Ethnici. Sequitur Zethe, cultum ab Ethnicis, Imperatori subiectis. Dein iacent Conche, Mahaola, Goroma. Duo illa haud grandia sunt, & solos habent Ethnicos. Tertium latissimè patet, Christianorumque, & Ethnorum viginti tractus continet. Magna ex parte circumcingitur Nilo, & pæne in eo insula est. Vix umquam vacat bello, variis hinc inde hostibus, aduersa signa circumferentibus: victus copia sic abundat, ut plures simul alere possit exercitus. Agri fertilitas causa est, cum bellis gerendis expetatur; cum Æthiopes isti alia in exercitu cibaria ferre non soleant, quàm quæ quisque sibi parauit; quibus consumptis in ea vertuntur, quæ rapere aliunde possunt. Quâ verò transeunt, locustarum more, demerunt omnia. Soli tamen tanta est fecunditas, ut simul atque collectæ fruges, mox dentur terræ semina. Præeunt messores, eos à tergo seminatores insequuntur: alia terræ cultura opus non est. Ex altera Nili parte

parte, Ægyptum versùs, tria vltima iacent regna, Damote, Sua, Fasculum. Sua patrio idiomate Imperij cor dicitur, ob id, quòd prioribus annis præcipua eius fuerit sedes. Fasculum ad Cairum urbem terminatur; Mahumetanos habet ex genere Maurorum. In hoc regno ea via est, qua singulis annis Quadragesimæ tempore vis magna peregrinorum religionis causa ex Dambeæ regno Hierosolymam agminatim proficiscitur. Prouinciæ huiusmodi traduntur hac tempestate nomina. Prima Dubane dicitur, in regno Tigris est, Ethnicis Castribus habitata. Secunda Xuncho, in eodem sita regno: gentem habet genere Saracenam, secta Mahumetanam. Tertia Daraita in regno Angote, quam incolunt Christiani. Quarta Bora dicitur, inter Tigrim iacet, & Abagamedrim. Quinta Calaoa. Sexta Agas, in his tribus homines viuunt Christiani nomine, cætera Ethnici. Septimam appellant Arimam, regno Dahali proximam. Octauam Arbum; nonam Xancalam, Zingero conterminam. Huic finitimam Xancoram, quæ decima est. Vndecima, & duodecima Mahumetanos promiscuè habet, & Christianos; illi Suggamo huic Bergamo nomen. Decimatertia, quæ Aris dicitur, ultra Nilum iacet, Mauris culta. Decimaquarta Euara nuncupatur, simul cum Mauris Ethnicos habens. Ex numeratis regnis præter Tigrim, Abagamedrim, Dambeam Goromam, vix aliud est, quod nunc Abassino principi obediat. Fatetur Æthiopes tertiam omnium partem Lusitano Regi iure deberi, quod ita inter ipsos, & Christophorum Gamam Lusitanorum duces conuenerit, quando is loca illa cum exercitu adiens, aduersus perfidas Mahumetanorum gentes cum iisdem Abassinis vires coniunxit, vt scæda superstitio

perstitutione, superbâque tyrannide communibus armis Æthiopiam liberarent. Cæterum nisi vi & armis Mahumetani pellantur, haudquaquam promptum est aliis artibus aut litibus occupatæ terræ possessionem quærere. Addam hîc quæ de amnibus & lacubus idem Gábrîel narravit. Quatuor esse dixit potissima flumina, quæ hanc Æthiopiam interluunt, totidem diuersis locis interfacere eximie magnitudinis lacus. Amnis primus, cui Tanceæ nomen, ab Austro tendens in Septentrionem, multis ante oram maritimam milliaribus arenosa absorbetur terra, occultisque subterlabitur meatibus. Vicinos habet montes mirandæ altitudinis, aditu pæne impetuosos, loco munitissimos, in quibus Abassini habitant genere Iudæi, qui veteres etiamnum Mosaicæ legis cæremonias seruant: tanta sunt ferocitate, vt reliquis populis terrorem incutiant. Secundum flumen vocant Oaram: aquarum copia Nilum superat, & Zeilanum in pelagus se exonerat. Non iniucundos habet ad potum liquores: sed Abassini Christiani ob eam causam ab eis abstinent, quod Mahumetanorum irrigans terras, alimenta ipsis ad vitam suppeditet. Inanis superstitio. Tertius amnis Gabea dictus versùs Mombazam influit in mare. Quartus Nilus est, de quo cum à multis plurima dicantur, hîc ego dicam nihil. Lacus primus cæteris magnitudinè cedit, in regno Angôte est, Aicha dicitur: Vocatur secundus Dambeabaliar, quod nomen sonat Dambeæ mare, non procul distat à Gubbai, vbi nunc Imperatoris aula, si quando ex castris ad urbem se recipit, sexaginta circiter longus est milliaria, latus quinque prope, & viginti: vno ex latere Nilum findit: multa gignit piscium genera, multos item hippopotamos, à

B quibus

quibus nonnullum est nauigantibus periculum. Cum proximis annis duo ex Societate religiosi ab Imperatore vocati scirpea rate lacum istum traicerent, tanta in eos irruit huiusmodi bestiarum multitudo, ut essent pæne desperati, nisi affuisset vis diuina, periclitantium precibus conciliata. Non paucæ, sed exiguæ in hoc lacu insulæ sunt, ad quas ablegantur coniuratores, nisi mulctentur morte. Lacus tertius in regno Oecie, est ad Adelum, & Morabazam spectans, Zella dicitur. Quartus Xacala non procul distans à tertio, tanta utrique longitudo est, quanta die vno percurri potest. Antonius Fernandus Societatis Iesu Sacerdos, ex quo deinceps non pauca referam, in Epistola quadam de Æthiopis rebus anno 1620, sub initium Iunij ex Abassia Romam missa, Abassinorum Imperio plusquam quadraginta attribuit prouincias. Sed nihil à Gabriele differt; huius enim tractus multo longius, quàm Antonij prouinciæ diffunduntur.

---

*Vnde Abassino Imperatori Preteiannis, seu Presbyteri Ioannis nomen.*

## C A P V T V.

**Q**UOD Abassino Monarchæ regna multa, ut dixi, iure subiecta essent, Imperatoris obtinuit appellationem; patria enim lingua Acegus dicitur, quod Imperatorem sonat; quamquam & à nostris Rex, & à suis quoque Nigus, quod regem significat, sæpissime nuncupatur. Dicendum nobis hoc loco est, cur à quibusdam Pretiosus Ioannes, ab aliis Preteiannes, seu Presbyter Ioannes communiter appelletur. Quod alij



alij Petrum Ioannem dixerunt, nimis abs re est; Pre-  
 teiannem verò pro Presbytero Ioanne nominari duab-  
 us dictionibus, facilioris pronuntiationis causa, in  
 vnam coeuntibus, haud est ambiguum: vt autem  
 Pretiosum Ioannem auctores quidam appellarent,  
 causam Abassini dèdere. Hi enim cum primum in  
 Europam venissent, & Imperatorem suum Presbyte-  
 rum Ioannem vulgo apud nos vocari agnoscerent,  
 speciosum titulum, quamuis errore, vt dicam, attri-  
 butum, retinere cupientes, multa & varia ex propria  
 lingua quæsierunt vocabula, vnde illam Presbyteri  
 Ioannis appellationem assererent deriuatam. Qui-  
 dam ergo finxere Belulgian, alij Beldigian, voces alij  
 alias, ex quibus Presbyteri Ioannis nomen irrepisse  
 affirmarunt. Ex iis, qui primi Belulgiani vocem in  
 hæc loca induxere, vnus fuit Zagazabus ille, de quo  
 suprâ narraui, Æthiopici Imperatoris ad Ioannem  
 III. Lusitaniz regem legatus. Alter eodem tem-  
 pore Petrus quidam Abassinus, qui Franciscum Al-  
 tiarum Lusitanum Sacerdotem, ad Clementem VII.  
 ab eodem Imperatore missum, in Italiam est co-  
 mitatus. Prior ille Damianum Goëz, vt dixi, hic  
 posterior Paulum Iouium, vterque forsitan sine dolo;  
 in errorem induxit, dum à nobis pro Belulgian Pres-  
 byterum Ioannem dici affirmabant. Sed & vocem  
 hanc Belulgian aiebant ex duabus esse dictionibus  
 compositam; quarum prima, quæ est Belul, pretio-  
 sum, altera Ioannem significet; ac si nomine ipso vel-  
 lent indicare, nihil in orbe esse Abassinorum Impera-  
 tore pretiosius. Quod nouus auctor scribit, Zaga-  
 zabum non Belulgian voce duplici, sed vna tantum  
 Beldigian dixisse, Damianum verò, quia Lusitanus  
 erat, non percepisse Æthiopicam pronuntiationem,

nugæ sunt, cum cæteris reponendæ. Addit verò Beldigian dignitatis esse nomen, pretiosum dominum, siue inestimabilis pretij gemmam denotans; addè antiquum, ut celeberrimæ illius Sabæ Reginæ ætatem superet; in Amara enim, nobilissimo Æthiopiz monte, vetustissima reperiri monumenta literarum, in quibus Abassini Imperatores ante eius Reginæ ortum hoc iam titulo insigniri essent soliti. Hæc & quædam paria, quæ hæc de se scribit nouus auctor, missa facio. Et id volo pro comperto haberi, Presbyteri Ioannis nomen, neque à Belulgian, neque à Beldigian, neque, ut alij voluerunt, à Naudgian, vel à simili alia Æthiopica voce esse deriuatum: sed Abassino Imperatori cum primum à Lusitanis cœpit, agnoscitur errore fuisse tributum. Nemo est, qui ambigat, sicut olim Egyptiorum reges primum Pharaones, deinde Ptolemæi, Mauritiorum Seriphij, Persarum Xerxes quondam & Artaxerxes, nunc Sophi dicuntur, ita Presbyteri Ioannis nomē regiam quorundam Christianorum Principum à longo iam tempore denotare dignitatem; hos verò non apud Æthiopes, aut in vlla alia Africæ parte, sed in Asia imperasse, peritiores conueniunt. Quo tamen loco Imperium habuerit, non est omnino compertum. Nam quod quidam scripsere, eos fuisse reges Cathai, magis dubiam rem facit; cum hisce proximis annis cognitum sit, quidquid Cathaium est, ad Sinas pertinere; nec urbem esse vllam, aut regnum hac dictum voce, quod nunc extra Sinarum terminos reperiat; sic enim à Matthæo Ritio Maceratensi, Societatis Iesu religioso apud Sinas Præposito, geographica demonstratione prius inuentum, & postea à Benedicto Goëz eiusdem Societatis homine ex Goa profecto, Cathaiumque terre-

stri

stri itinere ex industria inuestigante, satis exploratum. Non crederem ego procul diffitum à vero, præter illam terræ partem, quæ Cathai nomine intra Sinarum limites à nostris reperta est, aliam esse orbis plagam multo ampliorem per Asiaticos Scythas, & Massagetas, vicinósque circum effusam populos, Sinarumque finibus à meridie & occasu coterminam, cui & Cathai, siue Chethai nomen fuerit, & in qua is, de quo nunc agimus, Presbyter Ioannès maiorum nostrorum ætate principatum tenuerit. Nolo hic proponere omnia, quæ de re præsentī apud varios auctores reperi. Duo dicam, quæ non videntur ab instituto aliena. Primum est, quid de vero Presbytero Ioanne opiner probabilius. Alterum, quæ Lusitanis fuerit errandi occasio, cum nomen istud Abassino Imperatori tribuere. Vt à primò ordiar, Magnus Indiarum Presbyter Ioannès (sic enim antiquiores historici ipsum vocant) Christianus erat, eorum de numero quos veneno suo Nestorius infecerat. In illis imperabat regionibus, quas ea continet Scythia, quam extra montem Imaum Ptolemæus constituit, à qua fortè nihil illæ provinciæ differunt, quas Paulus Venetus Teuduchum, Abrahamus Ortelius Argum, Ayton Armenius Tarsē, vocabulis aliis appellarunt alij. Ferunt tam longè latèque fuisse dominatum, ut duos & septuaginta reges, partim Christianos, partim Ethnicos suæ subditos habuerit ditioni. Præterea in honorem Ionæ Vatis, dictum apud suos Ionanam: id autem fuisse omnium, qui Imperium illud tenebant, commune nomen, ut de Ægyptio Pharaone, de Mauritano Scythio, de Sophi Persico dictum est. In his tamen occiduis Ecclesiæ Latinæ partibus Ioannem solitum appellari, addito presbyteri



teri vocabulo; non quod is Sacerdos esset, sed quia Archiepiscopi primatis more, quando pacificis rebus prodibat in publicum, vnum habebat in comitatu, qui erectam crucem præferret. Ad bellum verò proficiscentem duo præbant cruciferi, ex quibus auream vnus, alter ex pretiosissimis constantem gemmis gestabat crucem. Nec deerat cæremoniæ significatio. Ipso Crucis signo Christianæ se religionis defensorem Preteiannes prædicabat; ex aurea verò, gemmeaque salutaris signi materia volebat intelligi, quantum aurum gemmæque metallis ac lapidibus antestant cæteris, tantum se aliis totius orbis principibus excellere. Multos hoc Imperium annos floruit, donec ad Dauidem quemdam ventum, qui à quodam suo Duce, Cinge dicto, victus prælio, & Imperij gloria, & Presbyteri Ioannis nomini finem imposuit. Victor enim Cinges anno salutis centesimo octogesimo septimo supra millesimum, Imperator ab exercitu creatus, & à Scythis receptus; pro Presbytero Ioanne Vlarcanus cœpit nūcupari. Inde quoque terum Christianatum ingens strages consecuta. Sensim enim præualere contra Christianos Ethnici; diminui religio; gentilica sacra & inanum Deorum cultus inferri. Vnus tunc superfuit ex tanta calamitate Rex, qui Nestorianas collegit reliquias; nec ipse tamen dum vixit, nec deinde alij contra prævalentes Tartarorum vires, caput amplius erigere potuere. Et sunt hoc tempore per ea loca sub grauissimo barbarorum iugo plures huiusmodi Christianorum diuersæ turmæ, quibus inconsutilem Christi discidisse tunicam, haud impunè est; eadèmq; illi sors miserrima, quæ Græciæ pari piaculo contaminatæ. Non ignoro aliquos ab his dissentire, quæ de Presbytero Ioanne

Ioanne dixi, sed ista mihi visa sunt vero magis similia; possemque rei propositæ non contemnendas in medium coniecturas afferre, si mea interesset, assensum à legentibus extorquere. Quo tamen errore Presbyteri Ioannis nomen Abassino Imperatori datum sit, iam apertum facio. Eo tempore quo novas terrarum plagas maritimo cursu Lusitani inquirebant, magna per Europam celebritate ferebatur Presbyteri Ioannis nomen. Dicebatur enim esse Imperator potentissimus, multorum regnorum dominus, religione Christianus; quo tamen esset orbis loco, erat incognitum. Ergo cum Petrus Couillanius, quem Ioannes secundus Lusitaniæ Rex ad eum Principem per mediterraneum primum mare, terrestri deinde itinere inuestigandum miserat in Asiatica India, ad quam deuenerat, audisset, in ea Æthiopia, quæ sub Ægypto est, principem quemdam esse longè maximum, qui Christianam profiteretur religionem, ad ipsum se contulit. Cumque multa apud illum reperisset, quæ de vero Presbytero Ioanne, constanti fama apud Europæos percrebuerant, credidit illum ipsum esse, qui Presbyter Ioannes dicebatur. Hic igitur primus fuit qui Abassinum Imperatorem eo cœpit nomine appellare. Eum deinde cæteri imitati, qui consequentibus annis Æthiopiam sunt ingressi, eundem errorem facile in Europam inuexere. Licebit nobis nunc quoties libitum erit, idem iam communi vsu detritum vsurpare vocabulum, cum de Abassino loquemur.

*Quanta olim fuerit, quanta hodie sit Pre-  
teiannis potentia..*

# CAPVT VI.

**M**agnam huius Principis olim fuisse potentiam, nemo de rebus Æthiopicis scripsit, qui non id memoriæ prodiderit. Nec derogabit fidem, qui tot ipsum per Æthiopiam regna, tot prouincias, quot supra retuli, sub imperio suo habuisse animaduertet. Constare tamen debet, quod iam dixi, multo maximam tantæ huius potentiae partem iisse pessum, & in dies singulos Abassinum Imperium magis magisque præcipitare; vt meritò timeri possit, ne paucos post annos miserabili percussum ruina penitus dilabatur. Orant enim maritimam sæuo premunt imperio Saraceni, qui magna ex parte Turcarum Tyranno vel beneficiario iure tributa pendunt, vel subiectionis subdantur lege. Per continentem terram plurimi partim Eclinici, partim Mahumerani sunt, qui ab eiusdem fide & obedientia, vt dictum est, recedentes, vel Turcarum Monarcham, vel nullum superiorem agnoscunt, suoque iure viuunt, & arbitrio. Vt igitur Abassinus Imperator plurimum olim valuerit, nunc sic eius copiae sunt accisae, sic opes fractae, & vires debilitatae, vt imperatorium nomen vix sustineat, & contra vicinos hostes subditosque per totum Imperium in ipsius caput conspirantes ab externis principibus, vt iam dixi, auxilium cogatur implorare. Cum florentes erant res, ad ostentandam maiestatem, non secus ac si diuinum quoddam esset Numen, ab omni  
se

se hominum reliquorum consortio, ut ferunt, separabat; nec ab ullo nisi difficile, multisque interpositis cæremoniis videri sinebat. Mahon etiam Tigrius, & Barnagassus, non spernendi reges, vix poterant eius alloquendi obtinere facultatem. Cùmque ipsius in conspectum dabant sese, ea erant externa corporis submissione, ut mancipia credi possent, principes non possent. Vbi quis de toto Imperio, quacumque esset dignitate & magnitudine præditus; aliquem ad se Imperatoris nuntium venire audiebat, illic à superiori corporis parte detractis vestibibus exibat domo, atque ad prima nuntij verba inclinato deorsum capite, terram manu tangebatur. Regum quoque legati ipsum adire erant prohibiti. Per imperatorios ministros tractabant negotia, iamque discessuri venerationis ergò ad pedis osculum accedebant; at ne tunc quidem digni habiti, qui Preteiannis faciem intuerentur, quam ille cyaneo habebat amictam velo, quoties in publicum prodibat. Ter se tantum in anno dabat populo conspiciendum, velo detractò; semel in ipsis Christi natalitiis; iterum eo die quo se idem Christus Magis præbuit adorandum; tertio cum assumptæ Virginis Deiparæ festus dies agebatur; cibum sumebat aureo in monopodio, nulla tecto mappa. Ferant inter edendum ex veteri consuetudine fuisse solitum ante oculos habere vitreum vas cinere plenum, cuius aspectus diem extremum obiiceret comedenti; ut ea tectus memoria rectam inter epulas teneret rationis semitam. Similia legimus fecisse alios viros principes, ne aut tumerent inter honores, aut inter voluptates diffuerent. De apparatu, de magnificentia, de multitudine ministrorum, deque aliis ad hoc munus spectantibus, maiora à scriptoribus dicuntur,

quàm credam. Ea si vera sunt, licebit in hoc imperio, ut in multis alijs, rerum humanarum considerare inconstantiam, quàmque nihil inter mortales sit, quod magno in pretio haberi debeat. Ex hac enim magnitudine, ne vestigium quidem hodie conspicias, ut is tibi solus, & suspiciendus sit, & quærendus, qui semper idem ipse est, cuiusque anni numquam deficiunt. Subiiciam hinc, quoniam locus est, quæ novus auctor de Abassini Imperatoris redditibus & thesauris comminiscitur. Plurimis ille quidem, & amplissimis verbis supra fidem rem attollit. Nobis sat erit simpliciter & summam referre, quæ scribit, & ea breuiter, sed verè refellere, ut hac etiam ex parte constet, quàm nulla sit in reliquis, quæ ad nos spectant; & maius habent momentum, dignus fide. Quanti igitur sint annui redditus, ex tributis, quæ hac etiam tempestate à subiectis regnis Imperatori solui perhibet, vult colligamus. Ait regnum Goyame (in quo asserit ex lacu Cafate Nilo esse principium) annis singulis tributi loco præter immensam auri copiam, mittere tria mularum millia, totidem millia equorum, totidem ex gossypio telas, totidem denique basutos; sic appellari vult quædam lectorum stragula, quibus utuntur nobiles, adèd pretiosa, ut nullum minus quàm undecim, multa viginti, ac triginta, non pauca etiam quadraginta & quinquaginta nummis aureis consistant. Modum præterea describit, quo allata ex regnis offeruntur Imperatori tributa, planè ridiculum. Vbi inquit is, cui hoc negotium commissum (dici tributorum præfectus potest) ad Imperatoris palatium, siue papilionem peruenit, foris consistit, & contenta voce ter clamat, *A alto, a alto, a alto*, his vocibus Dominum vocat. Mox ab interiori parte vox auditur

alia,



alia, qua bis quæritur, quisnam aduenerit. Respondet Præfectus, adesse quemdam, qui omnium sit domesticorum minimus, quippe qui frænos equis, capistra mulis imponat, aliæque eiusmodi abiecta & humilia exequatur officia. Postquam verba ista ter repetit, transire iubetur cum toto comitatu. Tum venerationis ergo submittens caput, præter imperatoriam domum hoc ordine transit. Præit ipse. Mox equi sequuntur à singulis agasonibus singuli habenis ducti. Primi triginta ephippiis exornati, reliqui nudi. Post equos modo eodem incedunt mulæ. Post mulas feruntur basuti, à singulis hominibus singuli. Post basutos telæ gossypinæ complicatæ, & quibusdam veluti capsulis inclusæ. Vnaquæque capsula recipit telas decem. Capsulas singulas singuli portant baiuli. Tum ij sequuntur, qui vectant aurum. Permulti sunt, & suam quisque in capite fert cistellam, serico tectam tapete, partim rubri, partim viridis coloris. Multa à tergo sequuntur militum millia, tributis custodiæ & securitati assignata. Atenim hæc tam immensa bestiarum hominûmque caterua decem circiter, vel duodecim consumit pertranseundo horas. Et ista quidem è regno Goyamis. Barnagassium quotannis centum & triginta pendit equos, omnium, qui possunt reperiri, optimos; qui propterea saltantes pertranseunt, & veluti congregientes. Mittit etiam plurimam valdeque pretiosam ex serico & gossypio vestem, hominum multorum portatam humeris, & militum armis custoditam. Regnum Tigrimahon sericæ vestis, quæ abundat, infinita propè mittit volumina, ducentos insuper valentissimos equos, qui sicuti illi alij, veluti congregientes pertranseunt. Ita regna cætera mittunt multa, & pretiosa, ex iis præcipue rebus

bus, quarum sunt feracia. Præter hæc in quolibet Imperij regno, in quo proprius Rex est, vnam Imperator ciuitatem habet, quæ quod erat tributum suo regi persolutura, id Imperatori persoluit; ob hoc imperatoria ciuitas dicta. At hæc non semper eadem in eodem regno, sed annis singulis ab Imperatore noua ac diuersa deligitur. Habet item regna tria, quæ ad Imperatoris pertinent patrimonium, neque vllum alium præter ipsum agnoscunt regem. Hæc sunt Sabæ, Zambra, Cafate, in quibus ingentes diuitiæ sunt, & auri argentique fodinæ quamplurimæ. Regna imperatoria quintam soluunt rerum omnium partem, cætera decimam. Exercitus, quos vel ducit Imperator, vel ad hostes debellandos aliud mittit, expensis aluntur ciuitatum. Eadem ipsæ non militibus tantum, qui versantur in bello, sed iis etiam, quibus tum Imperatoris tum montis Amaræ commissa custodia, stipendia soluunt. Cum ergo Imperator præter eos, quos facit in alenda familia sumptus, nulla in re alia de suo quidquam expendat; quidquid verò auri tam facti quàm infecti à stipendiariis populis recipit, atque immensam opum aliarum copiam separatim reponat; efficitur vt ne cogitatione quidem comprehendere quis possit, quàm immensos habeat thesauros; de quibus iam per se ex mente eiusdem noui auctoris aliquid dicendum. In monte Amara (vt ait) cœnobium est, quod à sancta Cruce nominatur. In eo Abassini Imperatoris thesauri sunt; in quibus tanta est auri & gemmarum copia; quantam nullus omnino totum per orbem princeps, siue ex iis, qui nunc sunt, siue ex iis, qui vniquam fuere, habuisse narratur. Possuntque & Babylonij, & Persæ, & Græci, & Romani Imperatores, quibus amplissimas legimus

mus fuisse diuitias. si cum vno Preteianne conferantur, pauperes æstimari. Quinetiam magnum Alexandrum, de cuius opibus incredibilia memorantur, longè hac in re à Preteianne vinci, facile deprehendet, qui rem attentius considerabit. Isti enim Abassini thesauri, vt latè per Æthiopiam traditur, à vetere illa Regina Sabæ (tria iam sunt annorum millia, & amplius) initium accepere. Cùm igitur ab eo tempore immensæ quotannis illum in locum inferantur diuitiæ, quas quinquaginta nouem regna copiosè fundunt; nec inde quidquam, cùm opus non sit, vquam auferatur: quantum diuitiarum necesse est in eos thesauros esse congestum? Denique vbi nouus auctor admodum multa & valde mirabilia hæc de re profert, cui etiam videtur diuinæ fidei, auctoritatem, adducto quodam è sacris libris testimonio, velle conciliare; ad extremum ex sententia quorundam, vt ait, Venetorum, ac Lusitanorum, qui quatuor amplissimas domos videre auro refertas, summam colligens, affirmat, tantum illic auri esse, vt vnaquæque domus, vsurpata nunc voce vtat, plusquam trecentos contineat millones. Hæc de auro. Quod attinet ad gemmas, ait idem auctor, prope illa auri receptacula, aliã esse domum longè amplissimam ingentibus refertam capsis, partim ex cedro, partim ex ebena fabricatis, egregiè politis, & firmiter obseratis; vnamquamque gemmarum esse plenam; rem verò ita dispositam, vt gemmæ omnes, quæ eiusdem generis sunt, iisdem separatim capsis contineantur. Cùm autem domus sit eximiè capax, & arcæ plurimæ, apertissimum esse, gemmarum varietatem esse maximam, numerum propè infinitum. Ad primum statim domus ingressum reperiiri ait Smaragdos, nonnullis capsis inclu-

fos,

fos, eosque omnes pretiosissimos, quales solet Æthiopia gignere. Alias deinde capsas esse plenas adamantibus, humanam taxationem pretio, opinionem magnitudine superantibus. Deceptos Plinium, ac Solinum, qui negarint, vllum esse nuce auellana maiorem: in illis namque Preteianis thesauris plurimos reperiri, qui digitum vincant longitudine, volam manus latitudine. Varium in iis colorem cerni; sic omnes candicare, ut in aureum quidam, in cæruleum alij, in pallidum nonnulli exeant nitorem; atque his postremis multo maximam auctoritatem esse. Alias præterea reperiri arcas plenas pyropis, quorum in nigro flumine magna est copia, & laus potissima: tantam in quibusdam magnitudinem, ut pollicis æquentur. Ingeniti in numero esse Iaspidas ærizusas ex lacteo in cæruleum tendentes; sapphiros ex rubro nigricantes; fulgentes auro Topasios; Balaxas rosis purpureis similes; tubentes igne Hyacinthos. Quasdam esse capsas plenas Chrysolitis, quibus in Æthiopia minor est inter gemmas auctoritas; alias quoque pretiosis aliis refertas lapillis, quorum ex numero ingens Achatum copia, & genus multiplex, colore distinctum; in quibusdam cum nigrore maculas esse albicantes; interlitum in aliis auro ruborem; in multis notas versicolores, & diuersis variegatum maculis splendorem. Plurimas item capsas Margaritis esse refertas; earum quasdam in Oceano Indico, alias in Nigro flumine, in Persico alias ortas mari; atque has postremas firmitate, colore, nitore cæteris præstare. Non eandem omnibus figuram; esse quasdam æqualiter rotundas, alias ouatas, alias teretes, alias planas, alias retortas; tante nonnullas magnitudinis, ut periti gemmarum compositores asseruerint, haud esse minores duabus

duabus illis, quas fama celebrat apud Cleopatram fuisse; centies sextertium æstimatas. Addit in eadem domo esse saxosæ cuiusdam rupis partem, pæne tripalmarem, in Nigro amne repertam, in qua mille gemmarum differentia à natura sint insertæ. Apparere in ea Adamantas plusquam centum & sexaginta, quorum alij sint volæ pares, alij duos ac tres lati digitos; nullus auellana nuce minor; primæ omnes auctoritatis. Apparere plus quàm trecentos Smaragdos, maiores quosdam, alios minores: plusquam quinquaginta carbunculos, omnium, qui possunt usquâ reperiri, maximos; apparere Sapphiros, Iaspides, Balaxas, Amyethystos, Topasios, Hyacinthos, Chrysolitos, & bonam partem aliarum gemmarum, quarum adhuc ignorantur nomina, quæ etsi magnæ non sunt, pulchritudine tamen nullis cedunt. Addit item Imperatorem Dauidem habuisse in animo hoc admirabile, ut ita dicam, gemmarum textum, naturæ manibus in vno lapide fabricatum, Apostolicæ sedi dono mittere, cum Paulus III. dare illi in matrimonium Victoriæ Farnesiæ cogitabat: verum sicut ob ipsius Pontificis mortem initium matrimonium non est, ita neque donum missum. Hæc omnia scribit de Abassini Imperatoris opibus nouus auctor, & multa alia planè admiranda, tam promptè, tam constanter, & confidenter, ac si nihil esse veriùs queat. Ea tamen, & quædam alia, quæ de gemmarum compositoribus à magno Hetruriæ duce Francisco Mediceo, in Æthiopiam missis, adiungit, ita perspicuè falsa sunt, ut superuacanea sit omnis refutatio. Quis enim tam hebeti erit iudicio, ut talia legens, non statim videat fabulas narrari? Illud tantum hoc loco dicam, quod verissimū est, & à Michaelè Castagnoso memoriz

memoriae proditum; quo tempore nonnullas imperij sui terras à rege Zeilæ occupatas Lusitanorum militum armis Preteiannes recuperavit, adeò thesauros nullos habuisse, ut cum eorundem militum quosdam, quibus erat in Indiam redeundum, remunerare cuperet, aliquot ipsis gemmas à matre, & ab aliis ad eam rem acceptas, veluti mercedis loco obtulerit, modestè inopiam excusans. At illi, inter quos Castagnosus erat, gratum regiae voluntati animum exhibentes, dona recipere recusarunt. Quas vèdò in miseras, quantàmque in egestatem, ut res humanae sunt, hac tempestate Abassinus princeps deiectus sit, ex litteris eorum, qui in Abassia sunt, postea cognoscetur.

---

*Vnde Abassinorum Imperatorum feratur  
ductum genus.*

## C A P U T. VII.

**Q**Uia generali orbis inundatione Æthiopiam per longa secula imperio tenuerint, quibusque appellati nominibus sint, auctores nonnulli scripserunt nec sunt veriti, quæ sub tantæ vetustatis latent tenebris, pro comperto tradere; adeò nihil est quod humana inquisitio inausum relinquat, aut intentatum. Non autem ego tam altè inuestigare harum rerum exordia; neque à Chuso incipiam Chami filio, quem ferunt aui, (ui Noëmi iussu in Æthiopiam profectum, illius iecisse fundamenta Imperij, quod Abassinorum postea fuit. Illud quoque omitto libens, quod est à Iosepho Hebræo traditum, & ab aliis acceptum,

Mosem

Mosē Israēlitici olim ductorem populi, dum adhuc in Ægypto sub Termutis filiæ Pharaonis tutela viueret, superatis bello Æthiopibus, cum eorum regis filia matrimonium simulatè contraxisse, pèrque annos aliquot in Æthiopia regnasse. Opinor longè hoc à veritate abesse, quemadmodum eiusdem generis per multa, quæ hisce de rebus quidam, vel ad libidinem finxere, vel ab aliis ficta minus cautè approbarunt, & literarum monumentis dederunt. Vetustiora relinquo. Proponam aliquid, quod etsi ipsum quoque satis vetustum est, vt tamen ab illa antiquitate magis remotum, ita forsitan videri poterit magis propinquum vero. Constans est Abassinorum non magis sententia, quàm gloriosa quædam prædicatio, Imperatores suos ab Salomone Iudæorum rege genus ducere. Res ab iis accepta hunc in modum narratur. Insula in Nilo est, nunc aliqui vocant Elsamam, aliter alij. Iosephus ille, de quo supra, nec pauci alij scribunt, eam à tempore Cambisis Persarum regis, à Meroe eiusdem Regis sorore, ibi defuncta, Meroem appellari cœptam, cùm antea Saba diceretur. Ab hac insula, vbi tunc erat Æthiopiæ caput, profectam volunt Austri Regiam, ad tentandam per ænigmata sapientiam Salomonis. Ab vrbe regia, vt aiunt, cum multo comitatu egressa Mazuam venit; conscensis ibi nauibus Erythræum mare traiecit, appulitque ad Arabicum littus, ex quo terrestri itinere octo ferè dierum spatio, Hierosolymam peruenit. A Salomone filium dicitur suscepisse Melichum, seu Melilechum nomine. Hunc asserunt aliqui, ante matris in patriam regressum, in eadem natum vrbe Hierosolymitana; & matre discedente in patris aula & cura relictum; ibique ad septimum vsque, aut octauum ætatis annum

C

sedulò

sedulo educatum, atque ad matrem postea missum. Scribunt alij, discessisse Reginam conceptu gravidam, & in itinere puerum peperisse, in Æthiopia apud se educasse, vigintique agentem annos, cum iam esset imperio aptus, Hierosolymam misisse, ut ei pater, & aliquid impertiret infusa sibi à Deo sapientia; & coram Arca testamenti diadema imponeret Æthiopici Imperij. Addunt insuper, cum sceptrum Melilechus sumpsit, cui sui nomen simul sumpsisse, & Davidem vocatum; acceptisque à Salomone patre duodecim viris, sapientia & virtute præstantibus, singulis ex singulis Israëlitis tribubus, à quibus divinam legem & sacras literas edoceret, in Æthiopiam cum duodecim Iudæorum millibus discessisse. Ab hoc igitur Melilecho volunt Abassini, suos Imperatores ducere originem; neque illo ex tempore ad hodiernum usque diem apud eos ex regia Davidis stirpe defuisse, qui in Æthiopia imperarent. Hanc opinionem, quam ego apud Europæos ab Æthiopibus antumo natam, confirmat novus auctor, sed parum firmè. Argumenta sunt, quod ita esse in Abassinorum reperiatur scriptum archiaui. Quod & stemmata, quibus Æthiopicus videtur Imperator, & tituli, quibus insignitur, rem eandem satis videantur indicare; Iconem enim ipsi esse pro insigni, cum hac inscriptione, *Vicit Leo de tribu Iudæ*; eoque reges Davidem, ac Salomonem, totamque Iudæ tribum fuisse usam. Tituli in ea videri possunt descriptione, in qua cum Imperator genus declarat suum, ex Iudæ stirpe ostendit se, dicit, Davidisque & Salomonis appellat filium. Illud etiam eidem firmandæ sententiæ additur argumentum, quod idem Imperator in urbem Hierosolymitanam, ut in patrum bonum, ius sibi arrogat hereditarium. Sed quart-



ti rationes istæ sint, haud libet expendere. Certum est, non minus incerta esse ex his quædam, quæ ad probandum assumuntur, quàm illa ipsa sunt, quæ proponuntur probanda. Nec mihi dubium, quin auctor iste, quæ in Abassinorum archiuis allato atque re- rum monumenta, numquam adierit; nec legerit librum, quem fingit sub hac inscriptione; *Historia Davidis, qui Melilechus aliter dictus est*, per viuentium Æthiopiam lectitari. Militaria quidem huius Imperatoris signa cum effigie crucis leonem habere, nonnulli asserunt. Quod nouus auctor de inscriptione adiicit, etsi non credo, non tamen ideo. Scio Imperatores aliquot ex hisce recentioribus ad summum Pontificem literas scripsisse, nullo eorum proprio obsignatas sigillo, curatumque à quibusdam Europæis in Abassia degentibus, ut aliquod ex Lusitania mitteretur, quod factum est. Non satis habet nouus auctor asserere per tot ætates, ac sæcula regum Davidis sanguinem, perpetua virorum serie, in Abassinis Imperatoribus integrum hucusque atque inuiolatum permansisse; verum etiam ait, eosdem Imperatores semper diligentissime curasse, ut eas haberent in matrimonio fœminas, quæ claritate generis, & auita sanctimonia maximè essent illustres. Ob hanc causam lege fuisse tantum, ne ullus Imperator aliam uxorem duceret, quàm quæ ad vnum aliquem ex tribus illis regibus, qui iacentem olim in stabulo infantem Christum cum donis intisere, genus referret suum. Vnum quidem ex regibus nomine Gasparem, affirmat fuisse patria Æthiopem, Melchiorem Arabem, Balthasarem Persam. Gasparis posteros autem regnum, quod erat Saba, cuiusdam Imperatoris iussu cum Betnagasso permutasse: qui autem ex reli-

quorum regum erant stirpe, eos scziente per Arabiam ac Persidem Arianæ hærescos tempestate.coactos fuisse solum vertere,regnisque relictis in Æthiopiam,in qua tunc integra ac sincera Christi fides erat, confugisse; ibi Imperatorem Ioannem, quem Sanctum Æthiopes vocant, Fatigaris regnum posteris Balthazaris,regnum Soæ Melchioris nepotibus dono dedisse. Ita factum,vt omnes,qui ex tribus illis sanctissimis regibus essent progeniti,in Æthiopia degerent; quorum masculis illud ait accidere mirabile,quodd ab ipso statim ortus sui primordio, in altero corporis latere stellam habeant diuinitus insertam; idque aded certum esse, vt anno Iubilæi 1575. ex tribus Magorum familiis tres Romæ visi fuerint adulescentes, in quibus illud stellæ signum à Gregorio XIII.Pontifice maximo,& à multis purpuratis patribus,aliisque principibus viris,qui religionis causa ad Urbem concurrerant, obseruatum sit. Cæterum hæc,& alia id generis à nouo auctore tradita,ob eam causam refero,vt intelligi ex iis queat, quam mereatur fidem reliqua de Abassinorum rebus ab ipso scripta,quæ videri possunt legentibus probabilia. Et verò quod de Abassinorum Imperatorum narratur genere,ab Salomone per Melilechum deriuato,rectè,vt opinor,docti & graues auctores docent,fabellam esse ineptissimam, neque creditu, neque auditu dignam. Non sum nescius,sic apud incolas narrari,quod in illa,quam dixi, epistola Fernandius scribit. Sed ea Lusitanorum culpa fuit, quodd illam ab ipsis acceptam Abassinis facile crediderint, literisque mandarint. Qui refutatam volet,eos legat,qui de Salomonis rebus non ita pridem scripsere. Nobis hîc otium non est. Certè ex priscis scriptoribus, qui de Salomone,

& regi

& regina Sabæ tam multa tradiderunt, ne vnus quidem est, qui hac de re verbum fecerit, non scriptores sacri, non Rabbini, non Iosephus Iudaicarum rerum audissimus amplificator, non denique vllus alius, cui haberi fides queat.

*Hæreditate, an electione fiat Abassinus  
Imperator.*

## CAPVT VIII.

**P**Roponam hîc breuiter, quæ apud varios historicos hac de re scripta legi. Sunt, qui dicant, Imperatorum filios ex ætatis prærogatiua solitos parentibus succedere: si filij desint, vnum deligi ex propinquis, non qui sit natu maior, aut mortuo Imperatori coniunctior, sed qui virtute cæteris excellat. Tradunt alij, liberum esse patri, quem velit ex filiis sibi decedenti substituere, nulla habita ætatis ratione. Apud alios est, rem hanc electione peragi; non ita quidem, vt ex vniuerso Æthiopum grege, aut ex qualibet eorum familia, sed ex imperatoria dumtaxat Imperator deligatur. Paucis hîc referam, quæ plurimis de hac electione nouus auctor componit. Describit primùm montem Amaram, quem indicat à terrestri paradiso diuersum, non esse. Illum certè reliquis orbis terrarum locis longè antefert; paradiso verò ipsi, bonorum omnium vbertate, varietate, copia, rebûsque aliis, in quibus commendatio est, prorsus exæquat, si tamen ab eo differt. Monet deinde, Franciscum Aluarum, Lusitanum Sacerdotem, de quo dictum suprâ, quique montem vidit, cum multa de illo scripserit, nihil ferè

scripsisse, quod non abhorreat à veritate. Fuisse autem facile hominem decipi, quod esset peregrinus, & Æthiopici ignarus idiomatis. Sibi tamen omnino vult haberi fidem, eo quod omnia, quæ scribit, à suo illo, de quo dixi, antesignano cum cura acceperit, & ex fide referat. Ait ergo montem istum in media situm esse Æthiopia, Æquatori subiectum; figuram habere circularem; æquabili camporum planitie per octoginta circiter passuum millia in orbem circumdari; sic esse editum, vt dies integer ad ascensum necessarius sit; ita natura munitum, vt duro viuoque saxo vndique cingatur; sic extrema parte, qua saxens est, læum, lenemque, vt humana industria & arte videatur politus. Saxum verò, quod montem ambit, vbi ad summum peruenit, omni ex parte æqualiter prominere, labrumque efficere, quod vndique mille passibus foras prodit, & à parte externa ascensum ad montem penitus impedit; huic labro murum esse impositum assabre & eleganter factum, ne inclusæ intra montem feræ, dum venatores fugiunt, ad extremitates cæco impetu delatæ ex alto præcipitent. In montis cacumine latissimum effundi camporum æquor, plusquam viginti continens in orbem leucas. Hoc in æquore meridiem versùs molliter collem exurgere, qui speculæ instar cuncta circum loca, quibus nihil esse queat aspectu iucundius, oculis subiiciat. Eodem in colle fontem erumpere perennibus pellucidisque affluentem aquis; & varios diuisum in riuulos, multiplici mæandro arua, prata, hortosque irrigare; ac tandem, collectis rursus hinc inde liquoribus, ad montis radicem præcipiti lapsu ex alto defluere, & lacum modicum efficere, ex quo fluuius exit, non longo inde locorum spatio suos cum Nilo latices permisceñs.

Nullam

Nullam prorsus esse ad hunc montem viam, cum turris in modum æqualiter vndique erigatur. Vnam dumtaxat portam esse, vt in arcibus solet, qua ingressus pateat, eamque & forma pulcherrimam, & materia robustissimam, & valida militum manu optimè munitam. Ab hac parte cochleam sine gradibus, in ipso excavatam saxo, variis hinc inde fenestellis luminis peruiam, in sublime ferri; ita latam & ascensu facilem, vt ab imo ad summum nullo negotio euadant equi. In medio cochleæ fabricatam ipso in saxo patentem aulam, tribus illuminatam fenestris. Hic rursus aliam esse portam à militibus aliis custoditam, per quam ad montis verticem exitus est. Nullum reperiri in toto monte oppidum, nullum pagum, aut vicum, sed quatuor & triginta petampla palatia magnificentissime constructa, locisque latè diuisa, in quibus cum familiaribus suis habitant Imperij principes. Milites, & quicumque sunt alij, qui montem incolant, tabernacula habere, ac tentoria pro arbitrata mobilia. Duo esse verustate, magnificentia, & artificio miranda delubra. Ante Sabæ Reginae tempora vnum ex iis dicatum Soli, alterum Lunæ fuisse. Sed à Regina Candacis ad Christum conuersione, quod Solis erat, Spiritui sancto, quod erat Lunæ, sanctæ Cruci fuisse consecratum. Duobus hisce templis adiuncta esse cœnobيا duo, Magni Antonij Archimandritæ signata nomine, & statutis administrata; mille & quingentos in vnoquoque religiosos viuere, partim monachos, partim equites, partim familiares, domesticis addictos ministeriis, & à sacrorum functionibus alienos. Esse in eodem monte hortos amœnissimos, floribus herbisque odoriferis, & arboribus consitos, mira varietate commendatis; quasdam

enim arbores vmbræ , alias aspectui , alias gustui inferuire; nec paucas esse, quas nulla ferat pars reliqui orbis. Cum hisce numerari illam, quam Cubaium vocant; eius fructum esse malocotoneo magnitudine similem, intus album, foris croceum; comedi ut sorbam, cum maturescit; fructus omnes, quos terra gignit, salubritate superare; restituere vires, & in longum vitam protrahere. Plurimos in eodem monte fontes esse, arte & natura eximie ornatos; plurima genera auicularum, modulatè canentium, quas & versicolores pennæ ita conuestiunt, ut videri nihil possit elegantius; rostra, cristæ, barbæ, quædâmque similia istis ignota locis, ita distinguunt, ut nihil esse queat peregrinis mirabilius. Nulla hîc venenata gigni animalia, non bestiolas visu turpes, aut tactu molestas, non sæuas, aut noxias animantes: sed illas tantum, quæ humanis vîsibus, & venationi sunt accomodæ. Hic mons ille est, ubi nouus auctor dicit, & Preteiannis thesauros seruari, & bibliothecam esse, qua nulla ab orbe condito fuit, aut erit vîquam librorum numero, aut antiquitate, aut præstantia, aut dignitate par; de qua nos aliquid postea referemus. Ait nulli aduenæ hunc montem ascendere, vel adire concessum: ab eo quoque arceri fœminas, & à tempore Reginæ Candacis, quæ cum Eunuchio Indica illoc est introgressa; ut Imperij principes inibi tunc commorantes lustrali aqua mundaret, ad hunc vsque diem nulli alij fœminæ ingressum patuisse. Ait præterea, omnes Imperatoris filios ubi octauum ætatis attingunt annum, ad hunc montem deferri; ibi educari, ibi adolescere, nunquam inde egredi, sed tamdiu persistere, donec vel ad imperatoriam euehantur dignitatem, vel reddant naturæ debitum. Affirmat autem, consuetudinem hanc impera

imperatorios pueros in monte Amara includendi, ab Iosue Salomonis, & Reginæ Sabæ nepote fuisse institutam. Cùm verò postea Imperatores aliqui, naturali filiorum amore emolliti, eam intermisissent, Imperatorem aliùm nomine Abrahamum, cœlesti monitum oraculo, eandem iterum reuocasse. Principes, qui in hoc Amarano siue paradiso, siue carcere communiter degunt, aliquando esse sex, nonnumquam octo, quandoque duodecim, & plures. Vnumquemque suos habere famulos, suumque palatium mille diuersi generis, atque ingentis pretij peripetasmatis pulcherrimè exornatum; ex quo, si velit, ad simile aliud possit transmigrare. Eisse enim, vt dixi, quatuor & triginta magnificentissimè præparata. Conuenire eos inter se, quoties lubet, vt vel de rebus variis serant sermones, vel tempus fallant ludo, vel deambulatum eant, aut venatum, vel quid præstent aliud, quod ipsis placitum. Debere omnes rei diuinæ simul interesse, nisi quem morbus præpediat; ad id in destinatum locum conuenire; magno inde ministrorum & cæremoniarum paratu in templum pergere. Plurima huius generis scribit idem auctor, quæ non vacat referre. Videamus iam quonam modo iuxta eius sensum ex his principibus Imperator deligatur. Ita rem proponit. Vbi mortuo parentatum est, vt successoris electio prosperè succedat, indicitur toto Imperio triginta dierum ieiunium, quod nemo, cuiuscumque sit status, & conditionis, debeat violare. Diebus iisdem de Spiritu sancto per omnia delubra sacrum fit. Interim supremus Senatus, penes quem in hoc interregno absoluta est imperij gubernandi potestas, statuit, vt quatuor ex iis regibus, qui Imperio subditi sunt, vt tres itidem Patriarchæ, totidem Ar-

chiepiscopi, tres Episcopi, omnes demum, qui tunc in Curia sunt cæterorum regum legati, in montem Amaram illic proficiscantur, quo possint noui Imperatoris electioni interesse. Vetitum his, dum ad Amaram pergunt, vllum ad oppidum diuertere. Patente in campo debent esse sub tentoriis, ac tabernaculis; ibi ipsis abundantissimè suppeditantur omnia, quæ ad victum necessaria. Postquam ij ad radices montis conuenere, legatus magni Abbatis, qui totius ordinis sancti Antonij magister est, coram adest, & certum ad electionem designat diem. Eo adueniente Imperatorij principes, qui in monte sunt, conueniunt inter se, & ad cœnobiũ Spiritus sancti vnà tendunt, ibique animos confessione expiant, ac cœlesti cibo confirmant. Id ubi factum, ad suum quisque deducitur palatium, in quo veluti in conclui, ita clauduntur, vt adiri, aut videri ab externis, vllumve nuntium vel ad aliquem mittere, vel ab aliquo accipere, nullo modo queant. Id verò vt incorruptè setuetur, custodes quidam, quibus id negotium seriò commissum, diligentissimè curant. Reductis ad palatia, & conclusis inibi principibus, tunc verò Reges, Antistites, & cæteri ad electionem vocati, qui ad radices montis præstolantur, intro recepti, montem ascendunt, & sancti Spiritus cœnobiũ petunt. In eius cœnobij templo, aptis ad præsentem celebritatem induti vestibus, suo quisque sedet loco. Abbates duo, ad quos Imperatoris pertinet electio (ii sunt, qui Spiritus sancti, & sanctæ Crucis cœnobiis præfunt) sua habent in medio templo subsellia. Cum iis duo, alij sedent eorumdem cœnobiũ Abbates, quos vocant militares, quòd sint equitibus præpositi, & duodecim insuper ex iisdem familiis consiliarij. His compositis legatus



gatus magni Abbatis, qui totius ordinis, ut dixi, magister est, templum ingreditur, atque inter mediam sedens concionem, pauca quædam de electione præfatur. Tum Patriarcha vnus, is nimirum, qui ad sinistrum sedet altaris cornu, hymnum quemdam, in quo eadem, quæ in illo, *Veni creator Spiritus*, est sententia, iubet Spiritui sancto Chaldaica lingua decantari. Eo finito ordinis magister accersit ad sese Abbates electores, & aperto Euangeliorum libro iureiurando adigit, ut omni improbo animi affectu prorsus deposito, integrè ac sincerè ad interrogata respondeant, nihilque aliud in ipsa Imperatoris electione respiciant, nisi quod gratum Deo, & communi Imperij bono perutile fore iudicant. Rogat igitur primum, quot sint in illo monte Imperij principes, ex regia stirpe Davidis profecti. Deinde quam eorum quisque habeat ætatem. Postremò, ad quæ vel proni sint mala, vel propensi bona; quibûsque aut infecti vitiis, aut præditi virtutibus. Vbi hæc expedita; Abbates electores procumbunt in genua, eosque quidam alius Patriarcha, cui id munus datum, contenta voce, ita breuiter alloquitur. Vobis, Patres, hi Principes probè noti sunt, illorum enim, & pædagogi estis, & magistri. Non ignoratis, quonam illorum propendeant ingenia, quibûsque instituti moribus sint; rectè etiam tenetis, quo res Imperij sint in statu, & qualem exigant Rectorem. Ex iis ergo vnum deligite, quem creditis ad imperandum aptiorem, qui non suis, sed suorum seruiat vtilitatibus, idque rebus in omnibus potissimum sectetur, quod viderit æterno Imperatori magis acceptum. His dictis, Abbas Spiritus sancti, cuius primæ in hac electione partes sunt, eum nominans, quem magis idoneum iudicat. Hic, inquit, ta-

les

les habet animi dotes, talia virtutum decora, & morum ornamenta; ob hanc causam dignum censeo, qui præferatur cæteris, & Imperij accipiat gubernacula. Meo igitur illum suffragio creo, declaroque Æthiopicum Imperatorem. Post hæc Abbas sanctæ Crucis suam profert eadem de re sententiam. Et verò si cū alio Abbate conuenit, Imperator est, quem consensu legunt: sin autem alium iudicat præferendum, quod numquam adhuc contigit, ad Abbates militares, & duodecim consiliarios res deferitur: isque Imperator fit, quem ipsi creant. Eo autem creato Patriarcha idem electoribus præcipit, vt electum principem adeant, & in templum ducant. Ita faciunt. Palatium ingressi, paludamento quodam, sancti Antonij insignibus distincto, Principem induunt, mediūque recipientes ducunt in templum, & à quo sit Imperatore genitus, coram omnibus patefaciunt. Tum princeps is ante aram maximam flectens genua, dicentem audit Patriarcham, cuius talis fertur esse oratio: *Inclyte Princeps, te Spiritus sanctus elegit, vt nobis imperio & auctoritate præsis. Idem te diuinus Spiritus regat, gubernet, illuminet, & cuncta doceat, qua ad munus tibi impostum risè ac rectè obeundum necessaria sunt. Suam quoque tibi imperiet gratiam, vt quàm longissimam vitam prosperè traducas, atque omni & spiritualium & corporalium bonorum genere cumueris.* Ab hac prece magni Abbatis legatus, detracto paludamento, geminam principi togam induit. Interior bombycina est coloris albi, ad talos vsque demissa; posterior cærulei, laciniata subsuta purpura, aureisque intexta stellulis. Illa candidos in ipso mores desiderat, vitamque sine fallaciis, atque dolis, & ab omni alienam fucò. Hæc cælo similem requirit, & aurea incensum

cenſum charitate. Talibus induto principe veſtibus, aureum Patriarcha monile, aureis quoque ſtellarum bullis, cum pendente inæſtimabilis pretij gemma, in qua Apoſtoli Matthæi Æthiopiarum proteſtoris ac patroni inſculpta effigies, in manus accipit, atque eius collo iniicit. Mox aureum capiti imponit diadema gemmis diſtinctum. Aureum item porrigit ſceptrum in crucis ſpeciem efformatum. Huic enim ſolum principi inter omnes, quotquot in toto orbe ſunt, crux eſt pro ſceptra. Hiſce Imperator decoratus inſignibus, poſtquam eſt ab eodem Patriarcha fauſtis precationibus ex veteri ritu diuinæ commendatus prouidentiarum, editum aſcendit ſolium, miro conſtructum opere, umbellæque ſuppoſitum magnificentiffimæ. Eo ſedente, quatuor illi reges, ſuam quique rem manibus geſtans, ad ſolium accedunt. Enſem primus diſtinctum tenet; Alter demortui hominis caput, impoſitum pateræ; Tertius vas terra plenum; Quartus foculum cum igne. Quibus ordine diſpoſitis, Patriarcha rem quamlibet per ſe ſumens, manûque tenens, quid quæque ſignificet, longiſſima oratione explicat, de humana diuinæque iuſtitia diſſerens multa, de ſine rerum humanarum non pauca, multa de charitate principis in ſubditos, multa de felicitate perpetua iuſtis conferenda, de quæ æternis Inferorum flammis, quibus non minus regum, quam hominum cæterorum ſcelera puniuntur. Poſt hæc à ſellis ſurgunt omnes, è templo exeunt, & vicinum peristylium ſolemni pompa luſtrant ſupplicantes. Hic autem procedentium ordo. Præit quidam de numero equitum: peſtus illi tectum thorace ex elephanti confecto pelle; phæcaſis pedes; ſuræ purpureis atque auratis indutæ cothurnis; ſub ſericum geſtat vexillum

lum coloris crocei, in quo depicta Imperij stemmata; niger nimirum leo pede dextero anteriori rubram tenens crucem, cum Æthiopica inscriptione, quam latinè reddes, *Vicū Leo de tribu Iuda, Æthiopia præueniet manus eius Deo*. Vexilliferum clatigeri sequuntur quatuor; aureæ illis in manibus clauæ; vestes humeris attalicæ ad mediam demissæ tibiam; caput tegmenta polymita; tres in iis potissimum colores, candidus, cæruleus, ruber; addita plummea crista miræ pulchritudinis. Post clauigeros procedunt viri sex, ætate maturi, dignitate senatores, rectoribus urbium officio pares. Hos togæ regunt, coloris atrii, quibus longæ laxæque manicæ; tales videntur, quales qui Venetiis dicuntur S. Marci Procuratores. Capita illis pilei operiunt, iis figura similes, quos Venetiarum vtuntur Duces; sequuntur regum legati; dein magni Senatus consiliarij; postea Reges: tum cum Patriarcha Imperator, dextram partem tenens, cui vestis sinum colligit magni Abbatis legatus. Postremò agmen claudunt quatuor illi cœnobiorum tum spirituales, vt vocant, tum militares Abbates, atque eorum consiliarij, hymnos, & psalmos, & quædam alia hunc in finem comparata decantantes. Perlustrato semel peristyllo, reditur in templum; vbi rursum Imperator solum ascendit, simulque reliqui suas repetunt sedes. Post hæc sex illi Senatores, vnà cum quatuor Abbatibus, atque eorum consiliariis, ea se conferunt in palatia, quibus Imperij principes sunt inclusi, eosque militaribus sancti Antonij indutos vestibus deferunt ad Imperatorem; ad quem bini accedunt venerabundi, ipsique manum deosculantes fidelitatis & obedientiæ iurandum præstant. Idem post eos faciunt, primum reges, cœnobiorum deinde præfecti;

fecti, & eorum consiliarii, tandem regum legati. His expeditis dimittitur concio. Ad aedes Abbatis Imperator, ad alia loca diuertunt alij, & quod est diei reliquum, cum sequenti nocte priuatim transigunt. Hæc nouus auctor de Abassini Imperatoris creatione, quæ falsitatis vitio laborare, sicut & plura alia eodem spectantia, quæ deinceps subdit, perspicuum est. Quod ad rem ipsam attinet, non est expeditu facile, quid olim fieri consueuerit: quid autem nunc fiat, haud est ambiguum. Certò scimus, quod apertius postea monstrabitur, euchi nunc ad Imperium, qui legitimum Imperatorem vita functum cognationis iure propius attingit, nisi ab aliquo conspiratore præpediatur. Præpediri autem non rarò solet, idque ex innata oritur facilitate, qua gens vniuersa ad coniurationes fertur esse proiecta. Hinc enim multa per hosce annos inter consanguineos exorta de Imperio bellæ ac non ita pridem inter Iacobum, & Sacinum patruces, postquam vltimus ante illos Imperator in bello occubuit. Hæc igitur tempestate si ius spectetur, constat hæreditate, non electione, acquiri Imperium; semper ita fuisse, non ausim dicere, sed probabilius. Quæ hac de re in antè memoratis Antonij literis scripta reperi lubet subiicere. Israël, inquit, nomine appellantur omnes, qui de imperatoria stirpe sunt. Nec vllus, nisi Israël, hoc est, ea de gente assumi potest ad Imperij fastigium. Ob hanc causam ne masculus vnquam ex hac progenie desit, qui Æthiopum teneat principatum curatum iam olim, vt imperatorium semen diligentissimè seruetur. Plurimi igitur ex eo etiam nunc in quadam provincia degunt, altos ibi habitant montes, agros colunt, armenta & pecora pascunt. Si quando contingit, vt nemo  
super

superfit, qui defuncto succedat Imperatori, ex rusticis illis eligitur vnus, & summo in folio collocatur. Quāquam verò Imperatores vnā dumtaxat legitimam habent vxorem; omnes tamen eorum filij, ex damnato licet nati consortio, patria siue lege, siue consuetudine parentibus succedunt. At is plerumque regnat, qui plus vi potest; has enim apud gentes, vti & apud non paucas alias, regnandi ius in armis esse creditur. Quæ de monte Amara tam portentosa & inaudita idem auctor scribit, quorum ne partem quidem minimam attigisse videor, valde ignorans erit, qui commentitia esse non intelligat. Quæ nobis tradiderunt, tum Abassini hac de re sine fūco loquentes, tum alij externi, qui ea loca peragrarunt, ipsumque montem sunt ingressi, & attentè contemplati, longè aliter se habent. Dicunt, præaltum esse, & situs natura munitum, atque in orbem efformatum. Quæ in cacumine planities est, non leucas plusquam viginti, vt ille ait, sed leucam circiter continere vnā; non item triginta quatuor ibi esse palatia, sed ædes tantum vnas, nec opere pulchras, nec aptè instructas. Aquam nullam, præter pluuialem exceptam cisternis in saxo excavatis. Cœnobium, quo tempore montem adiit Michael Castagnosus, vnicum erat, & ad quinquaginta sex in eo religiosi. Quæ fruges ex seminato solo singulis annis colligi possunt, vix homines mille sufficiunt alere. Est ibi pro terreni portione ouium, gallinarum, anserum, & occharum abundantia. Bibliotheca nulla, vt dicam postea; nulli neque auri, neque gemmarum thesauri. Arceri ab ingressu scēminas, & externos homines, planè falsum. Quando enim Christophorus Gama ad illum locum cum exercitu accessit, Emanuelem de Acugna, & Franciscum Vellium, Lusitanorum

norum militum præfectos, cum aliis in montē misit, ut reginæ Claudij matri, cum tribus filiis, vno masculo, & duabus fœminis, grandique ancillarum cœtu, annos iam quatuordecim ibi degenti, aduentum suū nunciarent; & ad colloquium descendentem comitarentur. Hi duo præfecti aduenæ erant, & montem sunt ingressi, omniâque lentè & attentè lustrarunt oculis, ac sine fallaciis tradiderunt. Sed vereor, ne auctor iste dicat, nihil eos rectè potuisse obseruare, quia Æthiopici idiomatis erant ignari: nam & in Frâncisco Aluaro linguæ accusat imperitiâ, & ex ea ortum asserit, quominus obseruare rectè potuerit, quæ oculis perspexit; quasi in Æthiopia non oculi tantum, sed os etiam atque lingua ad videndum requirantur.

---

*Vbi sit Abassini Imperatoris sedes.*

C A P V T IX.

**A** Pud diuersos auctores diuersa reperiuntur hæc de re literis tradita. Iouius in Xeuana cum prouincia constituit, quod illa soli vbertate, cœli temperie, hominum ingenio cæteris Æthiopiæ regionibus excellat. In eadem multas ait esse Imperatori regias, & augustiora delubra. Apparet, ex hac prouincia fuisse Petrum illum Abassinum, à quo se Iouius hisce de rebus instructum dicit. Apud alios legi in regno Cafatis Imperatorem esse. Ex his nouus auctor est, qui hoc in regno illum ait incolere urbem pulcherriam, ac florentissimam intra torridæ Zonæ latitudinem; quatuordecim ab Æquatore, versùs Austrum, dissitam gradibus; Zambram vocat. Celeberrima, inquit

D

quit

quit, vrbs Zambra est. Incolarum numero, & ædificiis longè præstat cæteris, quæ tota sunt in Æthiopia. Triginta mille complectitur domos, ingentem in his habitantium multitudinem. Qui ad eam undique perpetuò confluunt, numerari non possunt. Est in regno Cafatis prope Cafatem lacum, qui & vulgo lacus Zambra ex ea dicitur. Quoniam verò omnium rerum genere abundat, idcirco Abassini Imperatores, arua tandem, camposque & peregrinationes exosi, sedem ibi Imperij collocarunt. Habet latas, & rectas, ac spatiosas plateas; muros præaltos; firma propugnacula; amplas & magnificas ædes; delubra multa, & miro opere exornata; inter hæc imperatorum palatium est, & specie pulcherrimum, & maiestate augustissimum, & magnitudine amplissimum. In eo Preteciannes ipse habitat cum subditorum sibi regum filiis natu maioribus, & Augusta cum duabus & quadraginta regum filiabus, earumque pedissequis: habitant etiam vtriusque Senatus, Magni scilicet & Latini Consiliarii, de quibus dicam postea. Ad annum salutis millesimum quingentesimum septuagesimum ædificata est. Peritissimi illam architecti & opifices delinearunt, atque erexerunt, quos ea de causa magnus dux Hetruriæ ad Alexandrum III. Imperatorem in Æthiopiam misit. Huius vrbs forma eadem illa, quæ Florentiæ in Italia est. Equabili iacet loco, & longa undique præcingitur camporum planicie. Amœnissimos habet hortos, fontesque plurimos, & optimis ad potum aquis scaturientes. Cælo gaudet temperato, læto, sereno, salubri, in quo neque vmquam coguntur nubes, neque concresecunt nebulae, raro pluuie gignuntur. Portus illi capax, & opportunus in lacu Cafate, ex quo ingens egressus a-

mnis,



mnis, urbē totam circumfluit, paululūque decurrēs,  
& Aquilundæ fluuio commiſſus, meridiem verſus  
ſaliſ Oceani fluctibus dulces latices cōiungit. Quid-  
quid ad hanc urbem pertinet ad humana vota ex-  
plenda credas comparatum. Si venatio expetatur,  
non procul ſaktus ſunt, omni genere ferarum abun-  
dantes. Si placeat aucupium, plurimæ diuerſæque in  
vicinis agris ac ſyluis auium ſpecies; ſi piſcatio dele-  
ctet, Cafates adest omni piſcium varietate refertiſſi-  
mus. Si quid ergo eſt, quod in humanis rebus ſiue  
ad uſum, ſiue ad voluptatem optari queat, id Zam-  
bra, & ea quæ circa Zambra, cumulatè ſuppeditant.  
Hæc & alia auct̃or ille de ſua Zambra, quam poſſet  
aptius Noſquamiam appellare, quod nuſquam ſit.  
Aduertit autem, licet̃ Preteſiannes his temporibus in-  
tra urbem degat, ſemper tamen in vicinis campis,  
more priſtino, Auguſtale habere, quod ſimul ſeptem  
mille & quingenti pedites, ab Imperij ciuitatibus  
miſſi, & ex militari magni Antonij ordine ſex equi-  
tum millia vndique circumſtant: at præter hos alia  
ſex equitum millia ex eadem Magni Antonij militia  
ad Imperatoris cuſtodiam in urbe conſiſtere. Hæc  
omnia, & quædam alia, quæ de quodam Zambra  
amphiteatro lacui Cafati vicino, de ludis ferarum,  
magno totius aulae concuſſu & celebritate committi  
ſolitis, de quæ ſexcentis aliis eiufdem generis idem au-  
ct̃or ſcribit, commentitia ſunt, ad ingenij magis oſten-  
tationem, quàm ad veritatis cognitionem compoſita.  
Neque enim in tota Æthiopia urbs vlla eſt, quæ  
Zambra dicatur. Numquam is fuit, de quo ſæpiſſime  
loquitur, Alexander I I I. Imperator. Etiam nunc in  
caſtris Imperatores habitant; quamuis in regno Dam-  
beæ nonnumquam ad urbem diuertant, cui Gubay

nomen: sed ea vrbs nec magna est, nec visu pulchra, nec illas habet ad vsum vitæ, & animi oblectationem, quæ ab auctore finguntur, commoditates. Ostendam nunc, quod in hac parte caput est, numquam apud Abassinos extitisse Imperatorem illum Alexandrum, de quo nouus auctor tam multa scribit, quemque plurimis operis sui locis mirificè commendat. Ait in primis hunc Alexandrum mortuo Panusio accepisse Imperij habenas: Panusium autem Naumo successisse. Sed constat, Naumum patrem fuisse illius Dauidis, qui eo tempore, quo Rodericus Limacum Francisco Aluaro, & aliis triginta comitibus ex mandato Emanuelis Lusitani Regis Abassiam adiit, adolescens imperabat, & ad Clementem V I I. atque ad ipsum regem Lusitanix sub idem tempus legatos misit. Rursum cum de fundatione agit Romanæ domus sancti Stephani, quæ, vt ait, Indorum dicitur, eundem Alexandrum asserit successisse in Imperio Menæ; qui Menas, vt paulo post dicam, Adamas etiam vocabatur. Si fortè dicat Panusium etiam fuisse binominem, nec alium, quàm Dauidem Naumi filium (cuius tamen assertionis nullū poterit laudare auctorem) quoniam pacto tuebitur, Menam, & Panusium non fuisse diuersos, cum Menas hic, qui alius esse non potest, quàm Adamas, Dauidis fuerit filius, & Claudio fratri, anno prope vigesimo post mortem patris, in Imperio successerit? Loco alio scribit, hunc Alexandrum obiisse diem quo tempore viginti quatuor, vt ait, legati ad Pium V. ab eodem Alexandro destinati, sedente Gregorio X I I I. Pij successore Romam peruenerunt: alibi tamen affirmat, eundem Alexandrum anno millesimo sexcentesimo sexto è vita cessasse; quam inter mortem, & primam illam, anni intercessere circiter triginta.

triginta. Scribit præterea hunc Alexandrū anno Christi millesimo quingentesimo septuagesimo pepulisse omnes ex suis regnis Iudæos, & lege cauisse, ne quis eorum de genere pedem ampliùs in Æthiopia poneret; qui secus facere deprehenderetur, perpetuæ illum seruitutis pœnam incursum. Iterum verò alibi asseuerat, eundem Alexandrum eo ipso septuagesimo anno eiecisse tandem ex omnibus Imperij locis quotquot in iis erant per totam maritimam oram vsque ad Bonæ-spei promontorium de stirpe Saracenorum; & ea ratione Mahumetanis sordibus adeò terras suas perpurgasse, vt Imperium illud numquam antea, cunctis retro seculis, ad tantam magnitudinem & felicitatem sit erectum. Quando autem hæc contigisse narrat, adeò lapsus erat Imperium, vt nullo antè tempore maiori fuerit miseriarum mole depressum. Sed quid opus in re facili immorari? Qui credere potuerit, hunc Alexandrum bis fuisse natum, bis mortuum, bis in Imperio successisse, & fecisse plurima, quæ numquam facta sunt; is etiam credat, eum aliquando extitisse, & Æthiopiam gubernasse. Cæterum neque ab annis prope sexaginta, quo ex tempore Religiosi Societatis in illis Abassix regionibus commorantur; neque à centum, & ampliùs, cùm easdem peragrarè Lusitani cœpere, talem inibi Imperatorem fuisse, omnino compertum est. Nam quo tempore Rodericus Lima Lusitani Regis legatus Preteiannem conuenit, gubernacula Imperij tractabat David, de quo dictum suprà. Vixit hic in Imperio annos triginta sex. Secutus deinde est Claudius eius filius, qui annos prope viginti rerum potitus, anno Christi millesimo quingentesimo quinquagesimo nono in bello occubuit. Claudio successit Adamas, siue Mena, eius

frater, qui quatuor tantum imperauit annos, & millesimo quingentesimo sexagesimo tertio, Februario mense abiit è viuis. Post Adamam tenuit Imperium Sarfa Denghel eius filius, qui Malac Seguetus, relicto priori nomine, voluit appellari, & ad annos Christi mille quingentos nonaginta sex, cum prius tres & triginta imperasset, naturæ concessit. Huic filius successit natu paruo, Iacobus nomine, qui post annos septem à suis captus, atque in Nereæ regnum missus cessit imperio, quod quidam eius frater patruelis armis occupauit. At hic vix vno exacto anno cum mille sexcenti & quatuor Christi nati agerentur, occisus à suis est: Rediit ad Imperium Iacobus, ex quo alterum post annum ab alio fratre patruelle, cui nomen Sacinos, expulsus in bello occubuit. Satis constat ex hac Imperatorum serie, quam plurimis nostrorum Patrum literis certam esse scimus, longè esse à vero abhorrentia, quæ sunt de Alexandro illo tertio à nouo auctore composita. Sed eò, forsitan confugiet, vt asserat Imperatorem illum, qui anno vivebat quingentesimo septuagesimo supra millesimum, plura habuisse nomina, & ex his vnum fuisse illud Alexandri, quod tot locis tanta ab ipso magnificentia celebratur. Nihilo tamen secius nodos, quibus se irretiit, neque hoc modo dissoluit. Is quidem, qui tunc temporis imperabat, Adamæ erat filius; ante aditum Imperium Sarfa Dëghel. postea Malac Seguetus, vt dixi, appellatus. At hic neque Naumo successit, qui ante annos circiter septuaginta decesserat; sed patri Adamæ, seu Menæ, sub initium anni millesimi quingentesimi sexagesimi tertij; neque obiit tempore Gregotij XIII. Pontificis maximi, nec proinde anno sexcentesimo sexto supra millesimum, sed millesimo quingentesimo nonagesimo

fimo sexto , annis scilicet vndecim post obitum Gregorij, totidem ferè ante sextum & sexcentefimum; neque vllos Romam legatos misit, vt suum Pontifici offerret obsequiũ , & Romanæ sedis auctoritatẽ profiteretur; quippe qui parètum suorum secutus vestigia, hæreticis semper opinionibus adhæsit: neque Iudæos, aut Saracenos ex Imperio eiecit , cùm eo tempore, quo eiectos nouus auctor fingit , & annos antè septẽ, decẽque , aut vndecim postea ita fuerit ciuilibus bellis, assiduĩsque suorum conspirationibus oppressus, vix vt vñquam, dum vixit, respirare potuerit. Imò per eadem tempora vna ex parte Galæ domestici hostes , ex altera finitimi Turcæ ingentes sæpius in toto Imperio strages ediderunt. Iam verò quod ait , suum illam Alexandrum, Ouiedi suasu, Latinum quemdam Senatum , in quo res ad Europam spectantes tractarentur, de nouo instituisse , eique ipsum Ouiedum præfecisse , haud potest cum veritate cohærere. Sequetur enim ab eo statim tempore, quo imperare cœpit , vsque ad mortem Ouiedi , à Tigrensi regno , in quo Ouiedus erat, vnus saltem mensis itinere semper absens fuit; totosque ipsos sedecim, aut septemdecim annos, quos idem Ouiedus Segueto impetrante vixit, neque Imperatorem vidit, neque vllas ad eum literas dedit; quod ipse ciũsque focij ad Goanos, & Europæos patres non semel scripsere. Addendum insuper neque Alexandrum illum, qui numquam fuit, neque Imperatorem alium , qui temporibus illis fuerit ex Æthiopia Iudæos pepulisse: quin etiam ipsos Abassinos Moisaicam legem cum Christiana coniungere ; & plurimos adhuc apud eos degere genere , & secta Hebræos, vt iam dictum est, & iterum dicetur. Quod ad Saracenos attinet , nihil dici potest à veritate distan-

tius,quàm quòd eiekti omnes ab Æthiopia sint,quot-  
quot per oram maritimam vsque ad Bonæ-spei pro-  
montorium illas occupabant regiones. Quis enim  
vmquam Preteiannis ditionem ita latè extendit , vt  
promontorium illud ad eam senserit pertinere? Nam  
etſi olim aliquot in Erythræo mari portus tenebat,  
quos tamen omnes vi & armis Turcæ occuparunt;  
Oceani quidem fines numquam ditione attigit; ne-  
que principes illi , qui iis in locis , multòque minus,  
qui in insula Madagascare , dominabantur , ipsi vm-  
quam stipendiario iure fuere obligati. Sed iam com-  
mentitio hoc Alexandro tantarum tàmque mirabi-  
lium rerum patratore omiſſo,ad rem propositam re-  
deamus. Reperio Abassinum Imperatorem,cùm res  
Imperij florerent,in caſtris & tentoriis habitare , at-  
que infinita hominum ſtipatum multitudine huc &  
illuc vagari ſolitum;cùm imperatoria celſitudine,&  
dignitate(sicut olim Arabes,Perſæ , & Parthi ) repu-  
taret indignum,in vrbibus commorari. Vbicumque  
tamen ponebat caſtra,vrbs derepente ex hoſerica  
varij generis & coloris materia,vt ferunt , conſurge-  
bat,qua nulla ex cæmento & calce , ex latere ac li-  
gno multos per annos ſtrui poſſet elegantior,aut ar-  
chitecturæ legibus magis conſona. Erant ſuis quæ-  
que locis aptè diſpoſita,cælitum delubra, ædes , offi-  
cinæ,tabernæ. Nulla munerum perturbatio,nulla in  
operibus confuſio. Nemo ignorabat ad quam cœli  
plagam haberet domicilium : vbi templa ſurgerent,  
ad quæ precandi cauſa vellet accedere ; qua ad illa  
eſſet eundum via. Latæ inibi erant plateæ,variis ſe-  
mitis ac tramitibus interſectæ. Non deerant biuia,  
triuia,& quadriuia;quique ad alios vſus vel actus in  
vrbibus,vel angiportus ſolent inferuire. Viſebantur  
ædificia

ædificia quædam, alicuius straguli communione veluti muro, aut pariete coniuncta; alia proprio cincta circuitu, insulisque discretæ. Vnum cauponæ locum, alium Xenodochia, diuersum occupabât nosocomia: Ad pinsendam subigendamque farinam, & conficiendos panes, erant pistrina, & loca cætera, quæ ad idem ministerium necessaria. Ad superfluos barbæ capitisque capillos refecandos, tonstrinæ. Ad efficienda ac reficienda calceamenta, sutrinæ. Multiplex tota vrbe forum; multiplex macellum. Variæ pergulæ, quibus singula mercium discriminabantur genera, venum exposita. Vt quæque sors hominum officiis, ita locis vicisque distinguebatur. Habebat iuuentus vbi ludere, aut exercere se posset; siue de equorum pernicitate certando, hippodromos; siue imaginario prælio inter se concurrente, catadromos; siue lucta vites experiundo, palæstras. Denique quidquid in magna ac bene constituta exigitur vrbe, id in ea reperiebatur; cuius tanta fuisse fertur magnitudo, vt à principali foro, quod vrbe erat in media, ad ipsum Imperatoris augustale lata rectaque via quatuor pæne milliaria containerentur. Solebat in editiori loco Imperatoris figi tabernaculum, vt ex eo, qui ad maius illud forum populi concursus fieret, quove ibi tumultu res agerentur, commodè conspici posset. Aiunt vrbis huius dimentientem lineam ad decem ferè milliaria, ambientem ad triginta solitam excurrere. Vt ea ab vno loco mutaretur in alium, quod frequenter fiebat, præter infinitam baiulorum multitudinem, magnamque vim camelorum portandis oneribus comparatam, mulæ erant ad id munus plus decem mille clitellis instructæ; quæ tamen omnia tantæ machinæ vertendæ, vix sufficiebant. Habitat etiam nunc, vt

dixi, in castris Imperator; nisi cùm Gubaym diuertitur, quod facit aliquando: sed illius veteris magnificentiæ vix vllum hac ætate vestigium conspicitur.

*Qualis Abassini soli conditio.*

C A P V T X.

**N**OUUS auctor, quas prisca auctores generatim de terra laudes proferunt, eas vult omnes Æthiopix suæ potissimum deberi, quod nulla pæne res sit ad humanæ vitæ siue necessitatem, siue vtilitatem, siue oblectationem comparata; & inuenta, quæ in Æthiopia desideretur. Omnium, ait, abundare metallorum fodinis. Auri tantam esse copiam, vt non solum eruatur è terra, sed in fluminibus etiam, ac præsertim Nigro, inque ipsa soli aquis pluuiialibus aliquantulum excauati extima superficie copiosè reperiatur. Plures in regno Damute, quàm in quouis alio, auri fodinas reperiri; & aurum ibi, quem alibi, multo esse pretiosius; ideoque maiorem ex eo loco, quàm ex alio, ad Preteiannem copiam deferri. Ex regno quoque Goyamæ, vbi Nili fontes sunt, multum auri extrahi. In eo paucas quasdam ad proprios sumptus accepisse auri fodinas Helenam Augustam, atque ex iis erutum aurum, ex quo puro ac defæcato templi cuiusdam, quod ipsa suæ dicant. sepulturæ, tota atque integra ara maxima suo cum frontali, & immane simulacrum, eidem aræ impositum, miro artificio fabricata sunt. Argenti tantam esse abundantiam, vt fiat nilili; & ob eam causam in Preteiannis thesauris locum non habere. Præteritis annis antequam cum Europæis



Europæis commercia *Æthiopes* haberent, magno in pretio salem fuisse, & præcipuam magisque communem pecuniæ materiam. In *Balgada* prouincia è lapidicinis, vt nunc in *Catalomnia*, frustatim extrahi solitum. Frustra singula longa fuisse palmum cum dimidio, digitos lata quatuor, alta tres. Vt quæque regio magis minúsve à salis loco distabat, sic in ea maius minúsve pretium illa frustra habuisset. Nunc & huiusce pecuniæ extinctum vsus, & valde diminutum salis valorem, cum *Æthiopes* ex marina aqua illud efficere sint edocti. Quod ad fruges & fructus attinet, nihil *Æthiopico* solo fingi posse feracius; tritico, secali, ordeo, oriza, milio, panico, cicere, phascolo; eruo, erulia, lente, & plurimo alio abundare legumine, nobis ignoto. Nullum verò eius genus esse, ex quo simul, & panem ad vescendum, & vinum ad potandum non conficiant. Duo gigni tritici genera; alterum *Abassinum* dici, quod perfectius; alterum *Ægyptium*, minus perfectum. Huius grana magnitudine pineos adæquare ita crescere, vt calami celsitudo hominem superet: quo insidentem. Singulis annis in eodem terreno vtrumque seminari. *Ægyptium* Ianuario mense mens; *Abassinum* Septembri. Omnia legumina in eadem terræ parte ter quotannis prouenire. Sic & milium, & que ad iustam hominis ex crescere altitudinem. Multas olerum, multas herbarum esse species, quas terræ nostræ non ferunt, esui aptissimas; cepe, & allia in o solo non gigni: sæpius id tentatum, numquam respondisse. Vtrumque genus in pretio esse, illucque è Perside importatum, & donis inferuire, & mensis iunioribus. Plantarum tum specie, tum varietate differentium nullum esse numerum. Neque ipsos *Æthiopes* habere nomina, quibus tot genera distinguant:

Multis

Multis locis sic esse spissas, & inter se coniunctas, vt nullus superfit ad ingrediendum aditus. Glandes, castaneas, nuces, robora omnino desiderari, nec magnā vtriusque populi, albæ, & nigræ, esse copiam. Cupressum nullibi surgere, neque crassiorē, neque proceriorem. In cœmeteriis frequentem cerni, vt præfagam mortis & mœstitiæ indicem. Defuisse prius oliuam; aliunde adductam fructum reddere abundantissimum. Quæ medicæ citriæque mali de genere sūt, terræ sponte procreari, vlla sine cultura. Platanum, cedrum, ebenum, pluresque alias pretiosæ materiæ arbores ingenti esse in numero. Non deesse, quæ dulces ferant fructus, ficum, pyrum, malum punicam, & plātas similes, inter quas tum Palmam, tum etiam illam, quæ Indica ficus dicitur, figura, fructu, vtilitate, significatione omnibus seculis planè mirabiles. Fuisse prius vires in tota Æthiopia per paucas, ex quibus modicum colligebatur vinum, Preteiannis, & Abunæ sacrorum præsidis potui vix sufficiens; Hispanos, vbi illic sunt ingressi, vineas plantasse, tantæque hoc tempore esse vini copiam, vt inde in Libyam, Nubiam, Congum, omnesque Nigritarum regiones, in Arabiam, in Persidem, in Indiam, in Taprobanam, in regiones Sinarum, multasque alias Orientis prouincias inter reliquas merces vinum exportetur. In finitam propemodum produci florum multitudinem, & varietatem; sicque agris omnibus, & hortis vltro atque omni tempore innasce, vt Æthiopiam iure possis florentem terram, & ver perpetuum appellare. Omnes ibi, quotquot in Europa, atque in Peruana, & Mexicana regionibus sunt, florum species reperiri, permultasque alias cæteris peregrinas locis. suum cuique speciei odorem, suum colorem, suam pulchritudinem, suas

suas demum proprietates, ac vires, bene incolis notas. Inter floriferas herbas vnam esse, quæ aliis ab locis omnino exulat; longum habere scapum, heliotropij instar, frondes hederæ similes, florem in capite vñ magnitudine eximiam; in eo flore folia mille, tantæ colorum varietate distincta, vt nullus ibi deesse videatur ex iis, qui cæteris sunt in rebus. Nihil eodem flore excogitari posse, aut visu pulchrius, aut odoratu suauius. Præ illo sordere rosas, lilia, hyacinthos, violas, narcissos; scetere moschum, zibethum, ambarum, & quæcumque alia in toto orbe odoramaenta sunt, & odorum compositiones. Solis motum sequi, longè diuersa ab aliis solaribus herbis ratione. Cum primum Sol meridie in occasum declinare incipit, florem istum paulatim pandere sese, & folia explicare; quo verò nagis aperit sinus, redolere efficacius. Sub noctem omnino explicatum, quàm longissimè suauissimum iaculum eiaculari. Vbi ad noctem mediam ventum, um verò Solis accessu veluti indignatum colligere folia, odorémque retrahere; atque ita ad meridiem usque clausum permanere. Inde iterum paulatim aperiri, & odorem exhalare. Æthiopes vocare hunc florem Ghoyaulam, hoc est, florem Lunæ, eo quòd noctem & eius astrum videatur amare, diei ac Solis inimicus. Addit præterea, suo naturam flori diligentem adhibuisse custodiam. Auiculam enim pulcherrimam esse, Supiniminim ab Æthiopibus dictam, innumeris istinctam coloribus, figura & magnitudine cardueli arem. Hanc à meridie ad noctem mediam, quo tempore explicatus flos est, haud vñquam ab eo recedere. Perpetuò circum volitare, nec pati, vlla vt auis aut estiola prope accedat. Parua animalia, arrepta rostro, et deuorare, vel ore comminuta & occisa deiicere in

in terram. Alites maiores, & viribus magis pollentes, cum quibus congregari non audet, magnis, & oris vociferationibus, & alarum clangoribus procul abigere. In minores irruere violentius, easque rostro alis, pedibus, ac toto corpore à flore suo arcere. Cum omnino apertus flos est, si quid in eo videtur sordere, rostro mundare, singulatim eius folia percurrere; aptando, concinnando, adornando. Deinde alis expansis toto pectore spiratum excipere odorem, hauriuntque ebibere sibi salutarem. Demum insidere flori, & suavisimum inibi solui in concentum. Hunc esse excubantis auiculæ à meridie ad noctem usque mediam assiduum laborem: tunc enim, flore penitus clauso, recedere, quod libet, usque dum iterum incipit aperiri: eo namque tempore rursum redire, commissum à natura fidei suæ florem custodituram. Dura infeliciæ auiculæ conditio, quæ pro floris sui defensione cogatur assidue rixari, & bonam semper noctium partem insonnem ducere. Pergit idem auctor Æthiopicæ, explicare gazas. Magnam ait telæ bobyacinæ omnibus locis esse copiam, & nobilitatem. Vermiculos partim in ipsis moris, quatum frondibus aluntur, partim intra domos, adhibita artis industria, procreari, & adulescere. Apum examina nullibi plura, nec ad mel & ceram aptiora; causam esse florum tum copiam, tum præstantiam. Terrestrialium animantium tantam multitudinem, & varietatem, quanta, & mensis ad victum, & theatris ad voluptatem potuit natura largiri. Rhinoceros esse, peregrinum Hispanis, sed notum animal, *Abadam* vulgo dictum: Græcum nomen Latinis receptum, habere à cornu, quod surgit à nare, quatuor longum pedes à lato desinens in acutum, cum modica cuspidis ad superiorem partem inclinatione, Colorem

lorem bestię buxum ; corporis machinam tribus simul bobus parem magnitudine. Breuia habere crura pro vastitate corporis;oculos exiguos, paruas auriculas,cāsque acutas,& rectā in altum tendentes , equinis similes.Ingens illi caput;caudam sine pilis,& contractam.Toto corpore crustis tegi,tellisve adeò duris,nullo vt telo., vel ferreo globo vi iguea contorto penetrari queat. Cum elephanto , quo cum naturales gerit inimicitias, pugnam initurum , cornu acuerē ad laxa;vt hostis aluum,quæ illi pars mollior est,in dimicatione petat. Animal esse natura syluestre , indomitum,ferox,superbum;nulla arte viuum capi, postquā adoleuit. In regno Goyamæ ad radices montis Lunæ, vbi Nili fontes , non alibi reperiri. Ibi à venatoribus occidi dolo alicuius simiæ,extensum eius in terra corpus blandè & fraudulenter titillantis. Cornu contra venena expeti. Putari efficacius , cū certo Lunæ tempore bestia interficitur. Esse in eadē Goyamæ regno Monocerotæ, sed rarè visum : inaccessos incolere Lunæ montes ; inde ad plana aliquando descendere, cornua mutare;vt ceruum;& hæc ab agricolis reperta indicio esse,bestiam montem habitare. Haud esse illi, qui vulgo pingitur,similitudine parem;corpus habere elephanto pæne æquale , & similes pedes ; colore ac pilis referre bubalum;capite aprum; cōditione suam, cū cænosa amet loca. Nigrum illi media in fronte cornu,durum, & cuspidatum ; linguam sentibus plenam ; dum lambit,carminare. Elephantorum magnā copiam ; quinquaginta turratos ad bellum conducere Preteiannem,cū lubet. Animalia illa,ex quibus zibethum colligitur ( Hispani ob similitudinem feles vocant) adeò multa esse , vt quælibet domus aliquot ex iis nutriat. Notū satis,qua natura sint,qua forma,  
quo

quo loco zibethum gignant, quo pacto genitum reddant. Esse & alias odoriferas animantes, quarum non ignoti in Europa odores. Camelos, seu Dromedarios (eiusdem enim videri esse naturæ) plurimos, atque in vectandis oneribus valde vtilis, & vñtatos. Equos etiã plurimos, & optimę plerosque notæ. Omnia item iumentorum genera, vectaria, plaustraria, molaria. Inter hæc mulas ad equitandum præstantissimas. Vrsos, tigres, leones, ceruos, capreas, lepores, cuniculos, & id genus animantes forma & natura diuersas. Nonnullam otium differentiam; quasdam ingentes habere aurículas, gallici instar canis, & longissima colla, vt habent ætui, aut peruani galli. Alias habere caudas adedò crassas, & pingues, vt quindecim, aut sedecim libras singulæ pendent. Caput his cum collo nigrum, cætera alba. Alias toto albas corpore, barbas habere capris similes, longitudine tanta, vt iis, cum gradiuntur, humum verrant, quod & caudis faciunt: omnibus his carnem esse ad vescendum optimam. Boum quoque miram varietatem; omnes magnitudine & firmitate superare Europæos. Syluestres gregatim ingredi, trecenos, & quadragenos; magnam pascentes inferre agris stragem; ob id colonis, à quibus sagittis & sclopetis configuntur, graniter inuisos. Inter syluestres colore quosdam prorsus nigro, & cornibus ramosis, qualia sunt ceruis; alios vnum dumtaxat in fronte habere, vix palmo maius. Simiorum ingentem numerum, & varietatem. Hos quoque gregatim per agros syluâsque vagari ad ducentos simul, ac trecentos. Quosdam admodum exiguos esse: alios magnitudine tanta, vt cum posterioribus solum nituntur pedibus, in altum leuatis prioribus, iustam hominis adæquent staturam. Nonnullos esse

se rostro porcis similes, pectore leonibus, cætera simios. Maximam his inesse feritatem, & sauitiem. Omnibus communiter innatam calliditatem, ac turpitudinem. Quidquid apud nos vel ancillæ domi, vel in vrbe serui, vel in agris operæ faciunt, id in Æthiopia præstare simios. Nec lupos, nec vulpes, nec canes tellurem ferre. Hosce vltimos aliunde sapius delatos paulatim extabuisse. Canum loco esse pantheras; per vrbes vagari, neque nocere, aut sœuire, nisi tritatas. Inferuire venationi, equorum clunibus post equitem insidentes. Inde in lepores & cuniculos impetum facere, saltibus velocissimis: nisi tertio prælam teneant, à persequendo desistere, nec moueri loco, donec impetitur bestia in tuto sint. Hæc omnia, & multo plura, quæ non vacat referre, de Æthiopiæ æcunditate à nouo auctore traduntur. Scio alios ante illum fuisse, qui de Abassini soli fertilitate scripserunt multa, quæ si quis de vniuersa Abassia credat veresse, longè à recto discedet. Constat, regionem anc aliquot in locis rerum earum, quæ hominum generi ad victum & cultum sunt necessaria, non modò feracem non esse, sed infœcundam. Vbi fluuialis aquis irrigantur agri, magna vbertas est. Ob hanc usam, & in regno Tigrio, vbi riuuli frequētes sunt, in Goyama, quod regnum Nilus circumfluit, fertili est natura soli, & fruges quotannis bis ferre apta. incolæ magna ex parte pigri & inertes. Tantum termini quisque plerumque colit, quantum ipsi satis, vt recipiat, quibus tenuiter vitam toleret. Sed è re æsenti erit, quæ hoc de genere in relatis Antonij legis legi, seorsim perscribere.

B

Quid

*Quid de Abassini soli natura & fertilitate  
verè sentiendum.*

C A P V T X I.

**L**atina faciam Antonij verba, nihil ex sententia immutabo. Abassina, inquit, tellus maiori ex parte cauernosa est, & meatibus profundissimis dehiscit. In media camporum planitie passim ex prærupto saxo in miram altitudinem se rupes attollunt, quæ sæuiente belli procella pro arcibus sunt. Vniuersa regio metallorum & metallicorum medicaminum scatet venis. Sed incolæ partim inertia, partim metu, quia valde timent, ne si ista hîc esse malorum irritamenta agnoscant, Turcæ regnum armis inuadant, latere sinunt omnia in terræ visceribus. Solum ferri tantum accipiunt, quantum in ipsa superficie sine fossione reperiunt. Locis multis vbertim proueniunt sata; & caules terra gignit, & allia, & cepe, & quæcumque in Europa sunt legumina, & permulta alia Europæis ignota. Arborum non modica varietas: sed parum iucundi & sine pretio earum fructus. Vnus est impensè vitæ utilis. Cum ex carnibus, quas Æthiopes isti crudas edere consuerunt, vermes ipsis in aluo gignantur; ab iis intestina corrosi haud dubiè intereunt, nisi mensibus singulis fructu isto purgent sese; in eo quippe præstitum iis à natura remedium: sumptus quippe, vbi ad stomachum peruenit, lumbricos illic occidit, & ventrem exonerat. Malum Persicam, punicam, medicam, & ficum Indicam, ac pergulanam vitem terrenum procreat; sed nec passim, nec copiosè. Non desunt lepores, caprei, cerui, apri,



pri,elephantes,cameli,bubali,leones , pantheræ , tiores,rhinocerotes,& eiusdem generis animâtes aliæ; quas inter vna est magnitudinis adeò enormis , vt quo insidens homo subter eius aluum rectus pertransseat. Est illi figura camelo similis, sed natura diversa. Vescitur frondibus,quas erecto collo è summis arboribus decerpit. Riui permulti sunt , permulta etiam flumina,& lacus,quibus in omnibus inumeri hippopotami , valde noxiæ frugibus bestiarum manem habent corporis molem , & adeò vastum , vt ad cubitum cum dimidio diducant rictus. Nocturno tempore ab aquis exeunt in agros , pascendi iussa ; herbis enim victitant ; ac nisi tunc excubias agant agricolæ , nocte vna extremam frugibus infert vastitatem. Dum sub aquis sunt , nihil ipsis auicium : ferocium canum in morem impetunt hominibus ; & immaniter diserpunt quos apprehendunt.Sic nem fugiant,vt puerulus vnus facem accensam tenens,multa eorum millia in fugam dedat. Quoddam genus hominum est,quod belluas istas lanceis & gittis insequitur,earumque vescitur carnibus , quæ illa ferè in re differunt à bouina. Reperitur etiam in sæcæ amnibus & lacubus torpedo piscis Philosophorum opinionibus & altercationibus notissimus. Multum constat experientia , tale huic pisci ingenium è, vt si ab aliquo manu teneatur , ibique immotus nihil efficiat ; sin verò paululum se moueat , adeò mentis corpus eo motu torqueat,vt arteriæ,articuli, rui , iuncturæ partium , quotquot demum toto in corpore habet membra,ingentem cum stupore quom sentiant cruciatum. Vbi è manu dimittitur , omnis illicò dolor & stupor recedat. Æthiopes isti perstitiosè credunt,valere hunc piscem ad pellen-

dos dæmones ex humanis corporibus; quasi ipsi nequam spiritus iisdem, quibus corpora, torqueantur cruciatibus. Ferunt exploratum (rem ego per me non sum expertus) si inter mortuos pisces viuens torpedo ponatur, & inibi se moueat, eos, quos tetigerit, inerno quodam & arcano motu ita cieri, vt viuere videantur. Causam scrutentur, qui rerum naturas inuestigant; quærantque, quænam ea vis motionis sit, quam mortuis piscibus torpedo impertit. Magna huius piscis copia in Nilo reperitur, ad extremos prouinciæ Goyamæ fines, vbi palus est fundo carens, perennes habens atque mirabiles ebullientium aquarum scaturigines. Hic Nilo principium est. Exiguus surgit; primùmque vno ferè die cum dimidio in orientem plagam tendit. Deinde lacum ingreditur, quo nullus toto in orbe putatur esse maior, neque etiam par. Tum per lacum ipsum quasi medium concordibus atque impermixtis aquis rapidissimo decurrit impetu; seque ex altissimis præcipitans rupibus, & æquor nactus liberius tantisper spatiat: sed mox profundissimis terræ hiatibus veluti absorptus ita ripis constringitur, vt locis aliquot passu vno transiri queat. Postquam verò quinque dierum itinere versùs orientem Solem profluit, ad occidentem rursus cursum flectit, & in Ægyptiam Memphim prægrandi onustus mole aquarum pro temporis varietate nunc lenior, nunc torrentior contendit. Affirmant Æthiopes, haud esse difficile, huius amnis cursum aliò detorquere, & infœcundam reddere Ægyptum. Vereor, vt hoc dictu facile sit, factu difficillimum. Talia fuere alia, quæ visa priùs prope leuia, nulla tamen humana industria vinci potuere. Abassinum cœlum tepida plurimum aura vitali calore temperat. Vbi depressior

ior terra ex reflexis Solis ardoribus vapore immodice æstuante parum salubris aër. Hyems hîc sub Maij nem incipiens ad initium Septembris recedit. Tunc in Erythræo incipit mari. Expertus sum hoc fretum ab ortu Lunæ vîque ad plenitudinem quatuordecim continuos dies sine intermissione fluere; & dies totidem ad eiusdem Lunæ decrementum continenter fluere; vt longè mihi falli videantur malè feriati quidam philosophiæ professores, qui æstus marini causam aliò, quàm ad Lunæ motum referunt. Cùm in his regionibus hyems est, dies ferè nullus sine pluvia: hæc plerumque modica, semperque à meridie, nec sine tonitru. Ex hoc, in quo degimus Dambeæ regno etque conspicitur cœli vertex; sublimior antarctis. Prope illum stellæ variæ sunt, crucem situ figurentes: vnde apud nos datum huic polo à Cruce nomen; credo & apud Europæos usurpatum. Apparet hoc cœli tractu quædam veluti macula, nubis inter; opinamur partem esse cæteris non stellatis maris. Sed fortasse fallimur. Considerent Philosophi. Circa hanc maculam plurima micant sidera minora iis, quæ alterum illustant polum. Annus in his locis cum vere incipit, primo nimirum Septembris die. Quolibet in anno menses sunt duodecim, apud gentes alias: sed menses singuli triginta continent dies, non pauciores, nec plures; qui supersunt Augusti sine vîque ad Septembris ingressum, non habent in mensibus locum, sed per se seorsim numerantur. Hæc omnia eodem pæne ordine in suis literis Antonius, ex quibus apertum est, inania esse multa iis, quæ ex auctore nouo supra retuli. Non multum est hæc apud Antonium. Nulla re magis Abasistis, quàm edendo potandoque lætitiâ significat;

cant; nec ipsis vlla sine cibo & potu probata exultatio est. Quo facile festis diebus trahantur ad sacra, circa templa, quæ plurimis vndique vmbra efficiendæ circumdata sunt arboribus, amphoræ constituuntur permultæ quodam plenæ liquore, qui apud ipsos pro vino est. Tunc imposito rei diuinæ sine, aded plerumque poculis se ingurgitant, vt ad crapulam primùm & ebrietatem; deinde, quæ communes sunt ebriorum leges, ad probra & conuitia; tandem ad arma & concertationes bene poti deueniant. Conficere quoque solent ex melle vinum; idque addito opio sic temperant, vt nec gustui sit iniucundum, nec parum conferat sanitati, si moderatè sumatur. Hæc ille. Quæ igitur de vitis vino nouus auctor scribit, mirum, quætopere distent à vero. Et quæri ab eo posset, si nihil aliud, quam ratione in Congum, in Nubiam, Libyam, Arabiam, Persidem, atque in cætera, quæ numerat, loca conuehatur? Terrestrine an maritimo itinere? Neutro certè fieri posse, notissimum est. Etenim, vt dictum est, in mari rubro nullum Preteiannes portum habet, quos olim habuit, Turcæ ac Saraceni hostes occupant. Terrestre iter occludunt montes inaccessi, & vicina cælo iuga, & impenetrabiles rupes, quæ interiacent. Denique tam remota ac tam dissita regna siue mediterraneo, siue maritimo Abassinorum commercio communicari posse nemo, nisi imperitissimus, credet. Et compertissimum est, Abassinorum terras aded viuis vino carere, vt cum est vuarum tempus expresso multo vtantur in sacrificiis Sacerdotes; reliquo anno ex vuis passis ad hæc ministeria succum exprimant modo à me antè commemorato. Sæpe etiam accidit, vt Patres Societatis, qui illic sunt, quemadmodum ex iisdem per literas accepimus

nus, eo quòd prorsus vinum desit, à faciendo abstineant. Nec diu est, cùm Petrus Paëz ad nos scripsit, e anno 1604. apud Imperatorem fuisse, illúmque optasse, atque etiam petiisse, vt Romano ritu rem diuinam faceret, quæsitúmque ad id per totum locum diligenter vinum: at ne guttam quidem fuisse reperam; vnde factum, vt Preteciannis votis satisfacere nequirit. Vbi ergo Abassinum vinum est ex vuis connectum, cuius adeò auctor ille commendat copiam, et eo magis, quàm pluuiali aqua ingentes ex lapide isternæ impleantur? Prætermitto cætera, quæ sunt: quæ futilia, nec minus falsa. Accedo ad illa, quæ ad orbium regimen, & gentis mores pertinent, de quibus quid auctor idem scribat, iam dicendum.

*Quales Abassina gentis mores.*

C A P V T XII.

[N singulis, inquit, ciuitatibus sex eliguntur rectores, patritij duo, totidem ciues, totidem plebei. Ordinis quisque sui causas agnoscunt; patritiorum patritij, cinium ciues, plebeiorum plebei. Est autem in ualibet vrbe vnus supremus gubernator, cui sex illi ius sunt rectores. Hic quotannis de nouo ex patritiorum ordine, nunc ex vna, nunc ex alia familia vicissim creatur. Vt verò omnis auferatur malè iudicandi occasio, quàm & ipsi supremo gubernatori praua aliquâ animi affectio potest subministrare, statutum est, vt in cognoscenda & iudicanda eius, qui reus agitur, causa duo illi assideant ex eiusdem Rei paronia Sacerdotes. Quoniam verò nullo ferè ex vitio

maiora,quàm ex otio, damna in Republica nasci solent,lege cauetur, vt ab vno loco nemo se transferat ad alium absque publico iudicium loci illius testimonio;vnde cognoscatur cuius,& quisnam sit. Nam si quis vel scelus suscepisse, vel absque legitima causa vagari deprehendatur,gravi multatur pœna. Eadem externis,vel etiam strictior,statuta lex. Nullus ex iis in aliquem Imperij locum ingredi sinitur, quin prius patentes offerat literas, ex quibus constet, ipsum & Catholicæ religionis professorem esse, & egregiis moribus efformatum. Ita verò res habet.Vbi ad primam Imperij urbem peregrinus aduenit, literas exhibet. Istæ mox in curiam mittuntur, vt earum ibi veritas expendatur. Interim ille in eadem detinetur vrbe,donec approbatis literis facultatem accipiat ingrediendi. Ea accepta pergit portò. Quò accedit, communibus excipitur expensis hominum eorum, quorum ex ordine est; nobilis enim apud nobiles, apud ciues ciuis, apud plebeios hospitatur plebeius; & ipsi quidem aduenæ,& cæteris,quos habet in comitatu,omnia gratis & largè suppeditantur, nec is de suo quidquam insumit. Quolibet etiam in oppido datur illi viæ dux vsque ad oppidum propinquius;donec eò perueniat,quò iter intendit. Infidelium principum legati, externique mercatores adire ad interiora Imperij seuerè vetantur. Consistunt in finibus, indeque per alios negotia gerunt. Quælibet ciuitas tres diuisa in regiones est,in vna nobiles,in altera ciues,in tertia habitant plebei,sic omnes locis discreti,vt nullo modo misceantur. Magna in habitu inter omnes distinctio. Concessum nobili veste vti heteromalla,bombycina,holoferica,attalica; & cuiusque alterius conditionis, collumque & brachia argento, & auro,

& auro, gemmisque adornare. Vetitum ciui integram vestem gestare bombycinam, aut subsericam, integroque ex auro, aut gemmis vti ornamento; aliquid undulati aut pilosi indumenti admisceat necesse est; addere poterit, si velit, męandros, & segmenta ex pretiosa materia. Plebeius non alio vti potest vestimento, nisi ex pilis confecto; vsus enim laneæ vestis in Æthiopia non est. Itaque omnes habitu ipso discriminantur; móxque vbi quis comparet, quo sit ex ordine, dignoscitur. Semper in plebeiorum comitiis aliquis ciuis, & in comitiis ciuium aliquis nobilis interest; vt quisque quid ibi actum sit, referat ad suum ordinem, isque principi renuntiet; ne toto in regno quid iat, quod ipsum lateat. Immobilia omnium bona principis dominio ita subiecta sunt, vt. nemini liceat ex iis quidquam alienare. Ea conditione eorum habent vsus, vt transferre in alios illum nequeant. Secus res habet in rebus mobilibus. Vendi ista possunt, ut dono dari; id tamen sine magistratus consensu & iurisdictione facere, haud vlli fas. Paterna bona ex integro ad filium natu maiorem hæreditario iure pertinent. Nihil ex iis pater testamento, aut codicillo potest adimere: reliquos fratres, si quos habet, hæres aliter sua quemque conditione. Tantum verò assignare unicuique debet, quantum & parochiæ vicarius, & qui sunt ipsis sanguine propinquiore, iustum iudicant. Efficitur hinc, vt omnis intercludatur ad lites litis. Fœminæ cuiusque dos linteis quibusdam vestibus, & aliquot gemmis tora atque integra contineatur. Hæc ad hæredem fratrem redit, si ipsa absque liberis decedat. Si qua in familia masculus deest, ad operatoris fiscum eius bona deueniunt. Nec quis bassius in externis regnis quidquam possideat,

vxorémve ducat, aut dignitatem accipiat, imperato-  
 ria lege adeò strictè cautum est, vt si quis secus faxit,  
 non omnibus solùm, quas in Æthiopia habet, facul-  
 tatibus spoliatur, sed iram quoque incurrat Impera-  
 toris; atque alterius cuiusque Abassini familiaritate  
 & colloquio priuetur. Ioannes Imperator, is, qui vul-  
 go Sanctus dicitur, & post illum Philippus V I I. sta-  
 tuerant, ne quis vñquam ordinem mutaret; sed eo  
 quisque contineretur, in quo eius fuere maiores.  
 Quamobrem nulla prorsus de causa aut ciuis gradum  
 patritij, aut plebeius gradum ciuis assequi poterat.  
 Imperatores tamen alij optimis de causis legem il-  
 lam abrogarunt. Aditum igitur ad nobilitatem aper-  
 tum illis esse voluerunt, qui septem ingentia ederent  
 in bello facinora; qualia sunt, siue regem, siue supre-  
 mum exercitus ducem, siue militaria hostium signa in  
 bello capere. Inimicam aciem vi percurrere; & id  
 genus alia: quæ vbi ab aliquo facta esse, equitum  
 sancti Antonij testificatione Imperator agnoscit, cō-  
 tinuò istum albo nobilium adscribit, & nobilitatis  
 ipsi priuilegia concedit, assignatque stemma, quod  
 domus suæ valuis possit affigere. Primis tamen de-  
 cem ab acquisita nobilitate annis, ius non habet, vt in  
 nobilium comitiis suffragio suo quidquam decernat,  
 aut ad munus aliquod deligatur. Ciuitatis gradus  
 vno vel altero ex prædictis facinoribus à Plebeio ob-  
 tinetur. Vestitus Abassinis idem ferè, qui Persis, qui  
 Armeniis, qui aliis orientalibus populis. Capitis mu-  
 tarunt tegumenta post agnitos Hispanos, quos liben-  
 ter imitantur, quibúsque similes videri percipiunt.  
 Solus olim Imperator petaso utebatur; adeò in or-  
 bem diffuso, vt eius sub vmbra simul homines de-  
 cem sedere possent; nunc eius tegumenti vsus ad re-  
 liquos



liquos extensus. Agricolaë ob ingentem Solis calorem nonnumquam crudo corio, quandoque gossipio tantùm pudenda tegunt. Cùm inuicem obuiam fiunt, varium seruant inter se salutandi morem. Si Prete-  
iannes occurrit, cæteri prope accedentes, detracto galero vnâ imponunt capiti, aut fronti manum, ter-  
ram altera contingunt, Negum, aut Acegum appel-  
lantes; idque singuli faciunt ter. Inter alios ita res  
habet, inferiores detecto capite, & imposita pectori  
manu honorem exhibent superioribus; hi manum  
tantummodo imponunt pectori, cùm illos saluant;  
hoc ipsum inter eos vsitatum, qui sunt conditione  
pares. Viliores bouina coria, aut tegetes substernunt  
lectis. Mensas habent à terra eleuatas, & sedendo,  
non accumbendo sumunt cibos. Vasa communiter  
ex creta vel luto. Rubris imponunt frigida esculen-  
ta, nigris calida. Conficiendi vitri ignota erat prius  
ratio: aliquot iam abhinc annis accepta ab iis artifi-  
cibus, quos ad Preteianem misit Cosmus Medicus  
magnus dux Hetruriæ: nam & inter illos erant vitria-  
rij. Antequam vitis vinum in vsu esset, omni ferè ex  
re conficiebatur; ex nulla tamen, quam ex melle, pre-  
tiosius. Triticeo communiter vescuntur pane; eius  
loco aliquando est orizæ farina, aquæ permixta. Quæ  
apud nos, eadem apud ipsos in vsu sunt carnes. Has  
elixas edunt, & assas, vt cuique lubet. Francisco Alua-  
ro visum, crudis eos victitare: sed in hoc, vt in aliis,  
deceptus est. Pigmentario enim quodam puluere  
rubri coloris asperfas vidit, cùm comederent; cruen-  
tatas credidit, ac subinde crudas. Hic enim illis hoc  
in genere mos. Carnes accipiunt, & leuiter primùm  
serue faciunt: deinde varias in partes intercidunt, &  
aromatibus condiunt: tum vasis quibusdam receptas  
absque

absque noua concoctione paulatim comedunt. Franciscus igitur rei ignarus, quæ ex adiecto pigmento rubræ apparebant, existimauit crudas. Nullibi in tota Æthiopia, præterquam in loco ubi Preteiannis est, macellarie tabernæ sunt. Domi quisque suæ animalia ad esum occidit, & panes conficit. Statis hebdomadæ diebus venum exponuntur merces in communi foro. Nullæ sunt cauponæ; neque iis viatores indigent: frequentissima enim, ut dictum, occurrunt oppida, ubi cuique gratis suppeditantur omnia. Reperiuntur passim leprosi cum cætero vulgo commixti; non desunt, qui facile ipsis quidquid habent opus, ex pietate præstant. Vsus aberat literas inuicem mittendi, iam adscitus est. Plurima sunt musica instrumenta, & nostris similia. Reges olim, & viri primarij, cum ad Imperatorem adibant, vna tantum leonis pelle humeros induti, corpore reliquo eius se oculis obiciebant nudos. Ita magnitudinem animi ostentabant, cum significare vellent, aut propter Imperatorem egregia se in bello facinora edidisse, aut propriis manibus interemisse leones. Sic enim erant aliqui stultè temerarij, ut ad vires experiundas, & nomen aliquod parandum; ligno vel gladio leones ultro ad pugnam irritarent. Qui aliquem occidebat, eius detrahebat pellem, eaque humeris imposita, veluti alter Hercules, comparébat in aula gloriosus; ea specie indicans, haud esse quidpiam; quod ad tuendum Imperatoris honorem, non facile aggrediretur, qui ausus esset cum leone congredi. Hæc tamen, & alia quædam, in quibus aliquid inerat vel stolidæ feritatis, vel repugnans urbanitati, iam nunc omnino explosa; & diligenter ab Imperatoribus curatum, ut quæ videbuntur à nostris moribus abhorrere, ea ab

toto

toto Imperio procul abigantur ; adeò Europæas probant consuetudines. A temporibus priscis hæc Abassini habebant arma, gladios, tela, sagittas, æneothoraces, loricas, galeas, scuta. A Clementis VII. & Caroli V. tempore introductus in Abassiam nitrati, sulphureique pulueris usus, qui nunc cum omni æneorum tormentorum genere frequentissimus est. Olim deferebant in bellum leones caueis inclusos, & instructa vtraque acie, ut signum pugnae dabatur, soluebant in hostes. At id utrique parti parum erat tutum ; solutæ enim bestię non minus sæpe in suos, quàm in aduersarios irruerant. Omissus igitur communiter hic usus, & apud Tubacatubos, & Goragos, qui Æthiopum populi sunt, tantummodo retentus. Hæc omnia nouus auctor, ex quibus pauca sunt, quæ congruant cum veritate. De Abassinorum vestitu sic Antonius. Ditiore ab Saracenis emunt vestes, quibus eorum more se induunt. Reliqui siue mares, siue feminae, tegendis corporibus vel aliqua pelle aut corio, vel vna vtuntur crassa & rudi ex lino tela, non alio, quàm quod ex textrina tulit, expolita artificio. Cum reuerentiam exhibent alicui, telam hanc deiciunt ex humeris vsque ad vmbilicum, & seminudi apparent. Comam nutriunt, eaque ipsis pro galero, oroque extero capitis tegumento est. Elegantiæ causa variis modis intorquent capillos, & butyro inungunt; quos sic inunctos, cum solares excipiunt radios, verbas credas matutino rore madentes. Atenim ne capillamenta & cincinni disturbentur; cum eunt cecum, furculam quisque suam pede vno defigit in terra, & inter media cornua immittit collum; atque ta pendente capite somnum capit. Solent sibi toto corpore, præsertim in vultu, inurete stigmata. In minimis

minimis quoque manuum digitis ungues sinunt ex-  
 crescere ad quantam possunt longitudinem; usque  
 oblongis imitari cupiunt gallorum alitum calcæia;  
 quæ iisdem ex gallis nonnumquam refecant, & ipsis  
 adoptant digitis. Quo simul truculenti, simul spe-  
 ctabiles videantur, manuum pedumque, quibus nudis  
 incedunt, colorem adulterant succo cuiusdam corti-  
 cis ex albo rubescentis. Eum vi exprimunt, & vasis  
 excipiunt; dein manus inibi ac pedes dies aliquot  
 immergunt, donec peregrinum contrahant ruborem.  
 Hæc ex Antonio. Ex eo quoque & aliis habemus  
 Abassinam gentem communiter inertem esse ac de-  
 sidem, difficileque sibi, quæ sunt ad vitam necessaria,  
 præ ignavia comparare. Nec piscationi dant ope-  
 ram, nec venationi. Cùmque exiguo negotio parare  
 sibi possint ex pecore lanam, ex itriguis locis linum,  
 ex aliis gossipium, vnde texti telæ, & confici vestes  
 queant: qui de vulgo sunt, paucis exceptis, ob innatam  
 segnitiam, more bestiarum, rudibus pellibus ob-  
 nubunt corpora: & vnam tantum quisque ex ariete  
 gestat, ad pedem ac manum extremis partibus alliga-  
 tam. Boum coriis sine culcitris & lodicibus incubant.  
 Menfarum vice conchas habent ex ligno prægran-  
 des, impolitè excauatas. In his sine mappis, sine  
 mantilibus sumunt cibos. Vasis vtuntur ex nigra  
 creta. Præter eos, qui sunt genere Saraceni, pauci  
 alij, paucisque locis exercent mercaturam. Pars ma-  
 gna colunt agros. Nobiles militiam, & Imperatoris  
 aulam communiter frequentant. Maioribus carent  
 urbibus: pagos passim habitant, nullis septos mœni-  
 bus, nulla arte munitos. Oppidum inter eos maxi-  
 mum vix mille sexcentas numerat domus. Novus au-  
 ctor asserit, hac tempestate intra terram continentem  
 multa

multa esse oppida muris circumdata, multa castella, rces multas, multa demum propugnacula. Sed in hoc etiam lectorem fallit. Domus exiguae sunt, absque vlla contignatione, sine elegancia sine dignitate, & pæne sine arte. Formam habent communiter rotundam, & terra paleaque teguntur. Nullus etiam nunc apud eos epistolarum usus, neque ea, quæ publico iudicio decernuntur, neque aliud quidquam rotare literis consuevere. Præter libros diuinos, cõsque, quibus continentur sacra, alij non sunt, nisi quos habent regiis opibus præfecti, vt accepti & expensationes constent. Nonnihil hoc de genere à nostris introductum est, doctrinæ causa.

---

*Quæ sit apud Abassinos Reipublica gubernanda ratio.*

C A P V T XIII.

**S**cribit nouus auctor ab antiquissimis temporibus fuisse, apud Abassinos, hodièque perseverare Senatatum quemdam summa verendum maiestate : maximum vocat, & in eo triginta, ait esse consiliarios, qui iam tunc ante susceptam Christi fidem eximie fuerint auctoritatis, & probitatis. A prædicatione Apostoli Matthæi, à quo sacra & religionem Abassia accepit, eodem retento numero, conditionem personarum mutatam ; cum successerint Ethnicis Christiani ; patriarchæ sex, totidem Archiepiscopi, sex Episcopi, ex ex religiosa magni Antonij familia Abbates, totidem ex eadem equites, in quibus omnibus cum singulari doctrina, excellens vitæ sanctimonia, & præclara

clara rerum prudentia coniunguntur. Designari quoque ait ex ordine ciuium viros aliquot iudicio præstantes, qui à secretis sint. Ad hunc Senatum omnes omnino cuiuscumque generis deferri causas, atque ex toto consiliariorum numero, quinque selegi, Patriarcham vnum, alterum Archiepiscopum, tertium Episcopum, quartum Abbatem, quintum Equitem, qui hebdomadis singulis de controuersis ad trigintanitarum delatis cum Imperatore priuatim agant. Communem huius Senatus sedem esse eandem, quæ Imperatoris est, urbem videlicet Zambram, Imperij caput. Cum tamen vel loca Imperij lustrat Imperator, vel aliò se confert, partem Senatorum dimidiam, tres nimirum Patriarchas, tres Archiepiscopos, tres Episcopos, tres Abbates, tres Equites, solitum habere in comitatu; reliquos in vrbe, & imperatorio palatio remanere. Esse quidem in vnaquaque ciuitate proprios iudices, qui ius ciuibz dicant, de quibus iam antè dictum à nobis: esse item in singulis regnis peculiare magistratus, qui communibus præ sint regni causis: hunc tamen supremum Senatum ad vniuersum pertinere Imperium, posseque ad illum à cæteris regnotum & urbium iudicibus controuersias auocari. Centum viginti septem esse statuta, in maiori vrbis cuiusque foro palam & publicè exposita, quorum ad præscriptum ferri sententias oporteat: idcirco neque patronis, neque causidicis, neque cognitoribus, neque rabulis, neque vllis demum iuris peritis esse opus: si quid occurrat, quod iuxta scriptas illas leges nequeat iudicari, id boni viri committi arbitrio. Deinde parum faciam fabulam nouus auctor adiungit. Scribit enim, cum Panusius quidam Æthiopici Imperij clauum teneret, multos legum Doctores à Lusitano rege missos cum

cum grandi sarcina librorum (in quibus erant Barolus, Baldus, & permulti alij generis eiusdem) eo animo ad illum venisse, ut canonicas & Cæsareas leges, iurisque utriusque peritiam in Abassæ regna introducerent. Cum Imperator tam copiosam videret librorum supellectilem, miratum rogasse, quid iam in illis libris scriptum esset; respondisse Doctores, Ecclesiasticas & Ciuiles leges: se iuris esse consultos, ad quos regnorum, prouinciarum, urbium, oppidorumque omnium gubernatio pertineret; quorumque esset causas diiudicare, controuersias dirimere, lites æstimare, ius suum cuique reddere: eam ob rem illa secum volumina deportasse. Post hæc, quod cuique libro nomen esset, quæ ratio nominis, qua de re quoque ageretur, singulatim exposuisse. Ipsis tantum silentibus Panusium, qui ore hiscente dicentes intuebatur, eorumque in reddenda voluminum ratione inanem sollicitudinem & laborem irridebat, cum nec verbum vllum intelligeret, ad hunc modum dixisse. Quæ igitur ex hac vestra tam proluxa oratione vobis licet colligere, ista sunt. Primum vos Doctores vocari: sed ego Doctores alios non agnosco, nisi eos, quos agnoscit Ecclesia, Augustinum, Hieronymum, Athanasium, Basilium; nec in his regionibus, quæ sub vestra ditione sunt, præter sacros Theologos vllum ermittimus Doctorem dici. Deinde hisce libris, quos attulistis, leges contineri: sed ego præter Christi legem non recipio aliam; nec alia est, quæ hoc nomen mereatur: cæteras, quas vos leges dicitis, nos Constitutiones appellamus. Item ad vos litium causarumque negotia pertinere, vestrique muneris esse controuersias agitare, facultates quibusdam auferre; aliis dare, & his paria sententiis vestris efficere: sed ego

in regnis meis nec lites habeo , nec habere volo ; nemo in illis absque mea facultate quidquam vendit , aut emit ; nemo decedens quidquam alteri testamento relinquit , nisi nostram ad id habeat potestatem ; & hac ratione omnis litium materies ab his nostris regionibus quamlongissime abest. Vestro igitur labore nobis opus nō est. Quamobrem vos precor , ut nos quietos & pacatos esse sinatis , atque in Lusitaniam vestram quamprimum reuertamini ; intrāque paucos dies his oris relictis , quocumque libuerit , vestris cum libris abeatis ; alioquin & illos , & vos vnā cum illis , si parere imperio nostro recusabitis , in fluentem Nilum , quā profundior est , proiici imperabo. Cū Doctores Panusium vidissent trucibus oculis , terribili aspectu , verbis minacibus effundentem iras , nulla interposita mora , naui conscensa Goam petiere. Hæc prædictus auctor , quæ risum quibusdam , iram fortè aliis mouebunt. Quis esse nugas neget ? An ista de supremo Senatu , deque legū Doctoribus à suo Abassinno acceperit , nescio ; ab auctore certè alio non scribuntur ; & fabulas esse nemo , qui leget , dubitabit. Sed pacatè queramus , quis tam multos in Abassia creat Patriarchas , Archiepiscopos , Episcopos , vbi præter vnum Abunam , de quo postea , certum est , Patriarcham alium , aliūve Archiepiscopum , aut Episcopum non esse ? Quinam illi Equites sunt , quos absque dubio Abassia non nouit ? Sed hæc , & quædam talia seriò insectari , inane fortasse fuerit , cū facile se ipsa prodant. Illud tamen non prætereundum. Ecquisnam ille fuit Imperator Panusius , quæ ætate vixit ? A tempore quidem , quo Petrus Couillanius Lusitanorum primus Abassiam intrauit , ad hodiernum vsque diem Panusius Imperator nullus fuit , quod est à nobis



is suprà demonstratum. Quæ præterea illa fuit, Doctorum caterua tam grandi librorum sarcina onusta? Constat enim præter milites Lusitanos, qui Præfecto Gama Æthiopiam adiere, & Societatis religiosos, qui eadem loca diuersis postea temporibus missi sunt, aucósque alios, de quibus partim suprà memini partim dicam postea, haud vllos alios fuisse homines ab Lusitano Rege illuc missos. Si qui tamén, quales finit, missi fuissent, ecqua illius commentitij Imperatoris in recipiendis aduenis, à præstantissimo & amicissimo rege ad se missis, tanta esset imprudentia? Cogitari certè nihil posset vllò in principe, quamuis bararo, ac rudi, magis ineptum, nec magis indecorum. deò verò falsum est, leges nostras ab Æthiopicis nperatoribus contemni, vt quod ex literis Petri aëz, Societatis Iesu sacerdotis, nobis est compertum, anno 1604. is, qui tunc imperabat, & postea reinos, qui successit, eas habere summo opere optant. Pergit nouus auctor describere cætera. Prætorum, inquit, vbi causæ tractantur, tanta apud omnes veneratione est, vt nullus equo, vel mulæ insidens ideat prope pertransire, aut quacumque ex causa illud, veluti ad asylum, confugere. In aula tredecim sunt ex ferro sedes, corio insutæ, non ad sedendum, sed ad ostentationem expositæ. Diebus singulis afferuntur de nouo, iterumque remouentur. Quæ edia est, inter duodecim eminet. Cùm iudices liti-  
antium causas audiunt, humi sedent, in duos diuisi-  
dines. Sua cuique ordini potestas; sua ad reos detinendos custodia. Hic vtriusque partis dicendi mos. Quidquid accusator habet opponendum reo, continenter dicit. Eo silente, suam reus inchoat defensionem, eamque sine interruptione ad exitum perducit.

Rursum si quid habet accusator, quod obiiciat, profert in medium. Respondet iterum reus, si labet, & qua ratione potest, culpa se purgat. Hunc in modum tamdiu actor & reus contendunt, donec finitis utrimque rationibus, ultro quiescunt. Tum ex iis, qui adsunt, quidam veluti assessor, quæ sunt pro utraque parte allata, fideliter repetit, & vtra sibi causa magis probetur, breui oratione patefacit. Post hunc Iudices ipsi suas singulatim proferunt sententias. Tandem is, qui Senatui præest, quid sit agendum, suo iudicio decernit. Hæc autem verbis omnia, nihil scripto fit. Ita nouus auctor, quem ex illis ipsis Antonij literis aperte postea confutabo. Nunc pergo ad alia.

---

*Qua ratione in Iudicum vitam & mores apud  
Abassinos inquirei dicatur.*

C A P V T XIV.

**I**Nter cunctas orbis nationes ait nouus auctor, vna Æthiopica est, quæ in re iudiciaria largitiones munerum seuerissime prohibet. Hinc ortum, ut Philippus IX. ad Imperij cultum euectus, cum nouisset nonneminem ex Iudicum numero, inter regni tempora munus accepisse, statuerit, ut magni Senatus pars dimidia singulis septenniis montem Amaram peteret, quo posset in Senatores ipsos diligens super hac re, fieri inquisitio. Hæc autem ab eo est statuta forma, quæ hodieque seruatur. Primum acciri ad se iubet Imperator omnes magni Senatus consiliarios. Ex iis deinde quindecim deligit (hæc dimidia totius numeri pars est) ipsique præcipit, ut cum vno ex re-  
gum

primogenitis, quos habet in famulatu, & mille prætorianis equitibus dictum in montem proficiscantur. Illic obediunt; & se omnes in viam dant, vno ex equitibus præeunte, & sericum vexillum pallidi coloris cum Imperij insignibus præferente. Simulque ad montis radices veniunt, ex equis Senatores desiliunt. Regius ille princeps, qui est cum Senatoribus missus, Abbates militares, qui ad ipsos Senatores excipiendos descendunt, equo insidens ita breuiter illoquitur. Ex Imperatoris augustissimi, omnium Aballinorum regum supremi, semper Davidis, domini mei mandato, vobis trado hos quindecim magni senatus consiliarios, quos videtis; illos habete apud vos, dum erit opus. Curate, ne incommodè sint. Haud mora his, ad Imperatorem statim regreditur, eique tracti negotij reddit rationem. Tunc Imperator omnes Imperij ciuitates per earum procuratores, qui semper in curia sunt, confestim monet, vt si quis erit, qui ab vlllo ex iisdem illis consiliariis affectus iniuria fuerit, id planum faciat, quò possit, si deliquisse probabitur, pro meritis plecti. Cognita per vrbes Imperatoris denuntiatione, mox in vnaquaque cum parte leri conuenit nobilitas, & præconis voce edicitur, vt quicumque ab aliquo consiliario vllam accepit iniuriam, chirographum ea de re conficiat, in quo, & osus, & consiliarij nomen, & quæ fuerit inferendæ iniuriæ occasio, quo etiam tempore illata sit, dilucidè contineatur. Ad excipienda istiusmodi, si qua erunt, scripta, figitur publico in foro capsula, angustum defuer habens foramen, quò extrahi nequeant, quæ erunt promissa, quales ad eleemosynas excipiendas esse in templis solent. Hæc firmiter est obserata, nec ab vlllo præter Imperatorem, qui solus clauem habet, potest

test referari. Dies octo in eo loco perseuerat ; quibus elapsis vnaquæque ciuitas, suam, ita vt est, cum bona militum custodia ad Imperatorem capsam mittit. Vnus ex ciuibus agmen ducit, explicatum manu præferens ciuitatis suæ signum. Cùm ad palatium ventum, vocat Imperator cubiculi præfectum (is vnus est ex regum primogenitis natu antiquior) quamdam illi clauem porrigit, iubetque conclaue aperiat ad hoc designatum, & allatam in illud capsam intromittat. Ea recepta datur iis, qui detulerant, ad suos redeundi facultas. Postquam capsæ omnium ciuitatum eo, quo dictum est, modo in regiam sunt deportatæ, & in prædictum conclaue intromissæ, Imperator omnibus regum primogenitis, & aliis viginti aulicis comitatus conclaue ingreditur; referari iubet capsas, colligi chirographa, quæ cuiusque ciuitatis sunt, separatim poni, omnia demum voluminibus distincta, & inscripto cuique volumini propriæ ciuitatis nomine, in alia prægrandi capsâ simul recondi, & attrato vehiculo impositam legato magni Abbatis ordinis militaris sancti Antonij tradi; vt is cum trecentis equitibus eam deferat in urbem Sabam, & committat eiusdem urbis sacerdotibus, ad quos pertinet ea de re sententiam ferre. Ad urbem legatus cum capsâ perueniens, magno cum apparatu, & celebritate excipitur; deferiturque ad exedram capsâ, ibique diligenter custoditur. Id ubi factum, legatus cum sociis ad curiam reuertitur. Post hæc è templo exeunt Sabæ sacerdotes cum nobili comitatu, velatis capitibus, vt Abassinis sacerdotibus mos est; exedram ingressi, circa delphicam mensam in orbem sedentes, capsam aperiunt; arbitris remotis; volumina extrahunt; legunt chirographa; querelas scripto notant, & ad suam quasque bonæ

ona cum cura mittunt ciuitatem, vt proprij sacerdo-  
 es simul cum nobilibus rei veritatem sedulo inuesti-  
 gent. Si quem consiliarium accusatum reperiunt, per  
 untium, vel literas ipsum confestim monent, vt cer-  
 am intra tempus obiecta purget. Is monitione ac-  
 epta ad purgandum sese ex monte Amara vnum  
 quitem mittit. Si probatione res eget, dicti sacerdo-  
 es ad eum locum, vbi de ipsa agendum est, equitem  
 eundem delegant, vt rogandis testibus, & rebus cæte-  
 is, quas ad aperiendam veritatem fieri oportebit,  
 cæfens adsit. Tum verò si constet, consiliarium cul-  
 pæ vacare, sacerdotes Sabæ ad eius vrbis, cuius accu-  
 ator incola est, sacerdotes scribunt, vt ipsum pœna  
 uniant talionis, quo sint aliis documento, ne dein-  
 eps per artem calumniandi insidias innocentiz mo-  
 latur. His tandem peractis sacerdotes Sabæ cun-  
 taquæ reperere, & suam de vnaquaque re senten-  
 tiam, cedrina includunt arca, pœrque certos, quos eam  
 rem destinant, sacerdotes ad Imperatorem mit-  
 unt. Antequam hi curiam adeant, sub tentoriis tan-  
 spet subsistunt; dùmque ibi sunt vni ex regum pri-  
 uogenitis præcipit Imperator, vt cum centum nobi-  
 libus ad illos excipiendos egrediatur. Abit hic, &  
 umanè benignèque salutato ad Imperatorem du-  
 cit, vultus & capita de more velatos. Vbi in aula ven-  
 im, illis se Imperator cum eximia quadam amoris  
 gnificatione præbet videndum; capsamque recipiēs  
 o iis traditam, suo in cubiculo reponi iubet. Post-  
 uam verò & de hac ipsa re, & de permultis aliis be-  
 euolo: cum ipsis sermones confert, ab se dimit-  
 t; atque vt Sabam redeant, liberum facit. Eo-  
 em illi modo, quo sunt in curiam ingressi, suam  
 petunt urbem. Imperator autem lectis sacerdotum

Sabæ sententiis , in montem Amaram literas mittit ad principem Imperij natu maiorem , eique mandat, vt ad obeunda sua munera quamprimum remittat senatores; quorum si quis in literis excluditur , in culpa esse intelligitur , & pœnæ loco consiliarij officio perpetuè priuatur. Discedunt ergo ab monte senatores , eo comitante , qui literas detulit , & duodecim mille prætorianis equitibus stipati. Cùm Zambræ vicini sunt, tendi iubent tabernacula, in iisque manent vsque ad insequentem diem. Tunc ad primam lucem cum tubis , tibiis , tympanis , aliisque musicis instrumentis, atque ingenti exultatione & tripudio ad eis exit aulica nobilitas ; lætanteque exceptos ad Imperatoris palatium comitatur. Is inter primogenitos regum filios imperatoria augustus maiestate , crucem pro sceptro manu tenens , sublimi sedet duodecim graduum folio pretiosissimis tapetibus circumuestio. Accedunt prope senatores; curuant poplites; tamdumque ante Imperatorem ita sunt, quibusdam oblongis innixi scabellis , dum magni Abbatis legatus suggestum conscendens pauca verba pronunciat. Ea sint: En habes coram te, Imperator auguste, eos homines, quorum opera & consilio in gubernandis populis feliciter vteris. De mandato tuo in monte Amara iucusque fuere , donec in eorum actiones inquisitum est. Probat, & omni immunes culpa redeunt ad e, suâ tibi ac tuis operam, vt deinceps præstare pergant. His dictis , ingens in tota concione excitatur acclanatio; vox omnium hæc vna est , Viuat Imperator , qui ad honorem Dei, & Petri ac Pauli Apostolorum principum , Imperij sui statuta conseruat, quæque à Ioanne sancto, & Philippo VII. latæ sunt leges, iubet obseruari. Imperator læto atque hilari vultu cunctos ex folio

folio despiciens, grata sibi esse ostendit eorum studia, & acclamationes. Ita nouus auctor, quem non possum non mirari, quòd tales excogitarit examinandorum iudicum tricas, vel ab alio excogitatas acceperit, suoque nomine in lucem prodiderit. Nemo sanè tam crasso est iudicio, cui queant ista probari; cùm eiusmodi sint, vt esse falsa statim appareat: sed & memoriz lapsu peccat hic auctor, loquiturque pugnantly, & affirmat postea, quæ prius negarat. Pulsos Æthiopia dixit à suo Panusio Lusitanos legum Doctores, quia, vt nullæ ibi erant lites, nec litium causæ, ita neque ad eas tractandas, aut ullus iuris peritus, aut vlla iuris peritia requirebatur. Postea & litigatores admittit, & litigandi præscribit modum, & per omnes Imperij vrbes adiudicandas causas, & controuersias componendas multos iudices distribuit.

---

*De Latino quodam Senatu, qui apud Abasinos esse dicitur, deque aliis ad Imperij administrationem pertinentibus.*

C A P V T . XV.

**S**cribit nouus auctor Æthiopia patefacta, cœpisse Sex his Europæ partibus multorum hominum, præcipuè mercatorum, ingentem illuc concursum fieri. Id cùm videret Alexander III. Andrea Ouiedo suadente, Senatum instituisse, quem Latinum placuit appellari, quòd ea, quæ Latini orbis sunt, ad eum spectarent. Sex in eo creasse consiliarios, duos ex Veneta

neta gente, duos ex Florentina, duos ex Lusitana, excellentes homines sanctitate, & rerum multarum experientia insignes; iis & Ouiedum ipsum præfecisse, & pingua stipendia assignasse. Huius Senatus munus esse; primo ut de Europæis rebus, quoad opus erit, certiores faciant Imperatorem. Secundo, ut si quis ex hoc orbe vel negotiandi, vel Abassiam videnti gratia illuc intrarit, id statim Imperatori renuntient, eique insuper exponant cuius, & cuius conditionis sit; quid in illis velit regionibus; num quas vel aliorum principum, vel Abassinorum, qui Romæ habitant licetis ferat; & quæ sunt generis eiusdem. Tertio ut quæ ad Imperatorem ab Latinis oris epistolæ mittuntur, eas ipsi interpretentur, iisque, qui scripserunt, quo necesse erit idiomate, respondeant. Ita hic auctor de Latino Senatu; quem tam verum est apud Abassinos esse, quàm extitisse aliquando Alexandrum illum tertium, qui eius fingitur institutor. At eiusmodi Alexandrum commentitium esse, iam est à nobis aperte demonstratum. Quo autem honoris loco apud hosce Abassinos Imperatores Ouiedus fuerit, & tetigi supra, & latè postea videbitur, nunc dicere supersedeo, ne sæpius eadem repetantur. At ingentem illum ab Latino orbe in Abassiam cōcursum, satis constat fictitium esse, & prorsus inanem, cum & valde tenuis illic sit mercaturæ vsus, quod paulo antè dixi, iisque testantur, qui illis in locis versati sunt, & Saracenorum, Turcarumque armis ita aditus sit interclusus, vix ut ullus aduena queat intrò penetrare. Queramus deinde ecqui nam isti sint Veneti, Florentini, & Lusitani mercatores? Illuc ne ex Europa immigrarunt, vxorésque suas ibidem habent, & familias; an in portandis atque exportandis mercibus questum



stum faciunt, euntque sapius, & redeunt, haud fixum ibi domicilium habentes? Vtrouis de genere sint, mirum est, iis, qui apud nos sunt, prorsus esse ignotos. Veneti, & Florentini rogati, an ulli ex suis in Abassia mercatores sint, iocosam magis rem, quam seriam se rogari crediderunt. Verum ad alia. Scribit præterea, Abassinos Imperatores, cum fidem Christianam & Catholicam eximie colant, in procurandis Imperij negotiis adeo esse sollicitos, ut non satis habeant, à iudicibus, & consiliariis de rebus ad Reipublicæ pacem & tranquillitatem attinentibus bis in qualibet hebdomada certiores fieri, sed velint etiam per se vel à litigatoribus, vel ab eorum Aduocatis causas & controuersias audire, ut modum statuunt, quo possint iuste, & quoad res ferent, quam breuissime absolui. Si ad bellum, inquit, negotia spectent, ea Imperator ipse agnoscit, & magni Abbatis legatum adsciscit consiliarium, ut quod videbitur fieri oportere, quamocysime fiat. Singulis septenniis totum Imperator lustrat Imperium. Talis autem hac in re seruatur modus. Appetente profectionis tempore, duodecim primùm parantur vexilla, quæ ante Imperatorem ferri erecta & explicata solent; deinde papiliones, & tentoria, sub quibus & ipse Imperator, & tota eius habitat familia; numquam enim, dum huiusmodi munus obit, in oppidis hospitat. Ad custodienda tentoria tres ex vnaquaque vrbe custodes assignantur, nobilis vnus, cuius alter, tertius plebeius, qui omnes septem millium & quingentorum efficiunt numerum. Tres isti in partes diuisi ita se habent, ut primùm per se nobiles, deinde iues, tum plebei exsurgent ad Imperatoris tentoria; rursùmque redeatur ad caput, ordòque vnus alteri accedat. Pedibus plebei, equis cæteri conficiunt iter.

*Præter*

Præter hanc papilionum custodiam numquam ab Imperatoris latere discedunt prætoriani milites, qui duodecim mille sunt, omnes sancti Antonij equites. Hoc tamen ex numero deliguntur trecenti; quorum centum plebeis, totidem ciuibus præfunt; reliquis centum data cura per vicinas vrbes cibaria procurandi. Vrbes hi nequaquam ingrediuntur, sed cuiusque ad portas duos habent paratos ministros, quorum hac in re vtuntur opera. Cùm Imperator alicui vrbi propinquat, figi in apto loco iubet tentoria; & ibi proximam agit noctem. Die insequente Imperatorio ornatus habitu, atque elephanto vectus ad urbem progreditur. Abest tunc ab ea rex; ante Imperatoris enim aduentum ex præscripto iure alium in locum abire cogitur; nec ante eiusdem discessum potest reuerti. In ipso aditu rectores ciuitatis (sex numero in vnaquaque sunt) Imperatorem excipiunt, damascenis nigri coloris induti vestibus, vsque ad talos demissis; inter hos quidam est ex nobilibus, qui vexillum tenet cum ciuitatis insignibus. Adsunt, & vrbs eiusdem sacerdotes, quorum vnus in manibus librum habet missalem. Adest & supremus vrbs gubernator, breuem manu gestans virgam, & atrum amiculum, stolæ in morem ex humeris appensum, in quo & aureæ circum fimbriæ, & stemmata sunt Imperatorie dignitatis. Ad vrbs ingressum descendit Imperator ex elephanto, manûque sacrum librum tangens à sacerdote porrectum, iurat se tum Florétini Concilij, sedisque Apostolicæ constitutiones, tum Ioannis, qui Sanctus nominatur, & Philippi VII. statuta seruaturum. Mox ad illum cuncti sacerdotes, vt reuerentiam exhibeant, bini accedunt; post illos Gubernator, & cæteri rectores, qui præstita sub iureiurando obedientia,

dientia, Imperatori promittunt, se ex tribus filiis ad Imperij defensionem vnum duros. Vbi hæc peracta, urbem pedes ingreditur Imperator. Ingredientem comitantur duo & quadraginta regum filij, quindecim magni Senatus consilij, legatus magni Abbatiss, nobiles aliquot ex orbe Latino: multitudo reliqua manet in tentoriis. Hoc septus comitatu, quatuor, quæ in vrbe sunt, parochias primùm adit: dein de ad S. Antonij se confert abbatiam; tum domum intrat, in quam ad tractanda negotia conueniunt nobiles, vbi de seruandis Imperij statutis breuem ad eos habet concionem: suamque ad id, quantum opus erit, opem offert. Inde ad puellarum accedit gynæceum (in vnaquaque vrbe vnum est) quæ habeant, quibus egeant, sciscitatur, & suppeditari iubet necessaria. Si qua inter eas est, quæ matrimonio velit copulari, potestatem ei facit; vetitum enim aut regis filium sine Imperatoris, aut nobilem sine regis, aut ciuem sine nobilium, aut plebeium sine ciuium facultate coniugium inire; cui tamen vult Imperator, eam concedit; id ipsi liberum. Hæc auctor ille, quæ non minus, quàm superiora fictitia esse extra dubium est. Haud opus singula refellere. Satis erit ostendere, quod paulo post faciam, Abassinos Imperatores non modò Apostolicæ sedis nihil, decreta curare; sed plerosque ex iis, qui proximis annis Imperium tenere, Romanam fidem, noménque hostili animo fuisse insectatos. Quæ verò de Imperij lustrandi forma, de vexillis, de papilionum custodibus, de prætorianis equitibus, de urbium ingressu, de imperatorio comitatu, de quatuor vrbis parochiis, de S. Antonij Abbatia, de nobilium domibus, de puellarum gynæceis, de quæ eiusmodi aliis dicuntur, me tacente, facile quiuis intelli

telliget fabulas esse. Videbitur paulo post, num sit credibile, tam exhaustos principes, tantisque iactatos & oppressos bellorum calamitatibus, tanta cum magnificentia & celebritate Imperij terras lustrare posse, quippe qui sicuti sæpe iam dixi, ut ab domo pellant hostes, seque ab eorum armis tueantur, ad externas opes cogantur confugere.

---

*Quæ scelera, quibus pœnis in Abassia puniantur.*

## C A P V T X V I.

**D**E pœnis, quibus apud Abassinos addicuntur rei, deque variis puniendi modis varia ab historicis traduntur, quorum pleraque absunt à vero. Proponam breuiter, quæ scribit nouus auctor. Ait vni tantum delicto mortis supplicium iure decerni; id prodicionem esse. Ad hoc vnum duo alia reduci, homicidium, & adulterium; illud quidem quia qui hominem occidit, regi quoque suo audebit necem inferre; hoc verò quia qui thorum violat alterius eiusque honorem lædit, iniuriam videtur principi suo facere, cuius solius est honores conferre. Reliquis delictis nullum esse iure ipso statutum capitis supplicium, sed pro Iudicum & Imperatoris arbitrato plecti solere, aliquando morte, frequentius exilio. Relegari potissimum reos ad præsidia, quæ partim in finibus sunt Imperij, contra Mahumetanos Borni incolas, acerrimos Æthiopum hostes; partim contra Arabes piratas, in maritimis vrbibus freti Erythræi. Eo verò quæque

que reum difficiliore constitui in loco, quo grauius suscepit crimen. Olim in usu fuisse oculos furibus erui, vt hoc priuati instrumento, vel inuiti à tali abstererent maleficio. Nunc quamuis enormia suscipiant latrocinia, ad Borri præsidia amandari, seruata vita. Quibus inferenda mors est, eos neque infelici arbore suspendi. neque igni vrendos tradi. neque strangulari, sed viuos leonibus exponi; hoc vnicum esse in tota Abassia mortis supplicium; ideo singulis in ciuitatibus loca designari, in quibus, vt in carceribus, hæc animalia seruantur. Tres ante mortem dies denuntiari damnato sententiam, vt confessione animum expiet, & sacro viatico ad profectiorem se comparet. His elapsis, conduci ad locum supplicij; vestibus ibi denudari; velo oculos operiri; in lacum proiici; atque vno pæne momento temporis à bestiis deuorari. Nihil esse statutum contra partitidum, ignotum prorsus apud Abassinos flagitium; neque ipsis potuisse vquam venire in mentem, esse inter homines, qui auderet vitam illi eripere. à quo eam accepisset. Aliquando euenisse, vt frater fratrem interimeret; dñatum quidem ad leones qui fecerat cædem; verum extra fines Æthiopiæ delatum, ibique obiectum bestiis. Visum enim oportere, vt tam horrendi criminis parrator non viuus tantum, sed etiam mortuus patrio careret solo, & apud alienos eius ossa exularent; ne pessimi exempli vicina fama percelleret pias aures posterorum. Peccatum illud, quod sceditate sua nefandi nomen sibi vendicauit, nulla ratione fuisse antea in Abassia notum; adeoque Abassinorum animos & cogitationes ab eo fuisse auersas, vt nemo crederet, posse ab vilo suscipi; ob eam causam non modò nullam ei per leges statutam pœnam, sed neque vllam

lam in iisdem legibus factam de ipso mentionem. Cæterum ( quæ mala non inuehit in vitam mortali-  
um natura deprauata ) paucis antè annis vulgo co-  
gnitum, quosdam Italos illis in locis eo in scelere fuisse  
deprehenso. Increbuisse mox facinoris rumo-  
rem ; adeoque per vniuersum Imperium rei atrocita-  
te turbatum esse , vt crimen ad magnum Senatum  
delatum valde ancipites tenuerit consiliarios. Hæsisse  
eos primùm , inauditum flagitium considerantes;  
deinde quid opus facto esset, deliberasse: cùm tamen  
nullum reperissent , quod satis esse posset tanto malo  
supplicium, Alexandrum III. ( is adhuc, vt air , in vi-  
uis erat ) ea de re consuluisse ; eiúsque mandato com-  
missum negotium Latino Senatui, vt iuxta Europæas  
leges in turpes prædicatores animaduertèret. Cùm  
verò grauitatem delicti, atque ex eo ortam in omniũ  
animis offensionem penderent Senatores , viderent-  
que posse inde, vt ab pestifera radice, venenosam so-  
bolem pullulare, nefarios nebulones vlticibus flam-  
mis tradendos communi sententia iudicasse. Hoc au-  
tem iudicium ita magnum Senatum, ad quem res de-  
lata fuit, approbasse , vt censuerit extra Imperij fines  
pœnam esse infligendam , ne tam horrendi facinoris  
vlla in Abassia memoria remaneret. Deferendos igitur  
in Mosambicum reos , ibi statuto supplicio ma-  
ctandos, Imperatorem tamen cùm apud se cogitaret,  
eos homines ad Latinam Ecclesiam pertinere , & in  
ea natos esse prouincia, in qua Pontificis maximi se-  
des est, præcepisse, vt Goam deferrentur; & Latini Se-  
natus sententia cum magni Senatus approbatione  
traderetur proregi, eam vt ipse exequi ministris suis  
mandaret. Ita factum ; Proregem enim accepta le-  
ctaque sententia, quamprimum medio in foro ingentes

tes lignorum strues parari, & reos, in sua quemque inclusos, subiecto igne cremari, atque in cinerem redigi iussisse. Eo ex tempore conditum ab Imperatore nouum statutum, & veteribus additum, vt si quis vnuquam in tali culpa, quod absit, deprehendatur, absque vlla misericordia detur viuus leonibus dilaniandus. Ait præterea hæreticos, & apostatas morte mulctari. Talem verò in persequenda hæresi seruari ordinem. Si quis, inquit, hoc crimine noscitur infectus, ferreis catenis ligatus, Zambram ducitur. Ibi magnus Senatus est, eiusque iussu ad Priorem eius cœnobij, quod habet ex Alleluia nomen, & Dominicani ordinis est, literæ dantur, ex quibus comprehensum esse hæreticum agnoscat. Tum Prior vnum ex religiosiis, quem nouit ad rem idoneum, auctoritate sua legit, eique negotium committit. Is statim Zambram petit, & ibi rem diligenter examinat; anne hæreticus sit, qui de hæresi fuit postulatus, sententia sua declarat: si affirmat, Senatus decreto ad leones damnatur, iisque viuus subiicitur, nisi resipiscat. Eodem punitur modo, qui à Christi religione ad Mahumeticam turpitudinem deficit. Ait præterea Abassino Imperatori cum Rege Borni, & cum Ægypti præfecto, ac cæteris Arabiæ principibus iam olim conuenisse, vt qui mutandæ religionis causa, vel ad ipsos ex Abassia, vel ad Abassiam transferit ab ipsis, is suo principi reddatur, extremo supplicio perimundus. Eam tamen in hoc pacto interpositam esse conditionem, vt qui à Christo transfugerit ad Mahumetum, ad Abassinos omnino remittatur; qui verò Mahumeti seruitutem cum Christiana libertate commutarit, is quoque reddatur suis, nisi quoddam inueniatur habere sancti Dominici signum; id quoddam est exiguum scapularium,

rium, certo Prioris notatum sigillo. Quare cum primum ex dictis locis Christi fidem suscipere aliquis desiderat, mox sancti Dominici religionis erudendum tradi, & prædicto notandum signo. Hinc fieri, ut ea, quæ inter Abassinum, & vicinos principes est, de reddendis transfugis conuentio, nihil iis incommodet, qui Christianis ouibus cupiunt aggregari. Scribit item idem auctor, striges deferri ad templum, ibi Dominicanæ familiæ religiosum damnationis sententiam legere ex suggesto. Ea audita easdem striges duci ad peristylum, seu claustrum templi, tamdiuque à sacerdotibus vapulare, donec totum percurrant. Inde ad destinatum duci locum, vbi breuibus inclusæ parietibus vitam finiunt. Quæ enim fœminæ huic se arti semel addixere, vix contingere, ut ab ea deinceps vilo metu absterreantur. Prudenter igitur cautum, ut quibus vita relinquitur, ipso supplicij genere tentandi maleficij eripiator occasio. Periuros, ac blasphemos sacerdotali primùm reprehensione redargui. Si labuntur secundò, seminudos, manûque cereum tenentes festis diebus ad templi valuas palam exponi. Si peccant tertio, veste indui coloris pallidi, & iumentorum instar, os collumque capistro ligatos duci per urbem; demum in desertam siue Arabici freti, siue australis oceani insulam amandari, vbi fame consumpti, durum infelici vitæ imponant finem. Blasphemis olim fuisse solitum oculos erui, uti indignis, qui cælum aspicerent. Ita visu priuatos per Æthiopiam vagari, victum sibi medicando. Hæc ille omnia, sed more suo multo copiosius. Pleraque ex his esse falsa, hoc præsertim tempore, quo ille maximè ea vera esse contendit, facili negotio intelligitur; cum iam ex dictis constet, Abassinum Imperatorem in Ery-

thrazo



thrazo freto nullum habere portum, quem præsidio firmet; vix milites habere quorum se armis tueatur. Tantum enim plerumque habet copiarum, quantum potest raptim parare, cum hostis virget. Quæ de hæreticis, de eorum censoribus, de ratione eos puniendi, deque aliis huiusmodi dicuntur, commentitia sunt, valdeque à vero absunt. Hæretici enim in Abassia præter ipsos Abassinos nulli sunt: hos verò plurimis, & maximis erroribus perinacissimè adhærere, postea est demonstrandum. Si quis hos Catholicos dixerit, poterit hæreticos appellare Societatis religiosos, qui ipsis Abassinis ad Romanam fidem reducendis navant operam. Præterea satis constat, & postea multo fiet apertius, nullum esse in tota Abassia Dominicanæ familiæ cœnobium; ex quo sequitur eius religiosos non esse ibi hæreticæ prauitatis censores, quod tantopere, nescio quo consilio, nititur hic auctor legentibus suadere. Vtinam tales ibi religiosi essent, & sanctæ Inquisitionis fungerentur officio; qui nunc in ea gente errores sunt, haud dubiè non essent. Quod de nefando scelere ab Italis hominibus commisso, & ad supremum inprimis Senatum, ad Latinum deinde, tandemque ad Imperatorem delato, auctor comminiscitur, eamdem, quam duplex ille Senatus, habeat à lectoribus fidem. Quæri tamen ab eo potest, quonam animo, quæve ratione ausus sit, illud flagitium Italis hominibus affingere? Debuit certe religione prohiberi, quominus id faceret, & genti toto orbe clarissimæ, quam suspiciunt omnes, & venerantur, tantam inureret infamiæ notam. Etenim si in tali turpitudine fuissent Itali re ipsa deprehenso, ratioque historiæ postularet, ut flagitium in medio poneretur, silendum fuisset gentis nomen, cum rectè

constarent omnia, si tantum ab externis quibusdam hominibus patratum scelus diceretur. Iam verò, quàm est ineptum illud? hosce reos Imperatoris iussu fuisse Goam missos, ut Indicus prorex latam contra eos à Latino Senatu sententiam executioni manderet? Ecquod obsecro, habet Preteiannes aut in Goanam urbem Imperium, aut in Lusitanos prætores auctoritatem, ut flagitia in Abassia suscepta Indici prætoris ministerio Goæ plectantur? Haud opus ostendere meram esse fabulam, quæ de transfugis narratur; certius certo est nihil in ea dici, quod veritatem sapiat. Cùm auctor de strigibus locutus est, parcere debuit sacerdotum dignitati, & modestiæ; utrique autem valde nocet, dum eos fingit lamiarum verberatores. Proponam hîc, quæ de re iudiciaria in illa Antonij epistola legi. Sic scribit. Demum habet Imperator (Calam Abassini vocant) multiplici circumdatam septo, sed humilem, & sine vlla contignatione, ut foris existentium clamores percipiat. Concurrunt undique multi ad ostium domus; atque ut quisque ex diuersa natione est, ita peculiari modo contenta voce ab Imperatore ius postulat. Qui Lusitani generis sunt, clamant, Domine, Domine: Turcæ & Saraceni, Side, Side, quæ vox etiam Arabica lingua dominum sonat: alij Saió, Saió, hoc est, ô Sol, ô Sol. Alij simios, vulpes alij, alias alij animantes clamando imitantur; atque ex ipso clamore quo quisque ex genere aut prouincia est, facile dignoscitur. Vocibus igitur clamantium perceptis & cognitis, iubet Imperator eorum causas committi Vmbaris, ita curiæ iudices vocantur ab Vmbare, hoc est, tripode: duplici enim distributi ordine ad ostium palatij sedent, quidam ad sinistram, alij ad dextram, in tripide quisque sella. Neque

que scribis, neque vlllo vtuntur scripturæ genere in toto hoc litium negotio. Oppidorum domini subditorum agnoscunt causas. Hic apud illos mos. Cùm quis alium in crimen vocat, vnum toparcha ex familiaribus suis legit, qui diem reo dicat, & pro delicti cõditione necessarium assignet ad defensionem tempus. Mox vadimonium promittit reus. Quòd si idoneum non habet sponforem, vel iureiurando adstringitur, vel iniecta manui catena, quod frequentius fit, cum altero, cui traditur custodiendus, colligatur, ne fugam capessat. Ad præstitutum diem comparent in iudicio Actor & Reus, & pro se agit quisque quantum potest. Disceptatione finita, omnibûsque ex vtraque parte rationibus propositis, quotquot adsunt, ferunt sententiam. Libera cuique ab hoc iudicio ad Vmbares, ab istis ad Azages, qui supremi iudices sũt, ab Azagibus ad Imperatorem appellatio. Qui iudicis sententia damnatur, non solum parti alteri soluit litis expensas, sed etiam iudici pro iudicandi labore stipendium. Sæpe solent aliqui cum summa potestate prouincias lustrare, vt furta, homicidia, & eiusdem generis delicta plectant. Munus hoc constituta auctione venditur; & ex eo fit, vt non magis à latronibus & sicariis vexentur populi, quàm ab iis ipsis, qui ad insequenda crimina in prouincias mittuntur. Quicumque, quamuis priuatus capere homicidam potest. Cùm quis alicubi interficitur, statim per circũuicina oppida defertur cædis nuntius, vt homicidam oppidani comprehendant. Ni faciant, certa mulctantur pecuniæ summa. Hæc de re iudiciaria, & nihil amplius Antonius.

*De puerorum institutione & usu literarum  
apud Abassinos.*

C A P V T X V I I.

**S**Cribit nouus auctor, Æthiopes in pueritia instituenda summam semper curam adhibuisse; atque ab eo tempore, quo adhuc gentilicas colebant superstitiones (quod nunc, & iam inde à Christi fide suscepta multo ait diligentius seruari) in vnaquaque vrbe duo instituisse collegia, puerorum vnum, cui inditum à sapientia nomen, alterum puellarum, quod virginitatis habet appellationem. Hoc intra, illud extra vrbis muros esse; omnesque in his incolarum filios, & filias educari; fœminas ab anno decimo vsque ad vigesimum; masculos ab octauo vsque ad decimum sextum. In vtroque doceri Christianæ fidei Doctrinam. Cæteraque ad cuiusque status & vitæ rationem necessaria; masculis quidem tradi literas, cæterasque, ad quas quisque suoapte ingenio propendet, artes; fœminis verò ea omnia, in quibus iuxta patriū vsum solent exerceri. In vnoquoque collegio tria esse domicilia, diuisa inter se; vnum nobilibus, alterum ciuibus, tertium plebeis destinatum; in quolibet pædagogos esse, ac magistros pro cuiusque cœtus cōditione distinctos; ex nobilium tamen ordine quatuor esse viros, & totidem matura ætate fœminas, illos sapientiæ, has virginitatis collegio præsidere. Egredi masculos è collegio posse ad inuifendos suos, & causa animi laxandi; idque festis communiter diebus, aliquando etiam profestis, cum se occasio offert, ipsis concedi. Difficiliorem esse fœminis egressum. Neminem

minem nec reges quidem, ab ista dandi filios obligatione eximi. Duo potissimum ex tali institutione gigni commoda; vnum, quòd assuescant pueri à prima ætate suscipiendis confessionis & Eucharistiæ sacramentis; alterum, & hoc ex priori sequitur, quòd castè, & sincerè viuant. Inde fieri, vt in tota Abassia, vbi scorta plurima sunt, nullum indidem, sed ab externis omnia regionibus aduenire. Hæc nouus auctor de puerorum educatione, quæ omnino falsa sunt. Amant quidem Abassini literas, præsertim diuinas, in quas tanta feruntur cupiditate, vt vix vlla sit ex nobilibus fœmina, quæ Pauli epistolas, Daudicos Psalmos, & similia ignoret. At hæc non in collegiis, sed domi suæ, & in templis addiscunt. Cum his puerorum domibus cōiungit nouus auctor lupanaria meretricum, de quibus aliqua dicit, quæ referre mihi pudor est. Illud risu dignum, quod adiungit, si qua ex his perditis fœminis ad meliorem frugem se recipiat, quæstumque meretricium relinquat, eam mitti Goam vt inibi degat in domo, sicuti vocant, Conuersarum, cuius penes Societatis religiosos cura est; neque enim earum vlli fas esse in Abassia manere, ne pristini status memoria castas fœminas sollicitet ad turpitudinem. Earum quoque filios, si quos habuerint, cæterosque ex illegitimo natos thoro, vbi ad debitam veniunt ætatem, ex Abassia pelli, inque urbem Goam, vel in Ormuziam, vel Denzilanum, vel denique Mosambicum amandari; ibique ab Imperio longè distitos sacerdotum expensis ali. Atenim quodnam Abassinis est in Goanam urbem ius, vt eas fœminas ad illam se conferre, & in Conuersarum domum recipere, compellant? A quo item auctor hic accepit, administrationem illius domus, si qua Goæ est, Societatis religiosi

esse commissam? Ignorabat ab instituto Societatis esse alienum, fœminarum collegia moderari? Quis credat non legisse, vel audisse sapius, Societatis religiosos pluribus summorum Pontificum literis ab omni fœminarum cura & gubernatione esse immunes? Quod de spuris dicit, eamdem habet, quam reliqua, fidem. Quis hoc nescit? Hæc mihi fabula ex illis esse videtur, quas ex suo didicit Abassino, cui mirum est, in rebus talibus tam facile fuisse assensum. Cautior quidem esse debuit, quàm ut cuncta, quæ ab illo accepit, literarum monumentis, quasi certa, mandaret; nisi forte prudens & sciens falli voluit, quod vix credi potest. Quod ad literarum studia attinet, à medicina incipit novus auctor; atque hæc de medicis scribit. Eos in Æthiopia Philosophos nuncupari, postquam Doctoratus gradum sunt assecuti. Imposito enim studiis sine, examini subiici; si probentur, literas ab examinatore accipere, quibus de examine constet, & approbatione; & cum iis ad cœnobìa Dominicanæ ordinis, quæ de Alleluia, & Plurimanos dicuntur, conferre sese, propinquorum amicorumque cetera constipatos. Ad eos excipiendos in templa exire religiosos, eorumque Priorem nigrum candidatis imponere cum longis manicis cucullum; & de obedientia Romanæ sedis præstanda, deque servandis Florentini Concilij decretis iusiurandum exigere; eo exhibito, auream illis iniicere vestem, ex collo in pectus demissam, in qua Imperatoris fulgent insignia. Sic indutos ingenti omnium, quacumque transeunt, gratulatione & lætitia exceptos, in vrbes suas Philosophos, hoc est, Doctores redire. Summo apud omnes esse in honore, multisque affici & ornari tum publicis, tum privatis beneficiis. Possè enim elephanto ve-  
hi

hi per urbem, quod præter Imperatorem, antistites, virginésque sacerdotes, de quibus postea dicendum, nulli hominum fas. Posse, sicut ciuitatum gubernatores, stola uti ex humeris appensa, quod est eximie dignitatis insigne. Ab omni cuiuscumque tributoni onere esse exemptos. Non teneri ea lege, quæ ex tribus cuiusque filiis vnum bello addicit; quamuis & ipsi reges ea teneantur. Eundem namque legis auctorem, qui fuit Philippus VII. magno Basilio ætate par, statuisse, ut medici, honoris causa, ab illa essent soluti. Eam verò ob rem tanti medicos in Æthiopia fieri, quia præter medicinam nulla alia publicè addiscitur scientia. Theologiam enim, & Chaldaicū idioma, quod sacris inseruit, in cœnobiis ac templis inter solos Ecclesiasticos tradi; Logicam omnino ignorari; mathematicas disciplinas vix nosci; quidquid Philosophiæ ad Medicinam necessarium est, cum ipsa simul addiscendo coniungi. Itaque solam Medicinam in publicis gymnasiis doceri, ad eamque perdiscendam septem tantummodo in toto Imperio generales esse Academias. Haud esse cuique liberū, huic scientiæ operam dare; cū ex qualibet vrbe ex nobilium ordine tres iuuenes à Rectoribus eligantur, sunt qui & propenso sint in literas animo, & iudicio, ingeniōque valere noscantur. Hos communibus ali urbium suarum sumptibus, multosque in Academiis annos consumere; nec Medicinam tantum, sed etiam vulnera curandi, & pharmaca conficiendi artes addiscere; rei quoque herbariæ nauare operam, quin multæ sunt in Æthiopia herbæ, medicamentis aptissimæ. Quapropter vnumquemque ex his, qui ad studia mittuntur; & medicum simul, & chirurgum, & medicamentarium, & herbarium euadere. Medicandi

modum cauteriis potissimum constare. Aliquando tamen, sed rarò, scindi venam, & sanguinem extrahi. Ad purgationes frequenter v'surpari fructum arboris cuiusdam, quæ ad ripas alitur Nigri fluminis, Iuuay dictæ; prægrandem esse; & longa latâque habere folia, ac pomum magnitudine iuglandi par. Qui purgationem expetit, vno ex his vel altero sumpto, tantisper quiescere, ac post horas duas sudorem emittere, & ter, vel quater aluum exonerare; dein ad negotia expeditum, ac vegetum redire. Si maiori opus sit purgatione, idem medicamentum resumî; posse enim absque v'llo sanitatis incommodo toties eodem die repeti, quoties libuerit. Hæc de medicis, & medicamentis nouus auctor, quæ falsa esse compertissimum est. Sunt quidem in Æthiopia, qui medicandi artem profiteantur, & curandis febribus, aliisque morbis expellendis cauteria communiter adhibeant; quod in v'su etiam apud Saracenos est. Verùm septem generales in Imperij vrbibus esse Academias; ex nobilium genere ad illas mitti, qui sint à ciuitatum rectoribus delecti; hos ibi communibus ali expensis: multòsque perdiscendo annos transigere; denique præmisso de præstanda Romanæ sedi obedientia, & Concilij Florentini decretis seruandis iureiurando, ad Doctoratus gradum euehi, eximiiisque ornari priuilegiis, quorum quædam nec regibus sint concessa; cæterâque eiusdem generis tam constat esse falsa, vt ne ipsi quidem Abassini, quibus solemne est res suas efferre, nihilque respuere, quod aliquam genti existimationem conciliet, vltro oblata admittant, & à veto abesse facile fateantur. Illud etiam potuit hic auctor aduertere, cum totam ferè medicandi artem apud Abassinos cauteriis, & quarundam herbarum v'su contineri



tineri dixerit, non fuisse opus, suos illos medicos tanto tempore in scholis versari, & in perdiscenda re, quæ potest breuiter & facile addisci, multos annos consumere. Sed ad reliqua. Sic deinde scribit. Sacra Theologia non in publicis docetur Academiis, sed priuatim, tum in cœnobiis ordinis sancti Dominici, ac sancti Antonij Abbatis, tum in templis clericorum; nec alij, quàm Ecclesiastici in eius studium incumbunt. Æthiopica traditur lingua. Vt verò apud nos sententiarum Magister, aut sanctus Thomas, aut alius quispiam grauis scriptor, ita quatuor illa Concilia, Nicænum, Constantinopolitanum, Ephesinum, & Chalcedonense, quæ veluti quatuor Euangelia habenda esse Patres censuerunt, apud illos explicantur. Sanctæ Thomæ summæ, & quæ Theologica dicitur, & quæ inscribitur contra gentes, cætum iam abhinc annis à Petro Abbate Abassino ex Latino sermone translatae sunt in Æthiopicum. Dominicani, qui in Abassia sunt, vtriusque scientiam addiscunt; quamquam Conciliorum doctrinæ impensius se dedunt. Scriptura diuina Chaldæo traditur idiomate, eique communiter nauant operam, qui sunt addicti sacris. Licet autem disputandi ratio in eorum scholis ignota sit, non ideo tamen Abassinis Theologis denegari debet Scholasticorum appellatio, quam veteres Sapientes multis tribuere, qui longè aberant ab Scholasticis disceptationibus. Hæc ille, ex quibus rectè pauca; non esse videlicet apud Abassinos publicas scholas, in quibus Theologica tradantur; nullum esse de Theologicis rebus disputandi vsum; si quid Ecclesiastici addiscunt, id ex diuinis libris, & Conciliis desumi. Cætera ferè omnia cum falsis numeranda. Neque enim vlli in Abassia Doctores sunt qui sicut nostri

nostri apud nos Petrum Lombardum, aut sanctum Thomam, aliquémve alium explicant, ita quatuor illa Concilia magistrorum more interpretentur. Ecclesiastici, & nonnulli alij, præsertim nobiles, ut antè dixi, solent aliquid ex Scriptura sacra & quibusdam Conciliis memoriæ commendare; isque habetur peritior, qui memoriter plura tenet. Alij Doctoratus gradus, aliæque Doctorum dignitates nullæ sunt. Pueri nobiles, ut iam dixi, partim domi suæ, partim in cœnobiis prædicto modo nonnihil addiscunt. Aliquibus religiosis exceptis, qui tamen sunt paucissimi, reliqui ferè omnes, in maxima rerum sacrarum & naturalium ignorance versantur. Quoniam verò de studiis literarum hoc loco egimus, non putamus abs re, ex plurimis, quæ idem auctor de Preteianis bibliotheca scribit, aliqua breuissimè referre. Ait in monte Amara, in cœnobio sanctæ Crucis eam ferriari, & ab Regina Sabæ accepisse initium; repositos ibi esse libros permultos, quos & tunc Salomon ipsi Reginæ ab Hierosolymis in patriam discedenti dono dedit; & singulis deinde annis solitus erat ad eandem mittere. Inter reliquos esse quosdam, quos vetustissimus ille Enochus ab Adamo septimus de cœlo, de elementis, deque aliis Philosophicis rebus composuit. Esse alios, quibus res mathematicas, & plurima ad sacros ritus & cæremonias spectantia Noëmus tradidit. Alios ab Abrahamo editos, cum esset in valle Mambre, ubi philosophiam publicè profitebatur, & eos habebat auditores, quorum opera quatuor illos reges, qui Lothum nepotem ceperant, acie præfligauit. Alios à Iobo, ab Esdra, à multis Prophetis, & summis Iudæorum Pontificibus de rebus variis conscriptos. Alios, in quibus plurimæ sunt Apostoli Pauli epistolæ

epistolæ Europæis ignotæ; & plura Euangelia hisce & similibus inscripta titulis, secundum Hebræos, secundum Nazaræos, Encratitas, Ebionitas, Ægyptios, secundum Bartholomæum, Andream, Thomam, & secundum alios: hæc autem opera licet incertæ fidei sint, & ex eorum numero, quæ Apocrypha dicimus, summum tamen afferre bibliothecæ ornamentum. Alios esse libros de rebus variis, partim soluta, partim ligata oratione à Sibyllis, alios ab ipsa regina, & eius filio Melilecho compositos. Cabalisticæ Iudæorum disciplinæ diuersa, tomisq; diuisa plusquam quinque mille volumina. Tot denique in hac bibliotheca iustæ magnitudinis libros reperiri, ut numerari vix queant. Iis autem conseruandis, & amplificandis ducentos monachos addictos esse gnaros literarum. Hæc de monstruosa illa bibliotheca dixisse satis. Reliqua apud eum videat, qui volet. Duo tamen hîc adiungenda, quæ addit. Vnum est, Sirleti Cardinalis rogatu, fuisse à Gregorio XIII. Pontifice maximo in Æthiopiam missos Antonium Gricum, & Laurentium Cremonensem, ut hanc inspicerent bibliothecam; quos alij eodem fine sint comitati. Iuisse, & vidisse, & librorum tum multitudine, tum pulchritudine, in summâ raptos fuisse admirationem; tot enim simul reperisse vna in domo libros, quot nunquam antea in aliis conspexerant Europæ locis; prægrandi omnes membrana ad æqualitatem compositos, diuerso idiomate, & characteribus optimis manuscriptos, graphiceque & artificiosè concinnatos. Alterum est, Abasinos Imperatores iam inde ab Regina Sabæ per ætates consequentes, summa semper diligentia procurasse, ut sua illa bibliotheca nouis continenter libris augeretur. Habuisse ab Iudæis plurimos, quo tempore illi

illi a Babylonij, Assyriis, & Romanis victi, & in servitutem redacti sunt, plurimos ex clarissima Alexandria bibliotheca, quando Imperatores Romani Titus, & Vespasianus urbem Hierosolymitanam bello subactam solo æquarunt; plurimos, cum Saraceni Arabiam, Persidem, Mesopotamiam, Armeniam, Assyriam, Palæstinam, atque Ægyptum armis ceperunt: omnes enim tunc harum regionum Christianos, belli furorem declinantes, cum ingentibus librorum sarcinis in Æthiopiam se recepisse; quod antea fecerant alij veræ fidei sectatores, cum Ariana hæresis per vicina Æthiopie loca, perque orbem ferè totum non grassari tantum, verumetiam desæuire cœpit; cum item Vandalicus furor turbavit Africam; cum demum Turcarum rex minorem Asiam, Græciam, Constantinopolim, aliâque Europæ loca belli impetu penetravit; nullum enim tunc fuisse hominem catholicum, qui suis cum libris in Æthiopiam, veluti in quâdam salutis & religionis arcem, non confugerit. Tantam denique amplificandæ bibliothecæ in Abassinis Imperatoribus fuisse curam, ut cum Mena, peruagata per Africam fama, accepisset, Carolum V. armis Tunetum occupasse, valdeque insignem & copiosam regis Muleassis bibliothecam, quæ in ea dicebatur urbe esse, cum reliqua præda à militibus fuisset direptam, confestim miserit, qui Ægyptiis, Romanis, Venetis, Siculis, aliarumque provinciarum mercatoribus verbis suis nuntiaret, summo opere se optare cunctos eius bibliothecæ habere libros; darent proinde operam, ut reddito militibus pretio illos recuperarent, & ad se mitterent; omnes se expensas, quæ ipsis emendis, ac mittendis fierent, largiter soluturum. Hac ratione plusquam tria acquisivisse librorum millia, quibus

quibus rei herbariæ cognitio, Mathematicæ disciplinæ, Astrologia, Medicina, multaque alia scitu dignissima continebantur. Cæterum vnde, & quam ratione illa quinque millia cabalisticæ artis volumina comparata sint, si nosse lector velit, rem à nouo auctore sic accipiat. Cùm reges, inquit, catholici Fernandus, & Isabella propriis commodis Dei causa posthabitis, Hebræos ex Hispania eicere, aded copiosa perfidæ gentis examina in alias terræ plagas inde egressa sunt, vt Europam, Asiam, Africam implerint. Vix enim vlla fuit in orbe regio, quam pestis ista non inuaserit. Magna pars diuersis per Ægyptum, & Libyam itineribus Æthiopiâ adierunt. Cùm eos Abassini de rebus Scripturæ sacræ audissent colloquentes, & à lingua Hispanos, à ratione vitæ esse Christi hostes cõperissent, facile intellexerunt, genere & secta facè esse Hebræâ Rem deferunt ad Imperatorem; mittit ille ad cœnobiũ de Alleluia, qui patres familiæ Dominicanæ, hæreticæ censores prauitatis, ex tẽplo vocet ad se. Vbi veniunt, impensè mandat, vt aduenarum causam diligenter examinèt, quod genus hominũ sit, qua lege viuant, quid in Æthiopiam quæsitum venerint. Patres, quod iussum, faciunt. libros primũ, quos secum Hebræi asportant, colligunt; ad reliqua dein progrediuntur. Ex libris Latino quidam, nonnulli Italico, alij Hispano, alij Arabico, alij demum Hebraico erant conscripti sermone. Abassini Hebraicos legere, & Arabicos. Adsciti deinde Europæi, qui reliqua idiomata cognoscerent. Compertum igitur eos libros Rabbinicos esse, Thalmudicos, Cabalisticos. Tunc Imperator, quod Hebræi cõtra Imperij statuta Abassiam intrarint, & amissione librorum, & perpetuo eos exilio mulctauit; adiectis insuper grauissimis pœnis, si

aut

aut confestim ex Æthiopiæ finibus non exirent, aut in illam vñquam reuerterentur. Horum quidam in regnum Borni, in Arabiam alij contulere sese, non sine magno Abassinorum damno, cum nitrati ac sulphurei pulueris vsus, cæteramque ferreos globos iaculandi artem, nondum illis locis notam, eorum hostibus patefecerint. Addit vltimò idem auctor, hos Hebræorum libros in aula quadam fuisse expositos, & ab Antonio Brico ac sociis recognitos; reperta etiam cum iis opera omnia, quæ Raimundus Lullus Cathalanus de arte magica conscripsit. Ex Thalmudicis tandem, & Cabalisticis, (eiusdem rationis plures erant) quosdam Pontificis iussu Romam fuisse delatos, ut si quid inter illorum Hebræorum, & horum, qui nunc Romæ degunt, Cabalam, & Thalmudium esset discriminis, discerni posset. Hæc ille. Sed nullam in monte Amara esse bibliothecam, ex literis habemus, & narratione eorum, qui loca illa diu coluere. Nonnihil librorum est in eo cœnobio, quod Axumum, vel Acazumum dicitur, & à Regina Candace ferunt ædificatum in vrbe Saba, quæ nunc pæne euerfa, & æquata solo nonnulla retinet antiquæ signa pulchritudinis. Quidquid id tamen librorum est, regię bibliothecæ non meretur nomen. Ita referunt, qui rem perpexere, indubitatæ homines fidei, quique, quantum fert veritas, augere magis res Æthiopicas, quàm imminuere desiderat. Quæ auctor idem narrat de Antonio Brico, & Laurentio Cremonensi à Gregorio Pontifice in Abassiam missis, ut Amaranam viderent bibliothecam, deque immensa Imperatorum sollicitudine in ea omni ex parte amplificanda inter fabulas reponatur. Illud enim de Grico Romæ narratum mouit risum audientibus. Scilicet ea Pontificis maximi cura erat,

erat, vt homines in Æthiopiam mitteret, qui Amaranam explorarent bibliothecam (quamuis aliqua tam monstrosa inibi esset) & Cabalisticos atque Thalmudicos iuberet libros deportari, vt eos cum illis componeret, quibus, qui Romæ viuunt Hebræi, vterentur, quos quidem haud scio, an quid Cabala sit, vllomodo agnoscunt. De regis Tuneti bibliotheca quod additur, falsum est, & secum pugnans. Nam Carolus V. Tunetum cepit quatuor & viginti annis priusquā Abassinum Imperium Mena teneret: illud enim anno contigit quingentesimo trigesimo quinto supra millesimum; Mena verò, vt ex literis nostrorum notum est, & iam suprâ animaduersum, Claudio fratri successit anno millesimo quingentesimo quinquagesimo nono. Et de his satis ista.

---

*Quo tempore veri Dei religio in Æthiopia cœperit.*

### C A P V T XVIII.

**Q**ui reginam Sabæ illam, quæ ab austro aut terræ finibus iisse dicitur ad audiendum Salomonem, in Insula Meroe regnasse credunt, ij pro indubitato habent, post eius in patriam regressum, vnius veri Dei cognitionem esse in Æthiopia cœpisse. Reginam videlicet à Salomone edoctam, relicta idolorum superstitione transiisse ad Mosaicam religionem, ea tempestate probatam, illamque suis populis impertiisse. Huic ego haud dubitem assentiri sententiæ. Atque imprimis, vt rem alius retexam, ambiguum esse doctis non potest, duas Sabæ nomine fuisse regiones per orbem

H      bem

bem cognitas. Vnam in ea Arabia, quæ Felix nominata est, non procul ab Erythræo mari, à qua Sabæa thura celebrata Poëtis, & quod multis placet, tres illi reges, Bethlemitico olim nobiles aduentu, Sabæi nuncupati. Alteram ab illa alia non loco solum, verum etiam Hebraica scribendi ratione separatam, quæ in hac, de qua agimus, Æthiopia fuerit, & à Cambisis siue matre, siue sorore (incertum vtra) Meroe postea appellata est. Non me latet, graues auctores asserere, ex Felice Arabia, non ex Æthiopia fuisse Sabæ reginam. Scio quoque alios esse, qui eam velint & in Arabia Felice, & in hac Æthiopia, & in vicina Ægypto latè patente ditone fuisse dominatam; quibus ego etsi non credo, non tamen repugno. Illud volo mihi dent, quod est à petitoribus, hoc præsertim tempore, magis probatum, hanc reginam in Æthiopica Saba sedem sui habuisse Imperij, indeque ad Solomonem profectam. Quas nouus auctor ad hoc firmandum ex antiquissimis literarum monumentis, hodièque in monte Amata repositis, & ex templis ab ipsa regina per Æthiopiam conditis, atque ex rebus talibus affert coniecturas, veluti inanes, & in quibus ad faciendam fidem vis nulla sit, omnino repudio. Alias scio esse validiores, quibus eruditi monentur; sed ex nobis hoc loco, quibus aliud est institutum, intactæ prætereundæ. Quædam indicabo obiter haud abs re aliena, quæ de hac regina traduntur. Variis inuenio dictam nominibus. Quidam Nicantam vocant, Nicotorem alij, plures Nicaulam, non pauci Machedam, quod nomen recentiores historici vsurpant libentiùs, eo quod ita vocatam ab Æthiopibus acceperint. Tanta ferunt præditam fuisse sapientia, & rerum futurarum præsentione, vt habita pro Sibylla sit. Nec desunt,



sunt, qui illam credant, quæ est à quibusdam Iudæa dicta, ea nimirum de causa, quod & in Iudæa fuerit, & fidem acceperit Iudæorum. Nec valde discrepant, qui Sambetam, quasi Sabæam appellant. Eamdem volunt apud Ethnicos fuisse illam, quam quidam Babylonicam Ægyptiam alij, nonnulli Persicam nominant. Vixi quatuor aiunt scripsisse libros, & multa in iis, quæ ad Christi mysteria spectant, neque in hac re ulli ex aliis Sibyllis cessisse. Sed hæc incerta. Vincentius Ferrerius, vir doctrina & sanctitate clarissimus, scriptum nobis in quodam sermone reliquit; cum Regina Sabæ ab Salomonis aula in patriam reuerteretur, torrentem in via reperisse, & in eo pontis loco transuersum lignum; in quo cum pro humani generis salute figendum Christum diuino instinctu cognosset, ex mula, qua vehebatur, subito descendisse, lignum flexis genibus, & effusis lacrymis pronâ adorasse, nec fuisse passam, vt ullus ex toto comitatu pedibus in illo insisteret. Misisse deinde ad Salomonem nuntium cum literis, in quibus narraret, quid sibi in itinere esset diuinitus patefactum. Salomonem re cognita, tolli inde lignum iussisse, & abscondi sub terra; id verò in eo factum fuisse loco, in quo postea constructa est Probatica illa Piscina, Ioannis Euangelio celebrata. Hæc ille, & alia de eodem ligno ab aliis accepta ad sanctissimæ Christi Crucis commendationem in eo, quem dixi, sermone piè narrat. Nec desunt, qui vera esse coniecturis suadeant. Mihi satis de Regina Sabæ ista tetigisse, quam cum multis veteris legis ritibus ac cæremoniis æterni Numinis cognitionem fidemque à Salomone accepisse, & suis Æthiopibus communicasse, vt valde simile vero est, ita multorum literis constanter traditum. Quanto autem post eius mor-

tem tempore apud eas gentes sincera fides perstiterit, id quidem definiti certò non potest. Multos etiam nunc superesse Iudæorum ritus, haud est in dubio, vt postea ostendam. Apud nonneminem reperio Melilechi filium eiusdem Reginæ nepotem, nomine Iosue, statim à parentis obitu, relicta vnus Dei religione ad inanum simulacrorum transiisse cultum, & genti suæ, vt idem faceret, propositis pœnis præcepisse. Atque ita factum, vt ab eo tempore Æthiopum populi ad Idola redeunt, & sacra quædam, quæ fuerunt edocti, ex Iudæorum religione retinentes, simul fuerint, & cæremoniis Hebræi, & professione gentiles. Sed in rebus adeò vetustis haud facile est quidquam scribere, quod difficultatibus sit expeditum. Venio ad fidem Christi, quam nemo est qui negat ab ipso statim Apostolicæ prædicationis exordio fuisse in Æthiopiam faustè feliciterque ingressam. Duo secundum Deum eius illuc inferendæ propagandæque commendantur auctores. Præcessit Indica (hoc dicitur fuisse Reginæ Candacis Eunuchi nomen) secutus paulo pòst Apostolus Matthæus. Ille ab Hierosolymis, quò adoratum ierat, in Æthiopiam rediens, à Philippo Diacono Christiana instructus disciplina, & sacra lympha tinctus, quam acceperat religionem, cœpit suis impertiri. Hic distributo Apostolis orbe, Æthiopiam sortitò obtinuit, ad quam se conferens, quæ Eunuchi opera seri fides cœperat, subacto maioribus aratris solo, longè latèque per vniuersam gentem, labore quidem magno, sed non impari fructu, disseminauit. Quod Iouius habet Bartholomæum Apostolum, & Philippum Diaconum Christi fidem Æthiopes docuisse, cum probatis historiis parum cohæret. Parum & illud quod tradunt alij, Apostolum

stolum Thomam apud eosdem *Æthiopes* Euangelii prædicasse. Longius videntur à vero deflectere, qui hanc *Æthiopicam* procurationem Philippo Apostolo asserunt commendatam. Philippus quidem diaconus ea ratione *Æthiopum* magister dici potest, quòd Eunuchum Indicam, qui Christianam ipsis fidem primus indicauit, Christi mysteriis instructum aqua abluerit salutari. Probabile etiam videri potest Apostolos Thomam, Philippum, Bartholomæum, dum ad alias oras pergerent, per *Æthiopiam* transiisse, atque obiter, ut se occasio ferebat, Christum illis gentibus denuntiasse. Eam tamen provinciam Matthæo peculiariter obligasse, & novis Euangelij radiis ab eo fuisse illustratam, ut constanter traditur, ita absque dubio credendum est. Quæ de Eunuchò narrantur, hæc ferè sunt. Domum ab Hierosolymis reuersum, diuina Euangelij mysteria Regina Candaci, cui erat Iuditha nomen, primùm exposuisse, eamque adiunxisse Christo. Deinde prædicando *Æthiopiam* cepisse peragrate; cùmque in id opus incumberet, de aduentu Matthæi nuntios accepisse; tunc accepta à regina facultate obuiam Apostolo iisse, suamque cum ipso in prædicationis negotio coniunxisse operam. Tandem, & Matthæi, & Eunuchi, & reginæ industria effectum, ut pulso penitus ab vniuersa *Æthiopia* idolorum cultu, omnes eius regionis gentes Christi imperio subicerentur. Cæterum non ideo Eunuchum quiesse, sed Matthæo & regina consententibus atque approbantibus, rubro mari transmissò ad alias orbis partes Christianæ fidei detulisse notitiam, & Arabiam, Persidem, Indiam, innumeròsque Orientis populos perlustrasse. Postremò in insula Taprobana, quam nunc Zeilanum esse peritiores do-

cent, illustri martyrio finem vitæ imposuisse. Multa hisce de rebus scribunt aliqui. Ea ego neque simpliciter approbare ausim, neque reprobare: suum cuique de illis censendi iudicium sit. Videat tamen nouus auctor, an quæ de hisce rebus tradidit, cum iis, quæ de Matthæo, & ipsius morte ab Hirtaco rege illata ab Ecclesia recipiuntur, rectè cohæreant. Illud inter plerosque videtur constare, ex gentiliū regionibus istam Abassinorum Æthiopiam, vel omnium primā Christi fidem fuisse amplexam, vel inter primas, & per annos multos integram sinceramque seruasse, permixtis ex ignorantia quibusdam Hebræorum cæremoniis ab reginæ Sabæ tempore ex Iudæa aduectis. Sed iam hîc potissima nobis oritur cum nouo auctore concertatio. Is enim ab illo suo Abassino malè instructus, multis & locis & verbis contendit, numquā Abassinos fuisse vllis hæresum erroribus irretitos, numquam ab Ecclesia Romana, & à Romano Pontifice diuisos; sed Christianam fidem, vt eam à Matthæo, & Indica susceperant, ad hanc vsque diem perfectissimè custodisse. Quæ assertio, quia apertissimæ veritati, quod iam dixi, & læpius repetere oportet, aduersa est, non debet à nobis absque debita confutatione præteriri: præsertim cùm eo consilio cætera eius commenta adducamus, vt ex iis, quam hac vna in re habere fidem mereatur, perspicui queat. Verùm antequam ad certamen procedam, lubet in vnum corpus coniicere, quæ circa Abassinorum mores ad Religionem vtrumque spectantes ex variis scriptoribus carptim collegi. De quibus siue ea vera, siue falsa sint, nullam mihi cum vlllo homine volo esse controuersiam. Non enim sic illa scribo, vt in omnibus fidem exigam à legentibus, cùm neque ego prorsus ve-

ra esse mihi persuadeam. Quæ tamen ex literis accepi religiosorum Societatis, qui nunc in Æthiopia versantur, vel superioribus annis inibi vixere. iis certè ut habeatur fides, illi ipsi merentur, qui scripsere, cum & ipsi per se ea potuerint experiri, & ab omni sint alieni suspicione. quippe quibus neque vera narratio parere damnum queat, neque falsa vtilitatem; & ad eos scribât, apud quos sciant multos esse, qui Æthiopica illa loca diu coluerint, gentisque mores accuratè annotarint; ut hac ex parte iure vereri debeât, ne quid ab ipsis scriptum deprehendatur, quod aliqua ratione à veritatis norma declinet.

*Qualis Abassinorum in sacra propensio.*

## C A P V T XIX.

**Q**uanta olim fuerit Abassinorum in Religionem atque in res diuinas propensio, argumento sunt multa quæ adhuc apud ipsos visuntur pietatis indicia. Deiparam Virginem præcipua quadam beneuolentia ferunt coluisse; ipsique adhuc in terris viuenti posuisse templum, quod in tota Æthiopia à suscepta Christi fide primum fuerit. Fundasse illud volût in vrbe Acaxumo Reginam Candacem, eo ipso in loco, ubi ab Indica Eunuchò aqua lustrali fuit aspersa. Impositum delubro nomen à S. Maria de Monte Sionis, eo quòd sacer lapis, qui erat in ara maxima, ex illo monte fuerit in Æthiopiam asportatus. Illud quidem de templi fabrica & loco potest probabile haberi; quod de lapide additur valde mihi dubium, & eo ma-

ximè , quòd sic ab incertæ fidei auctore , sine grauiori testimonio traditum. Scribit etiam nouus auctor omnes festos solemnèsq̃ sanctissimæ Virginis dies, quos Romana celebrat Ecclesia , magna apud Abassinos celebritate agi : sic eos Assumptionem venerari, vt & mensibus singulis, decimo quinto die , eius memoriam solemniter recolant, & quotannis tres ac triginta dies continuos, statò tempore in eiusdem venerationem celebrent : hunc verò morem ex vetustis Imperatoribus quemdam, magnæ matri apprimè deditum instituisse. Purissimæ Conceptionis celebrandæ talem ait fuisse causam. Quo primùm tempore insulam Mazuam à Saracenis habitatam Lusitana classis occupauit, Didacum Lupium Sequeriam, Indicum prætorem, Mahumetis templum , quod inibi erat, Ecclesiastico prius ritu expiatum sanctissimæ Virginis conceptioni dedicasse. Re à vicinis Æthiopibus non satis intellecta, quem Lusitani Conceptionis nomine festum diem agebant, cum ipsos nomine Natiuitatis tamdiu celebrasse , donec superioribus annis Alexander Cardinalis Farnesius, Æthiopiarum protector, multa à Pontifice piacularia dona obtinens , eaque Apostolico contenta diplomate, ad Abassinos mittens, effecit, vt ij quotannis octauum Decembris diem conceptæ Virgini dicarent. Ita nouus auctor. De hoc festo nihil habeo certi, quod dicam. An apud eas gentes celebretur, valde mihi dubium : vero similis non celebrari. Quòd illud à Lusitanis acceperint, omnino falsum, cum à Romanis moribus auersi, Romanâ sacra oderint magis, quàm prosequantur. Protectorem Æthiopiarum Alexandrum Farnesium fuisse, ea ratione concedi potest, qua is Lusitaniz Protector fuit. Idem auctor scribit, natiuitatis Christi memo-

riam

riam omnibus mensibus die vigesimo quinto recoli;  
idque ab eodem illo, cuius meminimus, Imperatore  
fuisse institutum. Credat qui volet, haud magni in-  
terest. Gestare Abassinos cruces quocumque eant, à  
pluribus traditur; Ecclesiasticos, & nobiles ex ebeno,  
reliquos ex viliori materia; priores manu, posteriores  
collo appensas. Est, ut aiunt, in Ecclesiasticis, & no-  
bilibus talis significatio, ut illi scripturis, hi armis, cum  
erit opus, crucis fidem ab hostibus defendant. Alij  
tradunt solos Ecclesiasticos cruces portari, quod cre-  
do verius. Qui sacris dicati sunt, eos etiam ferunt  
æream phialam benedicta aqua plenam secum ferre  
solere, & antequam edant, & bibant, cibum illa, ac  
potum leuiter aspergere; eandemque petentibus dis-  
pertire. Imaginum sacrarum antiquissimus apud eos  
usus, & summa semper veneratio. Depingunt Chri-  
stum, Christi que matrem, & beatos spiritus, Patriar-  
chas, Prophetas, Apostolos, cæterosque omnes, quos  
frui credimus Dei conspectu. Vix templum est, in  
quo Georgij martyris non visatur effigies: magno in  
ipsum feruntur studio. Non utuntur anaglyptis, vel  
quia cælandi & sculpédi ignorant artem, vel ob alias  
causas, quas ignoro. Nouus auctor scribit, ex insigni  
horum Æthiopum in Sanctorum imagines venera-  
tione ortum, ut Philippus VII. Imperator, qui Arij,  
iniquissimi hæresiarchæ ætate vixit, & Ioannes ille  
sanctus, cui singularem fuisse ait cum magno Basilio  
amicitiam, statuerint, ne quis absque Episcopi sui fa-  
cultate ullam domi habere posset vilius sancti effi-  
giem; ne fortè, quod plerumque fit, assiduitate eam  
videndi de ipsius cultu quidquam remitteret. Ob hæc  
causam quosdam esse, quorum opera in domesticis  
imaginibus inspiciendis utantur Episcopi. His incum-  
bere,

bere, semel in anno, stato die, eorum, quibus concessa habendi imagines facultas est ædes adire; quàm apto, quàm honesto, quàm decente sint in loco diligenter perferutari. Si quem deprehenderint, cui hac in re culpa sit, multam illi imponere; & aliquando, quam habet, imaginem auferre. Vt omnibus in usu est crucem gestare, ita nulli vetitum eam domi habere. Crucifixi tamen Christi simulacrum habere domi, nemini prorsus concessum; quodd nefas ducant, rem tam augustam ac sacrosanctam sub peccatorum hominum tectis esse. In templis tantum depingitur, secreto in loco; semperque velo tegitur. Sextis solum anni feriis illa ipsa hora, qua Christus creditur Patri spiritum reddidisse, accedere dicuntur sacerdotes, accensis cereis, & velum remouere; tum populum vniuersum ingenti concursu in templum conuenientem flexis genibus, magnisque clamoribus implorare veniam; & ostensum sibi signum religiosissimè venerari. Illud à pluribus, & verius proditum, quæcumque Christi, Virginisque Deiparæ, & reliquorum cœlituum simulacra Æthiopes fingunt, nigro ea efformare colore; illa contra colore albo, quibus vel pessimos homines, vel ipsos cacodæmones, volunt exprimere. Ita Christum, & Apostolos in vltima cœna depingunt nigros, Iudam proditorem album; nigrum Christum patientem, albos Anan, Caipham, Pilatum, Herodem, cæteramque turbam carnificum, & Iudæorum. Similiter Michaelem cœlestis principem militie nigrum efformant, album cacodæmonem eius pedibus conculcatum. Ieiuniis aded, dediti sunt, ut ea in re à præscripto rationis dicantur recedere, cum ne ipsi quidem ægri à communi lege, eximantur. Religiosæ quædam familiæ, ut etiam sit apud nos, ex instituti sui



fui ratione semper abstinere à carnibus; quod illis in locis haud leue est, cum longè distent à mari, & pisculentis lacubus ac fluuiis plurimum careant. Solemne est omnibus, bis in hebdomada ieiunare, quæ fuit olim in tota Christi Ecclesia receptissima consuetudo. Ieiunant primùm die Mercurij, quòd tunc de tradendo ad mortem Christo consilium inter se Iudæi inierint. Iterum die Veneris, quòd tunc affixus ligno Christus animam efflavit. His autem abstinentiæ diebus usque ad occidentem solem nihil omnino degustant; id faciunt more magis veteri, ut quidam aiunt, quàm ut Hebræos, aut Mahumetanos imitètur. Cum ieiunant, poma aliqua pani adiiciunt, & coctas sine oleo ac butyro herbas; illo carent; hoc victui tunc adhibere, graue ipsis piaculum. Multis anni temporibus, ut aduentus feriis, sex primis Ianuarij diebus, cum reges Magi Christum recens ortum adoratum ibant, ultimis nouem, qui ferias quadragesimales præeunt, primis quatuordecim Augusti, ante assumptæ Virginis celebritatem, ab esu carniū dicuntur abstinere, & in meridiem differre prandium. Annis item superioribus in memoriam pœnitentiæ, quam olim Iona prædicante egerunt Niniuitæ, primos tres à Purificatione dies adeò religiosè strictèque dicuntur ieiunasse, ut ne infantes quidem lactentes, nisi semel tantum in die, admitterentur ad mammam; nunc abolitam ferunt eam consuetudinem, ut plerasque alias à maioribus usurpatas. Aiunt quoque vltima Quadragesimæ hebdomada viros nobiliores vestibus se induere ad luctum aptis, easque plerumque nigras esse, vel cæruleas. Omnes item tam viros, quàm fœminas patientis Christi memoriam ita venerari, ut illis diebus, & à mutuis inter se colloquiis, & à publico ac luce,

luce, quantum fieri potest, abstineant cum magna doloris significatione. Quem seruent in mortuis sepeliendis ritum, nihil traditur ab auctoribus constans. Quidam aiunt efferri funus præeunte cruce, in altum sublata; recitari S. Ioannis Euangelium, dum corpus sepulturæ datur; certis postea diebus pro defuncti anima erogari pauperibus eleemosynas, nihil amplius fieri. Similia alij. Nouus auctor scribit, vbi aliquem decessisse cognitum, quatuor illicò flamines ex iis, qui templi sunt addicti ministeriis, cum lustrali aqua, cruce, & thuribulo, sine lumine tamen, defuncti domum petere; præmissò inibi certo precum numero, summa illum celeritate ad templi ostium deportare; tum cæteros accedere sacerdotes, cantuque funebri alias recitare preces, thurèque suffitum cadauer deferre ad cœmeterium, & terræ tradere. Neminem in templo sepeliri, nec vllum fieri pro defunctis sacrum, scribunt multi. Illud prius nouus auctor probat, reprobatur posterius, asseritque sacrificia pro mortuis numquam in templo, sed in cœmeteriis peragi; verùm cum Ioanne de Sanctis pugnat Dominicanæ familiæ religioso, qui illis fuit in locis, & de Æthiopis rebus librum scripsit, typisque mādauit anno sexcentesimo octauo post millesimum, hic rem expertus affirmat, nulla apud Abassinos sacra pro defunctis fieri; idem & ab aliis, quibus credendum, sine dubitatione assertum; nec mirum cum purgatorium esse negent, vt dicendum postea. Hunc tradit nouus auctor Imperatoris sepeliendi modum. Vbi, inquit, animam efflat Imperator, balsamo primùm conditur; omnes deinde quotquot in vrbe Saba sacerdotes sunt, statim conueniunt, & in attratam lecticam ingentis elephantidorsio impositam, cadauer efferunt. Tum ad itin-

ris

ris securitatem mille stipati militibus, qui atro etiam operiti sunt amictu, cum magno hominum aliorum comitatu, pergunt ad montem Amaram. Quà transeunt, apparatu magnifico, sed lugubri, in vrbes & oppida recipiuntur. Cùm ad montis radices ventum, omnes ex utroque cœnobio tã monachi, quàm equites illuc descendunt, exceptumque cadauer deferunt ad sepulchrum. In ipsa montis planitie Imperij principes comparent, & funus inde cum cæteris ad cœmeterium ducunt. Plurima ibi sunt sepulcrorum monumenta magnificè extructa, ex quibus vnusquisque Imperator, dum viuit, illud designat, in quo velit post mortem corpus suum condi. In eo igitur illud depouunt, & summa cum dignitate funeris exequias dies triginta continenter prosequuntur. Hæc ille, quæ fictitia esse, iam ex iis constat, quæ de monte Amara, & similibus dixi. Illud quoque incredibile, Sabæ sacerdotibus lege impositum, vt imperatoria cadauera semper efferant, & ad montem Amaram ex loco, vbi obeunt, deportent. Cùm enim non vno tantùm in loco omnes Imperatores diem obeant, sed in diuersis, & vnus sæpe ac plurium mensium itinere inter se diffitis, quorum aliqua ab vrbe Saba, quæcumque illa sit, remota esse necesse est, quî possunt prædicti sacerdotes eò semper contendere, vbi moritur Imperator, vt eius funus ducant, & ad montem Amaram deferant cadauer?

*Quibus*

*Quibus ceremoniis dicatur uti Imperator certis  
quibusdam anni diebus.*

## C A P V T    X X .

**S**cribit nouus auctor, solere Abassinum Imperatorem aliquot per annum diebus in publicum se dare cum magna pietatis significatione. Primùm eo die, qui Inuentæ cruci sacer est. Ita rem proponit. Pridie eius diei, quo Christi Crucis celebratur Inuentio, inclinante ad occasum Sole, apto extra urbem loco tabernaculum excitatur, elegantia pulcherrimum. Ara in eo temporaria magnificè instructa; in hac Crux cedrina, illam referens, ex qua vita Dominum pependit. Die insequenti domo Imperator egreditur elephanto infidens, senatoribûsque & aulicis circumseptus, tabernaculum petit; ad quod perueniens, ex elephanto defilit; ingreditur; ad genua accidit; piè crucem adorat; vestibis detractis nigra sumit indumenta. Idè cæteri faciunt, quod Imperator; qui ad aram accedens, crucem reuerenter in manus accipit, eamque pedes, aliis ordine sequentibus, in urbem defert. Ad palatium deueniens, regium intrat facellum, ibi crucem reponit; per horæ quadrantem genibus flexis mysterium contemplatus, suum se in cubiculum recipit. Sic & reliqui. Deinde ipso Palmarum die, comitatu magno templum petit; & alto sedens folio diuinis interest officiis. Vbi auditur, Passio Domini nostri Iesu Christi, continuò relinquit thronum, imperatoriòque exutus habitu, illas ipsas vestes induit, quibus, cum erat in monte Amara, utebatur. Cùm cæteri imitantur

tur; pretiosa sibi detrahunt indumenta, & alia sumunt coloris attri, & religiosè modesta, quæ omnibus illis sanctioris hebdomadæ gestant feriis. Ritus huius Alexander I I I. auctor fuit; à quo etiam institutum, ut per eam hebdomadam à negotiis abstineret Imperator, nec alios haberet in comitatu, quàm Lusitani Regis, & Indici proregis legatos, mercatorum Italicorum Consulem, aliòsque ad Latinum orbem spectantes, quos quinto eiusdem hebdomadis die mensa dignatur excipere. Eo die, qui resurgenti Christo dicatus est, iisdem cum legatis, cum Italicorum Consule, aliisque Latinis, & cætero aulico comitatu in templū se confert, ut sacro intersit. Vbi canitur, Gloria in excelsis Deo, quas die Palmarum assumpsit vestes, eas tunc deponit, & aliis se lætioribus ac pretiosioribus induit. Ita cæteri faciunt. Peraçto sacrificio, in quo omnes diuino reficiuntur cibo, horam integram agendis habendisque Deo gratias eodem in loco insumunt. Tunc ad palatium pedes redit Imperator; nec amplius eo die foras exit. Die insequente, sacro finito, tres magnificentissimè apparantur mensæ; suum cuique peculiare instrumentum, & suus abacus. Vasa in vno aurea, in altero argentea, in tertio fictilia, fabre tamen & eleganter elaborata. Primæ mensæ cum duodecim sacerdotibus accumbit Preteciannes: secundæ legati cum cæteris Latini orbis nobilibus: tertiæ regum filij cum magni Senatus consiliariis. Mensis post prædium sublatis, suum singuli munus Imperatori offerunt, siue ex crystallo, cui magnum apud Abassinos pretium, siue ex materia simili. Post hæc accepta facultate discedunt regum filij, & significandæ lætitiæ equis per urbem vecti concurrunt inter sese, & pugnantient simulacra. Huic spectaculo nobiles inter-

sunt

sunt Europæi ab aulicis inuitati. Ad extremum de cæremoniis dicendum, quibus Preteciannes utitur die illo, quo Eucharistiæ mysterium celebratur, Corporis Christi festum vocamus. Usque ad Paulum tertium, ait idem auctor, festi huius ne fama quidem in Abassia fuit. Vbi is ad summum Pontificatum est euectus, cum Petro Abbate Abassino colloquens, & multa de Æthiopicis rebus partim ad gubernandi rationem, partim ad religionem spectantia sciscitans, hominem rogauit, num apud suos dies hic solemnis festusque haberetur. Cum Petrus negasset, remque iustæ ignorationi tribuisset, Pontifex diploma expedit in Æthiopiam, quo statuit, ut sacratissimæ Triadi festus per totam Abassiam dedicaretur dies, qui esset à Pentecoste septimus (ignota enim apud ipsos hæc etiam consuetudo erat) quinto verò ab hoc, magna cum iucunditate, externoque paratu Eucharistici beneficii in homines collati, recoleretur memoria. Ea namque Dominica die, quæ nunc Trinitati dicata est, Apostolorum per orbis terrarum prouincias diuisionem Abassini celebrabant. Peruenit Paulina in Æthiopiam constitutio, annis duobus ante Imperatoris Davidis obitum. Hic pro sua eximia in Romanam sedem obseruantia, & ut erat egregiè pius, & sacrorum rituum amans, statim Pontificium mandatum seruari iussit. Petrus Abbas, qui non minus latinitatis, quàm scholasticæ Theologiæ erat apprime gnarus, officium hymnorumque à sancto Thoma de Eucharistia compositos, ex Latinis fecit Abassinos, qua nunc lingua in Æthiopia decantantur. Per omnes ergo Imperij vrbes & oppida ad varia templa supplicationes fiunt & pompæ. Defertur in iis summa cum maiestate & veneratione Christi corpus, vniuerso clero,

clero, & sancti Antonij monachis, qui vbique sunt, comitantibus. Idem sancti Dominici religiosi præstant illis in locis, quæ cœnobiis de Alleluia, & Plurimanos sunt propinqua. Comitari quoque Preteianes pompam solet, & augustissimum mysterium ponè sequi. Dum in templo est, duos manibus portat cereos, accensum dextra, extinctum sinistra. Vbi exit à templo, eos tradit duobus famulis ferendos, cuique suum: cum ad templum reuertitur, rursus cereos capit, & propriis, vt antea, portat manibus. Talis huius cæremoniz sensus est. Extincto cereo, aiant, significari veteres figuras, hoc Sacramentum in antiqua lege adumbrantes, quæ ipso in vltima cœna instituto protinus extinctæ sunt, & quodammodo diffugere, vt ad Solis præsentiam diffugiunt vmbre. Accenso cereo eiusdem mysterij indicant fidem, quam & viuam esse, & splendere necesse sit. Hanc igitur fidem habere sese tali cæremonia Æthiopum Imperatores testantur, idque volunt vniuerso orbi esse notissimū. In hisce Eucharisticis pompis cereæ faces ardent innumeræ, nec magno sumptu, cum ea plaga ceræ sit feracissima. Qui iisdem pompis comitantur, saltantes plerumque, pedibusque choreas plaudentes cum ingenti tripudio & exultatione procedunt. Præteritis mysterium ex alto, despiciere, inexplabile scelus est: nemo igitur in fenestra tunc apparet, nemo in solario, nemo in alio sublimi loco. Omnes domo pedem efferunt, ante ianuas proni curuantur, tundunt pugnīs pectora, & sacramentum supplices adorant. Si qua in plateis, per quas pompa ducitur, cœnobia sunt monialium, ne iis quidem fas rem ex alto despectare. Ad templi ianuam congregantur omnes, in duos ibi diuisi ordines, ora & capita velis tectæ, procumbunt humi,





celebraret. Fidem, inquit, superant quorundam substructiones, quibus iure cedunt septem illa, quæ tanta apud omnes gentes in admiratione fuerunt, orbis miracula. Multa in asperis & abruptis effossa sunt cauitibus, nec singula in multis, sed in singulis singula. Clarissima sunt, quæ à Golgota, à sancto Salvatore, à sancto Emanuele, à sancto Georgio, à Bethëlem, à Marcoeo, à Lalibela nomen habent. Primum cœnæ viginti palmos longum est, septuaginta duos latum. Quinque pilis innititur fornix, binæ sunt ad singula latera, in medio vna. Tectum planum est, & pavimento par. Multæ hinc inde in parietibus apparent fenestræ, mira concinnitate & elegantiâ fabricatæ. In ara maxima ad sinistram partem incisum est sepulchrum illa ipsa forma, quam illud habuit, in quo Christi corpus à Rumenfi Iosepho conditum fuit. Bina eminent ad portam dextram Petri, & Ioannis Apostolorum simulacra, in eodem sculpta saxo. Præter communes aras ex utroque templi latere assurgentes, sacella duo sunt eximio perfecta opere, in quadrum efformata. Binis vnum, & quinquagenis quaque versum porrigitur palmis, duplici distinctum ordine columnarum, quæ extremos inter parietes triplicem sustinent fornicem. Alterum duodenos ex qualibet parte habet palmos: quæ respicit patentem aerem frequentibus, & factis affabre, veluti inter punctum fenestellis: sub ipso fano domus est, concamerata, fano eidem magnitudine æqualis. Circum effunditur peristylum, vasto amplum circuitu, eius aræ pavimento templi aliquanto depressior. Atque hæc quàm multa, quàm varia in hoc immensi delubro se ostendant, sic in vno omnia & eadem sunt incisa saxo, ut ne minimus quidem aliunde adglutinetur lapis, ali-

ve rei alterius materies extrinsecus adiungatur. Ingressum in templum præbet excavata in eadem rupe pergula, alta latæque palmos tredecim. Super hoc verò ædificium, supérque alia generis eiusdem patentes sunt campi arboribus consiti, quos interdum non exigua flumina interfecant. Hæc de templo scribit, quod Golgota dicitur. Pergit in hunc ferè modum alia describere. Sancti Saluatoris, inquit, fanum in alia est effossum rupe, ducentos patens in longitudinem palmos, centum & viginti in latitudinem. Quadruplex columnarum ordo quinque distinguit fornices, qui inter eos medius est, reliquos superat altitudine, alij ex utraque parte æquales. Singuli ordinis columnas habent septenas, quadrata figura; quæ quolibet in latere quatuor colligit palmos. Parietes mitro sunt structi artificio. Mille visuntur in iis non aliunde adsciti, sed in eodem calatæ saxo rerum species, specula quæ vultus reddunt intuentium; herbæ, arbores, flores, frondiùmque & pomorum implexus, atque contextus, varietate avicularum aliarumque animantium effigies pulcherrimè figuratæ; atque inter hæc apto ordine, & paribus dispositæ interval-  
lis late patentes fenestrarum aperturæ. Ara maxima in magnam eleuatur altitudinem. Quatuor pilis culmen imminet, excurrentibus in gyrum pergulis. Prima ianuà à parte incipit interiori, magnis extensa arcibus, qui paulatim ad angustias redacti, ianuam efficiunt per exiguam, nouem tantummodo altam palmos, latam quatuor cum dimidio. Eiusdem formæ & magnitudinis duæ aliæ ianuæ sunt, quæ duobus adiacent templi lateribus. Extra primam ianuam fornicata cernuntur propylææ, lanceis duabus alta, con-  
nexa inter se testudinibus: palmis duodecim à templi  
parieti

parietibus distant; singula septenis pilis incumbunt, in quibus variae apparent lunulae sculptura eleganti. Sub rupe aditus in templum est per ingentem pergulam, cuius altitudo lanceam superat; longitudo passus colligit octoginta, tanta est latitudo, ut decem simul excipiat homines in aciem dispositos. Atque haec omnia vnico sunt incisa saxo, sicuti & non pauca alia, quae neque fabricae magnitudine, neque rerum varietate, neque artis praestantia illis, quae sunt descripta, cedunt. Haec nouus auctor, multaque alia his similia. Aliqua esse in Abassia fana in rupibus excauata, digni hinc auctores scripsere. Qualia hic auctor describit, haud esse credo; neque enim ignota essent nostris, qui illic sunt; nec si nota essent, in literis siluissent, cum referant minora. Hac de re ex Antonio solum habeo, omnia templa figurae esse rotundae, & duplici circumcincta porticu. Tradunt alij, magnum templis honorem haberi apud Abassinos; eos olim quoties aliquod essent ingressuri, Mosem imitantes, calceos sibi detrahare consuesse. Nouus ille auctor ait, Romanorum Pontificum iussu sublatam eam consuetudinem temporibus aliis, praeterquam quadragesimali. Sed improbable eius rei curam suscepisse Pontifices, & morem abstulisse, qui non officit Religioni, sed proficit. Verum est, plerosque nudis pedibus intrare templa, neque ad id opus esse, ut exuant calceos, cum ijs non utantur. Nemo in templo aut deambulat, aut ridet, aut cum alio colloquitur. Aiunt etiam nefas esse, inibi spueri, oportere proinde, ut sicco omnes stomacho sint, ne a templis arceantur. Canes, & quauis aliae animantes, quarum solet esse in urbibus usus, non templi solum, verum etiam caemeterij prohibentur ingressu. Quibus hominibus praeter templa

pla transire necesse est, si mulis aut equis vehuntur, antequam ad ipsa accedant, in terram desiliunt, & aliquantulum spatium conficiunt pedibus, donec non modicè ab iis distent, tunc fas equos rursus conscendere, & iter sequi institutum. Nemini licitum in templo sedere. Ad lassitudinis subsidium multa sunt ad ianuam hastilia, furculæve iis persimiles, quibus innixi incedunt, qui aut pedibus capti sunt, aut ipsis sustineri nequeunt ob debilitatem. Hisce adminiculis incumbunt qui vel senectute sunt confecti, vel grauantur morbo. Talis communiter dicitur esse templorum dispositio, ut ara maxima in medio sita à reliquo spatio, quod ad ostium procurrit, diuidat odeum. Inter ostium & aram ab vno ad alterum templi latus bina tenduntur vela. Inter prius & aram illi tantum esse possunt, qui sunt initiati sacris. Inter vtrumque nemo est, nisi minoribus sit insignitus ordinibus. Spatium reliquum, quod inter posterius velum & ianuam interiacet, occupari à laicis potest. Tempia sunt, quæ à solis masculis, alia, quæ à solis adeuntur foeminis. Si aliqua vtrisque sint communia (quod in exiguis pagis, in quibus vnum duntaxat templum est, aiunt contingere) peculiares assignantur veluti stationes, ita discriminatae locis, ut intueri se masculi & foeminae non possint. Alia de templis & eorum veneratione traduntur his paria, quæ missa facio.

---

*De Abassinorum festis, & aliis ad sacra pertinentibus.*

## C A P V T XXII.

**S**cribit nouus auctor, apud Abassinos festa esse, tam quæ mobilia, quam quæ immobilia dicuntur.

tur. Peragere eos sicuti nos, quadragesimales ferias, Paschata, sacros Christo & eius Matri dies. Iam inde ab antiquissimis temporibus Apostolos. Euangelistas, Athanasium, Basilium, Antonium Archimandritam, Eunuchum Candacis reginæ, & reginam ipsam, alióque ex Abassia Cœlites, atque inter eos præcipuo quodam honore Claram Dominicani ordinis alumnâ, & magna omniû cum lætitiâ Theclaymanothum, vitum sanctitatis fama celeberrimum, statis diebus colere solitos. Præterea ex mandato Imperatoris cuiusdam, cui semen Iacobi nomen fuit, Michaeli cœlestis Militiæ principi, cæterisque Angelicis mentibus primum cuiusque mensis diem dedicare. Postquam verò cum Latina Ecclesia agere cœperunt, festa multa, quæ prius ignorabant, ab eadem Ecclesia accepisse, eaque nunc solemni ritu celebrare. Quod hac de re ex Antonio Fernandio habeo, hoc est. Plurimos esse apud Abassinos dies festos, qui non sunt apud nos. Mensibus singulis Christi optimi maximi, eiusque sanctissimæ Matris, Archangeli Michaelis, & religiosi cuiusdam, quem Spiritus sancti opus vocant (is Theclaymanothus videtur esse) festa peragere. Maiori celebritate Ioannis Baptistæ mortem, quàm Natiuitatem, & Crucis Exaltationem, quàm Inventionem colere: Hæc ille, non plura. Non dissimilia ab aliis traduntur. Quod ergo hisce retro annis vlla Cœlituum festa à Romana Ecclesia, acceperint, falsum est, nec facile creditu. Quomodo enim Romanos acciperent mores, qui Romanam Ecclesiam hostiliter oderant? Quis item novos factorum ritus, nouaque aliunde adscisceret festa, Abuna repugnante, qui ne à gradu cadat, Romanis moribus impensè resistit. Illud etiam hîc & locis aliis obseruatu di-

gnum, nouum hunc auctorem multa sæpe narrare ad religionem attinentia, quæ Abassini Imperatores decreuerint; viderique illa, vt ritè & iure statuta approbare, ac si ipsos Imperatores legitimos sacrorum Antistites agnoscat. Sed fortè dicet, tributam ipsis ad eiusmodi decreta amplam à summis Pontificibus auctoritatem; sic enim solet oppositiones declinare. Ita deinde scribit. Ecclesiastici diuinum officium hoc modo recitant, Matutinum duabus horis ante lucis ortum; Tertiam horis tribus ante meridiem; ipso in meridie Sextam; hora tertia pomeridiana Nonam; prius sub occasum Solis recitabant Vesperas. Completorium, Primam, & Laudes ignorabant; idcirco nullum his designatum tempus. More vetusto Psalmos, & hymnos, & alias canebant preces. Ad Psalmi cuiusque finem, Gloria Patri, & Antiphona, vt modò fit, adiungebatur. Nicæno utebantur Symbolo; utebantur etiam litaniis: sed in iis nihil erat aliud, quàm Sanctorum inuocatio, præsertim eorum, qui fuerunt patria Æthiopes. Hæc ad vsque Clementis VII. Pontificatum, antequam Latinæ Ecclesiæ res ipsis notæ. Eo autem ex tempore, aperto mari, & patefacta liberè hinc inde commeandi via, Romanas ceremonias ritusque adsciuerunt, & sicuti nobis moris est, ita nunc diuina, peragunt. Nihil ex scripto recitant, sed memoriter omnia. Cùm Matutinum dicitur, præter consuetas, quæ ante aram, lampades sunt, in quibus aruina pingui, loco olei, fouetur ignis, lumē aliud neque in templo, neque in odeo est. Non alternis, sed omnes simul singulos decantant Psalmorum versus. Matutini lectio ad principalem templi ianuam inconditis profertur clamoribus. Nemo sedens recitat: concessum senibus, vt ligneis innitantur adminiculis,

cùm

cū sunt defessi. Sacra omnia partim Chaldæo , partim Æthiopico continentur idiomate. Quæcumque proferunt, sic exprimunt, ut oris & corporis motum ad illa accommodent. Itaque pronuntiant flentes, quæ significant fletum; ridentes, quæ risum; saltantes, quæ saltum; contenta voce, quæ clamorem; submissa, quæ silentium: quidquid denique proferunt, ita corporis motu indicant, ut non minus dicentis gestu, quàm voce percipiatur. Ea musica instrumenta, quæ vocamus organa, generis vocabulo ad speciem contracto, quorūque frequens nostris in templis vsus, vsque ad Gregorij XII. tempus, ne de nomine quidem nouerant. Is Pontifex in Æthiopiam artifices misit, qui ea inibi fabricarent. Duo apud eos erant cymbalorum genera, quædam certo è lapide, è ferro alia confecta; vtraque & figura, & sono, & arte nostris dissimilia. Nunc ære vtuntur campano, ut apud nos sit, eoque pulsato populum conuocant ad templum. Supplicationibus ac pompis valde sunt dediti. Singulas post horas, quas recitant, supplicantes sanum circumeunt, eo sæpius, quo festus dies maiori colitur celebritate. Contingit, ut in vna eadēque pompa tricenos & amplius circa templum conficiant gyros. Hisce autem in pompis quatuor, vel quinque argenteæ, baculorum instar, feruntur cruces, totidem thuribula; hæc manu dextra, illæ sinistra; intērque Psalmorum & hymnorum cantus multa miscentur crepitacula. Cæterum tanta pietatis & interni affectus significatione diuina officia peraguntur, ut tenere lacrymas nequeant, qui intersunt. Gregorius XII. Pontifex optimus, ac valde pius collegium sancti Stephani, quod est Vaticano principis Apostolorum tēplo vicinum, sæpius ibat inuisum, ut Abassinos faciē-

tes, ac deprecantes audiret, nec temperare ipse à fletu poterat. Singulis Mercurij ac Venetis diebus Abassini omnes cōfluunt ad templum, vt hora post meridiē tertia, qua spiritum Christus Patri in cruce reddidit, preces inibi frequentes fundant. Dominica Palmarum à nocte media psallentes, atque saltantes diuina inchoant officia, & sacras altarium imagines, quæ per reliquum Quadragesimæ tempus fuerant opertæ, detractis velis populo visendas exponūt, quousque Prima decantetur. Tunc certa precationis formæ ramos benedicunt, & suos cuique benedictos reddunt. Denique per circuitum templi pompam ducunt, in qua suum quisque portat ramorum fascem; cūque ad templi ostia venit, iisdem, quibus Romana Ecclesia, vtuntur cætemoniis: quibus absolutis sacerdos vnus litat, & sub Missæ finem Eucharistico cibo præsentes reficit. Ipsa sacrosancta hebdomada bis tantum sacrificium fit, Iouis, & Saturni diebus. Iouis quoque die hora vespertina, magno totius populi concursu, is qui quolibet in templo cæteris dignitate præit, Ecclesiasticis primum, deinde aliis pedes abluit. Qua finita cætemonia, remanent omnes in templo, & nocte integra agunt excubias. Ibidem Ecclesiastici vsque ad diem Sabbati. postquam sacro finis imponitur, perseuerant. Die Venetis ad meridiem pretiosissimis fanū vestitur peristromatis; vbi principalis ianua est, longè ibi maior adhibetur ornatus, quod eam in partem totius populi fiat concursus. Inibi ergo sublimi in loco Christi ab cruce pendentis depicta ponitur effigies, holoserico nigri simul & coccinei coloris velo adoperta. Vnus est, qui passionis historiam semper decantat; quoties verò illam absoluit, detrahitur simulacro velum, omnesque ad genua prouoluti vociferantur,



tur, plorant, ululant, palmis genas, pectora pugnīs quatunt, capita feriunt ad parietes; totāsque atque integras duas horas lugubri cum fletu, & tristi eiulatu dedunt se mœrori. Hinc ad peristylī fores alij post alios conferunt sese. Vnamquamque ad ianuam ex clericali ordine duo sunt, flagella manu tenentes; simulātque ad eos quisque accedit, cuiuscumque ætatis sit, siue masculus, siue fœmina, mediam denudat corporis partem, caput versū; & tamdiu ab illis quatitur, donec dolore victus, verberantium ē manibus elabatur. Quidā vix vno accepto verbere, mox intro abripiunt sese. Alij patientis Christi dolore confixi non prius abscedunt, quā ingentem effundant sanguinis copiam. Vt hæc peracta, sub ipso peristylīo ad mediam noctem perstant, qui volunt. Ea hora sacrum fit, cui omnes intersunt, sacroque pabulo reficiuntur. Nemo aliis tota hac hebdomada, nisi atris, aut cæruleis vestibus corpus velat. Mirum seruant silentium; nec inter se salutant, dum sibi mutuo occurrunt in via; sed mutorum instar, demissis oculis prætereunt. Nec vendunt, nec emunt, nec pecuniam tangunt. Id faciunt in odium Iudæ proditoris, qui Christum pacis osculo fraudolenter salutatum, argenteis triginta vendidit. Tantāque aduersus illum ira incenduntur, vt nemo ferè sit, qui compositam ex scrutis Iudæ imaginem non raptet peruiam; quod pueris præcipuè ludi magis, quam odij causa frequentissimum. Nullus enim puer domo egreditur, qui fune alligatum ad cingulum simulacrum Iudæ non ferat. Digna risu, & visu res. Multa puerorum milia conueniūt in templum, & suus cuique recte ad cingulum alligatus trahitur Iudas. Canonici tota Quadragesima amiculis vrantur Benedictino cucullo similibus, à quibus vittæ pen

pendent, quæ humeros, ac totam pæne faciem velant. Exuti calceis incedunt, quod & reliquis sacerdotibus commune. Sine calceis toto anno sacrificabant; nunc id à Romano Põtifce extra Quadragesimã fieri prohibitum. Ipso resurgenti Christi die à nocte media decantare incipiunt Matutinum. Ante auroram instituunt pompam longè celeberrimam. Ad ortum Solis rem diuinam faciunt, & quotquot interfunt, Eucharistia reficiunt. His peractis domos repetunt, hilares, & læti, totosque atque integros octo dies insequentes choreis, saltibus, ac tripudiis augustissimam celebrant triumphantis Christi resurrectionem. Hæc omnia nouus auctor. In quibusdam exigua quædam est umbra veritatis; pleraque ab ea quàm lógissimè recedunt. Proponere satis est, vt qualia sint, quiuis nouerit. Non vti Abassinos Romanis cæremoniis, certo est certius; idque abundè patebit ex literis eorum, qui in Abassia sunt. Omitto nunc referre, ne eadem sæpius incalcem. Gregorium XIII. ad Abassinos misisse, qui organa fabricarent, quis credat? In actis quidem Gregorij: nihil tale reperitur. Neque is Pontifex ignorabat, à Romana fide dissidere Abassinos, vt prædicatorum loco, ad eos mitteret fabricatores organorum. Illud etiam ineptè fictum, eundem Pontificem, solitum sæpe, dum viueret, ad id, quod vocat Abassinorum collegium, itare, vt iis adesset sacrificantibus. Et quidem neque hoc in diariis Gregorij est. Auctor iste satis se ostendit à Romanæ curiæ moribus alienum, dum credit Pontifices more vulgi vagari per urbem, & huc atque illuc facile diuertete, vt quemuis de plebe hominem.

*Quibus*

*Quibus argumentis ostendi videatur numquam  
Abassinos à vera Christi fide  
decessisse.*

## CAPUT XXIII.

VEntum est ad id, quod nobis potissimum in hac de Æthiopis rebus tractatione propositum est. Quamquam verò totum novi auctoris opus, tribus vel quatuor distinctum libris, aliud ferè non est, nisi quædam, non tam defensio, quàm gloriosa Abassinæ religionis prædicatio; eo tamen non contentus, apologetico more, plurima ad eandem rem à coniectura, à similitudine, ab auctoritate, à capitibus aliis peculiariter in locum congerit argumenta; quo in loco mirum est, quàm multa sint ad historiam, ad situs terrarum, ad gentium mores, ad res alias pertinentia non modò malè cohærentia, sed planè falsa, & ab Ecclesiæ catholicæ iudicio dissidentanea. Nihil ego tamen neque refellam, neque referam, nisi quod aliquo modo è re nostra erit. Hæc autem sunt novi auctoris, quæ ex diversis locis collegi argumenta; quibus apud ipsum sincera Abassinorum probatur fides. Inprimis, inquit in his, quæ ad Christi, tam diuinitatem, quàm humanitatem spectant, nullum Abassini errorem habent. Distinctè credunt, & disertè confitentur sanctissimæ Trinitatis sacrosanctum mysterium; affirmantque Numen illud, quod colimus, cuius potentia mundus conditus est, & in quo solo veram esse diuinitatem, tenemus, personis esse trinum, natura vnum. Quod mysterium, ut Abassini omnes non minus vultu ipso prode-

rent,

rent, quàm mente crederent, Imperator ille Ioannes sanctus instituit, vt baptizatis infantibus candenti ferro tria in fronte inscriberentur pūcta, diuinarum personarum distinctionem testantia. Ex quo apparet, quàm falsò ipsis error adscribatur Sabellij; qui vnam tantummodo in Deo credidit esse personam; sicut ante ipsum Noetus quidam in Ptolemaide, cum summo illius provincie damno iniquissimè prædicarat. Credunt æqualitatem personarum, non aliter, quàm in Conciliis Nicæno, Constantinopolitano, Ephesino, Chalcedonensi apud ipsos approbatis, ac receptis continetur. Idque ex eo aptè colligitur, quòd Helena Augusta eius vxor Imperatoris, qui Mano de Maria dictus est, insigni fœmina probitate, & theologicis præceptionibus, Chaldæoque & Arabico idiomate apprime instructa, librum vnū scripsit de Christiana lege, & eius præstantia, alterum de sacrosanctæ Triadis mysterio, sicut illud Romana confitetur Ecclesia; quo in libro de perpetua Deiparæ Virginitate multa etiam interseruit. Vnde perspicuum fit, quantum Abassinis inferant iniuriam, qui eos asserunt Ariana vniquam hæresi fuisse infectos. Huc accedit, quòd propter Trinitatis sacramentum in Christi baptismo patefactum, dies Epiphaniæ (qui dies eidem est Baptismati dicatus) variis apud ipsos spectaculis, ludis, saltationibus, choreis, tripudiis, ingenti denique lætitiæ significatione celebratur. Credunt etiam, & expressè confitentur tam contra Autotheos generationem Filij, quàm contra Græcos Spiritus sancti à Patre & Filio processionem. Credunt contra Manicheos vnorb esse rerum omnium conditorem; qui & immensa sua clementiâ genus hominum ex primi parentis peccato damnatum à durissima cacodæmonis seruitute, atque ab æ-

terna

terna morte liberarit, & iustis pro rectè factis præmia, iniquis pro sceleribus supplicia statuto tempore decernat. Credunt contra antiquissimos Carpocratem, Cherinum, & Ebionem, contra Ethnicos, contra recentiores Iudæos, contra Mahumetanos veram in Christo esse diuinitatem: contra Apollinarem Eutychem, & similes veram in eodem esse hominis substantiam: contra Nestorium tum in vna Christi persona duas contineri naturas, humanam ac diuinam, non variatas, non permixtas, non confusas, sed prorsus distinctas; tum beatissimam Virginem verè ac propriè esse Dei matrem; & contra Heluidium nullo vnquam tempore illibatum virginitatis florem in ea clanguisse. Credunt Christum multa pro nobis dura & aspera perpeßum, affixum fuisse cruci, animam effluisse, die tertià a mortuis resurrexisse, post quadraginta a resurrectione dies ascendisse in cælum, inde post mundi finem in terras venturum, vt mortales omnes vno in loco cõgregatos summa potestate iudicet: animos enim humanos esse immortales, & post extremam orbis huius desolationem vi diuina ad corpora reuersuros, vt quisque eorum omnium, quæ in hac vita egerit, rationem reddat supremo iudici percontanti. Credunt omnià, quæ in illis quatuor generalibus Ecclesiæ Conciliis Nicæno, Constantinopolitano, Ephesino, Chalcedonenfi; veluti in quatuor Euangelis credenda proponuntur. Idem tum veteris, tum nouę Scripturæ libri, quos superioribus annis Tridentinum Cõcilium indubitatè fidei esse declarauit, semper apud eos firmissimæ fuerunt auctoritatis, quod quæ in eis sunt ab ipso limpidissimo veritatis fonte, qui nullo potest erroris luto turbari, certò crederent emanasse. Quin etiam Imperator Mena per legatos suos

suos à Pio V. Pontifice maximo suppliciter postu-  
lavit , vt eiusdem Tridentini Concilij decreta mitti  
ad se iuberet , ne quid forte à Romana Ecclesia esset  
statutum quod Abassini per ignorantiam seruare omit-  
terent;asserens optare se maximè , vt Æthiopica Ec-  
clesia ad Romanæ voluntatem ac nutum totam se ac  
penitus conformaret.Ex quibus apertum est, non eos  
quidem in re vlla Apostolico contenta symbolo , sed  
illos potiùs , qui vllum ipsis hac in parte impingunt  
errorem, valde à vero declinare. Deinde eorum Anti-  
stites, quoad eis per hostes & tempus licuit, Conciliis  
omnibus, quæ Pontificia auctoritate vsquam celebra-  
ta sunt, semper interfuere; Nicæno contra Arium, Cō-  
stantinopolitano contra Macedonium; Ephesino con-  
tra Nestorium; Chalcedonensi contra Eutychetem; &  
alijs, quæ deinceps succedere ; donec Mahumetani,  
gens ab inferis egressa, Arabiam, Palestinam, Iudæam;  
Ægyptum , & alias per Asiam & Africam regiones  
armis occupâtes , sic Abassinorum fines interclusere,  
vt efferre ex Æthiopia pedem vix deinceps potuerint.  
Quid illud, quod non coacti, imò nec vocati, non sine  
maximis periculis ac difficultatibus domo sæpissime  
exeantes, vel in urbem venire, vel ad alia adiere loca,  
in quibus tunc Romanus erat Antistes, vt & ipsum  
recognoscerent supremum Christiani gregis pasto-  
rem, & fidem suam, cum in Concilijs publicis testa-  
tam, tum in ipsa Romani principis curia, veluti in ge-  
nerali quodam omnium gentium theatro, palam ex-  
positam vniuerso orbi patefacerent. Nam cum acce-  
pissent à quibusdam gentis suæ hominibus , qui Hie-  
rosolymam religionis causa peregrinatum ierant, ius-  
su Eugenij I V. summi Pontificis in quadam Italiae  
vrbe Concilium cogi , remque Imperatori exposuis-  
sent;

sent; actis ille primùm immortali Deo gratiis, quòd sibi ac suis hanc proſtendæ religionis, & Romano Patri obedientiæ offerendæ occasionem ostenderet, mox legatos misit, qui verbis suis vtrumque præstarent, & quam Abassini sequerentur fidem palàm exponerent: quod in Concilio Florentino factum fuisse, nemo dubitat. Sed iam priùs, annos plusquam centum legati alij, vt idem facerent, ad Clementem V. Auenionem venerant; quos ille benignissimè exceptos, plurimisque donis & gratiis exornatos ad suos remisit. Vt verò maritimo itinere patefacta atque adita Æthiopia est, viâque in Europam nauigandi ostensa, mox David Imperator simul cùm Zagazabo ad Emanuelem Lusitaniz regem misso, Franciscum Aluarum Lusitanum sacerdotem cum muneribus ac literis obedientiam animùmque testantibus ad Clementem VII. delegauit. Denique his proximis temporibus Alexander III. Imperator celeberrimam ad Gregorium XIII. instituit legationem, in qua sacerdotes erant duodecim, totidem ex magni Antonij archimâdritæ militari ordine equites, qui omnium Abassinorum erga Romanam Ecclesiam animos & voluntatésque explicarent. Nec illud prætereundum, quod ad rem præsentem videtur attinere; Tum primùm Lusitanos adiisse Æthiopiam, cùm fidem catholicam Lutherus deseruit; tunc etiam Abassinos legatos ad Clementem VII. Bononiam venisse, & coram Carolo V. Imperatore, maximoque clarissimorum hominum conuentu Æthiopici Imperatoris obsequium Pontifici obtulisse, cùm Henricus VIII. Angliæ rex Romanæ sedis scita iussaque aspernatus, à recto Christianæ religionis tramite pertinaci animo deflexit, miserâque in Anglia

ingens consequentium malorum posuit seminarium. Et verò cōpertam esse summis Pontificibus egregiam Abassinorum fidem, illud etiam non mediocriter probare videtur, quòd Pontifices ipsi, eorum Imperatores filios carissimos appellant, & Apostolicam eis salutem ac benedictionem impendunt: quam loquendi formam numquam Pontifices Romani vsurpant, nisi cū ad catholicos principes Apostolicæ sedi obediētes literas dant. Si quando enim contingit, vt ad principem aliquem scribant, qui vel à Christi fide sit alienus, vel aliqua infectus hæresi, cui pertinaciter adhæreat, alio vti solent salutandi modo. Vtrumque facile videre est in literis Pij V. Pontificis maximi, quas de Naupactea victoria aduersus Turcas ad sinū Corinthiacum à Christianis obtenta ad Menam Æthiopiæ Imperatorem, ad Xiecum Tahamam regem Persarum, & ad Mutaharem felicis Arabiæ Xerifum per idem tēpus scripsit. Duos enim postēiores, quòd Mahumetanis infecti essent sordibus, nec filios carissimos appellauit, nec Apostolica dignatus est benedictione; sed illustres ac potentes vocauit reges, iisque lumen ac spiritum veritatis precatus est. Si quis forte dicat Æthiopiæ Imperatorem, carissimum filium fuisse à Pontifice appellatum, quia Christianus erat, licet sinceram fidem non teneret, facile is refelli poterit; quoniam Romanus Pater Christianos Principes à recta fide deuios nec filiorum titulo, nec Apostolica afficit benedictione; quod perspicuum fit ex literis, quas idem Pontifex dedit ad Basilium, magnum Moscouiæ ducem, peruerso schismate à Romana sede separatū; neutrum enim in illis scriptum reperimus. Huc illud tendit, quod Pius Pontifex in ea, quam ad Menam misit, epistola, eius quoque optabat felicitatem, & Imperij



perij amplificationem, vt in iis regionibus intemerata Christi religio maius indies acciperet incrementum. In cæteris infidelium principum literis nihil erat huiusmodi. Habet præterea ad hanc partem stabilendam non mediocrem vim, quod nulla hominum natio est, nulla sunt in orbe regna, nisi Christiana sacra sincerè colant, quæ Romæ designatum habeant à Pontifice protectorem, cui eorum negotia curæ sint. Nullus enim Romæ est, qui Mauritanæ, qui Arabiæ, qui Persidis, qui regionis alterius à Romanæ sedis obedientia remotæ curam habeat, aut ex proprio suo munere defensionem suscipiat; eo quod iis tantum provinciis, qui Christum colunt, & eius in terris Vicarium agnoscunt, audiuntque, Protectores assignantur. At Abassini & Protectorem semper habuere, & nunc etiam habent. Annis superioribus Paulus I I I. fuit, antequam ad summum Pontificatum fuisset assumptus; illi Alexander Farnesius, huic Odoardus, qui nunc vivit, successus est. Nonnihil etiam momenti habet, quod Abassini sacerdotes apud nos more suo rem divinam peragunt. Non enim aliis tantum in locis, sed etiam Romæ, hoc est, in ipsa primaria totius sanctitatis ac religionis sede, sacris sæpissime operantur; & aliquando Leo X. vt memoriæ proditum est, & alij postea Pontifices iis licantibus interfuere. Iam verò qui non videt, apud eos, qui à Romano Pontifice disjuncti sunt, nulla patrari miracula, nullam esse veram sanctitatem, nullam conseruandæ fidei curam, nullos hæreticæ prauitatis iudices, nullam Imperij firmitatem? Primum enim cum ea opera, quæ humanam superant facultatem, & suapte conditione maiora sunt, quàm vt vlla rei creatæ potentia edi queant, à Deo, qui potissimus est eorum opifex, non aliter, quàm ad

confirmandam religionis veritatem efficiantur; planè sequitur non alibi fieri, nisi ubi vera religio est. At enim multa etiam nunc in Æthiopia patrari miracula, pro certo habetur: sanitatem ægri mirabiliter recuperant, visum cæci, auditum surdi, redeunt ad vitam mortui: inficiari igitur nemo potest, verā esse in Abassinis fidem. Præterea absque recta fide, sine qua nemo potest Deo placere, veram animi sanctitatem non esse, ipsamet fides docet: cum autem veræ sanctitatis fundamentum fides sit, necesse est, ut si ista desit, consistere illa non possit. Sed quam multos in Æthiopia esse homines insigni vitæ sanctimonia præstantes, haud potest in dubio poni, nisi forte ab iis, qui res Æthiopicas penitus ignorāt. Ut enim omittantur alij, vix ullus huc usque apud eas gentes dicitur fuisse Imperator, qui cum summa Christianæ fidei constantia non coniunxerit excellentium virtutum mirabilia exempla. Tanto verò semper studio veræ doctrinæ integritatē coluere, ut ex Dominicanæ familia viros aliquot esse voluerint, qui proprio ex munere diligentissimè cauerent, ne quid umquam hæreticæ labis illis in locis Religioni aspergeretur. Ad hæc Religiosorum ordinum apud Abassinos perseverantia, & firmus atque stabilis per tot ætates ac secula illius Imperij status, duo sunt non vulgaria, neque contemnenda veræ atque incorruptæ Religionis indicia: sacræ enim religiosorum familiæ, ubi vera fides non est, non videntur posse diu persistere; cum nihil prius, quàm ista Religionis propugnacula hæresis innadat. Esse autem innumeram apud Abassinos religiosorum multitudinē, ambigi non potest, cum in duobus tantum sancti Dominici cœnobiis sedecim vivant Prædicatorum fratrum millia; quem numerum nec omnes simul, quæ eiusdem

eiusdem ordinis in vniuersa Europa domus sunt ; videntur cœquare. Hoc autem argumentum paruipendendum non esse , grauium monet scriptorum auctoritas, qui hoc idem assumunt , vt veram esse probent apud Armenios fidem. Quod autem stabilis ac diuturnus regum regnorumque status, Religionis arguat veritatem, ex eo deduci potest, quod hæresim , vbi-  
cumque pedem ponit , ingens semper strages æquis passibus comitatur ; vixque ad hanc diem vllus siue hæreticus , siue à Romano capite præcisus princeps extitit , qui lugubri & infausto exitu non interierit. Rem nouere , quibus nota veterum monumenta, nec pauci sunt, qui eam exemplis demonstrant. At Æthiopica respublica à primis Ecclesiæ temporibus vsque in præsens , cum principes semper optimos sortita est, & omni laudis genere præstantes , tum secundis rerum successibus tantum per omnem ætatem floruit , quantum alia in orbe nulla ; nec quidquam aliquando siue à casu , siue ab hostibus perpeffa est , ex quo graue acceperit detrimentum ; & quicumque in ea fuere Imperatores , ij exacto vitæ curriculo Ecclesiasticis muniti subsidiis feliciter decesserunt. Quis verò inducere in animum queat , potuisse Abassinum Imperium Ethnicorum vndique & Saracenorum circumcinctum armis , ita stabile persistere , vt non modò nulla ex parte imminutum sit, sed etiam amplificatum, nisi ea, quæ Imperia firmat & auget sincera Christi fides, semper in ea retenta, conseruata, amplificata fuisset ? Omnia regna , quæ Romani Patris excussere iugum, quamuis cum seculis victura viderentur, breui pèriere, & suis iacent condita in ruinis. Exempla memoriam superant , nec experientia requirit fidem.

*Quomodo Abassini ab heresis suspicione  
videantur defendi.*

# C A P V T   X X I V .

**I**llud nonnullos grauitè offendit , quòd Abassini non paucas Mosaicæ legis cæremonias cum Christianis sacris videantur commiscere, & tenebras cum luce, cum Christo coniungere Belial. Id verò absque Religionis iniuria fieri non posse , indubitatum est. Hoc igitur loco ostendit nouus auctor , potuisse illos absque vllò Christianæ fidei detrimento res aded inter se pugnantes veluti cõcordi sœdere copulare. Principio, inquit. ponendum est , multos iam ante annos quidquid Abassini habebant , quod ratione aliqua Iudaismum saperet , totum id summorum Pontificum iussu penitus reliquisse, adeoque in sacrorum procuratione Romanæ nunc Ecclesiæ esse conformes , nulla vt in re ab ea discrepent , iis tantùm exceptis , quæ orientalium sunt Ecclesiarum propria , nec Religionem violant. Circumcisionem priùs cùm Baptismo permiscebant: antiquæ purificationis seruabant legem: Sabbata simul, & Dominicos dies habebant festos : à porcina carne, à sanguine , & suffocato animali abstinabant : ipsis ieiunij diebus ante occasum Solis nihil sumebât cibi. Hæc illa sunt, ob quæ maxime à multis credebantur hæretici quasi mortiferos retinerent Iudæorum ritus diuinis humanisque decretis iamdiu cõdemnatos. Sed non est difficile tanto à crimine innocentes homines liberare. Vna dumtaxat satis esset ad hæc omnia responsio, ignorantiam, quæ iustè defendi potest, vacare culpa , sine culpa verò non posse fidem labefa

labefactari. Ignorantes enim , non autem pertinaces illis Iudæorum ritibus adhæſiſſe Abaſſinos inde com-  
pertum , quia ubi moniti ſunt , quidquid ex Iudaicis  
hauſerant fontibus , quamprimum repulere. Quòd  
verò ab initio talibus ſe cæremoniis immiſcuerint, tū  
libri quidam, Manda, & Abethilis dicti , quorum do-  
ctrinam ſequi iuſſi ſunt, tum receptæ in ipſo naſcentis  
Eccleſiæ exordio apud Chriſtianos conſuetudines an-  
ſam præbuere. Vt eaſdem cæremonias tamdiu reti-  
nuerint , cauſa fuit , quòd à Mahumetanis vtramque  
Arabiam, Paſtina, Ægyptum , & alias circum re-  
giones occupantibus circumdati, Chriſtianorum Cõ-  
ciliis, in Europa celebratis, intereſſe nequierunt. Inde  
enim factum, vt cum nullos haberet fidei Doctores, à  
quibus inſtitui poſſent, in iis, quos ſemel per ignoran-  
tiam hauſerant, erroribus eoſque perſeuerarint , do-  
nec ſub Eugenij I V. Pontificatum viam diuinitus re-  
perere, qua vtcumque poſſent è patriis finibus , veluti  
è carceribus , ad alias terras egredi. Cum ergo audiſ-  
ſent, ſicuti proximè narratum eſt, cogi in Italia Cõci-  
lium , Imperatoris ſui iuſſu ad illud aliqui ſe contule-  
re, qui, quæ decreta, & Romani Patris auctoritate ef-  
ſent approbata, referrent ad ſuos. Hi domo proſecti,  
& Ægyptum clanculum ſubintrantes, Hieroſolymam  
primùm, inde Ioppem, tum Venetias, vltimò Floren-  
tiam , ubi ſummo omnium ordinum concurſu Eccle-  
ſiaſtica comitia fiebant , non ſine maximis laboribus  
& periculis peruenere; reſque varias ad mores & fi-  
dem ſpectantes edocti remearunt in patriam , in qua  
nonnullas conſuetudines diuturnitate temporis fir-  
miter roboratas , quoniã à Florentinis ſtatutis abhor-  
rebant , ſtatim abiecere. Poſtea maris Oceani itinere  
patefacto , cum iam Europam, & in ea Romam faci-

lius adire possent, aliique & alij in has partes idem-  
dem transirent, didicere tandem, quibus essent impli-  
cati erroribus, eosque radicitus extirparunt. Quamvis  
autem Abassini Circumcisionem, & alias, de quibus  
dixi, Iudæorum cæremonias simul cum sacris Chri-  
stianorum ritibus scientes seruarent, non tamen idcir-  
co hæresis essent damnandi; quandoquidem non im-  
pio animo, atque ut antiquatam retinerent legem, sed  
mèrè planè pia, & ab omni libera superstitione, atque  
ut Christum parentem optimum, nostra causa circū-  
cisionis dolorem notamque subeuntem imitarentur,  
credi deberent id efficere, quod nulli diuinæ humanæ-  
que legi repugnabat. Fieri etiam potuit, ut illa pueros  
octauo die circūcidendi consuetudo remanserit apud  
Æthiopes ab antiquissimis illis temporibus. cum non-  
dum Christum, aut ullam veri Dei legem agnosce-  
bant. Multi enim Ethnicorum populi infantes suos  
circumcidere erant assueti, ut de Colchis, de Macro-  
nibus, de Syris, de Phænicibus in Asia, de Iucatanis,  
Totonibus, Mexicanis, Acuzamilensibus in nouo or-  
be, de Ægyptiis, & Æthiobus in Africa probati au-  
ctores memoriæ prodiderunt. Vero igitur videtur si-  
mile, Abassinorum gentem neque à Regina Sabæ, ne-  
que à Iudæis, qui illā, ut aliqui volunt, ad suos Æthio-  
pes reuertentem ab Hierosolyma sunt comitati, cir-  
cumcisionis rationem accepisse; sed multo iam antè,  
gentilico illam usurpasse ritu, cumque religione Chri-  
stiana postea retinuisse. Itavidemus plures etiam nunc  
inter Christianos seruari consuetudines, ab Ethnicis  
olim usurpatas; non eo quidem animo, ut aut mutis  
Deorum simulacris ullus exhibeatur honos, aut ex  
veteri superstitione quidquam fiat, quod absque pia-  
culo fieri non possit; sed ut quæ erant vanitati dicata,  
in

in rectum vsum conuersa, veritati famularentur. Cō-  
pertum enim est, quæ natura mala non sunt, nec lege  
vetita, posse licite fieri, si rectus finis adhibeatur. Ob  
purificationis quoque cæremoniam nemo Æthiopes  
iure damnabit. Sanctissimam enim Christi matrem  
imitari, non Iudæorum seruare legem, propositum illis  
erat. Sabbati obseruatio duplici ex capite à Iudaismi  
suspensione vindicatur. Illud quidem inter festos dies  
Abassini habebant, tum quod ita faciendum ab illis  
suis libris Manda, & Abethili, per ignorantiam acce-  
perant; tum quod non idem illis, qui Iudæis, legalis, vt  
dicitur, animus erat. Constat, multa Iudæos fecisse,  
quæ nunc apud Christianos in vfu sunt, & in laude.  
Abstinebant illi à cibis, vt Deum sibi redderent pro-  
pitium; ciliciis domabant corpora, tundeant pugnīs  
pectora, musicis instrumentis diuinas decantabant  
laudes, id genus præstabant alia, quæ tantum abest, vt  
à Christi Ecclesia repudiata sint, nihil vt frequentius  
& laudabilius in illa vsurpetur. Si quis Sabbatum cu-  
stodiat, vt conditi orbis beneficium, quod vniuerso  
hominum generi commune fuit, acceptum referat  
cōditori; neque id faciat, eo quod Hebræorū olim po-  
pulo eius custodiendi impositum fuerit præceptum, is  
certè non impiè, & prauè, sed piè, & sanctè faciet;  
quippe qui beneficentissimo Numini debitam exhi-  
beat grati animi significationem. Scitum illud est  
ex Leone magno, cæremonias Iudæorum, quæ ad ali-  
quid significandum fuerunt institutæ, nefas esse Chri-  
stianis imitari; virtutum autem exercitia vtrique esse  
populo communia, magisque nobis, quàm Iudæis cō-  
gruere. A porcina carne, à sanguine, à suffocato pro-  
pterea abstinebant, quod illi ipsi libri Manda, & Abe-  
thilis ita præceperant faciendum. Neque verò nimis

in hoc errasse, credendi sunt; cum legissent scriptum, primis nascentis Ecclesiæ Christianis Apostolica lege fuisse cautum, ne sanguine, aut suffocatae animantis carnibus se contaminarent. Quod tandem ad ieiunium attinet, non ideo occasum Solis ante cibum expectabant, quod Iudæorum, aut Mahumetanorum superstitionem sequi vellent, quasi ante stellæ ortum nefas ducerent cibum sumere; sed ut id præstarent, quod erat olim Ecclesiasticis legibus statutum, ne videlicet quadragesimalibus feriis ante vespertum, neve temporibus aliis ante horam post meridiem tertiam ederent ij, quibus esset imposita lex ieiunandi. Quin etiam hunc adhuc retinent morem, ut doment corpora, & Christo cruci affixo, ac sitim patienti per ipsâ inediæ tolerantiam aliquo modo similes fiant. Hanc enim ob causam hisce ieiuniorum feriis nō solum semel dumtaxat sumunt in die cibum; sed etiam vsque ad vespertum perstant ieiuni; ac tunc quidem præter panem, aquam, & herbas, aut aliqua poma, nihil aliud degustant. Quod si qui pisces addant, ij & pauci esse solent, & ab illis piscibus abstinere, in quibus sanguis est; marinis contenti locustis, sepiis, ostreis, polypis, conchiliis, & huiusmodi aliis; quibus in cibis & ad confirmandas vires minus roboris, & ad appetitus illecebram minus saporis inest. Quam verò certum sit, Abassinos, nullas omnino siue Iudæorum, siue Mahumetanorū cæremonias, eodem cū illis animo exercere solitos, immane illud testatur odiū, quo vtrāque semper gentem sunt insecuti. Nam & cū Mahumetanis, quibus omni ferè ex parte circumdantur, perpetua diuersis locis gerūt bella, & à Iudæis ita sūt auersi, ut eos, & quicūque ab eis ducunt originem, licet Christianā profiteantur fidem, Æthiopix ingressu interdicant.

*Aucto*



*Auctorum testimoniis probari videtur  
Abassinorum fides.*

## CAPUT XXV.

**S**I quid vlla in re scriptorum valent testimonia, illa profectò valere maximè debent, quæ ab iis proferruntur, quorum nihil interest, quid in alterutram partem dicendo statuatur. Nam qui vel contentionis magis, quàm veritatis cupidi sunt, vel aliquod sibi emolumentum scribendo proposuere; eorum quidem valde suspecta narratio est. Vt autem nihil audacius, quàm excellentium hominum, & rectè de rebus sentientium iudicium contemnere; ita nihil planè iniquius, quàm ex temeraria imperiti vulgi opinione, quid verum, aut falsum sit, definire. Hinc iam desumere oportet ex mente noui auctoris, quid de Abassinorum fide sentiendum sit. Eorum enim causæ probi inquit ac diligentes patrocinantur scriptores, rudes autem de vulgo homines, & veritatis ignari eidem aduersantur. Vtrorum standum sit iudicio, nemo ambiget; nisi qui simul ignoret, temeritatis ne, an prudentiæ potiores partes sint. Qui asserunt, numquàm Abassinos à Romanà & catholica fide decessisse, ex omni scriptorum genere ad quinquaginta ferè numerantur. Ex his aliqui Æthiopicum Imperium peragrantes, rem ipsi per se sunt experti. Alij ab illis fuerunt instructi, qui easdem terras obeuntes, gentis mores ac religionem accuratè obseruarunt. Nonnulli cum Abassinis ipsis, hominibus minimè malis, & candidè ac simpliciter agentibus, dum hæc ad loca venissent, collocuti,

locuti, quid gens vniuersa de fidei veritate sentiat, quid sequatur, sine dolo ab iisdem didicerunt. Neque inter auctores istos hæretici desunt; quorum hac in re testimonium, quamquam ipsi omni sunt indigni fide, eo pluris faciendum est, quo magis, quia eorum causæ nocet, ab inuitis profertur. Non erit forsitan à re & loco alienum, aliquorum nomina cursim indicare. Numerati ergo. in primis possunt Parra, nobilis Gallus, & Franciscus Aluarus, Lusitanus sacerdos, qui illas Æthiopum regiones perlustrarunt, deque Abassinorum moribus libros edidit. Deinde Theologi, & Iurisperiti nemini ignoti; ex quibus sunt Nicolaus Sanderus, & Ioannes Echius, & Franciscus Feuardenius, & Thomas Stapletonus, & Simon Maiolus, & Ludouicus Paramus Beroxensis; & quidam alij ingenij laude per Europam clari. Præterea qui vel illustriū hominum vitas, vel aliarum rerum historias literis mandarunt, inter quos sunt Paulus Iouius Nouocomensis, & Hieronymus Osorius Lusitanus, & Ioannes Boemus Aubanus Theutonicus, & Marcus Antonius Coccius Sabellicus, & Iacobus Middenderpius Colonienensis; item qui de Geographia & Chronographia scripsere, vt Raphael Volaterranus, & Liuius Sannutus, & Gilbertus Genebrardus, & Philippus Bergomensis. Item Poetæ, vt Ludouicus Ariostus, & Torquatus Tassus Itali, & Alfonso Erzilla Hispanus. Item David Chytrius hæreticus homo, & Desiderius Erasmus semihæreticus. Denique plures alij. minorum gentium auctores; quorum quidam disertis exprimunt verbis, Abassinorum veram profiteri Christi fidem. Alij ab hæresis nota eos ex instituto testimoniis & argumentis vendicant, atque à Romani Pontificis obedientia numquam recessisse contendunt. Nonnulli pleno ore

ore pronuntiant, eorum Imperatorem esse Christianissimum, & catholicæ Ecclesiæ obedientem filium. Nec parum valere debet, ad hanc rem, de qua agitur, roborandam, quòd Abassini duo in Europa habent collégia, Romæ vnum, Olisiponæ alterum. Illius auctor & institutor fuisse dicitur Eugenius I V. ad annos Christi mille quadringentos triginta quatuor, in quo ex ea gente multi virtute & diuinarum literarum cognitione florent; variarumque studia linguarum, quibus apprimè callent, cum magno Christianæ reipublicæ emolumento & illustrium virorum concursu diligentissimè exercent, vnámque Vaticanæ bibliothecæ clauim habēt, & Arabici, Syriaci, Chaldaici, atque Ægyptij idomatum bibliothecarij sunt. Magis verò his Abassinis collegis credendum, quàm Ioanni Petro Maffeo, & Petro Ribadaneræ, & Ioanni Antonio Gabutio, & huiusmodi aliis, qui de re sibi ignota temere scripsere. Sed magna inprimis dignus reprehensione Maffei est, quòd falsis ductus rumoribus, non tam vt verè, quàm vt Latine diceret, curauit; plúsq; apud illum Latinæ cuiusdam elegantiae opinio, quàm ratio veritatis videtur valuisse. Ribadanera Maffei vestigiis inconsultò institit; eo tamen videtur efficacius agere, quòd Pontificio innititur diplomati, à Pio V. ad Ouiedum in Æthiopiam dato; quod tamè nullius esse momenti ex eo. perspicuum est, quòd & Sebastianus Rex ficta ac malitiosa quorùdam deceptus narratione, illud à Pontifice obtinere conatus est; & Pontifex falsò de re instructus ita concessit, vt sciens & prudens nequaquam concessisset.

Vnde

*Vnde videatur ortum ut Abassini apud nos schismatici habeantur.*

## C A P V T XXVI.

**T**Alem huius Abassinorū infamiz causam nouus auctor comminiscitur. Circa annos, inquit, salutis nostræ mille quingentos quinquaginta quinque ingens Lusitanorum multitudo Æthiopiam ingressa est. Plusquam trecenti erant. Fuere ab indigenis eximia quadam amoris significatione excepti, quod Lusitani essent, & Christiani crederentur. Verum cum genere & secta essent Hebræi, paucos post dies perfidiz suæ venenum effudere, tanto liberius, quanto se à fidei censoribus putabant illis in locis tutiores. Qui ergo Christiani primùm habiti sunt, remoto simulationis velo, verbis, factis, moribus, ritibus, cæremoniis, superstitionibus quales erant, apparuere. Obstupuit Æthiopia, cum tam horrendam veluti derepente ex Christianis in Hebræos vidit metamorphosim; nec potuit continere sese, quin statim ad prædicatorum patrum Priores, qui hæreticæ prauitatis quæsitores illic sunt, negotium detulerit. Prope erat, ut perfidi Hebræi Censorum iussu comprehenderentur, cum vel aliquo indicio rem odorati, vel quod est verosimilius, à cacodemone, quocum omnes, qui huius sectæ sunt, occultam habere videntur familiaritatem, tacitè admoniti, periculum sedulò declinarunt, & fuga sibi cōsultentes, in diuersas abiire dispersi regiones. Multi in Bornum, quod regnum propè Abassiam Saraceni tenent; alij aliò; non pauci Goam se contulere. Isti postremi ut suam tegerent nequitiam; quidquid iniquū  
& cæ

& execrabile est, per summam calumniã Abassinis imponentes, eos eorúmque Imperatorẽ Christianam religionẽ acerrimẽ insectari, Ouiedum Patriarchã innumeris pressum ærumnis acerbo carcere apud eosdem concludi, & eiusdem generis cõmentĩ sunt sexcenta, tam abhorrentia à vero, quàm ipsoꝝ ingenio ac moribus cõsentanea. Ceterũ habita iis fides est, præsertim cùm iureiurando impiẽ confirmarent, quæ per summam impudentiam innocentibus impingebant. Cùm ergo falsa fallaxque fama, quæ celesterrimẽ terras & maria transuolat, non per Lusitaniam solũ, verumetiam per Europam vniuersum breui disseminasset, Abassinam gentem, quæ puram tenere fidem credebatur, mille hæresum erroribus esse immersam, atque à Romanæ sedis obedientia longẽ seiunctam; ad Sebastianum Regem res est delata. Is, vt erat egregiẽ pius, & valde religionis amans, Pium V. Pontificem maximum fecit per literas certiorẽ, ab eoque petiit, in Æthiopiam mitteret diploma, quo statueret, vt Andreas Ouiedus Patriarcha, quo primũ posset tempore, locis illis relictis, ad Sinas, vel Iaponios se conferret; apud quas gentes posset minori cum periculo, & maiori cum fructu Christianæ religioni operam impendere. Hæc diplomatis illius, cuius Ribadanera meminit, expediendi causa Pontifici fuit, quæ vt erat commentitia, non aliud effecit, quàm vt nullum in eodẽ diplomate robur inesset. Atenim qui tunc Romæ erant Abassini, cùm id, quod de suæ gentis fide non clanculum, sed apertẽ, ac palàm iactabatur, non sine grauissimo animi dolore percepissent, vnum ex collegis dimisere, qui Menæ Imperatori (is Claudio successerat) nuntiaret, quanta apud Europæos Æthiopica religio infamia laboraret. Imperator tam  
acerbo

acerbo nuntio vehementer percussus , extemplo Goam ad Indicum Prætozem, inde in Lusitaniam ad Sebastianum regem, postremò Romam ad Pium V. & ad Collegium Cardinalium , atque inprimis ad Alexandrum Farnesium Æthiopiæ protectorem , legatos ac literas misit , quibus rei totius seriem exponens , calumnias detexit Iudæorum. Iussit etiam vt magni Senatus consiliarij super eadem re ad Pontificem scriberent, suamque illi de nouo testarentur fidem , ac paratas deferrent ad omne obsequium voluntates. Simul etiam à Pontifice petiit, vt quod nuper celebratum audierat, Tridentinum Concilium ad se mitteret; non minus enim se, quàm reliquos catholicos principes , obedientem esse Romanæ Ecclesiæ filium. De Patriarcha Ouiedo nihil esset sollicitus; optimo enim apud se haberi loco, & Latino Senatui esse præfectum; tantique ab omnibus fieri , vt nemo esset, qui non illum vt eximie sanctum suspiceret , vt parentem amaret , vt magistrum audiret , vt à Deo missum veneraretur. Legatis auditis, literisque perlectis maximè tam Pontifici, quàm purpuratis patribus probata est Abassini Imperatoris causa; extincti rumores falsò in vulgus antea sparsi , & mendax opinio ab omnium animis eradicata. Datæ quoque à Pontifice ad Abassinum literæ honoris & amoris plenæ; cum iis Tridentini decreta Concilij, & canones enuntiationis modò propositi, absque vlla pœnarum, quæ inibi contra hæreticos pertinaces decernuntur , mentione; ne si fortè Abassini nossent , esse homines Romanæ vicinos , Romanæ sedis Imperium detrectantes, aliquam inde caperent offensionem. Posthæc Imperator Iudaicæ memor calumniæ, in tale genus hominum grauitè infensus, legem tulit, quæ hodièque stricte

Etè seruatur: ea cautum, ne cui Lusitano ingredi deinceps Æthiopiam fas esset, nisi ab Olisiponenſibus, & Goanis fidei quæſitoribus facultatem haberet illuc eundi. Atque hæc vna ac præcipua causa fuit, cur per Europæ regiones cum tanto Abassinorum dedecore disseminatum sit, à recta eos fide, quam semper summa cum laude tenuere, atque à Romani Pontificis obedientia & legibus descuiſſe. Præter hanc duplex alia malè de Abassinis sentiendi extitit occasio. Vnam locorum ignoratio, alteram falsi vulgi rumores peperere. Audierant quidam in ea Æthiopia, quæ sub Ægypto est, aliquas esse gentes inanium idolorum additas cultui; alias Mahumetana infectas turpitudine; nonnullas, quæ ita Christum profiterentur, vt & Moſaicæ legis cæremonias, Græcorumque ritus simul obseruarent: has gentes cum ex Abassinorum genere esse crederent, eo adducti sunt, vt scriberent Abassiam multis variarum sectarum erroribus esse contaminatam, & quod erat consequens, à veritate Romanæ fidei quamlongissimè abesse. Hæc locorum ignoratio est. Nam si geographicæ inquit spectentur dimensiones, sic aliquando latè capitur Æthiopia, vt omnem illam complectatur Africæ partem, quæ intra tropicos iacet, qua in parte ingentia regna sunt, & permultæ prouinciæ innumeris pæne populis refertæ. Sic aliquando strictè, vt idem proſus, quod Abassia sit, nec vltra in partem aliam protendatur. Hac verò ratione conſtricta, neque Ethnicos habet incolas, neque Mahumetanos, sed tantum Christianæ Romanæque religionis egregios cultores, ab omni hæresis errore remotissimos. Cum igitur probi auctores, quibus fallendi animus non erat, simpliciter scripsere, esse in Abassia gentes, quæ adorent Idola, quæ Mahu-

meto obsequantur, quæ cum Latinis ritibus, & Christianis sacris Græcas & Iudaicas misceant superstitiones inter Abassiam & Æthiopiam latissimè acceptam nullum agnoscentes discrimen id Abassiæ tribuere, quod est magnæ illius Æthiopiæ proprium; eosque, quibus ignota est Geographiæ ratio, in errorem sine dolo induxere. Altera deceptionis occasio ex falso vulgi rumore desumpta est. Hæc patet latius, nec Abassinos tantum, sed alios etiam permultos attingit populos, in quibus sunt Armenij, Iacobitæ, Maronitæ, Nestoriani, & similes alij, qui tamen Catholicis legibus sanctè obediunt. Inde autem rude ac mendax vulgus gentes istas albo adscribit hæreticorum, quod eas non videat ad Romanum tribunal Religionis causas deferre; quod quidem, nec nisi difficillimè possunt, nec verò opus est, cùm suos habeant in sacris iudices, ac magistros, quorum decreta sententiæque sequantur. At dubitari non debet, quod docti homines scribunt, per Abassiam, Persidem, Mediam, Indiam ad vastissimas vsque Sinarum regiones esse prope infinitos Christianorum populos, qui etsi vulgo inter schismaticos recensentur, Romanam tamen Ecclesiam & colunt ut matrem, & ut fidei magistram reuerentur, & caput esse prædicant omnium Ecclesiarum. Ignota eruditis esse non possunt, quæ de re proposita subiiciam. Tres Assyriorum Patriarchæ annis superioribus Romani Pontificis Imperium agnoscentes debitam ei præstitere obedientiam; Emericus Innocentio III. sub annum millesimum ducentesium; Simon Sulaca Iulio III. ad annos mille & quingentos; Abdifu Pio I V. anno quingentesimo sexagesimo secundo post millesimum. Deinde: Memini Antiochenus Patriarcha anno millesimo quin



quingentesimo septuagesimo quinto, Gregorio XIII. subiecit sese, & inferiorem confessus est. Tale Clementi VIII. obsequium detulit Gabriel Patriarcha Alexandrinus anno millesimo quingentesimo nonagesimo quinto. Præterea quadraginta ferè ante annos, multis ad Iulium III. literis missis, supremum illum esse Christianorum principem ac pastorem testati sunt Nestoriani. In Concilio Florentino sub Eugenio IV. Romanæ sedis primatum agnovere Iacobitæ. Idem sæpissimè fecere Armenij, & Georgiani. Rutheni quoque ac Moscovitæ coram Clemente VIII. ad annum millesimum quingentesimum nonagesimum quintum, abiuratis Græcorum erroribus, Romanam fidem sunt amplexi. Infinitum esset per omnes ire nationes, quæ nec vulgo cognitæ, nec pro catholicis habitæ, Romanam tamen, hoc est, veram & immaculatam tenent Christi religionem. Quod igitur populis istis, idem Abassinis contigit. Non alia de causa Schismatici atque hæretici ab imperiis creduntur, nisi quia longo locorum intervallo disiuncti ad hunc orbem nostrum atque ad Romanam urbem rarissimè accedunt. Cur etiam per hasce oras tanta infamia laborarint, causa Græci fuisse. Hi enim schismaticos hæreticosque æstimant, & appellant; qui Romanæ sedis iure reguntur. Dum igitur eam ob causam probrosis illis nominibus Abassinos diffamarent, occasionem ignorantibus dedere existimandi ab Romana eos fide dissentire. Hæc Gilberti Genebrardi hac de re sunt verba. Illo, inquit, artificio Græci, sæpius vsi sunt in Christianos orientales, ut quos cernerent in sedem Apostolicam propensos, hæreseos infamia traducerent. Hinc eos suspectos habeo, quotiescumque de Syris, Maronitis, Æthiopi-

bus, Persis, Indis, Georgianis, Ægyptiis scribunt. Nam qui versùs eos peregrinantur, catholicos offendunt, nec nisi quibuldam ritibus & cæremoniis à nobis differentes vident. Sic ille apud nouum auctorem, qui & his argumentis sepius inculcatis, & pluribus aliis, in quibus roboris nihil est, vehementer contendit, factam rectam in Abassinis tueri Christianæ fidei sinceritatem, & singularem quamdam erga Romanam sedem obedientiam, quam & semper conseruatint, & hoc tempore impensius conseruent. Quæ utinam vera essent. Quod enim à recta Abassinorum fide, si eam colerent, nobis incommodum, ut vel innocentes traducere, quod grauissimum scelus est, vel occultam vellemus esse veritatem, quam multo utilius sit per Europam Asiâque vulgari, quàm inutili pressam silentio in Africæ angulo delitescere? Sed quoniam hæc illorum defensio, ut suprâ dixi, Pontificum, Regum religiosarum familiarum, atque excellentium virorum auctoritatem & existimationem non parum lædit, magni interest, ut quantum distet à vero, dilucidè ostendatur.

---

*Abassinos à recta fide defecisse.*

C A P V T    X X V I I .

**A**Vctores ij, qui superioribus annis, nondum rebus planè cognitis ab ipsis decepti Abassinis omnia sua venditantibus aliter scripserunt atque res est, digni sunt, quibus ignoscatur: neque enim absque vlla coniectura suspicari poterant, imponi sibi, ab iis præsertim, quos ob ingenij tarditatem credere possent

sent à dolis abesse: sed vafra calliditas nusquam fidentius, quàm in rudi pectore sibi sedem statuit. Nouus auctor videtur iusta carere deceptionis suæ excusatione: posset enim sic nosse omnia, vt nisi consultò affectaret ignorantiam, quo scriberet licentiùs, nulla in parte à recto aberraret. Aded in tota Æthiopia nihil nunc est, quod nostris hominibus patefactum non sit, & planè compertum. Et verò ne quid de Abassinorum in Romanam sedem obseruantia, & debita Pontifici maximo obedientia auctor ille statueret, grauissima inprimis Pontificum, & Regum auctoritate deterreti debuit. Qua enim ratione temeritatis notam effugere potest, qui prudentissimos principes in re tanti momenti quidquam temere credidisse, & in reuocandis ad fidem Abassinis tanta solitudine non modò sine causa, sed leuiter etiam atque inconsideratè laborasse, tam liberè definit? Alterum certè necesse est, auctor ille nobis concedat, aut Pontifices, Regesque credendo, & agendo temerarios fuisse, aut nimis esse temerarium, qui vel tacitè hanc illis ignominie notam audet impingere. Deinde ecqua illi esse potest siue calumnie siue temeritatis iusta excusatio, dum testes tam multos, tamque locupletes, ex quibus plerique insigni sunt prudentia & sanctimonia illustres, palàm apertèque mendacij redarguit? Non vnus quidem fuit, vel alter à quo Romani Pontifices & Lusitani Reges acceperè, Abassinos à recta fide & Apostolica sede esse auersos. Non semel tantùm & iterum, sed quam sæpiissime, & temporibus diuersis, & in vario eius imperij statu ea de re facti sunt certiores. Valde quidem mirandum, si veram religionem semper Abassini coluere, tanto hominum ex numero, qui apud eos tamdiu, tamque longo decursu temporum

habitarunt, neminem fuisse repertum, qui rem, ut erat, Romanis Pontificibus & Lusitanis regibus exponeret gentemque innoxiam ab infamia liberaret. At Abassinus ille, a quo nouus auctor instructus est, rerum Christianarum non mediocriter intelligens. atque in Æthiopia natus, & educatus, numquam Abassinos suos à vera fide cecidisse, constanter affirmavit. Bene habet Magis ergo vni credendum, suspectæ homini fidei, quàm iis, quibus inererat, omni ope niti, ut in re tanta omnia nota perspectæque haberent, ne quid suo nomine sine maturo consilio ageretur. Fuisset quidem longè tutius opinari, hominem vnum sua venditantem deflexisse à vero, quàm tot tamque præclara, prudentiæ & constantiæ lumina, tam singulares, inquam, Pontifices, tamque eximios Reges ad res tantas temere fuisse abreptos, suæque & consilia, & opera præcipitalse. Iam verò quàm est indignum, quæ vitia idem auctor in aliis falsò reprehendit, in ea ipsum sponte incurrere, & credere licere sibi, quæ negat aliis licere? Si enim eos vocat temerarios, atque in dicendo præcipientes, qui res Æthiopum clarissimis firmatas testimoniis, crebrisque eorum, qui eas per se ipsi experti sunt, testatas literis, & ab iis tandem, ad quos pertinent, cum cura acceptas, fideliter referunt: ecquàm oportet sibi inurat notam, cum testibus anteferat grauissimis illius fidem, qui & malè cohærentia, atque apertè falsa narrauit, & in mendaciis deprehensus, se mentitum, non difficile confessus est? Eiusmodi certè erant, quæ ab illo narrata sunt, ut nemo tam crasso esset iudicio, qui non ea aut statim ficta indicaret; aut saltem ab iis credendis assensum cohiberet. Alia erat Ribadaneræ, Maffei, Gusmani, Gabutij, quàm eius Abassini auctoritas, ut si is aduersus illos

illos quidquam diceret, vel ea tantum de causa suspensus esset habendus. Nec erat existimandum, tam graues, tamque pios homines, quibus nihil magis, quam veritas cordi, res similes fuisse scripturos, nisi de illis, quantum humana ferunt, essent certissimi. Quare ut nemo sanæ mentis ambigere iute queat à Romana fide Abassinos esse alienos, satis illi esse debet, Pontifices maximos, summósque reges, qui graua negotia non solent absque magna consideratione & consultatione agere, tam multa præstitisse, ut illos ad veterem, quam deseruerant, veritatis viam reuocarent. Quemadmodum enim verè possent leuitatis reprehendi si inanibus permoti rumoribus res tam graues essent aggressi; ita planè, qui illos dicat fuisse deceptos, leues eosdem fuisse iudicet, necesse est. Videat igitur nouus auctor, an tutum fuerit viros tales ac tantos leuitatis coarguere; adeoque eorum imminuere auctoritatem, ut minus ipsis, quam Abassino uni, qui se, quod sæpe dixi, mentitum esse confessus est, credendum putarit. Quod autem alios optimæ fidei scriptores ita respuerit, ut nullam eorum habendam duxerit rationem, etsi est valde indignum, eo tamen æquius ferendum, quod qui summorum Pontificum, & regum contemnit auctoritatem, ab eo reliquos contemni, haud magnum est. Sed quæro; unde acceperit Ioannem Petrum Maffeiū, quæ legerat, quæue audierat, absque vllō veri falsique discrimine tradidisse, nec tā curasse, ut vera scriberet, quam ut elegantem se Latinæ linguæ scriptorem mundo venditaret; indeque factum, ut qui postea de Abassinis scripsere, ipsum ut antesignanum secuti, in eosdem collapsi sint errores? Si ipse non quidem tantam, quam Maffeiū, sed multo minorem adhibuisset in scri-

bendo diligentiam, non eò deuenisset, vt cùm scripserit plutima, longè quidem sint pauciora, quæ cum veritate consentiunt, quàm quæ ab eodem apertissimè discordant. Maffei<sup>us</sup> ne qua in re, quoad fieri posset, ne minimum quidem aberraret, non satis habuit id facere, quod solent diligentissimi scriptores, & qui maximè amant veritatem; sed Italia relicta, anno millesimo quingentesimo septuagesimo nono in Lusitaniam se conferens Olisiponem adiit, regiam urbem; in qua & cùm iis, qui res illas, quas erat scripturus, vel magna ex parte gesserant, vel interfuerant gerendis, coràm colloqueretur; & quæ ab illis erant temporibus remotiora, ex ipsis erueret monumentis, rerumque gestarum annalibus in regni archiuo referuatis. Id præstitit viuente adhuc Henrico rege, & amplissimam ad id potestatem conoedente. Atenim Petrus Ribadanera, Ludouicus Gusmanus, Ioannes Antonius Gabutius, & qui deinceps, siue ex Societate, siue extra illam de Abassinis scripsere, præter illa, quæ iam vulgo multorum erant literis, nemine contradicente, celebrata, nihil tradidere, nisi quod à religiosis Societatis, qui ab annis prope sexaginta Æthiopiam incolunt, acceperere. Ab eo enim tempore, quo Andreas Ouiedus ea in loca cum sociis penetrauit, ad hunc vsque diem, numquam ferè illic ex Societate defuere, qui frequenter de statu rerum & Goanos & Europæos Societatis religiosos, ipsùmque inprimis Præpositum generalem per literas monerent. Anno, vt dixi, millesimo quingentesimo quinquagesimo septimo Abassiam Ouiedus cum sociis ingressus est. Inde vsque ad annum tertium huius sæculi, etsi est valde laboratum, vt illuc alij ex Societate ingrederentur, haud vllus tamen fuit, qui perueniret. Statim enim

enim ab Ouiedi ingressu omnes Erythræi maris portus, qui in Æthiopia sunt, priusque sub Preteiannis erant ditione, ita Turcæ occuparunt, ut quadraginta sex annorum spatio nullus Lusitanus adire eas Abassiz partes tentarit, qui non fuerit à Turcis vel occisus, vel captus. Anno enim superioris seculi sexagesimo Fulgentius Frerius ex Societate Iesu illuc ex India missus, ut quid ageret Ouiedus, quid reliqui socij, agnosceret, & renuntiaret, in ipso Arabico sinu à Turcis est captus, vulneratus, & Cairum ductus. Idem triginta post annos Antonio Monserrato, & Petro Paëz eiusdem Societatis sacerdotibus contigit. Cum enim in Æthiopiam se conferrent, ut eos, qui tunc ibi erant eiusdem instituti homines, in illo agro colendo adiuuarent, usque decedentibus succederent, à Saracenis capri, septem in captiuitate annos durissime traduxere. Felicior Abrahamus de Georgiis Societatis quoque sacerdos, Maronita genere, qui cum anno millesimo quingentesimo nonagesimo quinto in eadem oras eodem proposito contenderet, in Insula Mazua à Mahumetanis incolis cognitus, & comprehensus, & quia renuntiare Christo noluit, crudelissime trucidatus, ad cælum abiit maturus. Cum ergo Patres, qui in India erant, hoc Æthiopicum iter tantis viderent præpeditum difficultatibus, considerare sedulo cœpere, quoniam modo effici posset, ut aliqui ex socijs in Abassiam introirent. Visum tandem post multa, nihil esse ad hanc rem aptius, quam si Dio, quam ad urbem multæ quotannis ex variis locis negotiandi causa naues appellunt, aliquod haberent domicilium, in quo degerent, ut inde in Æthiopiam breuius & minori cum periculo traicerent. Acriter huic consilio per suos obstitit humanæ salutis hostis.

sed causa cecidit. Cùm enim Arias Saldagna vir clarissimus, & præter cæteras animi virtutes singulari excellens pietate, Indiam gubernare esset aggressus, apud se reputans, quanta in hac vna re & adeundæ, & ad veritatem reuocandæ Æthiopiæ esset spes, tanta in eam diligentia incubuit, vt dicta in vrbe ad hos, atque alios similes vsus valde commodam Societati domum à fundamentis erexerit. Ex ea nunc in iisdem infidelium nauibus exiguo cum periculo proficiscuntur nostri; & in ipsa tandem exponuntur Æthiopia. Ita variis annis variij profecti, sine damno peruenere. Petrus Paëz anno millesimo sexcentesimo tertio; duobus post annis Antonius Fernandus, & Franciscus Antonius de Angelis; anno tandem millesimo sexcentesimo sexto Ludouicus Azevedus, & Laurentius Mangonius, Romanus cognominatus. Qui omnes, vt iam suprâ dixi, summo cum labore, sed fructu pari, & conseruandis catholicis, & hæreticis reducendis operam impendunt.

---

*In quibus prius erroribus Abassini fuisse, in iisdem adhuc persistere.*

## C A P V T XXVIII.

**A** Bassinos non tantum ex Hebræis damnatas accepisse cæremonias; sed etiam ex Græcis aliisque hæreticis praua dogmata & multiplices hausisse errores, atque in iis hoc maxime tempore, quando notus auctor eorum religionem mirifice commendat pertinaciter hærerè, demonstrandum in præsentia est. Vtrumque eadem opera & breuiter præstabo,



productis in medium erroribus, & auctoritate eorum, qui ea de re ex Abassia scripserunt, confirmatis. Ex Iudæis Circūcisionem habent, & Purificationem. Colunt sabbata. Non nisi ad vesperum sumunt cibum, cum ieiunant. Abstinent à carnibus porcina, leporena, & suffocatae animantis, à sanguine, & à piscibus, qui squamis carent. Plures simul habent vxores, & eas, cum lubet, repudiant. Purgatorium negant. Aiunt Spiritum sanctum à solo Patre procedere. Humanam Christi naturam æqualem asserunt diuinitati. Vnam in eodem Christo voluntatem, & vnam lumentaxat agnoscunt operationem. Repetunt Baptisma. Animas iustorum ab omni labe & pœnæ dicto exolutas nolunt in cœlum recipi ad conspectum Dei, ante Mundi finem. Non seruant Christi de viatico præceptum. Neque peccatorum numerum, neque species confitentur, neque id putant necessarium. Humanos animos è materia educi volunt, non creati. Multi ex ipsis impudenter iactant, eos, qui Romanam sectantur doctrinam, non hæreticos tantum esse, sed Mahumetanis peiores. Reprobant Chalcedonense Concilium, quod Dioscorum cōdemnarit: solos Ethnicos & Mahumetanos credunt æterno igni addicendos. Hos ex literis eorum, tam qui superioribus annis in Abassia fuere, quàm qui modò sunt, errores collegi. Alios iisdem in eadem gente esse generatim firman. Sed iam aliqua in medio testimonia ponam. Sit Gonzali Roderici Societatis sacerdotis, vi ad explorandam Preteiannis de excipiendo Patriarcha voluntatem, cum Iacobo Dias legato Goa in Abassiam profectus est. Is in quadam epistola, quam postea transcribam, ait, habuisse se cum docto quodam monacho de Christianis rebus sermonem, multisque

tōsque in eo errores deprehendisse. Inter eos Sabbati observantiam; abstinentiam à porcina & leporina carne; Spiritus sancti à solo Patre processionem; illud sanctarum animarum à cœlesti regno veluti exilium vsque ad mundi finem; hæresim demum illam, quæ tradit solos infideles æternum cruciandos. Similia scribit Alfonso de Francia nobilis Lusitanus Æthiopice linguæ cum primis peritus, & in Preteiannis aula diu versatus. Similia Emanuel Fernandius, & alij Societatis religiosi, qui sunt Ouiedum in Abassiam comitari; quorum literas loco postea commodiori legendas proponam. Anno sexcentesimo quarto post millesimum, nono Calédas Augusti ita in Indiam ad Goanos socios scripsit Petrus Paëz patria Castellanus, qui cæteris hodie sociis in Æthiopia præest. Abassini, inquit, in ea sunt opinione, ut credant, quatuor nos in diuinis asserere personas, quia duas in Christo naturas, duas confitemur voluntates, in quo illi naturam tantum unam, & unam tantum dicunt esse voluntatem. Asserunt à solo Patre Spiritum sanctum procedere. Purgatorium negant. Baptismum repetunt quotannis. Circumcisione utuntur. Custodiunt Sabbata, & plures alias habent. Iudæorum cæremonias. Idem Petrus ait, sæpius se cum præcipuis eorum literatis priuatim domi, bis coram Augusta, semel magna cum celebritate coram Imperatore hisce de rebus disputasse; redactos in angustias errata sua fuisse confessos; dixisse tamen, non audere se Romanæ Ecclesiæ primatum palam confiteri. Addit præterea, duos se ad veritatem fidei reuocasse, quorum quilibet tres simul habebat uxores. Cum id illis absque diuinæ legis iniuria fieri non posse, ostenderet, respondisse, ea se de re suum rogasse Abunam, & ab

eo accepisse, nulla esse prohibitum lege, plures vnum  
vxores habere; ne qua tamen per ignorantiam reli-  
gione tenerentur, liberam se ipsis ad illas habendas  
facere potestatem Ludouicus Azeuedius in quadam  
epistola, quam anno septimo huius seculi, vndecimo  
Calendas Augusti ad socios scripsit, inter alia aliò spe-  
ctantia, hæc de Abassinis adiungit. Plures ducunt v-  
xores. Non continentur numerum, neque species pec-  
catorum, sed generatim dicunt: Peccaui, peccaui. Non  
roborantur Chrismatis sacramento; neque vicini  
morti sacro inunguntur oleo; neque demum è vita  
discessuri vitæ pane stabiliuntur. Antonius Fernan-  
dus ex Dambeæ regno, vrbe Gorgorra, anno sexto  
post millesimum & sexcentesium, vltimo die Iulij  
hunc in modum scribit. Hic vbi sum, aliqui Roma-  
nam fidem recipiunt. Alij agnitæ veritati nolunt ad-  
hærere. Imperator hoc ipso anno ad summum Pon-  
tificem literas mittit; in iis petit, vt aliquem sacrorum  
antistitem seu Patriarcham in has oras destinet. Ad  
Catholicum etiam regem scribit, à quo petit, aliquod  
ad se mittat Lusitanorum militum præsidium, vt quod  
in votis habet, reducere Imperium suum ad fidem  
possit; rem à principibus pendere; eos; si aliter con-  
sentire nequeant, vi & armis esse adigendos: sed val-  
de vereor, vt inania Imperatoris vota reddantur; ad-  
modum enim mobili ingenio Abassini sunt, nec mul-  
tum curant, quantum oporteat seruare in promissis  
fidem. Non pauci eorum suos se testantur agnosce-  
re errores; vt eos tamen relinquant id ipsis difficilli-  
mum. Clementissimus Deus claram illis affulgeat lu-  
cem. ne miseri absque fidei cereo claudant in morte  
oculos, & ita moriantur, vt viuunt. De Imperio præ-  
ne actum est ( hos hæresis fructus parit ) ex partibus  
vigin

viginti adeptæ iam Imperatori sunt ferè septemdecim. Hæc omnia Antonius. Anno rursus insequente, quarto Calendas Iulij sic idem scripsit. Sumus in Æthiopia sacerdotes ex Societate quinque. Aliqui imperatoriis comitamur castris, simul ut catholicos nostros conseruemus, simul ut eorum numerum, fauente Numine, augeamus. Multi ex iis, qui à nobis fide disident, res nostras, nostramque doctrinam miris effertur. laudibus; ne eam recipiant partim deterrentur metu, partim animi duritie & obstinatione reuocantur. Multa habent Iudæorum propria, eaque Iudaico obseruant ritu. Circumcisione vtuntur; diem Sabbati festum agunt; ab iis abstinent carnibus quæ ab Iudæis habebantur immundæ; ab iis item piscibus, quibus squama non est. Aded verò his legalibus cæremoniis adherent, vt cum euidenter agnoscant diuina lege esse damnatas, idque etiam fateantur, abduci tamen ab iis nolint. Idem anno eodem, vigesimo die Iulij scripsit, quæ sequuntur. Imperatorem sequens magnæ huius Æthiopie continentem perlustro. Plurimis Abassini iugentur erroribus, maiorem eorum partem ex veteri hauserunt Iudæorum lege; præterea Baptisma iterant; humanam Christi naturam affirmant esse diuinitati æqualem, & hominum animas, sicuti animantium cæterarum ex parentum semine generari. De his, atque aliis ipsorum erroribus cum potissimis, quos habent, literatis sæpe conflixi; facile reliqua concessere; postrema duo de humana Christi natura, deque hominum animis obstinatissimè negarunt. Iterum in illa epistola, quam sæpius retuli, de Æthiopicis rebus Romam missa, ita scribit. Huius Abassinæ gentis errores plurimi sunt. Inprimis in Leonem Magnum, sanctissimum Pontificem, quod Dioscorum,

scorum, quem beatum prædicant; cum Concilio damnarit, multa conferunt maledicta; grauiâque ei circa Christi naturas & operationes imponunt mendacia. Deinde præter conseruationem rerum, & miracula, si qua fiunt, nihil aiunt efficere Deum; atque inde colligunt non creari, sed educi è materia formas hominum actione parentum. Multas præterea Moisaicæ sectæ seruant cæremonias: abstinent enim ab esu eorum animalium, quæ olim erant Iudæis prohibita. Purificationis legem & Sabbata custodiunt: circumcidunt masculos, & peculiari ritu etiam fœminas. Item annis singulis ipso Epiphaniæ die Baptismatis renouant lauacrum. Religionis quoque Christianæ desertores, qui ad Mosem aut Mahumetum transfugere, si redeunt, aqua rursus lustrali intingunt. Idem iis faciunt qui vel enorme suscepere facinus, vel matrimonium consummarunt, vel alicui religiosæ familiæ se addicunt. At contrâ aded pertinaci consuetudine certum baptizandis infantibus tempus designatum est, vt ne morientes quidem ante illud expiant Baptismo. Nulla præmissa aut confessione, aut contritione ad Eucharisticam mensam accedunt etiam illi, qui sceleratissimi esse noscuntur. Non putant esse opus, cum peccata confitentur, neque eorum numerum, neque species patefacere. Dissoluunt pro libito coniugia. Negant Purgatorium, & Spiritus sancti à Filio processionem. Afferunt ante diem Iudicij neque iustorum animas beatitudine cœlesti donari, neque animas impiorum ad Inferos detrudi, & æternis cruciatibus mantipari. Errores isti, & huiusmodi alij cõmunes omnibus sunt. Nō paucos reperio quorumdā peculiare: vt enim quisque libetè credit, quod vult, ita nouæ quotidie pullulant hèreses, atque impunè vagantur.

*Qua*

*Quæ argumenta pro tuenda Abassina gentis religione proposita sunt, nullam vim habere.*

## CAPUT XXIX.

**E**X iis, quæ ad Abassinorum defensionem à nouo auctore adducta sunt, quædam extra rem esse, nō pauca inania, & commentitia, satis, vt opinor, cuique cōstabit. Ea tamen, ne quid, quod è re erit, prætermisum videatur, percurrā breuiter. Tale primū eius erat argumētū. Quæ ad vtramque Christi naturā pertinet, quæque Apostolico continentur Symbolo, ea Abassinos ritè credere, & disertè confiteri. At certū est, nihil hoc argumentum efficere, cū sit ostensum, & grauissimis probatum testimoniis, ipsos de origine Spiritus sancti, quem nolunt à filio procedere, de humana Christi natura, quam diuinitati exæquant, de eiusdem Christi operationibus, quas esse plures negāt, de supplicio Christianorum malè vitam finientium, de animarum nostrarum produetione, quam parentibus attribunt, deque huiusmodi aliis longè aliter, quàm Romana & Catholica fides docet, sentire, & credere. Secundum erat; Nicæno, Constantinopolitano, Ephesino, Chalcedonenſi Conciliis, vti quatuor Euangelis, semper Abassinos honorem habuisse; nec vmq̃ aliquid reieciſſe eorum, quæ in iis fuisse statuta. Seruare præterea Tridentinæ decreta, quæ à Pio V. Pontifice maximo per legatos suos petiit, & obtinuit Mena Imperator. Tribus primis Cōciliis aliquem Abassinos honorem deferre, facile admitto: Chalcedonenſe, aded

execrantur , vt nihil magis aut peius. Patebit etiam  
postea ex literis Gonzali Roderici ad Goanos socios  
ex Æthiopia missis. Quod de Tridentino additur à  
Mena petito. & obtento. ponendum est inter nugas.  
Nec eius nomen apud Abassinos notum. Et verò qui  
poterat Mena , cùm Romanam Ecclesiam, vt iam o-  
stensum, & magis postea. cùm de Ouiedo agetur, ostē-  
dendum est, valde auersaretur , Tridentinas ab ea le-  
ges petere , aut vltro oblatas recipere ? Interfuisse A-  
bassinos Cōciliis Romani Pontificis auctoritate con-  
gregatis, aliud sinceræ eorum fidei argumentum fuit,  
à nouo auctore propositum. Quid valeat, facile est vi-  
dere. De Græcis ita licebit argumentari : Conciliis in-  
terfuere Romana auctoritate celebratis, ergo schisma-  
tici non sunt. Quis non videat non esse aptam conse-  
cutionem ? Demus Æthiopes interfuisse primis il-  
lis generalibus Ecclesiæ Conciliis, quæ numerata sunt.  
At quo pacto in Chalcedonense fuerunt affecti ? Quo  
illud hodie loco habent , cùm & errasse sentiant , &  
multa decreuisse veræ fidei contraria , ac Leonem  
magnum, quem sanctissimum Romana prædicat Ec-  
clesia, inter nequissimos homines reponant ? Ad Cle-  
mentem V. Auenionem in Gallia , ad Florentinum  
Concilium sub Eugenio I V. celebratum , ad Cle-  
mentem V I I. Bononiā in Italia , ex Æthiopia Abas-  
sinos venisse, certum est. Nihil inde aliud habetur, nisi  
quosdam eorum Imperatores cognitis erroribus, qui-  
bus ea gens erat implicata , missis legatis curasse , vt  
aliqua ipsi veritatis lux ab Romana sede affulgeret. Id  
neque ex communi omnium consensu , neque ab iis-  
dem Imperatoribus constanter tentatum esse, euentus  
docuit. His quoque proximis temporibus Imperato-  
res fuere , qui de Abassia ad veram fidem reducenda

M ad

ad summos Pontifices misere literas , quas ego ipse Romæ vidi. Non asserabant catholicos esse Abassinos , debitamque Romanæ sedi præstare obedientiam : imò à supremo eos capite esse diuisos , & varias cum re Christiana miscere superstitiones ; atque inde fieri , vt immensis iactati miseriarum fluctibus in exitium ruerent. Idem octo , aut nouem ante annos præstitit Sacinos , verè religionis amans Imperator , vnam ad summum Pontificem , alteram ad Catholicum Regem hac ipsa de re scribens epistolam ; qui legatos etiam ad eosdem principes misisset , quod & tunc valde optabat , & iam antè facere decreuerat , nisi iter mille esset impeditum difficultatibus. Legatio autem illa hominum viginti quatuor , quæ ab Alexandro III. Imperatore ad Gregorium XIII. missa dicitur , tam fuit vera , quàm is ipse , qui eam misisse fingitur Alexander III. quem numquam fuisse demonstratum est. Illo quoque vsus est nouus auctor argumento , quòd Romani Pontifices nec carissimos filios solent appellare , nisi eos principes , qui Romanæ obediunt Ecclesiæ ; nec nisi iisdem vel Apostolicam impertiunt benedictionem , vel Imperij precantur felicitatem. Constat autem Pium V. in iis literis , quas ad Menam Æthiopicum Imperatorem dedit , post naualem illam de Turca victoriam à Christiana classe reportatam , non aliter ipsum , quàm vnum ex catholicis regibus tractasse , cum & carissimum filium nuncuparit , & Apostolicam ei impertierit benedictionem , & Imperij felicitatem atque incrementum precatus sit. Id porro argumentum quantum valeat inde perspicui potest , quòd Paulus V. Pontifex maximus , qui Abassinos hæreticos esse , & à Romano capite præciosos certò scit , nec vllò modo ea de re dubitat , per hos

dies



dies ad eorum rescribens Imperatorem , sic eum salutatur, ut catholicos reges solet. Id verò optima ratione fieri , haud dubium est. Neque enim Abassini tanta pertinacia, quanta Europæi hæretici, à Romana. diffident Ecclesia; & hosce Imperatores, atque vniuersum eorum Imperium ad sanam doctrinam reuocandi magna spes est; ut propterea blandis titulis , amorémque significantibus alliciendi potius ad fidei concordiam sint, quàm ab ea asperis verbis auertendi. Quòd Pontifex felicitatem , & Imperij amplificationem Abassinis precatur , ut intemerata Christi religio illis in regionibus augeatur , non significat Abassinos catholicos esse, sed optat, ut sint, quo sacra Christi religio purè ac sincere ab ipsis culta magnum indies accipiat incrementum. Aliud est noui auctoris argumentum, Abassiam habere peculiarem Romæ protectorem, quem nulla habet orbis terrarum regio , quæ Romanum Pontificem non fatetur Christi Vicarium , & summum inter Christianos sacrorum Antistitem. Detecta à nobis supra est huius argumenti falsitas. Nul- lum enim Abassiam peculiarem Romæ habet protectorem, si quem tamen haberet , haud inferri inde aptè posset, Abassinam gentem esse catholicam, & Romanæ Ecclesiæ obedientem. Nam & Græci, & Angli protectores habent peculiares , ex quo non sequitur Græciam & Angliam cum Romana sede consentire. Illud etiam hic auctor affert , Abassinos sacerdotes, apud nos, atque in ipsa primaria religionis sede , hoc est, Romæ, non consentientibus tantùm, & approbâ- tibus, verum etiam præsentibus summis Pontificibus, more suo rem diuinam facere; inde optime sequi, eor- um gentem esse catholicam , & à Romana sede nequaquam disiunctam. Probare eadem ratione posset,

veram esse in Græcia fidem, cum Græci sacerdotes, qui Romæ sunt, Græco ritu sacrificent. Non ideo cum hæreticis Abassini numerantur, quod diuersos à nobis habeant ritus, diuersasque cæremonias, quæ nihil obfunt Religioni; sed quod à fide aberrant, neque Romani Patris agnoscant imperium. Si qui erunt, qui re-tentis Ecclesiæ suæ ritibus errores deponant, & summo Pontifici submissè obtemperent, ij, si ritè sint ini-tiati, cur à sacris remoneantur. causa nulla erit. Quod ait, summos Pontifices Abassinis litantibus sæpe in-terfuisse, dictum hominis est, vt notauì, pontificias consuetudines ignorantis, & à Romana vrbe longè remoti. Alia deinde à miraculis, à gentis sanctitate, à cura tuendæ fidei, à sacris familiis, à religiosorum ho-minum numero, ab Imperij firmitate accumulat idem auctòr argumenta. Ait multa in Abassia patrari mira-cula; id vbi vera religio non est, haud posse fieri. Sed quæro ab eo, quænam ista miracula sint, quorúmve probentur testimoniis? à quibus item, & cuius rei cau-sa fiant, aut facta sint? Numquam profectò ostendet, si qua in Abassia edita sunt miracula, fuisse ea patrata vel ab aliquo Abassinæ religionis professore, vel ad ipsam Abassinorum religionem testandam, ab eo tẽ-pore, quo cum Alexandrino Patriarcha Romanam obedientiam deseruere. Quæ in Abassinis monachis, qui præ cæteris sancti apud ipsos habentur, vitæ san-ctimonia sit, certis postea testimoniis ostendam. Vt enim vera apud Abassinos fides non est, ita neque ve-ram esse sanctitatem, certissimum. Si qui ex iis rectè viuunt, illi sunt, qui ad Catholica castra transiere. In reliquis, vt aliqua sit vmbra sanctitatis, vera sanctitas non est. Neque verò quidquam efficit, quod eorùm nonnulli etiam nunc ieiuniis, vigiliis, aliisque corpo-ris

ris castigationibus affligunt sese, ac macerant: hæc enim externa signa, ut Epiphanius notauit, & Euangelium innuit, in Phariseis quoque apparebant olim, & in Indicis hodie obseruantur Ioghibus; neque in his tamen nunc est, neque in illis fuit tunc vera animi sanctitas & quæ Deo gratum hominem efficit, Iustitia. Pharisei quidem, quod ipsis Christus exprobrauit, inanem vulgi captabant gloriam; Ioghes verò & magna ex parte idem sibi proponunt, & ab iniquissimo animorum deluduntur hoste, prauas superstitiones hisce fallaciis commendante. Quod additur, vix vltum apud Abassinam gentem hucusque fuisse Imperatorem, qui ardore fidei non fuerit insignis, & eximia non præbuerit virtutum exempla, apertissime falsum est. Et certè qui ita sentit, haud satis percipit, quantam, quod sæpe dixi, Apostolicæ sedis, quantam Lusitanis regibus, quantam Lusitano regno, quantam Ouiedo Patriarchæ, quantam mille aliis hominibus singulari fide, prudentia, virtute præstâtibus iniuriam faciat. Longè aliud enim horum iudicium fuit, & testificatio. Nullos esse in Abassia fidei quæsores paulo post apertum fiet. Ex eo autem quòd aliquæ inibi sint religiosorum familiæ, quàm bene colligatur, veram quoque fidem esse, & Romani Pontificis obedientiam, ex Græcia discat nouus auctor, & paulisper consideret, an rectè inferri queat, catholicam fidem Græcos sectari, quoniam apud ipsos multi sunt, qui religiosam sectantur disciplinam? Vltimi argumenti, quod ab Imperij firmitate, tranquillitate, pace, felicitateque vniuscuiusque Imperatoris decessu deducebatur, ex iis capiatur responsio, quæ suprâ de successione Imperatorum à me dicta sunt. Addi & ista possunt ex literis Antonij Fernandij anno sexcentesi-

mo nono post millesimum ad socios datis. In hoc, inquit, Æthiopico Imperio non aliter viuitur, quàm sub armis, & cuiusque ferè hominis vita posita in bello est; nec magis quietam, quàm reliqui, Imperator degit. Is enim annis singulis vix hyeme exacta, mox per se ac præfectos suos partim aduersus coniuratos ac rebelles, partim aduersus vicinos hostes renouat bella. Omissis præteritis tumultibus, dici vix potest quâto opere hisce duobus proximis annis omnia turbata sint. Vbi hic, qui nunc est, Imperator Imperij habenas suscepit, tres statim vel quatuor ex primoribus, regio nomine vsurpato, contra ipsum insurrexere; sed prælio victi, & profligati sunt. Hoc ipso anno, qui eius Imperij secundus est, totidem alij idem ausi facinus, in campum prodierunt. Nec à multis vsque seculis res in Æthiopia quietiores fuere. Cogimur & nos iisdem fluctuare bellorum æstibus, atque in varias partes perpetuò diuertere. Fugimus enim aliquando ad montes; in abditas interdum terræ specus abdimur; nonnumquam inaccessas ingredimur sylvas, & loca inuia penetramus, ne belli turbine abrepti ad scopulos allidamur. Infinita prope sunt, quæ in his regionibus patimur, mala; possumus non immeritò easdem illas, quas olim Apostolus Paulus, Litanias decantare. Et viderentur ista quidem perpeffa facilia, eaque æquis ferremus animis, si aliquem possemus fructum colligere, quem ex nostris laboribus offerremus Deo. Hoc eodem anno cùm Imperator hinc esset profectus, vt cum vno duce suo, qui rebellati cuidam principi bellum inferebat, copias coniungeret, repente ad castra delatum est, prope esse Galas, Castrum gentem immanissimam, quam vulgo ferunt ab dæmoniis gentitam. Centum pæne anni sunt, cùm hi ab agris syluisque

uisque egressi (pastoritiam enim agebant vitam) excusso Æthiopum, quibus suberant, iugo eam armis acquisiuere potentiam, ut modò non solum terrori omnibus sint, verumetiam partem Æthiopiæ ferè duodecimam occupent. Fama est, à Patriarcha Bermudio hasce Galarum strages fuisse prædictas, dum sæpius inter sacrificandum ex improviso diceret, videre se miseram Æthiopiam, ob ingentia gētis ipsius peccata à nigris canibus crudeliter dilaniari. His ergo venientibus cum exercitu obuiam prædiit Imperator, sed fusus ab ipsis fugatusque est; nec multum abfuit, quin totum Imperium penitus rueret. Hominem conueniebant, ut aliquod, si possem, afflicto animo afferrem leuamentum; sed ipse collectis raptim nouis militibus in victores derepente irruit, iisque profligatis perditâ recuperauit. Aliquot post hanc victoriam dies ipsam adiij, sumque ab ipso honorificè & beneuolè exceptus. Erga rem Romanam egregiè se affectum præbet. Deus illum cœlesti perfundat luce. Hæc omnia Antonius. Huius generis ex aliorum Patrum literis afferre possem multa, quæ consultò prætereo.

---

*Neque Abassinorum errores aptè excusari, neque  
eorum fidem auctorum testimoniis  
rectè probari.*

## CAPUT XXX.

**E**Os tantum errores conatus est nouus auctor excusare, quos Abassini è turbidis Hebræorum fontibus

tibus hausere. Negauit reliquos, quoniam quo pacto excusari possent, non inuenit; ac proinde asseruit, ritè ipsos ac rectè credere, & confiteri omnia quæ tum explicatè, tum inuolute Apostolico docentur in Symbolo. Ego ostendi, quod iterum repeto, eos de augustissimo diuinæ Triadis mysterio, de Christo, de sacramentis, de sempiternæ felicitatis præmio, de æternis malorum hominum suppliciis, de purgatorio, de natura animi humani, deque aliis inde decre is pessimè sentire: cum asserant, non produci à Filio Spiritum sanctum; vnam tantum in Christo esse naturam, eamque diuinitati æqualem, vnam tantum operationem; nosque vocent hæreticos, quasi duas in eo asseramus personas, quia duas confitemur naturas, duas agnoscimus operationes; cum ab hac vita in alteram transcuntēs cœlesti pabulo non roborentur; cum neque peccatorum numerum neque species explicent confessori; cum plures quisque ducat vxores, easque prohibito repudiet; cum post hanc vitam nullam esse dicant animarum purgationem; cum negent malos Christianos apud inferos æternum puniendos; cum beatitudinis ingressū ad extremi vsque iudicii diem animas arceant hominum sanctorum, quæ prorsus mundæ sunt, nec ullius pœnæ debito obnoxia; cum putent animas nostras posse natura sua corrumpi dū eas, sicut animalium cæterorum, parentum opera educi dicant è materia. His Abassinos hoc tempore erroribus inuolui, quantum satis est, palàm feci. Quod ad Iudaicas attinet superstitiones, nouus auctor ait, Abassinos à Romano Pontifice monitos, ne illas vsurparent, illic abieciisse, nec iterasse amplius; quod falsum esse probatum est, nec repeto probationes. Adhuc enim in iisdem perseuerant, cum non solum sæpe

pe audierint ab Apostolo dictum, *Ecce ego Paulus dico vobis, quoniam si circumcidamini, Christus vobis nihil proderit*; sed rectè sciant Mosaicæ cæremonias fuisse à Christo abrogatas. Itaque licèt aliquando, siue ex ignorantia, siue quo alio fine legalia ista sic obseruarint, vt habere aliquam facti sui excusationem possent; multis tamen abhinc annis optimè norunt, Romanæ Ecclesiæ esse contrarias, & diuino Christi præcepto prohiberi. Quàm rectè idem auctor affirmet Christianum hominem, vt Christum imitetur, qui circûcisionis dolorem ac notam nostra causa subiit, posse nunc absque scelere circûcisione uti; posse item fœminas, quæ peperere, ob honorem Virginis Deiparæ uti purificatione; posse quoque à Christi cultoribus ob conditi orbis beneficium licitè seruari Sabbatum, quo die ab eiusdem orbis conditione dicitur Deus requieuisse; posse denique alias Mosaicæ legis vsurpari cæremonias, dummodo animus absit, vt dicitur, legalis, discutiant alij; ego hîc scholasticas disputationes non edissero. Scire tamen ab eo velim, quodnam hoc imitationis genus sit, vt quis alieno vulnere & dolore similem se patienti Christo præbeat? Si Abassini Christum multa propter nos mala passum cupiant imitari, à feriendis filiis manus abstineant; illa præstent (prope enim infinita sunt) quæ nullum religioni incommodum, nullam veris Christianis parere queant offensionem: illa demum abijciant, quæ à Iudaicis vel Mahumetanis fontibus videntur deriuata. Nec opus est de his plura dicere. Nihil etiam efficiunt testimonia scriptorum, qui pro Abassinorum defensione adducti sunt. Quidam enim ex iis solùm asserunt, Abassinos esse Christianos, quod nos inficias non imus: siquidem sacra vnda perfuni

sunt, & Christi religionem profitentur. Quamquam ea ratione vel semiuudæi possunt dici, vel semichristiani, quod Mosaicis ritus cum Christianis sacris ita misceant, ut dubitari iure queat, magis ne antiquam Moysi, an nouam Christi sequantur legem. Auctores alij, quod initio dixi, ab iisdem Abassinis decepti sunt. Alij cum scirent eorum aliquos Clementi V. Auenionē, Eugenio I V. in Florentino Concilio, Clementi V I I. Bononiæ obsequium & obedientiam præstitisse, nec aliud per ea tempora de ipsis audierint, facile existimare potuerunt perseverasse in proposito, & quam tunc per eos legatos professi sunt Romanam fidem, deinceps retinuisse. Hac verò tempestate, rebus planè perspectis, aliter sentire necesse est. Idem quod scriptores illi de Abassinis possent quoque post Florentinum Concilium de Græcis existimare, nisi loci propinquitas, & frequens eius gentis ad hæc loca concursus palàm fecisset, fregisse eos fidem in dicto Concilio Romanæ Ecclesiæ datam, & ad mores pristinos rediisse. Alij demum auctores, quæ de Abassinis reperere ab antiquioribus scripta, nullo veritatis facti examine, in suos ea libros transtulere, in quibus ob hanc causam in omni rerum genere errores magni sunt, quos quivis hoc tempore in hisce gētium hitoriiis mediocriter versatus, facile deprehendet. Qui tamen disertè pronuntiarint, numquam Abassinos rectam fidem, & Romanæ sedis Imperium reliquisse, paucissimi sunt, nec multum referret, si plures essent, cum notissimum sit, fuisse deceptos. Illud etiā debet observari, quosdam Abassinorum Imperatores optimè potuisse verè Christianos & catholicos appellari, quod & nouerint, confessique sunt Romanæ Ecclesiæ principatum, & valde labora-

rint,



rint, vt Iudaicis superstitionibus, cæterisque erroribus ex imperio depulsis ad sinceram Christi fidem populos suos reducerent. Talis ille fuit, qui ad Clementem V. & is, qui ad Florentinum Concilium diuersis temporibus legatos misere. Talis Dauid Claudij pater annis superioribus. Talis his proximis Sacinos, qui de recipienda Romana fide cum suis sæpe consultauit, literasque eadem de re ad summum Pontificem misit, ac de legato mittendo sollicitè cogitabat. Quàm verò absurdum sit, ex his inferre, Abassinos in Ecclesiæ Romanæ fide & obedientia viuere, nemo non videt. Nam ex iis Constantinopolitanis Patriarchis, qui nobis tempore fuere proximi, de rebus fidei, & Romana sede aliqui putantur rectè sensisse, non proinde quisquam Græcos esse catholicos, & Romano Pontifici obedientes, nisi perperam colliget. Præterea qui nunc est Babylonius Patriarcha Romanum agnoscit principatum; nec ita pridem legatum misit in Urbem, nomine Adamum, sancti Pachomij per illas regiones Abbatem generalem, qui de Babyloniiis Romanæ sedi subiiciendis ageret cum Pontifice. Egit diu, nunc de rebus fidei aptè instructus remittitur ad suos: adiunctique ipsi à Pontifice sunt Ioannes Antonius Marietius, & Petrus Metoscita Societatis Iesu presbyteri, prudentes viri, & docti, vt in Babylonica Ecclesia reducenda omnes animi & corporis vires intendant. Speramus fore, vt ex sententia expeditio succedat. Quis verò hinc scitè arguat, Babylonicam gentem esse catholicam? Damus ergo aliquos Abassinorum Imperatores, agnita fidei veritate, conatos esse gentem suam Romanæ Ecclesiæ subdere: dicimus non nisi inscitè inde colligi, Abassinos nobiscum in fide consentire, numquàmque ab eadem descivisse. Constanter

stanter etiam negamus, vlllo firmo alicuius scriptoris testimonio eorum religionē probari. Quod de Abassinorum collegiis, Romano, & Olisiponensi nouus auctor adiungit, satis ostendit, quàm sint inania cætera, quæ dicit, & indigna fide. Nihil enim Abassini Romæ habent, quod vel collegium sit, vel eo nomine cense-ri queat; nisi more loquamur Iurisperitorum, dum aiunt sufficere tres, vt collegium faciant. Exigua illis, & ignota in Vaticano colle ædícula est. Ibi hoc tem-pore tres quatuorve degunt, atque ita sunt, ac si non essent. Cùm Iouius viuebat, per occasionem legatio-nis ad Clementem VII. ex Abassia missæ, plu-res eò conuenere; & animus forte Pontificibus erat, aliquot ex ea gente Romæ alere, fideique doctrina in-stituere, vt ad suos postea reuersi, esse possent Reli-gioni vtilis; quemadmodum propriis in collegiis Sco-ri, Angli, Græci, aliique aluntur. At multis iam ab-hinc annis sic abolita est in Vrbe Abassinorum me-moria, vt paucos reperiatis, qui sciant, an vlli Romæ Abassini sint. Ego homines multos in ea natos & edu-catos de Abassinorum collegio dedita opera rogavi, rem ab se nouam quæri confessi sunt. Ecce celeberrimum illud Abassinorum in Vrbe collegium, quod à sancto Stephano Indorum habere nomē dicitur. Ta-le illud aliud est, quod esse fingitur Olisipone, vbi Æthiopes isti ne ædiculam quidem propriam habent Romanæ similem. Iam verò quod nouus auctor ait, habere Abassinos Vaticanæ bibliothecæ clauim vnā, esseque, vt vocat, Linguarum Chaldaicæ, Arabicæ, Syriacæ, Ægyptiæ bibliothecarios, multosque ad eo-rum collegium Cardinales, aliosque illustres viros ire solitos, varias vt linguas ab iis discant, & quædam talia, quæ scribit, ad eò non modò falsà, verum etiam ridicu-

ridicula sunt, ut nihil magis. Illustrissimus Cardinalis Bellarminus, qui solus ex iis, quos auctor nominat, superstes est, hac de re quæsitus, nullam se umquam ab istis Æthiopibus linguam didicisse, nec discere voluisse affirmavit. Idem absque dubio affirmassent alij, si viuerent & essent rogati. Nec scio, quænam ista sit linguarum peritia, quæ tanta ab hoc auctore in Abassinis esse dicitur: ne ipsi quidem eam se habere sciunt.

---

*Commentitias esse causas, ex quibus orta fingitur deserta Religionis in Abassinis infamia.*

C A P V T XXXI.

**V**T ab hæresis nota Abassini liberarentur, nihil afferri poterat vel absurdius, vel ineptius, quàm quodd hunc in finem nouus auctor excogitauit, aut ab alio fictum credidit, & approbavit. Quæ assumuntur, ut faciant fidem, & si reipsa falsa sint, probabilia tamen, aut probabilibus proxima videri debent: quod enim simile vero non est, ad probandum aptum esse non potest. Ait in primis anno Christi millesimo quingentesimo quinquagesimo homines plusquam trecentos ex Lusitania in Abassiam profectos, eosque ibi pro Lusitanis & Christianis habitos peramanter fuisse ab Æthiopibus exceptos. At cum non tantum origine, sed etiam secta Hebræi essent, facile animos suos prauis infectos opinionibus aperuisse. Delatum id ad Patres prædicatores hæreticæ censores prauitatis; eorum iussu statim missos, qui perfidos comprehenderent, & in vincula conicerent. Cùmque abesset parum, quin id

id fieret, eos recognita, (incertum cuius monitu) mox ex Abassia clanculum discessisse, & in alias regiones commigrasse. Bonam eorum partem appulisse Goam, ibique de Abassinorum erroribus, deque Patriarchæ Ouiedi laboribus tam falsò, quàm perfidè plurima narrasse; quæ vulgo credita non per Indiam tantùm, sed etiam per Europam latè sparsa, summâ innocentibus infamiam peperere. Inde factum, vt Lusitanus Rex de auocando Ouiedo cum Pontifice egerit, & Pontifex regis rogatu in Æthiopiam diploma miserit, quo eundem Ouiedum ad Sinas, vel Iaponios destinavit. Hanc igitur fuisse causam, cur Abassini apud Indos, & Europæos inter hæreticos ac schismaticos haberi cœperint, cum neque à fide, neque à Romana obedientia vmquam defecerint. En causa præcipua, multa continens, de quibus singulatim, sed breuiter, dicendum. Quæritur ergo ab hoc auctore primùm, quo erant de genere trecenti illi Hebræi, quos è Lusitania in Abassiam profectos scribit? Eorum ne de numero, qui Moisaicam legem publicè profitentur, cuiusmodi sunt, qui Romæ, qui Florentiæ, qui in aliis Christianorum locis viuere permittuntur; an ex iis, qui cum animo Iudæi sint, Christum foris simulant, cuiusmodi in Hispania non pauci. Priori quidem de genere esse non poterant, cum in Lusitania nulli sint, vt nemini ignotum. Dicet, ex posteriori fuisse. Iam ergo rursum quæritur, palàmne & apertè, scientibusque & consentientibus magistratibus, an transfugarum more clanculum & occultè è Lusitania fuerint egressi. Vtrumque creditu difficile. Primùm quia protus est improbabile, Christianos & catholicos magistratus passos fuisse, vt qui Religionis Christianæ Baptismi iure erant adstricti, aliò tenderent, ybi cum  
sum

summa eiusdem Religionis iniuria liberè viderent? Alterum, quia non apparet, quo nam modo tanta hominum multitudo posset clanculum è regno fugere, cum vix vnus hoc de genere inde fugiat, qui non statim capiatur. Quo enim è portu tam occultè soluere poterant, marisque & arcium fallere custodias? Cur deinde in Abassiam, vt inter Æthiopes, atque in ardentissimis regionibus habitarent, non aliò potius abiere, vbi mitiore cœli solique temperie, & politioris gētis vterentur consuetudine, quò possent etiam breviori maris traiectu facilius ac tutius peruenire? Præterea si cognita ab Æthiopibus eorum perfidia est, ac tantopere curatum, vt caperentur, qui fieri potuit vt ne vno quidem capto tam facile omnes euaderent? Si fugientes ab Lusitania recesserant, cur pars eorum maxima Goam se contulit, vbi nulla ratione occultari poterant, erátque certum, extrema passuros? Quis nõ videat, quàm malè ista cohæreant? Sicut igitur est incredibile, tantam ac talem hominum multitudinem siue scientibus siue insciis magistratibus excedere regno potuisse; ita omnino est verum, numquam excessisse. Tandem cum nulla Dominicanorum patrum cœnobiaz in Abassia sint, vt paulo pòst dicam, nulli hæreticæ prauitatis censores, ecquinam illi fueré, apud quos obstupefacta Æthiopia Hebræorum perfidiam incusauit? Sed paulo apertiùs propositam fabulam euoluamus. Ait nouus auctor, suos illos Hebræos anno Christi millesimo quingentesimo quinquagesimo quinto Abassiam adiisse, atque intra paucos dies cognitos arripuisse fugam; qui Goam petiere, inter cætera falsò sparsisse, Ouiedum pessimè in Æthiopia tractari, milléque laboribus atque ærumnis miserè consumi; quæ causa fuerit, vt Sebastianus Rex de illo  
inde

inde auocando, & ad Sinas vel Iaponios mittendo cū Pontifice egerit. En patefacta fabula. Quo anno ficti illi Hebræi Abassiam dicuntur ingressi, & ab ea subito egressi, nondum ibi Andreas erat, cū duobus post annis illuc ex India peruenerit. Qua igitur ratione poterant illi transfuge Goanis dicere, malè Andream ab Æthiopibus tractari, quem scirent apud Æthiopes non esse, & utrū aliquando esset futurus, prorsus ignorarent? Ab eo autem tempore, quo Abassiam cū sociis ingressus est Ouiedus, vsque ad hanc diem nullam eò Lusitanorum adiisse multitudinem, comperitissimum est. Anno quidem mill. simo quingentesimo quadagesimo primo Lusitani quadringenti Christophoro Gama præfecto ex Goana urbe ab Indico prætore fuerant in Æthiopiam missi, ut Imperatori Claudio contra Zeilæ regem secta Mahumetanum militanti suppetias ferrent. Ex illis plerique variis in præliis occubere pugnando; pauci in Indiam redire, reliqui ductis in Abassia vxoribus. vitam ibi vsque ad obitum traduxere. Relicti ab iis posterī sunt, paternarum rerum, & catholicæ fidei hæredes, quos defuncto Claudio, successor Imperij Adamas crudeliter est persecutus, non quòd Hebræi essent, sed quòd à Romana disciplina à parentibus accepta nollent deficere. Quæ deinde nouus auctor adiungit, de Collegio sancti Stephani, ex quo ab reliquis collegis vnū, ait, delectum, qui in Abassiam nuntiatum iret Imperatori, ortam apud Europæos suæ gentis infamiam; & de ipso Imperatore Mena grauitèr apud summum Pontificem de illata sibi ac suis iniuria per literas querente, & Tridentinum Concilium flagitante; quæ item de magni Senatus consiliariis ad Pontificem, & Cardinales eadem de re scribentibus; de ingressu in

Abas

Abassiam Lusitanis prohibito, nisi Olisiponensium Goanorúmque sacrae fidei quæsitores deferant testimonia, & huiusmodi alia, quæ cum illo de Hebræis commento miscet, non habeo necesse seriò refellere; satis constat, fabulas esse, multoque postea constabit apertius. Interim scitum volo, Menam illum, qui, ut antea dictum, Adamas dictus est, fuisse acerrimum Romanæ Ecclesiæ hostem, nullumque cum Apostolica sede habuisse, aut habere voluisse commercium; quatuor item antè annis cessisse è vita, quàm pontificium diploma, quo ad loca alia Ouiedus destinabatur, fuisset in Abassia receptum. Obiit enim anno millesimo quingentesimo sexagesimo tertio; diploma verò quatuor post annis ad Æthiopiam peruenit. Denique rectè monent sapientes, qui multa facile & sine consilio dicit, pollere memoria debere, ne loquatur pugnantia. Afferuerat auctor iste, Alexandrum III. quem vult fuisse in Imperio Menæ successorem, Ouiedi suasu Latinum instituisse Senatum; at Mena, ut idem auctor ait, ad Pontificem de Ouiedo scribens, non solum negat malè in Abassia Ouiedum tractari, sed affirmat optimo apud se haberi loco, cum Latino Senatu præfectus sit. Itaque iam Latinus ille Senatus erat, cuique præerat Ouiedus, antequam esset institutus. Hæc sunt auctoris huius miracula, efficit ut sint, quæ non sunt, & facta iam sint, quæ nondum sunt inchoata. Atque hæc de prima ac potissima causa, ex qua circa res fidei orta fingitur in Abassinos infamia. De altera, quam peperisse dicitur locorum ignoratio, nihil est, quod dicam. Haud dubitari potest, quin scriptores ij, qui Æthiopes schismaticos esse dicunt, non alios Æthiopum populos, quàm Abassinos designent. Quæ de geographicis dimen-

N

sionibus,

sionibus, de quæ variis *Æthiopiæ* acceptionibus nouus auctor tradit, iure potuisset omittere, cum in isto mathematico puluere parum videatur exercitatus. De tertia causa, quæ dicitur in falso vulgi rumore consistere, non nihil dicendum est. Ait nouus auctor contigisse Abassinis, quod Armeniis, Iacobitis, Maronitis, Nestorianis, & gentibus aliis Christi fidem profitentibus, quæ quoddam ab Vrbe longè absint, nec suas ad eam causas deferant, vulgi opinione à Romana Ecclesia creduntur diuisæ, cum re ipsa non sint. Deinde varios eorumdem gentium Patriarchas diuersis temporibus Pontifici Romano, vt superiori, suum detulisse obsequium. Præterea, eosdem, quos recensui, populos legatis, literis, modisque aliis Romanæ sedis auctoritatem sæpe fuisse confessos. Ruthenos demum, & Moscouitas non ita pridem, abiuratis coram Clemente VIII, Græcorum erroribus, ad sinceram maiorum suorum fidem rediisse. Quod de Patriarchis quibusdam asserit, libenter admitto. Verum quoque est Clementis VIII. tempore aliquot ex Ruthenis & Moscouitis Romam venisse, vt de illis populis ad rectam fidem reducendis cum Pontifice agerent. Imò de eadem re eiusdem Pontificis iussu coacta in Lituania est Brestensis synodus, in qua quid actum sit, apud Thomam à Iesu copiosè leges. Hoc certum, adhuc Ruthenos & Moscouitas à Romana Ecclesia dissidere; atque inde volo colligatur, quod dixeram suprâ, non propterea credendum esse, Abassinos Romanam suscepisse religionem, quoddam aliqui eorum Imperatores eam professi sint, suosque ad eam pertrahere curaunt. Etsi enim aliqui ex his Christianis, qui à nouo auctore catholici, & Apostolico imperio obedientes prædicantur, priuatim tales sint, gentem tamen vniuersam



uerſam à Romana ſede eſſe communiter alienam, non eſt in dubiis ponendum. Armeniorum pars magna recta fide caret. Iacobitz, Neſtoriani, Georgiani, eiufdem generis alij vniuerſim ſchiſmatici ſunt, & variis inuoluti erroribus, quamquam inter iſtos aliqui reperiantur, qui veritatem agnoſcant, & priuatim teneant. Ex quo tam abſurdè inferitur, gentem vniuerſam colere Romanam fidem, quàm ſi ex eo, quòd inter Anglos & Græcos non pauci ſunt egregiè catholici, inferre quis vellet, Angliam & Græciam ſub Romani Pontificis obedientia veram Chriſti religionem ſectari. Quod tandem de Græcis Genebrardus ſcribit, ſolere ipſos hæreſis notam catholicis per calumniam inurere, verum ne, an falſum ſit, non curo. Abaſſinos eſſe hæreticos, & à Romano capite præciſos, etſi nihil ea de re Græci dicant, certiffimum eſt. Sed iam ad reliqua.

---

*Sintne ulli in Abaſſia ſacrorum Antiſtites.*

## C A P V T XXXII.

**T**Radiderunt aliqui, centum viginti ſeptem in Abaſſia eſſe Archiepiſcopos; vnicuique eorum viginti ſubiici Epifcopos, Suffraganeos appellât. Hoc falſum eſt, veriſſimum eſt, & ſtatim conſtabit. Nouus ille auctor affirmat, Preteciannem data ſibi ab Eugenio I V. & à ſequentibus Pontificibus facultate, creare poſſe Patriarchas, Archiepiſcopos, & Epifcopos, quos ſui ſupremi Senatus conſiliarios conſtituat. Hos & patriarchalibus & pontificiis ornari titulis, vt præter nudos titulos nihil aliud in conſecratione accipe-

re: neque enim aut ullus diœcesis appellationem, aut ullam habere curam animarum. Solitos primùm fuisse quibusdam indui vestimentis malè compositis, & ad pontificiam dignitatem parum aptis; sed Gregorium *XIII.* constitutione sanxisse, ut habitu uterentur, quali Romæ & in Latina Ecclesia uti Episcopi consueverunt; Ioannem Balthasarem Abassinum diploma Gregorianum in Abassiam portasse. Hæc ille, quæ ficta esse, perspicuum est. Vbi ymquam auditum, ullum Patriarcham aut Episcopum esse, qui nullius loci Patriarcha, aut Episcopus sit? Quos titulares vocant, non quoddam loco, sed quoddam administratione careant, tales dicuntur, ut nemini ignotum. At Patriarchæ isti & Episcopi quemadmodum ficti sunt, ita nullius loci pastores sunt. Ait deinde idem auctor in vniuerso Imperio duodecim esse Archiepiscopos, septuaginta duos Episcopos, atque hunc utrorumque numerum ab ipso Christianæ Religionis exordio firmum hucusque & constantem perstitisse, neque Abassinos ymquam passos, ut vel plures essent, vel pauciores, semper ut Apostolorum ac discipulorum Christi memoria eo numero retento apud ipsos vigeret. In quolibet cathedrali, ut vocant, Ecclesia duodecim tantum esse canonicos, Abassino idiomate Debeteras appellatos; eum esse ab Episcopo secundum, quem lingua sua nominant Nobretem, quasi dicas Decanum. Hos habere statuta, & more vivere regularium, simul cum Episcopo, vel Archiepiscopo in eodem communi triclinio & communi mensa cibum sumere. Ætatis prærogatiua ab dignitatem euehi. Cum enim aliquis ex canonicis diem obit, in eius locum suffici sacerdotē, qui in ea urbe, penes quam tunc eligendi ius est, cæteris antiquitate præit: canonicorum enim electionem

ad

ad vrbes diœcesis vicissim pertinere, ac modò vnam, modò aliã decedenti canonico subrogare solitam quẽ tũc habet sacerdotem cæteris anteriorem. Episcoporũ electiones ita fieri Archiepiscopo mortuo ex iis Episcopis, qui illi subdebantur, antiquiorem succedere: mortuo Episcopo ex eius canonicis eum similiter substitui, qui reliquos superat antiquitate: qui autem inter Archiepiscopos tempore est prior, eum Clementis VII. & Pauli III. auctoritate esse in Æthiopia nuntium Apostolicum, & summi Pontificis gerere vices. Ad hunc spectare Episcoporum & canonicorum electiones habere ratas, patentẽsque electis dare confirmationis literas. Hos antistites semel tantũ annis senis diœceses suas lustrare. Archiepiscopos ex metropolitanis vrbibus, quas incolunt, numquam egredi, cũ nullas alibi habeant oues: singulos verò Episcopos varias peragrarẽ ciuitates, cũ singuli multis sint præfecti. Talem ait hac in re seruari modum. Cũ ad diœcesim lustrandam Episcopus proficiscitur, prætor ipsius familiares ac domesticos, à collegio Canoniorum duo Canonici, ab vrbe metropoli viginti nobiles, à militari Abbate sancti Antonij, qui ea est in vrbe, ex qua discedit Episcopus, viginti equites ad comitatum ipsi assignantur. Hac stipatus hominum caterua in viam se dat. Vbi propinquat loco, quem it inuisum, quotquot ibi Ecclesiastici, & patritij ordinis sunt cum famulis & ingenti alia hominum multitudine obuiam exeunt venienti. Episcopus cũ suis cæterisque, quos in comitatu habet, erectis ante vrbem recipitur tentoriis, quanto opus est tempore, vt oues recognoscat. Interim ipsi & comitibus quæ ad victum pertinent, abundantissimè suppeditantur. Ecclesiastici vrbis illius, ad quam deuẽtum, expensis suis

Episcopo & canonicis comitantibus, atque horum & illius familiaribus ministrant necessaria. Urbis eiusdem nobiles idem præstant nobilibus Episcopi sociis. Cœnobium denique S. Antonij. quod eadem in vrbe est, ordinis sui equites cum Episcopo venientes suis alunt sumptibus. Ingreditur quidem Episcopus in urbem, dum & templa inuisit, & inquit in incolas: cum tamen aut sumendus cibus, aut quiescendum est, ad papilionem reuerti. Archiepiscopos ait bis annis singulis, primò ad ferias Pentecostes, iterum sexto Idus Octobris prouincialium Episcoporum ac parochorum conuocare Concilia, vt quæ videbuntur ad rectam Ecclesiæ administrationem conducere, in commune constituent. Hæc omnia & huiusmodi plura nouus auctor, quæ ficta haud dubiè sunt, & inania. Vnum habent Abassini, qui aliquo modo sacris præest; Abuna dicitur, idest, Pater; nōmine alio Macus appellatur. Penes Alexandrinum Patriarcham eius electio & creatio est. Monachis & clericis confert ordines; vix præstat aliud, in quo vllam in ipsos videatur habere potestatem. Præter societatis religiosos in Æthiopia degentes, qui hoc sæpius scripsere, testis est Ioannes à Sanctis Dominicani professor instituti, quē suprà laudaui. Is in octauo capite libri quarti operis sui ista scribit. Qui Sactorum est in his locis præses, ab Alexandrino mittitur Patriarcha. Præter hunc nemo alius munera exercet Pontificalia. Abuna ab incolis vocatur; monachis & clericis confert ordines. Cùm defungitur vita, ab eodem Patriarcha deposcitur alius, qui defuncto succedat. Hæc ille. Testes etiam rei eiusdem sunt Abassini, qui Romæ, qui Olisipone, quique alibi apud nos reperiuntur, veritatis amatores. Omnes firmissimè asseuerant non esse in Abassia, qui

diocesæ

diœceses lustrat , qui in aliorum mores Ecclesiastica potestate inquirat , aut eorum peccata puniat , qui quo quisque modo viuât , quidquam ad se pertinere arbitretur. Falsum quoque est , & ab ipsis Æthiopicis reprobatum , quod nouus auctor ait , Abunam Hierosolymis eligi à religiosis Abassinis ibi cômorantibus; electionem deinde ad Alexandrinum Patriarcham mitti, vt eam prius examinatam auctoritate sua confirmet. Integra enim, vt dixi, penes Patriarcham electio est: is quem vult, mittit; nec is, quem mittit, vmquam reiicitur. Falsum item, quod asserit, Abunam, idem quodammodo esse, ac visitatorem; officio enim & significationi Abunæ ea interpretatio repugnat, quod Abassini, atque externi, qui linguam callent, apertè testantur.

---

*Sintne vlla apud Abassinos religionum  
familia.*

C A P V T XXXIII.

VT in templis ædificandis, ita in religiosis familiis erigendis atque instituendis Abassinorum principum celebratur pietas. Multa dicuntur sacris hominum cœtibus fundasse cœnobia, iisque copiosos ex suis facultatibus assignasse redditus, quibus lautè & liberaliter, quantum ordinis ferret conditio, alerentur. Aiunt cœnobia ferè omnia, vel in altissimis rupibus, vel in profundissimis esse cōstructa vallibus, ipsoque situ indicare, quantum à secularium hominum consortio remoti esse religiosi debeant, quorum munus sit, & cœlestia veluti propinquiora respicere, & æternas Inferorum miseras assidua contéplatione per-

scrutari; vt hinc suppliciis deterriti, illinc allecti præmiis rectum semper teneant virtutis iter. Nouus auctor scribit in Anconæ prouincia vnum esse cœnobium, vbi separatis in locis, ac prorsus discretis monachi simul & moniales degant; quod ait, consuetum olim fuisse tota in Græcia, in qua sancti Basilij monasteria vna ex parte viros, ex altera continebant scēminas; hodiēque in sanctę Brigittę cœnobiis idem obseruari. Hanc verò Anconitanam vtriusque sexus domum Æthiopica lingua nomen habere Iconoamecalem, hoc est, Deus prouidet. Totam simul ædem cum templo, quod est peramplum, & in modum crucis cōformatum, eūque cæteris, quę ad fabricam pertinent, in sola vna esse excisam rupe, supra quam ingenti aquarum copia decurrit amnis. Hoc commune virorum & scēminarum cœnobium, si quod est, suspicor haud esse ab eo diuersum, de quo ex literis Gózali Roderici altero libro dicam. In eo vt Gonzalus scribit, licet in parte vna monachi, in altera essent moniales, locis distinctis; non erat tamen tanta inter ipsos diuisio, quin ex tali vicinitate noua soboles pulularet. Quænam hæc sit Anconitana prouincia, atque hoc monasterium, si ab illo est diuersum, mihi ignotum est: auctor enim iste, quemadmodum alia, sic & prouincias & regna pro suo fingit arbitratu. Sed primū ab eo quæramus, vbi legerit, per totam olim Græciam in iisdem sancti Basilij monasteriis viros simul & scēminas fuisse, eo modo quo nunc ait esse in illo suo Anconitano cœnobio? Risere quidam Græci veterum & recentiorum Græciæ morum peritissimi, cū hac de re essent rogati. Monialium quidem monasteria, quę sub monachorum administratione sunt, aliquos habere eiusdem professionis viros, separa

Separatis domiciliis, qui sint à confessionibus, qui ministrant sacra, qui res monasteriorum curent; id non fuit olim sancti Basilij monasteriis peculiare; sed & olim, & nunc in omnibus Christianorum prouinciis frequentissimum. Nec aptè inde inferas, monasteria in Hispania esse, separatim quamquam domiciliis, viris & foeminis communia. Quæramus deinde, vbi nam gentium sint illa, quæ memorat, sanctæ Brigittæ cœnobiaz? Quæ sita à nobis per totam Europam diligenter, nusquam tamen reperta; non in Italia, non in Gallia, non in Hispania, non in Germania, non in Polonia, eiúsque prouinciis, non in Britania, non etiam, vbi maximè possent esse, in Suetia, in Gothia, in Dania, non in alia orbis parte. Et verò quamuis aliquando absque incommodo id fieri potuerit, quod auctor iste non solum defendere, sed etiam laudare videtur; non dubium, quin hoc tempore in Ecclesia neque vñtatum sit, neque probatum. Quid Antonius hac de re scripserit, paulo pòst referam. Plerosque religiosorum cœtus sub magni Antonij nomine in Abassia viuere haud est ambiguum. Dubitatum scio, an ordines alij sint. Apud aliquos legi, canonicos esse, quorum sub cura & administratione sunt templa maxima: eos certis sub statutis viuere, vt apud nos, qui Regulares Canonici nuncupantur. Nihil ausim de his asserere, quia nihil mihi certum. An canonici huiusmodi aliquando in Abassia fuerint, dubitari potest; modò non esse, magis credo, quia nulla de his in literis nostrorum mentio. Scribit idem auctor, multos illic esse religiosorum ordines modo viuendi & professione diuersos. Esse Anachoretas, quorum institutor quidam extiterit Æthiops, vir sanctus, Moses nomine, ex nequissimo nebulone in sanctissimum virum commu-

tatus: alios, qui Paulum primùm Eremitam; alios, qui Hilarionem; alios, qui Macarium; alios, qui Onuphrium sui instituti sequantur ducem. Ex vnoquoque anachoretarum genere in desertis illis Æthiopiz sal-  
tibus innumeros esse greges, partim per agros sub aperto vagantes cœlo, partim abditos specus & latebras sub terra habitantes, partim sylvestribus tuguriis à temporum iniuriis corpora tuentes, partim denique cœnobarum more in communi quadam vitæ societate, nullis tamen obstrictos votorum laqueis, degentes. Nullum hisce eremitis peculiare esse indumenti genus; liberum cuique, quibus velit, vti vestibus. Plerosque pellibus aut coriis, paucos gossipinis tegi amiculis crocei coloris. Nonnullos inter eos esse sacerdotij exornatos dignitate, qui sacra cæteris ministrant. Reperiri aliquos sub Augustini vexillo militantes, sed hos, & paucos esse, & egenos, & Eremitarum more deserta loca incolere. Eorum apud Abassinos originem idem auctor ita ferè narrat. Superi-  
oribus, inquit, annis ex Thebaide, Ægypti regione, quæ est Æthiopiz contermina, magna hominum vis exiit, vitam ab omni humano consortio separatam sub Augustini nomine ducentium. Hi multarum hæresum corrupti erant erroribus, quippe qui dicerent, neque Spiritum sanctum procedere à Filio; neque vllum esse in mundo purgatorij locum; neque vllam crucem præter illam ipsam, cui affixus Christus fuit, esse adorandam; neque defunctorum animas ab omni peccati labe puras nullique obnoxias pœnæ ante extremi iudicii diem videre Deum; neque Romanam Ecclesiam reliquarum esse Ecclesiarum matrem, & magistram; multaque alia impiè crederent à vera religione dissidentia, eaque Abassinis inculcarent. Cùm  
id



id ad Imperatorem Claudium esset delatum, confestim in carceres, & vincula nefarios proditores iniici iussit, & à fidei censoribus eorum hæreses examinari; quos pertinaces reperit, partim leonibus exponi, partim vivos in terram defodi imperavit: qui contra faciles veritati præbuerunt aures, statuit, vt certum reciperentur in locum, ibique catholicis præceptionibus instruerentur. Interim nuntium Romam misit, qui à Tadæo Perusino Eremitarum sancti Augustini per id tempus moderatori generali, Augustiniani ordinis constitutiones peteret, vt ipsas anachoretæ illi ad fidem conuerſi profiteri & seruare possent. Misum statim ab Generali omne Augustinianum ius, & in Æthiopicum idioma ex Latino traductum. Tum Claudius Imperator decreuit, vt qui ex illis dare Augustino nomen vellent, & eius legibus viuere, coram iisdem illis fidei iudicibus religionis vota nuncuparent, simulque Romano Pontifici, tamquam communi Christianorum pastori, & vniuersalis Ecclesiæ capiti, iureiurando obedientiam promitterent: qui religiosam profiteri vitam nolent, tota quamprimum Æthiopia abscederent. Hæc nouus auctor, copiosius, vt solet; sed ficta omnia, & illud magis, quod de sancti Augustini eremitis scriptum proximè. Huiusmodi enim religiosi in Abassia nulli sunt, nulli etiam fidei iudices ad quos religionis causæ deferantur. Claudius præterea hæresum fuit non oppugnator, sed propugnator, & Romanæ Ecclesiæ insignis hostis, vt sæpe dictum, & sæpius dicendum. Qui sub Antonij Abbatis nomine religiosam in Æthiopia vitam degant, etiam nunc multos esse; & ante hæresis ingressum varia eorum per totam Abassiam fuisse cœnobia, omnibus pietatis & virtutum operibus florentia, pro comperto

perto traditur. Huius ibi ordinis instituendi talem novus auctor rationem proponit. Mortuo, inquit, Antonio Archimandrita, anno Christi quinquagesimo septimo supra trecentefimum, cum Magni Constantini filius Constantius orbis haberet Imperium, multi Antonij discipuli, inter quos Macarius, Hilarion, & alij erant, religionis & sanctimonie fama notissimi, ex Thebaide in Æthiopiam se conferentes, abditas speluncas, & loca deserta cœpere separatim incolere; tamdiuque eum vitæ modum tenuere, donec Basilius Cæsareæ Episcopus, diuino actus instinctu, dispersos ac dissipatos per sylvas & solitudines homines in societatem vitæ conuocauit, & domiciliis legumque communione coniunxit. Tum primum multa in Æthiopia erecta cœnobita sunt, quæ sub eiusdem Antonij nomine viuendi formam & instituta à magno Basilio accepere. Addit idem auctor, per id tempus Ioannem Abassie Imperatorem, vulgo Sanctum nominatum, aduersus Arianam hæresim, quæ tunc auctis mirum in modum viribus, Æthiopiam inuadebat, induxisse in animum militarem Equitum ordinem instituere, & suum hac de re cum Basilio consilium communicasse; eo autem approbato, peculiare condidisse leges, & nigram vestem, cum cærulei coloris Cruce in modum, T, Græca litera, efformata, equitibus assignasse. Hoc insigne discipulis suis dedisse Antonium, ut tamquam Israelis primogeniti, hac salutis nota à reliquis discriminarentur. Addit præterea, eundem Imperatorem stabili decreto firmasse, ut quicumque tres haberet filios, ni medicus esset, ut iam dictum supra, vnum ex iis huic adscriberet militiæ, id decretum adeo strictè seruari, ut ne Reges quidem ab eo absoluantur. In vnaquaque vrbe vnam esse horum equitum

tum domum, in qua separatis distinctisque locis duorum sint genera; quosdam militaribus incumbere exercitationibus, & ad bellicos usus, quoties est opus, paratos esse; alios donatos rude, quos diu multumque in militia exercitos plenior annis ætas grauat, habitu vivere, & ritu monachorum, sacerdotio initiatos; nec posse hoc de numero plures esse, quàm viginti; quorum, qui natus est grandior, cæteris emeritis præest, spiritualis Abbas nominatur. Alterius generis equites nullo certo ætati numero; ad quingentos, ad mille, ad duo millia, & ulterius procedere. Istos militari subiici Abbati, ab seipsis inter se suffragiis creato. Tunc autem in equitum ordinem cooptari, & in eorum collegium recipi, cum primum decimum sextum, decimumve octauum attingunt ætatis annum. Moxque ubi recepti sunt, ad bellum mitti, & nouem integros annos dare militiæ, sub nomine tyrocinij; ea diuisos ratione, ut primos tres ad Erythræum mare transigant, & maritimam Æthiopiæ oram defendant ab Arabicis prædonibus. Tres alios in insula Meroë, ut esse præstò queant, si quid Turca ab Ægypto molitur. Tres ultimos in locis Borno finitimis, ne eius regni tyrannus, genere Saracenus, opibusque & copiis potens, qui perpetuas cum Abassino gerit inimicitias, quidquam mali ab ea parte valeat inferre. Hæc & mille alia, quæ à nouo auctore de his commentitiis equitibus scribuntur, eo magis absunt à vero, quo sunt speciosius composita. Militarem enim ordinem in Abassia nullum esse, & ipsi fatentur Abassini, quibus, ut dixi, haud leue est quidquam fateri, quod sibi putent minus honorificum; & idem ipse huius falsi ordinis fabricator apertissimè falsus est, fabulam esse, quod ea de re tradidit in libello à me antea memorato.

to. Cætera quoque partim falsa, partim suspecta; sed nihil opus, ea singulatim refellere. Qualis nunc Æthiopum monachorum viuendi ratio sit, ad finem sequentis capitis ex Antonio referam.

---

*An præter religiosum Magni Antonij ordinem  
aliquis alius in Abassia sit.*

## C A P V T    X X X I V .

**N**Ouus auctor, & quidam alius eo anterior literarum monumentis tradiderunt, multa esse Dominicani ordinis per totam Abassiam cœnobia. Illa duo maximè celebrant, quæ de Plurimanis & Alleluia vocant. In primo nouem religiosorum millia, in secundo millia septem aiunt viuere. Addunt Monialium eiusdem instituti tertium, Bedenagli dictum, quod quinque complectitur millia sceminarum. Huius religiosæ familiæ in Abassia fundandæ causam nouus auctor proponit. Ait ab his Europæ locis ex prædicatorum ordine sæpius aliquos in Æthiopiam iisse, ibique diuinum verbum disseminasse; anno tamen salutis millesimo trecentesimo decimo sexto, & à condita sancti Dominici religione centesimo, sub finem Aprilis, cum post obitum Clementis V. vacaret Romana sedes, & Berengarius de Longorra esset generalis magister ordinis Prædicatorij, profectos Roma religiosos octo, quorum vnus Pantaleo dicebatur, reliquorum ignorantur nomina: & in eorum comitatu vnâ ex iis, quæ de tertio dicuntur esse Pœnitentiæ ordine, probatam ætate, virtute, & religione sceminam. Hos primum Hierosolymam accessisse, ibi aliquot

quot consumptis diebus cū essent dubij, quod ulterius se ferrent, piis precationibus consuluisse Numen; & eam ab ipso iniectam omnibus mentem vt ad Æthiopes tenderent, idque magna fecisse animorum concordia. Dein Æthiopiam ingressos, gentis linguā breuissimè didicisse, & palàm ac publicè de rebys diuinis cœpisse disserere; ad amorem pietatis omne genus hominum exhortari, doctrinæ suæ veritatem signis stabilire. Continud commotos rei fama Æthiopes oppidis & domibus relictis, ad nouos homines de facie noscendos, audiendosque vndique confluisse. Ipsum quoque Imperatorem, cū id, quod erat, agnosset, pro tam singulari beneficio actis Deo gratiis, nuntium ad eos misisse de aduentu gratulatum, & potestatem fecisse, non liberè tantum ac sine impedimento, vbicumque vellent, prædicandi, sed monasteria quoque ædēsque per vniuersos Imperij terras erigendi, in quibus & censorum fidei exercerent munus, & omnibus iis vterentur facultatibus, quibus in Latina Ecclesia solerent vti. Hac illos principis beneuolentia vehementer lætos, & animatos perrexisse ulterius, subiectas Æquatori plagas, & Cafatis lacum, hoc est, ipsos Nili fontes, tanta olim à natura occultatos industria, tantæque plurimorum regum ac dynastarum quæsitos diligentia, tandem penetrasse. Multa in regnis Goyamæ, Cafatis, & Sabæ cœnobia ædificasse, & immensam hominum multitudinem sancti Dominici signis adiunxisse. Nec illam interim mulierem, quæ pios comitabatur prædicatores, desidia aut otio languisse; verum pro parte sua laborasse strenuè, & clarissimam inprimis sub eadem sancti Dominici viuendi forma extruxisse scæminis ædem, tunc de Bedenagli, à sanctæ Claræ nomine postea nuncu

nuncupatam, quinque, vt dictum est, & plura complectentem millia monialium. Mulieres deinde plurimas vitæ exemplo & sanctimonia notas, quibus ardens erat ad perfectionem tendendi desiderium, ad tertium Pœnitentiæ ordinem adiciuisse. Ex fabricatis tunc cœnobiis quædam non mediocri hucusque habitantium frequentia integra perseuerare, alia partim infidelium armis esse destructa, partim ob aëris inclementiam, & causas similes ab ipsis religiosis ultro deserta. Illos egregios prædicatores, Pantaleone excepto, qui solus erat notus ex nomine, ab ipsis Æthiopibus Argai, Grima, Luanos, Sama, Aleph, Agaloa, Assen fuisse appellatos. Argai apud Abassinos ait senem significare; Grima concionatorem terribilem; Luanos de Deo placidè loquentem; Sama eum, apud quem deponitur seruanda pecunia; Aleph, qui panem ministrat; Agaloa cui victus & vestitus aliis suppeditandi cura incumbit; Assen superiorem, vel dominum. Impositum quoque fœminæ nomen Imata, quod siue Dei mulierem, siue Dei seruam designat. Addit, in peristyliis celeberrimi illius cœnobij de Plurimanis totam ferè hanc prædicatorum patrum historiam multis cum miraculis, quæ patrarunt, per ipsos parietes etiam nunc depictam conspici. Hæc nouus ille auctor. Quæ de cœnobiolorum fabrica, ædificiorum magnitudine, forma, dispositione, deque vniuersa gubernandi ratione adiungit, hand lubet referre. Ex his autem, quæ retuli, multa vt à veritate, sic ab humana fide sunt aliena, & tenebris magis, quàm luce digna. Optandum quidem esset, vt in aliqua Christiani orbis parte, nedum in asperrimis illis Æthiopix dumetis, tam celebres, actam copiosæ modò reperirentur religiosæ vitæ veræque pietatis scholæ.

At

At nullos in Abassia esse siue virorum, siue fœminarum cœtus, qui sancti Dominici legibus regantur, omnino certum est. Credatur illi ipsi Abassino, cuius fidem nouus auctor in cœlum effert, quique has forsitan fabulas, ab alio primùm fictas, auctoritate sua firmavit. Is nobis asseruit, dubitare se, an vllum vquam in Abassia viderit Dominicanæ familiæ religiosum; cœnobium quidem eius ordinis esse nullum. Idem Abassini ij, qui Romam veniunt, cum quibus sumus collocuti, idem qui Olisiponem appellant, absque hæsitatione affirmant. Multis id quoque nostrorum literis sæpe inculcatum; cum enim scribant, illos, qui in Abassia sunt, religiosos, paucis exceptis, quibus Romanæ veritatis lux fulsit, plurimis innolui erroribus, & Catholicæ fidei præ cæteris obsistere, atque omnium pessimè viuere; statim monent, eos neque Dominicani ordinis esse, neque Franciscani. Tales verò illi monachi sunt, qui in illis de Plurimanis siue Bilibanis (sic etiam appellant) & de Alleluia cœnobiis habitant (quod non solum ex Francisco Aluaro antiquiore teste, sed etiam ex Gonzalo Roderico, qui anno millesimo quingentesimo quinquagesimo quinto in Abassia fuit, atque ex iis, qui modò ibidem degunt, agnoscimus) vt iudicare faciliè sit, indignissimos esse, qui tam sanctæ piæque familiæ credantur alumni. Et quidem illud eiusdem rei magno esse argumento debet, quod Societatis religiosi, qui annis iam propè sexaginta Æthiopicas incolunt regiones, nihil vspiã reperere, vnde colligere possent, aut nominata cœnobìa, aut alia, quæ apud Abassinos sunt, Dominicanis legibus gubernari, vel ad Dominicanam familiam quidquam pertinere; quod & ipsa quoque indicat ædificiorum vetustas, cum sint omnia multo antiquiora,

quiora , quàm vt cum sancti Dominici ordine incœperint. Est quidem in Regno Tigri monasterium, Abbaguarima appellatum; in eo sepultum esse virum sanctitate insignem cum aliis octo sociis illuc Roma profectum, fama fert. Haud est improbable, hunc, & socios ex sancti Dominici ordine fuisse; quamquam id apud Abassinos non dicitur. Certè qui illud nunc habent monasterium, institutis viuunt à Dominicanis longè diuersis. Quare cùm nulla in Abassia Dominicanæ militiæ castra sint, perspicuè colligitur eius ordinis religiosos, neque fidei censorum officio ibi fungi, neque Imperatoribus esse à confessionibus, neque alia habere, quæ nouus auctor tam sollicitè actam sæpe, quasi magni intersit, ipsis attribuit. Haberi pro certo volumus, quicumque apud Abassinos sunt, qui religiosam profiteantur vitam, eos Magni Antonij, Macarij, Basilij, non aliorum Patrum ætate posteriorum, leges & instituta profiteri. De Religiosis Societatis ex Europa aut India profectis nihil attinet hoc loco dicere. De Abassinis dumtaxat, deque propriis eorum cœnobiis sermo nobis in præsentia est. Si quis tamen aliquid obiter de nostris scire velit, quinque esse sciat, qui hoc tempore illis degunt in locis. Hi sunt Petrus Paëz Castellanus, cæteris præpositus; Franciscus Antonius de Angelis, & Laurentius Romanus, Itali; Antonius Fernandius, & Ludouicus Azeuedius, Lusitani. Duo tenent loca. Partim in regno Tigri sunt; ibi pagum incolunt, cui Fremona nomen; partim Imperatoris castra sequuntur, & oppidum communiter habitant, quod vocât Gorgortam. Alia de his nunc dicere, ad rem præsentem nihil. Dicam, quæ suprâ pollicitus sum de Abassinis monachis ex Antonio Fernandio me dicturum. Monachorum, inquit,



•inquit, cœnobia patentia sunt, & nullis prorsus obsepta claustris. Suam quisque ad habitandum spelūcam magis, quàm ædem habet; quæ sibi opus, quærit per se, nulla donandi vel accipiendi prohibitus lege. Multis locis simul cum monialibus monachi habitant. A quibus iam virorum cœnobiis arcentur fœminæ, sed prope domos habent, ad quas monachi pro libito vêtitant, Mundi loca vocant ipsi. Multi secum ancillas habent, quibus cum coniugatorum more viuunt. Sunt etiam inter ipsos, qui palàm ac publicè vxores ducât; tanta in miseris hominibus mentis caligo est. Ne ipsū quidem obedientiæ nomen inter eos notum. Vadunt quò volunt siue interdiu, siue noctu; nullum illis discrimen temporis. Per oppida vagantur, nundinas frequentant, & institorum more negotia exercent. Indumenta ipsis ad libitum. Quī vitam profitentur asperiores duris præcincti zonis corpora regunt corio, & prolixam demittunt ad humeros comam. Non pauci solo victitant legumine, & summam in ieiunio putant esse sanctitatem. Quæ tamen frequenter in ipsis deprehenduntur scelera satis demonstrant, hæc eos facere non amore virtutis, sed inanis gloriæ cupiditate. Hæc vna non paucos eorum in solitudinem abripit, vt sanctimonix fama noti, & in pretio habitū vocentur in aulam, vbi ad summum deueniunt nequitix fastigium. Omnes cucullum portant, nec alio indicio religiosi esse noscuntur, ac si tota religiosæ vitæ ratio in solo cucullo posita sit. Eadem, quæ in monachis, in monialibus est viuendi licentia. Hic est modus, quo se vtrique religiosæ adscribunt disciplinæ. Ad cœnobia accedunt; ibi primùm baptizantur; deinde certæ supra ipsos recitantur preces; postremò imponitur illis cucullus. His peractis Religiosi euadunt;

neque apud Abassinos valet, quod apud nos pro-  
bio teritur, Monachum non cucullus, sed viuendi ra-  
tio facit.

*Quæ sacramenta, qualisque eorum usus apud  
Abassinos sit.*

## C A P V T    X X X V .

**I**Nter argumenta, quibus nouus auctor suadere niti-  
tur, numquam Abassinos à vera fide, & Romani  
Pontificis obedientia recessisse, illud vnum est, quod  
Religionis Christianæ sacramenta non secus atque  
Romana Ecclesia, purè sincerèque vsurpent, sempér-  
que vsurparint. A Baptismate rem inchoat, cætera  
deinde mysteria singulatim percurrrens, quid in vno-  
quoque nobiscum commune, quid peculiare habeât,  
ac proprium, multo pluribus, quàm ego referam ver-  
bis, lingua sua exponit. Quod igitur attinet ad cœleste  
lauacrum, ait credere Abassinos, quemlibet homi-  
nem, quo primùm puncto temporis, efformato intra  
maternam aluum corpusculo animus à Deo infundi-  
tur, originali, vt Theologi loquuntur, cōmaculari labe;  
hanc verò aquæ deleri Baptismo, qui more apud ipsos  
peructusto, die ab ortu quadragesimo masculis, octo-  
gesimo fœminis ministratur, nisi quid interueniat,  
quod anteire cogat præscriptos dies. Hoc vltimum  
falsum esse, iam suprà ex Antonij literis constitit; ex  
iis dixi, ne mortis quidem periculo interueniēte ante-  
uerti designatum Baptismi tempus, morique illotos  
infantes, quibus ante illud accidit mors. Ait deinde  
nouus auctor illum adhuc vigere morem, si qua de  
causa

causa ante constitutum diem sacra vnda tingatur infans, non porrigi ipsi à matre mammam, donec præfixus ille dierum numerus adueniat; matrem enim nondum purificatione expurgatam, non reputari dignam, quæ loto iam puello, & ab omni purgato peccati macula lac suum sugendum dedat. Nam quæ masculum peperit, ante diem quadragesimum; quæ verò fœminam, ante octogesimum censeri immundam. Olim baptizatis infantibus, Græcorum more dari solitam Eucharistiam, nunc ab hoc ritu cessatum, summorum Pontificum iussu. Quotannis ipso sacro Epiphaniæ die in memoriam ac reuerentiam baptizati Christi corpora in lacubus, aut fluminibus solere abluere, myltis præsentibus, & preces quasdam recitâtibus. Inde ait occasionem aliquos accepisse falsò existimandi, solere Abassinos Baptisma iterare. Hæc ille. Sed iam suprâ ostensum est, Abassinos Baptismum modis pluribus repetere, & hunc cum aliis tenere errorem. Apud antiquiores historicos reperio, ex veterum Imperatorum instituto esse apud hanc gentem positum in more, baptizati pueruli in fronte quædam inurere stigmata; id verò adeò strictè obseruari, ut si quis absque huiusmodi signo deprehendatur, in pœnam violatæ consuetudinis libertatem amittat, fiatque Imperatoris mancipium. Quid ea indicarit frontis nota apud eius auctores in ambiguo est. Tria potissimum dicuntur. Quidam affirmant, Æthiopes istos, eo signo, quod igne fit, credere, illud se Baptisma suscipere, quod à Christo conferendum eius Præcurzor videtur significasse, cum apud Mathæum dixit, *Ille vos baptizabit in Spiritu sancto, & igne*. Alij, voluisse primos illos Æthiopiz Imperatores, qui fidem Christi sequebâtur, ut aliquod externum signum in Christianis esset, quo

ij à reliquis infidelibus , inter quos vivebant , primo statim intuitu discernerentur. Alij denique, decemisse Imperatorem Ioannem, dictum Sanctum, vt baptizatis infantibus tria statim in fronte puncta ignito ferro imprimerentur, quo miserrimis illis Atianorum temporibus augustissimę Trinitatis fidem literati ipsorum vultus palam ac publicè confiterentur. Quanam ex istis illius signi vera causa fuerit , nequeo certò definire. Primam vel secundam magis probo ; suspecti auctoris tertia est Qui illam, quam diximus parientium purificationem ex Hebraicis negant desumptam cæremoniis, valde pij sunt ; sed veritatem pietas non respuit, nec tollit errores excusatio. Ostendi, Abassinorum gentem à Romana fide defecisse , & multos hodięque seruare ritus Iudæorum, multasque eorum cæremonas cum Christianis sacris miscere , nec paucis Græcorum erroribus implicari. Non me latet Zagazabum illum, de quo sæpius memini, multos Abassinorum suorum excusasse errores ; eumque negare rem ipsam, vt pote nostris notissimam, non posset legalem animum negasse. Sed iam monui ab illo Damianum Goëz & alios per idem tempus historicos fuisse deceptos , multaque ex eius narratione mandasse literis, quæ falsa fuisse , deprehensum postea est. Scio etiam Teclam Mariam , Abassinum monachum , de quo dicam infra , in recensendis suorum erroribus sic à Zagazabo discrepasse, adeoque in hac re malè inter se conuenire Abassinos , qui apud nos sunt , vt Thomas à Iesù in thesauro suo de Abassinis agens , eorumque ex variis auctoribus ritus referens, meritò dicat difficile esse hisce de rebus certum aliquid definire. Idem ego iure possem dicere , nisi quæ hîc propono, ex ipsis Patrum nostrorum, qui in Abassia degunt,

omnia

omniâque perspecta habent, agnouissem literis. Sed pergo ad alia. Scribit idem nouus auctor esse nunc apud Abassinos Confirmationis, & Extremæ vnctionis mysteria. An olim fuerint, statuere nequeo. His temporibus non esse, sine dubitatione assero; & fidem habeo Ludouico Azeuedio Societatis Iesu sacerdoti, viro prudenti, ac pio, qui ex Æthiopia, quam vineam, vt suprâ dixi, cum aliis sollicitè colit, anno 1607. vndecimo Calendas Augusti ad Europæos Patres scribens disertè ait, ignota Abassinis esse prædicta sacramenta. Quod ad Confessionem attinet, haud dubium, quin aliquis eius vsus apud Abassinos sit. Nouus auctor ait, solere ipsos species, & numerum, & circumstantias peccatorumque aggrauantes dicuntur, perfectè atque integrè confiteri, sicut apud catholicos ex Romanæ Ecclesiæ præscripto fit. Præterea eos, qui animi sui rationem habent, diebus singulis, qui verò negligentius se gerunt, bis singulis hebdomadis ad hoc sacramentum accedere: neminem inter ipsos reperiri, qualiscumque is sit, qui non statim, si fortè alicuius lethalis sceleris venenum hauserit, ad hoc salutare medicamentum confugiat. Pœnitentē ait, antequam peccata prodat, hos ex Psalmo sexagesimo octauo dicere versiculos, *Saluum me fac Deus, quoniam intrauerunt aqua vsque ad animam meam. Infixus sum in limbo profundi, & non est substantia. Veni in altitudinem maris, & tempestas demersit me. Laboravi clamans, rauca factæ sunt fauces mea. Defecerunt oculi mei, dum spero in Deum meum.* His finitis illam ipsam ferè recitare confitendi formam, qua Romana vuitur Ecclesia. Item annis superioribus solitum confitentem stare, & stanti sacerdoti ad aurem peccata dicere: nunc sacerdotem more iudicis sedere; confi-

tētem ad illius pedes flexis inniti genibus. Haud fuisse cuiquam licitum vel apud illum confiteri, qui eius confessionem aliquando excepisset; vel quem semel habuit confessorem, pro suo arbitratu relinquere, & apud aliū fateri: nunc tamen remissas esse istiusmodi consuetudines. Sic ille. Verū aliter rem habere iam dictum suprà, & ex iisdem constat Azeuedij literis, in quibus scriptum est, Abassinos neque species, neque numerum peccatorum in confessione exprimere, sed tantū generatim dicere, *Habessen, Habessen*, hoc est, peccaui, peccaui. Atque etiam hoc modò rarò admodum confiteri, cū & sæpius ad communionem, & frequentissimè ad mortem, nulla præmissa confessione miseri homines accedant. Idem patres alij, qui iamdiu in Abassia sunt, epistolis suis testantur. Circa diuinissimum Eucharistiæ mysterium non pauca legi à variis tradita. Aiunt bis tantū in hebdomada, Sabbato nimirum, & Dominico die sacrificium apud Abassinos fieri; in vnoquoque templo vnum dumtaxat; omnes verò tam qui sacris sunt initiati, quàm qui non sunt, suis dispositos locis, semperque stantes interesse; & cantantes sub vtrâque specie Eucharistiam sumere. Nouus auctor scribit cū solemniter fit, varias præmitti cæremonias, & ob eam causam multum temporis consumi; cū fit priuatim, breuiter absolui. Res creditu facilis. Addit ieiunij diebus, hora post meridiem tertia fieri sacrificium; reliquo tempore ante meridiem. Qui apud nos Abassini sunt, & in his & in similibus parum sunt constantes propterea eorum auctoritate haud libenter vtor. Dicam paulo post, quid de hisce rebus scripserit Antonius. Adiecit tandem nouus auctor, etsi vestes sacrificantis erant olim à nostris longè diuersæ, nunc illis

illis esse perfimiles, eodémque apparatu, atque iisdem propè cæremoniis, intermixto etiã musicorum instrumentorum concentu, sacra celebrari. Ego inprimis dubito, num apud Abassinos verum fiat Missæ sacrificium, dubitationis causã paulo pòst subiiciã. Deinde ex Azeuedio suprà laudato, atque ex aliorum Patrum literis compertum habeo, etiã nunc apud ipsos longè aliter, quàm apud nos, rem diuinam peragi; alia esse sacrificantis vestimenta, dissimiles ritus, diuersas cæremonias. Ioannes de Sanctis Dominicanus ita scribit, Sacrum pallium (planetam dicimus) quo Abassini sacerdotes sacra faciunt, oblongæ subucluræ est perfimile: stola foramen habet in medio, quo immissa capiti partim à pectore, partim à tergo pendet. Neque amictu, neque manipulo, neque cingulo vtuntur. Operta cucullis sunt capita monachorum, dum sacrificant. Sacerdotes in ara conficiunt sacramentum; non ostendunt hostiam populo, qui interest, cum eam in sublime tollunt. Nullus potest sacro interesse, qui eo finito non sumat Eucharistiam. Ita Ioannes de sanctis rem per se expertus. Constat etiã diuinum de viatico præceptum nec illic obseruari, nec agnosci, quod Azeuedius & Patres alij non semel scripsere. Sed quæ de saceris & ieiuniis scripsit Antonius, ista sunt. Illi, inquit, solum ingrediuntur templum, qui facienti ministrant; cæteri, neque ipsum sacerdotem vident. Calix & patena ex ære sunt, ex gossipio corporalia & purificatoria, parum omnia tanto mysterio consentanea. Si quam calix rimam agit, ne diffuset infusus liquor, cera obstruitur. Quinque minimum ministri adesse solent litanti; hi plerumque ob inopiam seminudi sunt, & characteres legere communiter nesciunt;

O s respon

respondent memoriter, nec responsa intelligunt. Fermentato in sacris pane vtuntur eodem confecto die. Ex uvis passis aqua infusa succum exprimunt, quod loco vini est. Peritiores parum miscent aquæ; alij communiter tantum, vt expressus liquor à natura vini recedat. Sub vtraque specie omnes Eucharistiam sumunt. Ex calice, cui similis capaci pateræ figura est, cochleari hauritur sanguis, & communicantibus porrigitur. In festis solemnioribus partim plaudunt manibus Dauidico moniti versu, *Omnes gentes plaudite manibus*, partim sistris & tympanis concrepant, more bacchantium; adeoque his tinnitibus delectantur, nulla vt ipsis videatur esse musica suauior. De ieiuniis sic Antonius. In Sanctorum peruigiliis nullum Ecclesiastica lege impositum ieiunium est. Quadragesimalibus feriis, omnibusque Mercurij & Veneris diebus toto anno ieiunant; præterquam eo tempore, quod inter Resurrectionis Dominicæ Pascha & Pentecosten interiectum est: tunc enim & carne vesci, & sæpius in die comedere, lex nulla prohibet. In Quadragesima, donec occidat Sol, nihil prorsus degustant. Paulò ante occasum rem diuinam faciunt sacerdotes, non prius, quia credunt ipso Eucharistico cibo ac potu ieiunium frangi. Diebus Mercurij tunc putant licitum edere, cum Sol occidens quinque efficit umbratum pedes; diebus Veneris, cum efficit septem. Hæc eorum sunt eulogia. Non pauci vbi semel sumptere cibum, quamuis sæpius eodem die edant, satisfactum credunt ieiunij legi. Adeò supersticiosè sua hæc ieiunia obseruât, vt nec decrepitos senes, nec iter pedibus per sūmos æstus conficiētes, nec morti proximos sine summo scelere quidquam edere aut bibere posse credant, culicē scilicet excolātes, & camelū glutiētes.

*Qualia*



*Qualia apud Abassinos Ordinis, & Matrimonij sacramenta.*

## CAPVT XXXVI.

**D**E sacramēto ordinis multa scribit nouus auctor, quorum aliqua summam proponam. Asserit esse apud Abassinos omnium ordinum, quos maiores, quosque minores dicimus, perfectam distinctionem, à sancto Matthæo expressè traditam; nec deesse primam tonsuram. Diu ab ipsis creditum, solùm Abunam habuisse potestatem ordinis conferendi; atque hoc vnum proprium illius fuisse munus, quod nemo alius posset usurpare. Bis in anno solitos conferre; primum quidem omnes simul, sacerdotio excepto; ipsum deinde per se sacerdotium. Nullam à prioribus suscipiendis exceptam fuisse ætatem. Non eos dumtaxat, qui ratione uti, & ingredi per se possent, verumetiam ipsos infantes, omnium ignaros rerum, vlnis vitorum delatos initiari consueſſe. Quatuor minores patuisse omnibus, quocumque essent vitio deformati, lippis, strabis, cæcis, balbis, blæsis, mutis, surdis, flaccis, mancis, mutilis, claudis, & id genus reliquis. Hunc autem, inquit, in modum solebant conferri. Tendebatur patente in campo tabernaculum, templi instar. Intus Abuna sedens ex pontificali libro legebat paululum: qui erant initiandi, apto inter se ordine dispositi ad illum accedentes, capita ipsi submittebant sua; is capillorum portionem cuique incidebat. Hac peracta cæremonia, recedebant omnes, & Abuna libro resumpto paululum iterum legebat. Illi interim eodem reuertentes ordine, quasdam manibus tangebant clauus;

ues;indéque ad templi ostia conferentes sese , ea & referabant,& claudebant.Mox linteis quibusdam capita operientes redibant ad Abunam,& fictile tangebant vasculum ; cûmque paulisper procedebant , ad eundem reuertebantur ; qui manus capiti cuiusque prius imponens , rem diuinam peragebat ; atque ad extremum Eucharistico pane omnes cibabat ; quem cûm puelli demittere in stomachum aliter non possent, frequentibus aquæ haultibus deglutiebant. Ad hos ordines suscipiendos ex vniuersa Æthiopia plusquam decem millia confluebant.Cûm ministrandum erat sacerdotium, simile figebatur in campo tentoriû. Conueniebant illuc initiandi , qui ad sex aut septem millia erant. Inter eos Abuna sedens , graui primùm sermone mysterij commendabat dignitatem; terribili deinde anathemate, qui aliquo essent publico scelere maculati, à sacris arcebat. Posthæc ad ostium templi progrediens,parata inibi sedebat sella;tres ante ipsum pariter sedentes, tres alij stantes, rerum sacrarum libros manu tenebant. Qui erant sacerdotio inaugurandi,tribus distincti ordinibus, longo agmine sedebant humi ; déque rebus ad eum gradum necessariis singulatim rogabantur.Qui probè essent instructi, sigillo quodam signati medium in campum recedebãt; qui secus,repellebantur. Tunc Abuna tabernaculum ingrediebatur. Qui probati signatique fuerant , vna ingressi porta alij post alios ordine procedentes , ad ipsum in sella sedentem accedebant; quibus vbi certa cum precatione imponebat manus,porta alia rursum exhibant.Posthæc certo ex libro legebat quædam,quibus lectis,cruce,quam manu tenebat,salutare signum efficiens, bene omnibus precabatur. Tum Presbyter vnus ad ostium tabernaculi pergens,Euangelium inibi

bi & epistolam decantabat; Abuna verò mira celeritate rem diuinam peragebat; tandèmq; cœlesti cibo inauguratos recreabat. Ita nouus auctor. Addit, sublatum nunc quidquid hac in re minus rectè fiebat, nec iam ad hoc sacramentum cæcos, claudos, & similes admitti, tandèmq; omnia ad Ecclesiæ Romanæ vsum ritumque aptè esse composita; quæque sunt hæc de rebus apud nos pontificia auctoritate constituta, hac tempestate in Abassia perfectissimè seruari. Scribit deinde vnaquaque in ciuitate quatuor esse parochias, suum cuique templum, cum vicinis ædibus ad cœnobij formam constructis; in qualibet parochia sub iisdem ædibus, sed distinctis domiciliis, tredecim viuere sacerdotes. cælibem vitam agentes, qui numquam fuerint matrimonio ligati; ex his vnum auctoritate & imperio reliquis duodecim præesse. Duo enim sacerdotum esse genera, vnum eorum, qui ab omni semper coniugio abstinent, de quibus proximè dictum, & statim dicendum; alterum eorum, qui matrimonium contrahunt. Illos virgines, hos coniugatos appellari. Vt quis ad priorum, quorum summa est auctoritas, numerum adiungatur, multa requiri. Primum vt nobilitate generis commendetur. Deinde vt quinquagesimum confecerit ætatis annum. Tum vt egregium dederit virtutis specimen. Demum vt ab omni mentis perturbatione, motuque animi effrænato sit prorsus liber: Ad hæc quo eius probetur virtus, opus esse, vt in cœnobio, famulantis more, tres annos transigat; quo peracto tempore si videatur sacerdotum albo adscribendus, bono propinquorum amicorumque stipatus cœtu sacerdotum, ac parochianorum, à quibus est approbatus deferēs suffragia. coram Episcopo se sistit, eique literas tradit, quas defert probitatis suæ,  
&

& rerum aliarum testes. Vbi constat, legitimè probatum; sacris initiatur ordinibus (à spiritali enim vrbis suę Abbate minores prius acceperat) die Mercurij ad subdiaconatum, ad diaconatum die Veneris, ad presbyteratum Sabbato prouehitur. Prouectus confestim eodem cum comitatu reuertitur ad suos, cum quibus vnum latè & hilarè mensem agit. Eo pertransito confert se ad parochiam; cuius sacerdotes de eius aduentu certiores, iisdem, quibus litare solent, amicti vestibus, obuiam exeunt venienti; eumque ducunt ad Parochiæ præfectum. Sella is sublimi sedens socium excipit, & librum Euāgeliorum porrigit apertum, vt antequam sacrum illum in ordinem cooptetur ea præstet, quæ veteri ritu præstari solent. Ille ad genua accidens, libro imponit manum, & obediturum se Romanæ Ecclesiæ, atque antiquæ illius Antiochenæ sedis instituta seruaturum iureiurando promittit. Mox detractō pallio, vestes induit sacrificantis, quibus indutas solemniter cum pompa ducitur ad sacrarium. Ibi reliqui sacerdotes ordine sedent. Ipse autem ante positam crucem curuans poplites, intimo ex corde ter illa repetit ex Psalmo verba, *Peccauī Domine, miserere mei; sana animam meam, quia peccauī tibi.* Quibus pronuntiatis surgūt omnes, tenduntque psallentes ad altare; ad quod nouus sacerdos subdiacono, diacono, & alio assistente sacerdote comitatus accedens, rem diuinam peragit. Vbi absoluit, paratæ sellæ insidet. Tum sacerdotes primū, cæterū dein vulgus manus ei deosculatum accedunt. Posthæc sacris vestibus exiit, album dumtaxat retinens ex lino amictum (pontificium id ornamentum est) quo vt sacerdotes virgines vti possent, Gregorij XIII. Pontificis maximi beneficio est concessum. Hæc de virgi

virginibus sacerdotibus nouus auctor , & plura alia, quæ non memoro. De secundo genere sic ait. Coniugati sacerdotes initium habuere à Ioanne illo, cui Sâcto fuit cognomen. Hic Imperator cùm virginum sacerdotum auctoritatem , quam scire nimia aliorum familiaritate imminui, conseruatam perciperet ; quo isti profano consortio sublato, honorem suum possent illèsum tueri; concepit animo genus aliud sacerdotum notæ inferiores, qui & matrimonium contraherent, & virginum sacerdotum essent yeluti famuli, & in rebus ad secularia pertinentibus operam suis parochiis nauarent. Rem ad quoddam detulit Concilium , quod per id tēpus Antiochiæ celebrabatur. Probata à Patribus est, quibus placuit talis vt ordo institueretur. Hæ tamen adhibet conditiones. Primò vt admitti nō possit ad hunc gradum, nisi qui vnam dumtaxat, eamque non viduam vxorem habeat. Secundò vt antequam sacris initiatur, coniugio copuletur , & coniugalis castitatis (vt appellant) votum emittat. Tertio vt defuncta vxore ad secundum matrimoniū transire nequeat. Institutus ergo nouus sacerdotum ordo , & vnicuique Imperij ciuitati duo & triginta assignati , sedecim ex ciuibus , totidem ex plebe. Octoni dati singulis parochiis , ciues quatuor, totidem plebei. Priores intra domesticos parietes necessaria curant : posterioribus ea commendantur, quæ ad victum , & cultum , quæque foris agenda. Vtrique ad vxores exeunt, quas priuatis habent in ædibus , cùm sunt ab aliis negotiis liberi. Sacrum facturi sex vel septem ante dies à maritali consortio quoddam ad sacellum recipiunt se ; ibi multis precationibus ac meditationibus exercent animum. Si quis ex his adulterium commisisse ab Episcopoprehenditur , grauissimas luit pœnas. Ordinis enim  
vfu,

usu, ac munere, & Ecclesiasticis beneficiis, ac cæteris privilegiis spoliatur; habitu exuitur clericali; nequit manu gestare crucem, ut Abassinis sacerdotibus mos est: templi ingressu prohibetur: seculari subiicitur potestati: denique ad laicorum ordinem ita redigitur, ut spes nulla sit ad pristinum statum, à quo adulterij culpa cecidit, amplius redeundi. Hæc de coniugatis sacerdotibus auctor ille. Addit insuper Gregorium XIIII. missis in Æthiopiam apostolicis literis statuisset, ut sacerdotes virgines abraſa, aut detonsa orbiculatim superiori capitis parte, quadrato vterentur pileo, demissa ad talos tunica, albo desuper indusio, oblongo pallio, habitu denique eodem, atque eodem vestitus genere, quo Romani uti sacerdotes consueverunt. Cauisse quoque, ne coniugati aut vestitu incederent virginibus simili, aut umquã ad ullam siue Episcopi, siue canonici dignitatem assumi possent; sed eundem simplicis sacerdotij gradum perpetuò retinerent. Quanta in his sint à vero dissita, nemo non videt. Quod ait Episcopos nunc conferre ordines, & in iis conferendis Romanas cæremonias seruari, falsum esse ex dictis constat. Cùm præter Abunam Episcopi apud Abassinos nulli sint; neque ipsi veteres Alexandrinæ Ecclesiæ ritus cum Romanis umquam commutarint. Adeò verò hæc in parte à Romano usu, ritùque abhorrent, ut Ouiedus Patriarcha quamdiu in Æthiopia vixit, valde semper, & magna de causa dubitarit, essentne Abassini sacerdotes ritè ac legitime initiati, quòd eæ sacrandi formæ, quibus Abuna vtitur, adeò essent incertæ, ut corruptè viderentur. Ob hanc causam in iis, quæ sunt ordinum propria, & verum in ministro exigunt characterem, numquam inducere in animum potuit, ut eorum vteretur opera, ne  
fortè

forte irrita fierent sacramenta. Vnde etiam factum, ut cum Teclamaría, cuius suprà mentionem feci (erat hic ex ordine sancti Antonij monachus & apud suos sacerdos) ad tractanda quædam Christianæ religionis negotia anno Christi millesimo quingentesimo nonagesimo tertio, ex Æthiopia Romam venisset, in domestico sacello illustrissimi Cardinalis sanctæ Severinæ, ab Episcopo Sydoniæ more Romano, omnibus iterum ordinibus fuerit initiatus, eo quòd summus Pontifex, cui Patriarchæ dubitatio exposita fuerat, re prius cum Cardinalibus & viris doctissimis consultata, ita faciendum iudicavit. Testes sunt præter alios, duo ex Societate Iesu integerrimæ viri fidei, qui nunc Lusitaniam incolunt, tunc Romæ degebant, Ioannes Aluarus, & Sebastianus Rodericus. Prior Generali præposito pro Lusitanicis provinciis assistebat. Posterior eidem Generali pro iisdem provinciis erat à secretis. Thomas à Iesu, quem suprà laudavi, rem eandem illo, quo dixi, loco, legendam exhibet. Commenditia quoque est illa de Virginibus, & coniugatis sacerdotibus distinctio, ut constat ex literis nostrorum, qui in Abassia sunt. Præterea, qui apud nos Abassini viuunt, discrimen tale non agnoscunt. Quid hac de re scripserit Antonius Fernandus, paulo pòst referam. Quare tota illa, ac tam appositè ficta coniugatorum, ac Virginum sacerdotum per parochias distributio, & quæ ex his pendent, inania planè sunt, sicut & reliqua nuper à me commemorata. Matrimonium restat. Non referam modum, quo nouus ille auctor scribit, hoc sacramentum apud Abassinos celebrari; ut enim parum est modestus, ita probabile à veritate abhorrere. De reliquis sic ait. Incusant aliqui Æthiopes, quòd plures simul ducant vxores. Res est & falsitatis

& calumniæ plena. Nulla enim gens seueriùs punit adulteria; neque ipsis regibus parciunt. Si princeps in pellicatu esse cognoscatur, actutum graui ab Ecclesia ligatur anathemate; nec prius soluitur, quàm verè respiscat. Vnum ab antiquis temporibus ignorantia magis, quàm pertinacia habuerunt errorem. Is talis fuit, vt alteruter coniugum repudiato eo, quem haberet, liberè, si luberet, ad alterum transiret. Solis id coniugatis sacerdotibus vetitum. Adeò error inualuerat, vt matrimonia passim dissoluerentur; quòd ne facile fieret in contrahendis connubiis pœna illi apponebatur, qui primus coniugem repudiaret. Creditur error à Græcis & Armeniis habuisse originem, & contagione quadam, vt fit, ad ipsos doflexisse. Non ideo tamen cum hæreticis numerandi, cum defecerit pertinacia, sine qua hæresis non est. Ipsi se errasse, ingenuè fatentur; nec eos tantùm peruersæ consuetudinis pœnitet, sed etiam pudet; & cum primum à Romana Ecclesia moniti sunt, dicto citius eam deseruere; nec iam ulla ferè, ne minima quidem, extat rei memoria. Hec nouus auctor. Locis aliis scribit, quod iam tetigi, morem esse apud Abassinos peruetustum, vt regum filij ab Imperatore, nobiles à suis regibus, ciues à nobilibus, plebei à ciuibus potestatem obtineant matrimonij contrahendi; aliter vetitum ipsis contrahere. Cæterum ex his, quæ retuli, nihil ferè non falsum est. Constat pro suo quemque arbitrio, absque vlla siue Imperatoris, siue alterius cuiusquam facultate coniugia inire; & singulos etiam nunc quot lubet, vxores ducere, easque vel leuibus de causis repudiare. Testes sunt Societatis religiosi in iis, quas ad nos misere, literis, vt sæpe à me traditum est. Verùm quæ de sacerdotibus scribit Antonius, ista sunt. Qui sacris  
sunt



sunt initiati ordinibus, vxores habent. Siquis primam amittit, suspensionis pœna vetatur accipere secundam, propter bigamiam. Cæterum quoniam summa est in omnibus vitæ licentia, neque villo supplicij deterrentur metu, alia se in loca conferunt, ibique ordinum officia non secus exercent, quàm si nulla essent lege prohibiti. Ex eadem oritur viuendi libertate, vt multi Laici sacerdotium simulantes in locis, vbi cogniti non sunt, sacrorum ordinum fungantur ministeriis. Monachos à clericis cucullus, hos à cætero populo distinguit crux, quam quisque ex ligno vel metallica materia manu portat. Qui volunt sacris initiari, multos ante per dies ad Abunæ domum se cōferunt, vbi stantes ad ostium voce contenta & lugubri identidem clamant, *Domine miserere nostri*. Vbi id sæpius fecerunt, admittuntur ad ordines, quibus susceptis vnâ singuli salis petram reddunt conferenti: ea laboris pretium est, & in his locis pecunia. Hæc Antonius, ex quibus apertissimè constat, abesse à vero quæ nouus auctor scripsit. Sed de his hætenus. Nunc ad Patriarchas.

*Libri primi finis.*



D E

IOANNE NONIO BAR-  
RETO PATRIARCHA

LIBER SECVNDVS.

*Vbi ē quibus parentibus natus Ioannes, quomo-  
do à pueritia institutus.*

CAPVT . I.



**D**IXI, quæ de Abassinorum rebus dicere in præsentia habui. Duos nunc eorum Patriarchas, Ioannem & Andream, duo clarissima orbis decora, vna, ut aiunt, manu ex abditis obliuionis recessibus foras promam, & veluti è tenebris erutos ponam in propatulo. Quos enim idem vitæ institutum, eadem dignitatis ratio, summa morum similitudo, singularis quædam in iucundissima non exigui temporis consuetudine animorum voluntatûmque consensus, plurimæque aliæ studiorum simul & officiorum necessitudines arctè in terris deuinxere; quosque insuper gloriosa facinora, & merita, quantum mortali coniectare fas est, apud Deum

Deum pæne paria , pèrque eòsdem rerum turbines  
& varietates quæſita inferuerunt cælo ; eos historia  
diſiungere, atque vno quaſi ex corpore diſcerpere,  
piaculum duco. Iungam igitur vtrumque ; & de illo  
dicam priùs, qui & auctòritate muneris , & felici ad  
ſuperos abiectione anteceſſit. Hic eſt Ioannes Nonius  
Barretus, patria Luſitanus, domo Portuenſis. Eſt au-  
tem Portus vrbs apprimè nobilis , ad veteris Luſita-  
niæ terminos, Septentrionem verſus, ſenſim accliuu ac  
peramœno conſtituta loco. Durio imminet, quàm hic  
amnis non modico auctus numero fluminum mino-  
rum, ingentem aquarum copiam à Pelendonibus per  
Areuacos & Vacciòs, pèrque alios complures Hiſpa-  
niæ populos, longo terrarum tractu collectam, pater-  
te non procul oſtio in Oceanum infert. Dulci fruſitur  
cœli ſolique temperie: inſtitoribus & populo frequēs,  
cuiuſque elegantia & comitate inter Luſitaniz pri-  
mas. Ea quoque ratione non incelebris, quòd naſcen-  
ti regno nomen feſerit. Ab hac vrbe Portugaliã  
dici, indubitatum eſt. Conſtat etiam, ſic eandem ali-  
quando vocatam; ſiue quòd iactatos olim tempeſtate  
Gallos , aut deductas eorum in Luſitaniam colonias  
tuto portu exceperit ; ſiue ob quædam talia ſparſa in  
vulguſ, quæ fictis magis ſpecioſa fabulis, quàm verè  
traduntur : ſiue quia, ſicut periti narrant , & propius  
vero eſt, ad communem portus appellationem vicini  
pagi, qui Cale dictus , vocabulum ſibi addidit , cauſa  
diſcriminis; primuſque portus Cale, immutatis dein  
paululum literis Portugaliã euafit. Hoc tamen ipſa  
nomen ſurgenti quondam regno, cuius tunc erat ca-  
put, fertur libens reliquiſſe, ſola Portus nuncupatione  
contenta. In hac igitur vrbe (non nihil momenti ha-  
bet, quo quis loco primam accipiat lucis uſuram) na-

talis dies & incunabula Ioannis fuere. Parentes habuit locupletes, & familiæ nobilitate per Lusitaniam claros. Primam pueritiæ ætatem quo pacto domi egerit, non accepi. Honestissimis ut opinor imbutum moribus facile mihi suadent parentum inprimis pietas hisce adhuc temporibus grata recordatione apud Portuenses commendata; ipsius deinde Nonij adolescentia inter inquietos ac turbidos Salmanticensis Academix tumultus tam pura à labe, tam graui ter pieque instituta, ut cum summa omnium quibus erat notus; beneuolentia & admiratione sanctus vulgo prædicaretur. Illud tandem me valde mouet, quòd cum octo essent germani fratres, quatuor mares, totidem foeminae, vno excepto, cui conseruandæ familiæ relicta cura, cæteri, quòd parètum industria, ut promptum est credere, egregiè essent educati, & ad pietatem exculi, Deo vocanti dociles aures præbuere, eiusque affatu incertis caducæ vitæ rebus remittentes nuntium, religiosis cœtibus se aggregarunt. Tales esse fructus solent, quos à bene culta pueritia colligit posterior ætas; nec nisi rarò fit, ut insignes ad virtutem accessus derepente contingant. Ipsos tres mares vna complexa est Societas Iesu; iisque, ut splendidissimis ornata gemmis, natiuitatis suæ primordia mirificè decorauit.

---

*Melchior Nonius Barretus in Societatem à Deo  
premittitur, ut Ioanni fratri viam  
aperiat.*

## C. A. P. V T II.

**P**Rior ad Societatem venit Melchior Nonius Barretus, anno à partu Virginis 1543. ut locum Ioanni

ni pararet. Coluerat Melchior ab ineunte ætate in Conimbricensi Academia studia literarum; nec minori fructu, quàm labore eò iam peruenerat, vt præter externa Doctòratus ornàmèta, nihil ipsi in eo genere superesset. Cùm veid supremus hic literarum gradus tum propter diuturnas grauésque molestias, quas ferè illos oportet, qui in ea Academia ad ipsum aspirât; quidem multos primùm annos impendunt studio, & repetito sæpius scientiæ periculo dutè asperèque robantur; tum quia necessum est non modicum hiesumptum, quem non cuiusque facultas ferre potest; im propter alias causas partim communes omnibus, partim cuique peculiare, nec facile, nec à multis bineatur. ideoque magno apud Lusitanos in pretio existimatione sit: Melchior diuino iam actus impulsus, & ad sublimiòra intendens animum, cœpit hosce vud se honores despicere, ac subinde statuit Doctòrus laurea supersedere. Ergo in collegium Societatis, cuius ad institutum per insignia sociorum exempla, pèrque intimas animi motiones à Deo vocabatur, confert sese, & cum Simone Roderico vno ex priis Ignatii Loiolæ sociis, penes quem prouinciæ administratione tunc erat, negotium seriò pertractat. Tanti Simon virum non libenter modò & hilarè excipit; sed facilè ostendit, velle se quamprimum voti sum compotem efficere. Rogat tamen, vt ante inessum vel inuitus patiat, ad illud efferri se spreum iam, & prius fastiditum, quàm obtentum Doctòrus fastigium, cui erat proximus: id enim è Societate esse. Paret dicto Melchior; atque vt Conimbricæ sit; tanta celebritate, tantòque apparatu, quam nullibi exhiberi solet in re simili maior, non iam, sed Societatis causa in illum conspicuum Docto-

rum ordinem cooptatur. His peractis eodem ipso die, grauiſſimo ſeptus Academicorum comitatu redit ad collegium. Dúmque ibi paululum ſubſiſtit, ecce tibi ſimul vt læues deprimantur fumi, ſiqui ex collato honore in hominis caput aſcenderant; ſimul vt eius conſtantia & ſuſcepti conſilij firmitas tentetur, ex obedientiæ præſcripto decernitur, vt exutus pallio, vilique ac detrito amiſtus indumento, mediam per urbem, ſublatus humeris veruecem donoſerat Marco Romæo, Theologico profeſſori, literis & fama valde commédato, cuius, opinor, patrocínio, in ipſo Doctóratu actu, vt fieri mos eſt, fuerat vſus. Tam duro Melchior imperio nihil abſterritus, promptè obtemperat. Animal dorſo imponit; eo oneratus baiuli in morem domo egreditur; ſpectante ac ſtupente populo pergit ad Romæi, ipſique importatum munus offert. Marcus ad hanc nouæ rei formam attonito ſimilis, demittere præ verecundia oculos; irriſum ſe potius, quàm munere affectum credere; ne verbum quidem mutire; tantum apud ſe, quænam iſta ſit inuſitati ſpectaculi ſpecies, cogitabundus quærere. Tum Melchior turbatæ menti & rei nouitate confuſæ hiſce verbis pacem, lucémque reſtituit. Qui nobilioribus, inquit, in Academiis mos eſt, clariffime Doctór, vt Theologici Doctóratu laurea decorandi amarulentis primùm vexentur ſcommatis, & veris quaſi conuitiis proſcindantur, vt quanto magis alieno à faſtu & ambitione animo, tanto ad eum honorem digniùs accedant; eundem iſta, cui me modò addixi, Societas vſurpat, vt ad alium euehat gradum dignitatis longè ſublimiorem; ad eóſque præparet honores, qui vbi vera ac ſolida animi ſubmiſſio, ſuíque contemptio non eſt, eſſe ipſi non poſſunt. Optimè noſti,

vir

vir sapientissime, quàm sit ab istis vestris gymnasiis schola Christi dissimilis, quas in ea disci literas, quos ambiri gradus oporteat. Nec te etiam latet, quod in maiorum scriptis sæpe legisti, illud ante omnia constitutum esse debere religioso homini, vt cum se semel Deo dediderit, nihil sibi prorsus retineat sui; sed ab eorum nutu totus pendeat, quos diuinæ sibi elegerit nuntios & interpretes voluntatis. Hæc est illa (ita morum magistri vocant) Abnegatio sui, quam religiosæ vitæ, quamdiu vita superest, ducem simul & comitem esse, necesse est. Ab hac igitur istum cursum, quem nunc auctore Numine, decurrere incipio, mea tunc Societas inchoare iubet. Quare siquid actum secus, ac placitum tibi, ignoscas, vir prudentissime, & boni consulas. Non enim tua hîc tentata est auctoritas, sed animi mei explorata constantia, & studium excitatum. Mirum quantam ex hoc vno facinore Marcus de Melchione opinionem concepit, quâ tamque iam tunc in spem venit, fore vt ex eius laboribus & rebus gestis, vbicumque terrarum viueret, ingens postea incrementum atque eximios fructus Res Christiana esset perceptura. Nec euentus fefellit. Primum enim in Lusitania, deinde in India, in Iaponia, in aliis orbis regionibus per summas rerum difficultates, & innumera vitæ pericula, longè maiorem, quàm vt breuiter dici queat, Christi Reipublicæ operam nauauit. Sed hæc de Melchione, Ioannis gratia, satis mihi sit, breuiter attigisse: cætera, quæ gessit, scriptores alij copiosius persequuntur.

*Alfonſus Barretus fratrum motus exemplo Societatem amplectitur, & egregiis facinoribus tyrocinium illuſtrat.*

### C A P V T III.

**A**Lter fuit Ioannis frater Alfonſus Barretus, cæteris natu minor, cuius, & in Ioannis gratiam, oportet breuiter meminiffe; eo quòd eius excitatus exemplo eamdem ſit amplexus viuendi rationem. Quintumdecimum is agebat ætatis annum, & viduæ matris, cui erat in deliciis, ſolitudinem atque orbitatem domi ſolabatur. Cùm fratrum Ioannis & Melchioris, quos ambos iam Societas habebat, ſæpe ipſi in mētem veniret, eorūque perciperet veſtigia inſequi; cogitare cœpit apud ſe, quī fieri poſſet, vt quos ipſi natura fratres dederat, eoſdem ſibi redderet viuendi ratione ſocios, doctrina magiſtros, religione parentes. Certò ſciebat, haud vñquam futurum, vt mater, cæteroquin pia & diuina reuerens mulier, quantiſcūque eſſet fatigata precibus, facultatem ſibi concederet ad fratres eundi, vt idem, quod illi, ſequeretur inſtitutum. Nouerat enim tenerrimi illius affectus, quo, veluti vnicus vitæ oculus, ab ea diligebatur, vim eſſe intractabilem & flecti neſciam. Nec ſperabat, ea negotij conſcia, quamquam omnino inuita ac repugnante, ſatisfacere votis ſuis ſe poſſe. Ratus ergo opportunum eſſe in fuga remedium, fugere demum ſtatuit. Nulli mortalium animum ſuum aperit. Parat ipſe per ſe clanculum, quæ ad iter neceſſaria. Rebus tandem compoſitis domo & vrbe exiens, quan



quanta potest celeritate Conimbricam contendit. Eò ubi peruentum, collegium adit Societatis; aduentus causam & desiderium suū moderatori exponit. Haud opus fuit, tam compertam, tantòque testatam facinore cogniti adolescentis voluntatem diutius explorare. Mora nulla, Societate donatur, & albo tyronum adscribitur. Vix est, vt bene accensa diuini amoris flamma, in recessu pectoris delitens, inibi contineri queat, quin foras erumpat, & occasione captata insigne aliquid atque excelsum moliatur. Paucos admodum egerat Alfonso cum sodalibus dies, cùm illa eorum conspicatus opera, quæ quisque submittendo sese ac despiciendo (vt tunc feruentia erant nouæ familiæ initia) admiratione fortè magis, quàm æmulatione digna patrabat. Simili & ipse spiritus ardore corripitur, miræque animi simplicitate rem aggreditur memorandam. Consuetas deponit vestes; assūmit lugubres, & aptas dolori; detrahit de pedibus calceos; ad Conimbricense forum eo habitu procedit. Inibi primū, vt alicuius atrocissimi reum criminis, ad marmoream pilam, publicum supplicij instrumentum, alligari se facit; summo dein ardore animi, nec impari vultus ac totius corporis commotione, & voce, quantum vires ac latera patiuntur, contenta hunc in modum precatur. Domine Iesu Christe, veri & æterni Dei vere & æterne fili, qui ob infanda humani generis flagitia in atrio Præsidis Pilati corpus tuum sanctissimum columnæ alligari passus est, huius, obsecro, populi benignus miserere, ab eoque auerte supplicia, quæ pro innumeris sceleribus, quibus se polluit, tuamque læsit maiestatem, iustissimè meretur. Intuere miseros, Pater clementissime, non vt punias, sed vt parcas. Hæc eadem iterum & sæpius eadem contentione repetita  
ingen

ingentem vndique consciuerē turbam, ad horribile spectaculum trepidè confluentem. Varia hîc, vt solet, de Alfonso vulgi iudicia. Iactitare quidam, exisse illum de mente & furere: alij suspicari puerum minimè malum ab aliquo deceptum, & turbandi populi illuc impulsū: plerique spiritu sublimiori correptum credere, vt quanto simplicius, tanto fructuosius ex publico loco in publica vrbis scelera detonaret: in alias alij sententias & dicta diuisi. Nullus tamen erat ex tanta turba, qui non suspiceret præclaram adolescentis indolem liberali oris probitate expressam, quique perfusos ingenuo pudore, animique neque maligni, neque fallacis indices oculos non miraretur. Ceterum ille hoc submissionis & pietatis officio probè perfunctus, foro relicto domum reperit. Non multo post mittitur Olisiponē, vt vastissima in vrbe, in qua nec facile agnosci, nec obseruari facile possit, quamdam pænæ immensam abiiciendi sese, & alios iuuandi, quam breui contraxerat, sitim, veluti in patentissimo flumine restinguat. Præter alia, quæ illic edidit admiranda, duo reperio, quæ nō debeo præterire. Ex variis Lusitaniæ partibus, illis præsertim extremis, quibus Galleciæ regno contermina est, frequenter exeūt copiosi infimæ sortis hominum greges, quos rei familiaris apud suos tenuitas patriis eicit sedibus, suæque industria victum quærere, & aliquod pecuniæ subsidium, quod domum referant, apud alienos parare cogit. Paucis hoc ex numero per alia loca dissipatis, longè pars maxima Olisiponem confluit, urbem populo & negotiis plenissimam. Varia in his ætatis conditio, viri, iuuenes, adolescentes, pueri. Idem omnibus onera portandi munus. Qui natu grandes, & pollentes viribus, grauiora baiulant, quibus

quibus nondum firma per ætatem membra , leuioribus succumbunt. Maximæ plerumque his in communi victu & vestitu sordes ; summa in moribus cultusque barbaries ; nulla tunc virtutis , nulla salutis cura, sed rerum cœlestium, eorûque , quæ ad vitam futuram pertinent, ignorantia tanta , quanta potest maxima cogitari. Instituuntur hodie, vt res ferunt , accurate , summo quidem catechistarum labore ob tarditatem gentis, sed non modico emolumento. Vbi Alfonso Olisiponem veniens istum tam incultum tantisque obrutum vitiis sentibus conspexit agrum, eò statim adiecit animum , vt quidquid factò opus esset, id Deo duce & adiutore faceret, quo illum acciperet excolendum. Ab Deo immortali inchoat, à quo quæ non ducuntur rerum primordia, fausta esse nequeunt. Fusus in preces anxie orat, vt si eam sibi mentem dedit , quam habet miseræ illius gentis iuuandæ, si tanti sibi consilij auctor est, rei gerendæ quoque modum aperiat, & postulata sua ne repellantur , Præpositi sui flectat volutatem. Se quidem neque agere quidquam, nec tentare velle , nisi quod ipsi credat esse gratissimum. Ab hac precatione ingens illico & sine nube æ nebula adolescentis animo affulsit lux ; ostensumque monstrante Deo , qualem sequi deberet in negotio modum. Agnoscit igitur, si non dubios cupiat laboris sui fructus colligere, opus sibi esse, toto corporis habitu, atque ipso externo viuendi genere sic ad eos gerulos sese efformare , vt ex suo grege vnum esse haud dubie credant. Quare vestibus aliis depositis , necessum esse tunicam sibi induere , qualem ipsi induunt, sordidam, breuem, vix ad genua pertinentem, ex crassissima lana inscite textam , & malè confutam ; rusticum pileum , aut rudem petasum vsûque tritum imponere

ponere capiti; duos pedibus circū dare perones; adi-  
ciendam quoque humeris sportulam, quam ferè ex  
hoc ordine, qui natu minores sunt, gestare semper so-  
lent. Non satis quoque semel quotidie, aut bis in die  
ad eos itare; oportere cum illis esse, inter illos viuere,  
in mensa, in colloquiis, in labore, in quiete, in rebus  
cæteris se illis sodalem præbere. Hæc sua ad superio-  
rem defert Alfonsus cogitata; summisque insuper cō-  
tendit precibus, ut illo, quo dictum est, modo aliquot  
sibi dies apud eam hominum faciem agere permit-  
tat. Mirum dictu, quod homini annofo, diūque in re-  
ligione & virtutum palæstra exercito difficile cōmit-  
ti posset; id recentissimo tyroni, vixque altero die ab  
ephebis egresso tā facile cōceditur, ut qui in hoc facto  
præpotentē Numinis manum non videat, cæcus sanè  
sit. Flexit haud dubie supremus ille Rector, cui parent  
omnia, moderatoris animū, ut noui militis annueret  
postulatis, quo potissimum dux illæ eximæ eius ani-  
mi gemmæ, Despicientia sui, & aduersus omne genus  
hominum Caritas tam singulari exemplo præderen-  
tur. Alia tamen ex parte adeò se illustrem fecerat Al-  
fonsi virtus, tantisque erat domi ac foris in operibus  
perspecta, suo ut quodammodo iure vendicaret, ut in  
hoc genere nihil tam arduum, ac tam difficile habe-  
retur, quod ipsi nequiret tutissimè commendari. Im-  
petrata igitur eundi facultate, anolat Alfonsus à Præ-  
positi sui conspectu lætus & alacer, illaque sibi infimæ  
vilitatis & inopiæ parat indumēta, quibus paulo post  
speciosior, quàm si pictis acu, & intertextis auro vesti-  
bus esset ornatus, Præposito iterum se sistit, & ab illo  
etiam atque etiam discedens petit, suis ut precibus &  
cœleste sibi lumen, quo diuinam agnoscat volunta-  
tem, & vires, quibus ab ea cognita nihilum discedat,

&amp;c

& faustos suscepto negotio exitus obtineat. Se quidem ad eam prouinciam proficisci libentius ac lætius, quàm soleant proreges, cum ad Indicam ex Lusitania proficiscuntur. Vade Alfonsè, quò vocaris, cœlo duce & auspice, inquit Præpositus. Ad tuos illos, quos tantopere diligis, confer te gerulos. Numen, quod vocat, semper tibi, ne dubita, præsens erit, ac propitium. Eosdem ego tibi, Christi inprimis, meis deinde verbis maximopere commendo. Discant ex te, alium esse victum, quem diligentius quærere, alia lucra, quæ debeant facere auidius. Te docente ac præcunte ingrediantur viam salutis; odèrint vitia; sectentur virtutes. Eslo omnibus solatio & exemplo. Vbi opus erit, ex doctrina Pauli, argue, obsecra, increpa; inflamma ad iustitiam, ad castitatem, ad omne genus pietatis. Caue nequid pretermittas, quod ad eorum cultum videatur conferre. Ne tamen simus ignari eorum, quæ per te Deus agat, quòque sis loco, quive habeas; simul etiã vt isti tuæ procurationi, cum videbitur, statuamus finem; curabis ad nos identidem ventitare, & rerum facere certiores. His dictis discedit Alfonsus, & ad publicum vrbis forum, vbi greges illi communiter vagantur, extemplo se confert. Curat primum eorum se cœtibus & colloquiis miscere, vnũque præbere ipsorum de numero. Deinde publicè omnium, & priuatim singulorum inire familiaritatem, & amicitiam captare. Tum quæsitâ opportunitate inferere de rebus salutaribus sermones; Christianam catechesim exponere; vitiorum fœditatem ostendere; virtutum vires & pretium extollere; frequentem sacramentorum vsum commendare; præpotentis Dei aduersus impios iram, aduersus probos benignitatem efferre. Ad hæc insignia heroum facta, miseròsque diuinas leges præuarican

ticantium exitus recensere: siquid bene ab vlllo fieret, collaudare; sicut secus reprehendere. His artibus tantam sibi apud illos auctoritatem breui conciliauit, vt eorum voluntates quocumque vellet, nullo negotio perduceret. Vim excellentem barbara quoque ingenia sentiunt. Facile suis se factis apud rudes illos stipites Alfonsi sanctimonia probauit, animosque agrestes inuasit, ac tenuit. Suum ergo cuncti mirantur locum, suspiciunt, amant, siue doceat, siue reprehendat, auscultant libenter: reputant portento simile in tali vitæ conditione ac tam parua ætate tantam esse morum probitatem, talem scientiam diuinorum. Quærent denique inter se, quis & cuias sit, atque ad illas sordes vnde delapsus. Ille interim rebus aptè compositis, euocante præposito domum remeat. Atque hoc vnū est ex duobus, quæ non duxi prætereunda. En alterum, quod sequitur. Dum gerulum Alfonsus agit inter gerulos, sæpiusque ad eundem vrbis vicum onera forte importat, agnoscit sacerdotem inibi esse vita solutum & moribus, scdâque turpitudinis infamia laborâtem. Huic mederi cupiens, postquam reuersus domum est, rem defert ad præpositum, suamque illi iuuandi hominis voluntatem & consilium aperit. Ait peroptare se aliquot diès in illius sacerdotis esse famulatu, vt domesticæ testis nequitia, fidentiùs eū monere queat, & à turpi consuetudine, iuuante Deo, amouere. Facta facultate, eodem habitu domo egreditur; hominem conuenit; ei se famulum offert. Is adolescentuli specie & simplicitate captus oblatum seruitium confestim admittit, eo libentiùs, quod nihil sibi ab illo per ætatem timendum putat. Vbi Alfonsus tum ministrandi diligentia, tum animi modestia & comitate suo se hero carum fecit, cœpit illum paulatim officij admone-

re:

re: dein monita irridentem asperius obiurgare: tum de infelici ac periculoso impiorum statu ardentius discurrere: postremo vltima illa, in quibus ad auertendos à scelere animos vis magna est, Mortem, Iudicium, Æternos cruciatus in memoriam identidem reuocare. Hæc miser sacerdos partim risu illudere, partim per contemptum despicere, partim per iracundiam declinare; verba insuper addere probrosa & contumeliarum plena. Abi, inquit, in malam crucem, furcifer, hominum nequissime. Tu mihi monitorem agis? Vnde ista tibi concionandi potestas? Quin ego tibi os illud audax & arrogans pugnis contundo? Vade, tui similes quære, quibus viam monstres. Cohortationes mihi tuæ nulli omnino rei. Vrget Alfonsus nihilo secius, nihil remittit; iacula potius contorquet acutiora. Moneo, inquit, prædico, denuntio, & immortales cœlites, hominesque mortales testor, recta te in interitum ferri sempiternum. Contine gressum, miser Christiane, miserrime sacerdos. Veniat tibi tantisper in mentem tui, & aliquam animo concipe cogitationem recipiendi te ad frugem meliorem. His ille auditis tanto repete corripitur furore, vt vix à cæde manus absteineat. Fidelem seruum domo eiicit, omnia sæua minitans, si audeat vnumquam coram se cõparere. Recedit ab eo re infecta subtristis adolescens, ad singulos gradus eandem, quam prius, tundens incudem, donec est ad publicam egressus viam. Dum suos repetit, ad consortem flagitij fœminam ex itinere diuertit, vt nihil relinquat intentatum. Non hic eandem, quam in misero sacerdote, reperit mentis duritiem. Præbet aures mulier, & fidem habet adhortanti: moxque ex recordatione sceleris in lacrymas effusa veniam à Deo submisit precatur. Exinde vitæ prioris acta diligenter discuti-

Q

ens,

ens, quæcumque flagitia ad id usque tempus se suscepisse reperit, ad confessionem defert salutari sacramento abluenda; quibus demum elutis pulcherrimus cœlestis gratiæ nitor renouato animo restituitur. Hic huius facti exitus. Fuit in Alfonso pars vitæ posterior priori par. Tres in ipso obseruatæ potissimum virtutes, quæ reliquis antistarēt, excellens animi modestia, singularis in Deum & homines caritas, ad omne sanctimonix opus alacritas eximia. Postquam & Olisipone docuit literas humaniores, & rectorem egit Eboræ, & alia Societatis munia tum in his, tum in aliis locis magna cum laude & fructu exercuit, in ipso tandem Olisiponensi collegio, in quo pæne cœperat Societatis iure viuere, corporis ergastulo liberatus ad superos concessit.

---

*Ioannes imposito studiis sine religiosa vitæ desiderio pulsatur.*

#### C A P V T IV.

**P**Rimos ætatis annos, ut à nobis tactum suprâ partim domi inter suos, partim in studio minorum literarum cum æqualibus egit Ioannes. Grandior effectus à Gaspare Nonio Barreto, fratre natu maiore, cui relictam diximus conseruandæ familiæ curam, Freirensis Abbas eligitur. Abbatia sub nomine Deiparæ Virginis, Freirensis à loco dictæ, in ea est Interamnensi regione, quæ Minio Darióque fluuiis concluditur. Patronatus, ut vocant, ius ad Gasparem pertinebat. Non multo post Ioannes, quia nondum maioribus studiis imposuerat finem, ad ea insequenda Salman



Salmanticam petiit. Qualem ibi vitam vixerit, non habeo necesse longo verborum ambitu describere: inde cuique satis erit notum, quod inter duo multo maxima malorum inciramenta, iuventutis, inquam, ardorem, & opum abundantiam, atque in tanta, quanta in hisce Academiis esse solet, vitæ morumque licentia, sic ille Scholasticum egit, & Ecclesiasticum, ut sicuti iam antè memini, non alio, quàm Abatis sancti nomine & agnosceretur vulgo, & appellaretur. Frequentissimis in locis, in quibus vitia ex æquo virtutesque versantur, latere solent mediocritia. Quæ verò in hominum oculos animosque incurrunt, quæque vel amorem sui, vel odium excitant in multitudine, ea porro summa esse necesse est. Hinc promptum conicere, quid iure de Ioâne censendum, cum in tanta ac tam varia undique confluentium iuuenum frequentia tam præclarum & illustre sanctitatis nomen sibi pararit, ipsumque vulgus, non satis æquum virtutum ac meritorum arbitrum, excellenti tamen rectè factorum specie deinctum in maximam sui existimationem pertraxerit. Finitis studiis literarum ad suam se Ecclesiam recepit, ut commissum sibi gregem ipse per se exemplo, doctrina, sacrorum administratione pasceret. Id autem ita præstitit, ut per totum illum tractum, qui erat Abbatie vicinus, sancti Abbatis nomen ac famam, sicuti Salmanticæ euenerat, breui compararit. Sic erat propenso in res diuinas animo, ut iis perscrutandis non solum sex quotidie totas atque integras horas priuatim impenderet; sed reliquo etiam diei tempore assiduam earum memoriam agendis negotiis intermisceret; ne umquam ab Dei præsentia, quantum homini fas, mente exularet. Immaculatam Virginem Mariam ex intimo sensu diligebat;

& absque dubio creditur eius ope singularia sæpe à Deo accepisse dona, multaque nouisse ad animi salutem cumprimis conducentia. Ardentissimo item Euangelicæ assequendæ perfectionis agitabatur æstu. Atque illa potissimum cogitatio eius animum dies noctesque versabat, num fortè gratum Deo faceret, si patria, propinquis, rebusque cæteris relictis, notas atque ignotas regiones peragrandò, vt olim Apostoli, dispersis per orbem gentibus Christi nomen lucemque inferret. Non posse quidem Rectori maximo perfectè subdi se, quamdiu terrenas opes possideret, suoque viueret arbitrio; id quodammodo persuasum habebat. Dubitabat deinde, an satis sibi esset, turbas hominum declinare, illasum ab omni turpitudinis labe corpus animumque seruare, & in rerum coelestium contemplationem enixè incumbere; nisi illud etiam adderet, vt Christi causa suam alteri voluntatem regendam committeret, & ab eius nutu ita penderet totus, vt ne minima quidem in re sui esset iuris, vt vile prorsus mancipium, aut quolibet etiam vilissimo mancipio conditione inferior. Altera tamen ex parte, cum in animum induceret, pacatam illam dulcemque mentis tranquillitatem, quæ ex assidua Dei contemplatione existit, eamdemque rursus fouet ac tuetur, vix cum ipsa obediendi ratione, aut ne vix quidem posse coherere; siquidem qui alieno subest imperio, eum sua sæpe emolumenta postponere, & suam animi pacem obedientie causa interturbare, necesse est; vix egregius, qui & ob insignem in Deum caritatem obedientie vinculis adstringi cuperet, & ab illa iucundissima animi quiete nullo pacto vellet dimoueri, incipiti contentione distractus vehementer fluctuabat.

*Mel*

*Melchior ut Ioannem ad Societatem pertrahat,  
illum conuenit, irrito successu.*

## CAPUT V.

**P**ER id tempus Melchior Nonius, qui, ut dictum est, prius Societati nomen dederat, sua sorte, non modò contentus, sed etiam lætus, Abbatem Ioannem in ea sibi sociare ardentè cupiebat. Multis ab illo distabat passuum millibus, nec aliter, quàm per literas agere cum ipso poterat. At cum rectè sciret, frigidas esse epistolarum voces, nec aptas satis ad mouendum; adire ipse per se hominem, & coràm alloqui decreuit. Suum ergo cum Rectore communicat votum & consilium, utroque approbato sic inter eos conuenit, ut Melchior ad S. Iacobi Compostellani peregrinationem suscipiat, atque ex itinere ad Abbatem diuertens rem cum ipso commodè & maturè pertractet. Ita fit. Conimbrica proficiscitur; intra paucos dies Interamensem ingressus prouinciã. fratris domum adit; & ab eo peramanter atque officiosè excipitur. Post pauca deinde ad salutandi rationem attentia, afferre se negotium ait, quod cupiat statim & pluribus proponere, nisi ipsi molestus sit. Imò, inquit Ioannes, audiam te libèrissimè; nec tu mihi fastidium, sed voluptatem dicendo paries. Agè rem tuam dic, quàm multis voles. Tum sic exorsus Melchior. Quid agis, inquit, mi Ioannes? Quo progressu ad animi perfectionem tendis? Scio, te pietatis studio teneri; nec segniter in ea incumbere, quæ ab animo sunt, ut quod optimum factu sit, non sequaris tantum, sed etiam allequaris. Agè tamen, nullasne tibi hoc tuum pa-

storale munus exhibet molestias? Nihilne impedit  
 virtutis cursum? Creditu mihi difficile. Quietos  
 enim animos & pacis amantes nulla res acerbius agi-  
 tat. Non ignoras, multos esse miserè beatos, qui-  
 bus suaue est hisce curis absumi; & vereor, ut tu ipse  
 vnus sis de numero; libénsque attollas pondus planè  
 ponderosum. Nolim te ista captum esse felicitate. Nò  
 equidem aut munus damno, aut vitæ genus. Absit.  
 Rectum vtrumque est, cum rectè sit; & fieri Christia-  
 næ Reipublicæ est pernecessarium. Sed aliud est, quod  
 esse cuique potest, & ad vitæ tranquillitatem aptius,  
 & ad salutem animi securius. Quid per ambages di-  
 ctum eo, quod volo apertè intelligatur? Planè dico.  
 Tu mihi natura germanus frater es; vitæ quoque in-  
 stituto ut sis, ardentè cupio. Longè optabilior ista  
 propinquitas, & quæ nos tanto constringet arctiùs,  
 quanto est diuinior. Nisi ego te mihi hoc etiam vin-  
 culo copulare & impensè optem, & studiosè curem;  
 vel miser sanè sim, qui quod possideo bonum non  
 agnoscam, neque æstimem; vel in amicitiam infideli-  
 ter peccem, qui non dem operam, ut amicus habeat,  
 quod illi reor bonum. At ego & animum tuum, mi  
 frater, tantum diligo, quantum maximè possum (ipsis  
 enim mihi oculis multo est carior) & vitæ meæ ratio-  
 nem tanto habeo in pretio, ut ex caducis rebus nihil  
 æstimem pretiosius. Quid igitur velim aliud, nisi ut  
 mutes genus viuendi, & commutes in melius; me-  
 cùmque, quem sequor, sequaris tramitem ad æterni-  
 tatem tutiorem, forsitan & breuiorem? Neque enim,  
 nisi valde fallor, terrent te illa religiosæ arcis prima  
 & firmissima propugnacula, Paupertas, Castitas, Obe-  
 dientia, quæ ipsa iis, qui sapiunt, ad hoc genus vitæ il-  
 licita solent esse magis, quàm terricula. Et vero illa  
 bonæ

bonę mentis soror, caputque virtutum omnium (sicut Sapientes vocant) voluntaria Paupertas quantum abest, ut ab huius vię ingressu absterre te debeat? Quid obsecro? Credis ne eum, qui Christi causa suis se bonis spoliatur, ea vel amittere, vel imminuere? Imò conseruat, auget, amplificat. Pauca commutat multis, parua magnis, terrena cœlestibus, perituris æterna; nec iacturam facit diuitiarum, sed cupiditatem. Felix damnum ac fructuosum, quo tanto quis euadit locupletior, quanto se magis habendi exiit voluntate. In mentis enim inopia, non in tenuitate rei possessæ vera paupertas est, ut ex Magno Gregorio didicisti. Et is censeretur diues debet, non qui multa possidet, sed qui nec indiget, nec appetit possidere. Atenim illa altera libidinum dominatrix, expultrixque vitiorum, & ut cum maioribus nostris loquar, sæcunda virtutum parens, pudoris vinculum, morum ornamentum, pacis conciliatrix, quę vitam agit in terris cœlestem, æmulationem beatarum, quàm te allicit ad sese? Non quidem, ut nunc primum ipsam amplectaris, cui pridem dedisti manus, & cum sacris simul solemnibus sacramentis te addidisti. Sed optat reponi in loco tutiori, quę nunc in publico est, exposita prædonibus latere thesaurus debet, ne periclitetur. Inter epulas difficile est esurire, vel ad ignem frigere. Maior esse inter turbas tumultus solet, & frequentior ac sæuior exoritur in alto mari tempestas. Edò igitur transfer castimoniam tuam thesaurum, ubi melius delitescens, certius custoditur. Iam verò quid ego tibi verbis multis illam inculcem, quę Augustino & Gregorio testibus, omnium est mater, custodique virtutum? Obedientiam dico, cuius ea vis est, ut nihil in Religione sit vel ad aggrediendos animi hostes fortius, vel ad expugnandos

dos potentius. An ne putas quidquam esse homini posse obedientia vtilius, quæ ita certa dux vitæ est, nulla ut in re sinat errare, quem dirigit bona fide sequentem? Quid tandem illa alia Religiosi status emolumenta? Multorum inter se vnicè amantium sincerus amor; idémque & concors dissimilium voluntatum, atque in omni re consentiens, ut ita dicam, consensus; cum ad mala fugienda, tum ad consecranda bona & à rectoribus remedia, & à sapientibus consilia, & ab omni sociorum cœtu præcû subsidia; vera animi pax & tranquillitas; tumultus ac molestiæ, curarúmque inutilium recessus & solitudo; frequentissima piorum operum cum magno gaudio & fructu exercitatio. Quorsum percurro singula, quæ experiendo magis, quàm dicendo cognoscuntur? Agè, mi frater, da operam, ut ea ipse quamprimum experiri. Animosè abrumpe, si qua te ligant, vincula; & me ad meos redeuntem bis frater & socius comitare. Hæc ubi dicta, siluit Melchior, & Abbatem intuitus responsum silentio postulabat. Tunc sic exorsus Ioannes. Quanta me voluptate tua oratione perfuderis, tu ipse, Melchior, meo in ore atque in auribus agnoscere potuisti. Benignum enim, attentum, facilem expertus es auditorem. Quæ autem de religiosæ vitæ ratione coràm disputasti, ea ego ita sublimia atque excellentia esse apud me reputo, ut ieiunè à te, & frigidè (dabis mihi hanc veniam) disputata esse existimem. Cúmque multa exprompseris, quæ ipsa per se magna & audienti dignissima sunt; omisisti tamen plurima, forsitan nihilo minora, quæ ego audissem abs te pari attentione & voluptate. Itaque de religioso statu ut mirificè sentias; tamen ut præ me sentias sublimiùs, numquam tibi dabo. Nec puto quidquam in eo esse, quod

quod delicato etiam homini nimis formidandum sit. Quidquid enim difficultatis habet, id quidem, si minus natura, auxilio certè diuino, quod cuique semper præstò adest, non difficile superatur. Sed aliud me tenet, & planè reuocat ab hac viuendi ratione, quæ magna ex parte in obedientiæ vi, hoc est, in sollicito quodam ac pleno curarum ministerio posita est. Vt verò hanc vestram Societatem ingenio meo minus aptam putem, illa efficit negotiosa quidem ac permolesta, quam sibi tamquam propriam assumit, iuuandi alios procuratio. Nam & qui obedientiæ legibus subiacent, sic ad omnia, quæ erunt præcepta, debent esse prompti atque expediti, ut vix ab opere discernatur imperium; & qui in aliorum salute procuranda exercent sese, eos oportet oblitos sui in alienam excubare vtilitatem, multùmque laboris atque industriæ adhibere, ne quid prætermittant, quod sui muneris esse iudicarent. At quantum vtrumque quietis animis & contemplationis otio delinitis perpeßum durum est? Quantum etiam mihi ac meis moribus dissentaneum? Quam enim possim ego sine maxima animi mei molestia iucundissimam quietem abrumperere, meque iis, quos ex diuinis rebus meditandis percipio, honestissimæ voluptatis fructibus priuare? Hoc me tenet, Melchior, hoc sic stringit, ut aliud vitæ genus non modò optare mihi, sed neque etiam animo meo consentaneum possim cogitare. Næ tu, Ioannes, intorpellat Melchior, duplici, ut video, in errore es; dum & illum viuendi modum, qui in sola rerum diuinarum contemplatione versatur, cum obedientiæ legibus pugnare credis; & eundem ipsum sic effers, ut nihil ei in hoc genere non tantùm superius, sed ne par quidem aut æquale esse aperte significes. Quid si

Q 5 ego

ego facile ostendo, vtrumque à vero abesse, & te fateri cogo errorem tutum? Non agam multis, neque enim opus. Numquid inficiari mihi poteris, multos olim fuisse, & esse modò tum in vrbibus, tum in desertis locis religiosorum hominum cœtus obedientiæ vinculis adstrictos, quibus ea vna cura sit, vt viuant sibi, & ab omni alio soluti negotio res diuinas & humanas perscrutentur? Religiosum nullum sine obedientia viuere certum tibi. Quis verò ignorat, plurimos esse, quibus id potissimum est, vt in penuariam illam Magni regis cellam tripartitò diuisam introducti, in prima externam hanc mundanæ machinæ faciem, ornatum ordinem, pulchritudinem, varietatem inspiciant; conuersi ad sese in altera, nihil relinquant sui, quod animo & cogitatione non penetrent, & omnino cognitum atque exploratum habeant; in tertia denum, quæ diuina sunt, & longè à sensibus remota mententur? Hæc illa vita est, quam probas, & beatissimam prædicas, eo in religioso homine securior, quo magis abest à lapsu, fulgentissima obedientiæ face illustrata. Potestne vlli virtuti virtus illa aduersari, quæ cæteras animo inferit, & custodit insertas? Sed quid do lucem rei perspicuæ? Accede ad partem alteram, quam tibi quoque breuiter expedio. Si tu mihi, mi Abbas, cum sola actione contemplationem componis, lis nulla inter nos. Huic posteriori dandas esse primas, sanctorum Patrum nullus non asserit, & Doctorum Doctor nos Christus docet, Mariæ partem præferens solitudini Marthæ. Quis aliter dicat aut sentiat? Non ego quidem, neque vllus, qui sana sit mente. Memineris tamen, neminem sibi soli, aut suis tantum commodis natum esse. Hanc omnibus præscriptam esse à natura legem, vt quoad



fas & facultas erit, alienas etiam curent, & tueantur  
utilitates. Quid enim si vel calceos sibi dumtaxat su-  
tor, aut sartor vestes conficeret; vel sibi soli terram  
proscinderet, & sementem faceret; & fruges fructus-  
que colligeret agricola; nec ullus hominum esset, qui  
quidquam aliis, sed tantum sibi labore suo præstaret?  
Ullane esset inter homines societas, quæ sine mutuis  
officiis non conseruatur, nec constat? Cæterum cum  
ista sine Actione esse non possint, quis non videt, quæ  
sit naturæ legibus conueniens illa vitæ ratio, qua res  
quisque suas sic amat, ut non negligat alienas? Quod  
si in iis quoque bonis, quæ mortali vita terminantur,  
homines iuuare quidpiam excellens ac prope diui-  
num est; in eam curam incumbere, quæ ad animum  
refertur, & æterna respicit, quàm erit excellentius ac  
diuius? Sentis, ut opinor, Ioannes, quamquam opti-  
mum est id genus vitæ, quod in contemplandis diui-  
nis est positum; hoc etiam aliud, quod actionibus cõ-  
tinetur, & per se præstans esse, & cum ratione, cum-  
que ipsa hominis natura maximè congruere. Quid  
verò hinc efficitur, nisi ut necesse sit, fateare, eam vi-  
uendi rationem, quæ est ex utraque mixta, lógo inter-  
uallo illi esse præferendam, quæ vel in sola actione,  
vel in sola contemplatione consistit? Hanc & summus  
rectè viuendi Magister Christus; hanc, quæ fuit totius  
probitatis norma, Christi mater; hanc illi, quos idem  
Christus Religionis mysteria per se docuit, & ad do-  
cendas gentes per orbem misit, Apostoli tenuere.  
Hanc & nostra Societas, omnium, quæ Iesum sequun-  
tur ducem, Societatum minima, diuino beneficio cõ-  
plectitur. Prima cuiusque nostrum cura à nobis est:  
tum aliorum utilitati quæ monitis, quæ doctrina,  
quæ sacrorum procuratione, quæ modis aliis nos  
addicij

addicimus. Idque imprimis ex instituti nostri præscripto conari diligenter debemus, ab Deo eiusque præsentia ne umquam animo recedamus; cum planè compertum sit, nisi ad Christi pedes Maria sedeat, vitæ verba aure corde percipiens, posse quidem Martham satagere, nihil tamen ad suam aliorumque salutem vtiliter agere. Itaque imitandæ nobis sunt alites illæ, quæ vel hyeme vel æstate appetente, dum ex locis quibusdam se transferunt ad alia, mariæque immensa tranando defatigantur, ut vires tantisper reficiant, ex alto ad undas descendunt; alæque una, ut nauigio, subter corpus substrata, alteram erigunt in sublime, veli instar; atque ita pelago feruntur, ventis impulsæ. Haud aliter à Deo, rebusque cœlestibus mentem abstrahere, ne tum quidem nobis concessum, cum ad actiones, tamquam ad tumultuosi maris undas descendimus: altera enim animi parte hisce inferioribus curis occupata, erigi altera debet, ut concepta è cœlo diuini fauoris aura, remis, ut ita loquar, velique simul institutum cursum feliciter dirigamus. Ex quo clarè perspicis, contemplandi munus istud, quod te tantopere ac tanto iure delectat, quam non omitamus propterea, ut forsitan opinabatur, sed neque etiam inter agendum intermittamus. Hæc & alia in eadem sententiam Melchior. Verumtamen Abbas, ut est propositi tenax obfirmata consuetudine opinio, ratus præter eam, quam fruebatur, animi quietem, nihil contingere sibi posse ingenio suo congruens, si alium iniret viuendi modum, motus quidem aliquantulum fratris oratione est, sed non permotus.

*Ioan*

*Ioannes litantem Fabrum per quietem videt, & à  
Deipara monitus Conimbricam petit.*

## CAPUT VI.

**R**E infecta Conimbricam Melchior à peregrinatione rediit. Cùmque eadem pertrahendi ad se fratrem cogitatione nihilominus pungeretur, virgere propositum suum alia ratione cœpit. Post dies aliquot, opportunitate oblata, literas ad Ioannem dat. Hæc rei summa: Petere se ab eo, pro ea, quæ inter ipsos est, amoris coniunctione, & iterum atque iterum precari; ut curis aliis paulisper depositis, Conimbricense Collegium inuisit, quæ aliquanto temporis intervallo sociorum fructus cōsuetudine, vtilisque cum iis habeat de rebus animi sermones; ac Petrum Fabrum, cuius aduentus propediem expectatur, videat, & agnoscat, virum insigni vitæ sanctimonia clarissimum, rerumque diuinarum apprime intelligentem, cum quo possit omnes vitæ ac propositi sui rationes summo cum fructu communicare. His literis lectis excitatè rursus in ægro animo curæ; nec mediocriter concussus petus, eoque inclinatum, ut ancipitem illam de commutanda viuendi ratione animi sui pugnam maiori sollicitudine & contentione repeperet. Iterum igitur hinc & illinc agitari anxius homo; multa in utramque partem secum volueret; Fabri illius, de quo in epistola legerat, conspectum & colloquium ardentè exoptare. Dum sic æstuat; & assidua obsecratione intelligere conatur, quid facere debeat acceptius Deo, sibi que ad salutem vtilius; nocte quadam sacerdotem videt solemni ritu litantem; cui ipse Diaconus assistit. Vbi eò

ven

ventum, cum pax de more datur; Ioannes, cuius id in illo adumbrato sacrificio munus est, ad dextram facientis accedit, & inde, ut fit, illud, quo dari pax solet, porrigit instrumentum. Sacerdos renuens accipere, modica capitis inclinatione porrigenti innuit, ut ad laevam vertat se, & inde porrigat. Negat Ioannes ex ea aræ parte id officium præstari; pergit porrigere ab dextra. lubet iterum sacerdos, ut ad sinistram se vertat, & inde porrigat. Miratur Abbas, nec intelligit, quonam modo iubeatur à præscripto Ecclesiæ ritu præter morem recedere. Dum hæret dubius, magnoque pressus stupore, somno soluitur: statumque illustrante montem Deo in ducit in animum, videri illis visis significatum, non à sola contemplatione, sed ab actione simul petendam sibi esse eam pacem, qua frui desiderat; foreque & gratum Deo, & ad salutem animi sibi utile, si partem utramque, dexteram nimirum contemplationis, & actionis sinistram simul complectatur. Ut ergo hac de re fiat certior, ad æternum Numen supplex recurrit, à quo profusis lacrymis, quantum potest, demissè precatur, suam ut sibi hac in re aperiat voluntatem. Id verò vobis obtinere facilius queat. Deiparam Virginem, cuius imprimis nitatur ope, certo sacrificiorum numero statuto, sibi conciliandam putat. Altero igitur à Calendis Nouembris die, dum sacrum facit, suumque sanctissimæ Virgini negotium exponit, & eius se curæ ac patrocinio committit, enixè petens, ut quæ ad rem tantam rectè perspiciendam, & aptè tractandam necessaria è cælo lux est, eâ sibi clementissimæ Mater à Filio impetret. Ecce ipsa mundi Regina, specie pulcherrima, atque immortaliter circumfusa splendore, qualis & quanta videri cœlestibus solet, & litati seruo se spectandâ præbet, eiusque

animum incredibili iucunditate perfundit. Aderat cū beatissima Dei matre Petrus Faber, ille ipse, cui paulo antè sacrificanti idem Ioannes per quietem ministrarat; quem statim, vt vidit, ex facie agnouit. Tum Virgo seruum suum benignè intuens, Animos, inquit, sume Ioannes, & iam angorem istum, qui te nimis angit, procul pelle. Conimbricam actutum confer te: Societatis collegium adi; hunc Fabrum, quem præsentem cernis, inibi expecta: eius consilia, cohortationes, præcepta, doctrinam sequere. Nec plura, è conspectu Ioannis cum suo se Fabro Deipara eripuit. Ille tanta Virginis gratia maiorem in modum erectus, omnia difficultatū vincula, nodosque dissoluens, postero statim die, peregrinantis habitu assumpto iter suscipit; quo paucis diebus confecto, collegium ingreditur Conimbricense.

---

*Ioannem Faber prius instructum ac probatum  
in Societatem cooptat.*

## C A P V T VII.

**N**ondum Conimbricæ erat Faber, cū eò Ioannes peruenit: sed plures adhuc dies suum remoratus aduentum videndi ac fruendi sui desiderium expectantibus augebat. Ioanni imprimis, cui cū antea non aliter, quàm in somnis, & in illo cum Deipara viso fuisset conspectus, adèò expressam sui in eius oculis animoque imaginem reliquit, vt cum primum Ioannes ipse collegium tetigit, Melchiori fratri hominis figurā, magnitudinem, orisque ac totius corporis lineamenta probè descripserit. Quadraginta tandem post  
dies

dies Conimbricense collegium ingressus Faber est; quem ut Abbas vidit, illicò agnouit, & ad Melchiorrem versus. Hic, inquit, Faber ille est, cui litanti per quietem ministraui, quique mihi facienti cum suprema Matre conspectus. Haud multum moratus, secreto hominem conuenit, & cum summa animi dum submissione tum alacritate ad eius pedes accidens, totum se illi ac penitus patefacit. Quid deinde de commutando vitæ statu cogitet, & qua in obscuritate rerum atque ambiguitate sit, sincerè declarat. Illum Faber singulari quadam beneuolentiæ significatione habitum, bono animo esse iubet, & ad obtemperandum vocanti Deo hac oratione adhortatur. Nolim, vir egregie, sic ista contemplationis tuæ dulcedine rapi te sinas, nihil ut opineris, præstare te posse aliud, quod sit vel Deo gratius, vel tibi ad animi quietem congruentius. Rem introspecte, deprehendes forsitan calidissimè hostis latere dolos. In hac enim quietis opinione tibi parat insidias, eaque veluti firmissima compe tenere te vult; uti dum in magna rerum abundantia, omni obedientiæ solutus fræno, liberrimè uiuis, tuoque arbitrio tibi res accommodas, in liberiorrem deinde viuendi licentiam, quod sæpe fit, paulatim delabaris; atque illam ipsam, quæ nunc tantopere te delectat, contemplationis quietem, à nullo coercitus, tandè deferas, vitæ laxioris blanditiis delinitus. Quin etiam illud te oportet considerare, in eo viuendi modo, quem hæctenus tenuisti, haud posse tibi deinceps illam esse animi tranquillitatem, quæ hucusque forte fuit; cum iam constet, aliò te ab æterno Numine vocari, & latissimum quemdam de ipso, deque multis mortalibus benemerendi tibi campum aperiri. Illud tene vitæ gentis, quod Christus, quod eius Apostoli

tenue

tenuere: nec tibi tantum, sed aliis etiam tuam sedulus impertire industriam. Generosæ mentis est iuuare, & prodesse. Abiice, quem times, de amittenda animi pace timorem. Quod pro Deo bellum suscipitur, pax & tranquillitas est: & eo mens pacatiùs agit intus, quo Christi causa foris agit turbulentiùs. His Fabri dictis valde commotus Abbas, ad eius igitur prouoluitur pedes, seque vt ad socios adscribat, & rectam doceat perfectè viuendi rationem, sollicitè contendit. Ad hæc rursum Faber, beneperitus istiusmodi rerum artifex, non vt hominis retardet propositum, sed vt firmet constantiùs. Ne temere, inquit, videare, Ioannes, & mentis magis leuitate quàm consilio ferri, maturè perpende, quo impulsu moueare, totumque te ac vires tuas accuratiùs examina. Hic autem aptus, esse poterit istius tuæ mentis periclitandæ modus. Nocte media è lecto surgito, coram Deo te supplicem sistito, eius per preces exploraturus voluntatem. Tum toto ex animo te ipsi totum deuoueto, eiùsque implorato auxilium; eoque roboratus malum dæmonem in certamen prouocato, atque ea cum illo agito conditione, vt si quas habet aduersus hunc vitæ modum, quem vis inire, difficultates; si quas postea tentationum machinas ad deiiciendum te est admoturus; si quos dolos, si quas fallacias, si quas insidias & fraudes ad capiendum te est structurus; totum id, quantumcumque malorum ipsi in promptu erit, illicò expromat, & ad concepti propositi oppugnationem adhibeat. Ab hac dein pugna, vbi lux prima noctem abiget, sacrum adi-to altare, oblato ibi immaculato sacrificio, Numen tibi redde propitium, ipsùmque demissè & enixè ora & obsecra, vt quod in hac causa sibi erit gratissimum, id vt perspicias, cœleste tibi lumē, vt perficias, firmas

R

vires

vires robúrque suppeditet. Rem Ioannes, vt à Fabro tradita, diligenter exequitur. Ad noctem mediam excusso somno procumbit in genua; cum primum aliquantulum agit, & vires ad pugnam opémque implorat; his deinde verbis animose cacodæmonem laccellit. Huc ades, hostis hominum sæuissime, omnium architecte & machinator malorum. Audi quod decerno, quódque animo meo firmissimè fixum est. Ab hoc puncto temporis rebus caducis remitto nütium. Quidquid aut honorificum ad pompam, aut ambitiosum ad superbiam, aut spectabile ad elegantiam, aut iucundum ad voluptatem, siue vñquam habui, siue nunc habeo, siue habere aliquando possem, aspurnor, respuo, repudio: méque & mea æterno Deo æternùm consacro: ac sub vexillo, crucis per labores & dolores, per egestatem rerum, per probra & opprobria, pérque cætera omnia perpeßu aspera, auditu horribilia, Christum Iesum ducem in eius Societate mihi sequendum eligo. Tibi, immanissima & cruentissima bestia, isque omnibus, qui à te sunt, perpetuū indico bellum. Huc igitur ades, tenta, inuade, vrge. Tuis hñc artibus vttere; solitas molire insidias; quidquid sapiß, quidquid vales ad propositi mei oppugnationem profer, Non te fugio, non trepido; expecto impavidus; vltro prouoco ad certamen. Arma, quibus me defendam, téque aggrediar, non mihi alia, quàm vñicum clementissimi & inuictissimi Imperatoris mei Christi Iesu auxilium. His in fœdissimum hostem iactatis, pergit Ioannes agere cum Deo, & apud ipsum rationes expendere vitæ sibi deinceps incundæ. Cúmque meditationi insisteret, tam fœda repente tentationum procella in hominem irruit, vt facile appareret, superbissimum cacodæmona, veluti  
iniuria



iniuria irritatum, omnes vires neruósque industriæ suæ voluisse ad ultionem intendere. Conuolant vndique cruenta diuersi generis tela in cor precantis magno impetu contorta. Mille cateruatim hinc bonorum, inde malorum inter se dissidentes atque ex aduerso pugnantes erumpunt cogitationes. Ex parte vna illa inprimis se offert, qua tantopere delectatur, mentis quies, rerum cōtemplatione quæsitæ: deinde, quas possidet, quibúsque sine vllius offensione ad iuuandos pauperes atque ad alia pietatis officia vitur, facultates; tum quædam non dubia honores opésque licitè augendi spes; & complura generis eiusdem, quæ ipso Societatis ingressu evanescere necesse sit. Ex parte altera innumeræ propemodum obiiciuntur noui status difficultates, quas non vno aut altero tantum anno, sed toto vitæ tempore, quamlongum illud erit, velit nolit, subire debeat. Ist hæc omnia aded viuis animatisque figurata imaginibus sollicito animo obuersantur, vt iam se vndique sexcentis circumseptum miseriis, sine nomine, sine libertate, sine vlla spe fortunæ melioris, vilem, obiectum, omnium ioco & ludibrio expositum sibi videre videatur. Inter hæc altè quoque se in animum insinuat quædam importunè sagax futurorum prouidentia, molesto timore de perseuerantia sollicita, quæ grande secum conuehens curarum agmen, nobile pectus, plusquam credi potest, acerbè exagitat. Producta prope ad auroram pugna, in qua pugnanda cū malus dæmon exhaustis iam viribus nihil proficeret, non minima dedecoris aspersus nota, militum Christi, laborioso quidem fatigatum prælio, liberum tamen victorémque relinquens, turpiter campo cessit. Ioannes ergo victo fugatoque potentissimo hoste, cū iam dies albesceret, ex Fabri

præscripto ad aram contulit se facturus sacrum. Quo in sacro cùm Christi corpus manibus teneret, noua rursus spiritus luce perfusus, adeò firmiter apud se statuit, Societatis Iesu signa sequi, vt vaserimi hostis confusa deterritaque impudentia firmati pectoris constantiam neque apertè, neque ex insidiis adoriri amplius vnumquam ausa sit. Quamobrem his peractis anno à partu Virginis millesimo quingentesimo quadragésimo quinto, sociorum albo adscribitur, piisque spiritualium rerum cõmentationibus confestim exercetur. Tum verò Paupertatis quoque, Castitatis, & Obedientiæ votis coram Fabro sponte nuncupatis, extréma culinæ officia tam demissè, promptè, hilarèque amplexus est, vt Faber idem doctus morum & religiosæ disciplinæ censor absolutè affirmaret, numquam se virtutem vidisse sub proprio arbitrio in seculo natam & adultam, quæ sub alieno imperio ad nouitia Religionis opera tam facile flecteretur.

---

*E<sup>1</sup> Lusitania in Africam mittitur Ioannes, &  
Septæ rem Christianam egregiè  
promouet.*

## C A P V T VIII.

**A**D excolendum sese religiosis virtutibus, atque ad alios tum domesticos, tum externos exemplo & opere iuandos intentus erat Ioannis animus; cùm nec opinanti materies oblata est fructus vberioris. Præerat Septæ, celebri Mauritanix vrbi, pro Marchione villæ regalis Alfonso Norogna eius germanus frater, vir valde pius. Is cùm sciret Christianos à  
Sarace

Saracenis bello captos, inque vicinis Maurorum oppidis degentes, grauissimis animi & corporis miseriis afflictari; caritate motus, binas in Lusitaniam literas dedit, ad Regem vnas, ad Simonē Rodericum Societatis in eo regno moderatorem alteras. In utrisque de infelici captiuorum statu permulta. Hæc potissimum ad regem: Miseros illos homines non tantum miris modis à Mahumetanis, efferata gente, vexari, & acerbissima quæque pati; sed omni quoque fidei doctrina esse destitutos; atque ob eam causam viuere exleges, adeoque impiæ gentis cōsuetudine à Christianis moribus ad nefaria scelera desciscere, vt præter vnum nomen, vix aliud habeant, quo ad Christi gregem pertinere cognoscantur. Maximè ad ipsius Regis clemenciam & pietatem spectare, aliquos vt eò mittat è Societate religiosos, quorum opera & industria nutantes firmentur, sustineantur labentes, erigantur lapsi, & quæ ad vitam ac libertatem erunt necessaria, omnibus suppeditentur. Ad Simonem paria, & eadem ipse per se Regi suggerat, cumque ad ferendam miseris opem pro sua virili permoueat. Illud insuper, precari se vehementer, vt Regi aliquot è Societate homines ad hoc opus efflagitanti, ne qua excusatione durus obstitat: nihil enim magis esse è re Christiana, aut in quo cum maiori Dei honore & Societatis exultimatione desudare queat Patriam industria. Rex & Alfonsi literis, & Simonis denuntiatione factus de re certior, laudata inprimis Præfecti pietate ac sollicitudine, nō volens tantum, sed etiam libens in eandem venit sententiā. Moxque à Simone petit, vt aliquos è Societate destinet ad missionem idoneos, suis deinde ministris præcipit, vt quæ ad rem totam aptissimè peragendam opus esse censebuntur, abundè suppeditent; caueant-

que, ne vlla in re, aut Patrum commodis, aut captiuorum necessitatibus ipsorum siue caritas, siue liberalitas desideretur. Simon, quod erat in se, accepto Regis decreto, ex omni sociorum multitudine, qui se viresque suas ad eam rem certatim & studiosè offerebant, sacerdotes duos elegit, Ioannem Nonium Barretum, quo de agimus, & Ludouicum Gonzaluium de Camera, virum multis nominibus in Lusitania atque in tota Societate notissimum, qui paucis antè mensibus in Conimbricensi collegio Rectoris munere fuerat perfunctus. Tertium addidit ad domestica ministeria, Ignatium Vogadum, non ita pridem ad Societatis admissum tyrocinium; sed qui eam breui dederat cuiusdam maturæ ac perfectæ virtutis significationem, vt dignus esset, qui tali loco haberetur. Paratis rebus terrestri itinere è Lusitania profecti, non ita multo post Beticâ peruenere. Consensa ibi naui, Septam perducti sunt. Quamdiu in ea vrbe fuerunt, ad aliorum utilitatem totos se accommodarunt. Quid verò & quantum concionando, conferendo sacramenta, cætera pietatis officia exercendo egerint, non potest paucis, nec facile explicari. Inde aliquid colligetur, quòd gens illa, militari magis insolentiæ, quàm morum disciplinæ assueta, vsuque armorum & Mahumetanorum cruore efferata, ita per id tempus bonorum operum exercitationibus mansuefacta est, & ad omnem probitatem inducta, vt miratus Præfectus, gaudiòque exiliens, literis ad Simonem datis, gratias inprimis multas ipsi egerit, quòd tales eò viros miserit, quorum labore & exemplo res Christiana mirandum in modum prouecta sit; omni deinde asseneratione affirmauerit, tantam in eadem vrbe factam esse animorum mutationem, vt qui antea vel ipsos Mahumetanos, acerrimos

acerrimos totius honestatis aduersarios morum improbitate superabant , commutata viuendi ratione, patum iam viderentur esse religiosis dissimiles ; verèque dici posse, profana militum castra in claustra trās-  
iisse religiosa. Addit iisdem in literis Norogna, misisse se ad Acenum ( id Mauri cuiusdam gubernatoris erat nomen ) qui facultatem ab eo Patribus obtineret, vt possent Tituanum, Saracenorum oppidum , liberè tutòque commearè. Atenim non tam timere se impedimenta cacodæmonis , quàm ardentia ipsorum Patrū desideria. Tanta enim , inquit, mortis pro Christo oppetendæ inflammantur cupiditate, vt si Tituanū adeant, dubitari non possit , quin dum igneo quodam spiritus impetu in Mahumeticam superstitionem inuehantur, perfidæ gentis odium, manúsque in se conuertant , & capite luant loquendi libertatem. Id vt ipsi dulce ac decorum sit, captiuis certè, quorum causa in hæc loca venere, maximo erit detrimento. Quātum valeo & mihi fas, obsecro & obtestor, optime Simon , vt captiuorum salutem & commoda benignis oculis respiciens, Patribus istis tuis per literas præscribas , ne quo spiritus æstu ita sese abripi sinant, vt terrore deposito, diuina Christi mysteria per compita & vicos publicè palàmque prædicent , & ad ea amplectenda pertrahere conentur hoc hominum genus adamante durius : sed miseris Christianis animo sæuius , quàm corpore vexatis ferant opem , & impendant operam, eos in ergastulis inuisant, colloquiis recreent, consiliis instruant, confessione expient, Eucharistico pabulo reficiant , in fide fulciant , in malis soleantur , ad grauiora præparent , multisque aliis leuationum modis , quos non ignorant , eorum corpora animósque pertractent. Satis quidem magnam in his-

ce rebus esse benemerendi segetem ; unde commendabili laborum toletantia, & longa, ut ita dicam, mortis perpeffione ipsos martyrij fructus absque dubio percipient; quamvis mors illa breuior, quàm sic adamant, ipsorum votis desideretur. Quinetiam ne Mauris hisce, quorum vafrum & ad suspiciones proclive ingenium est, villa vel quidquam à nobis metuendi, vel alicuius mali machinandi præbeatur occasio, iudico oportere, ita Patres in eam urbem ingrediantur, ut non continenter inibi persistant, sed per speciem gerendi redemptionis negotium eant sæpius ac redeant; donec tandem omni sublata cuiuscumque mali suspicione, & contracta etiam, si fieri poterit, cum magistratibus amicitia, liberè possint non Christianorum tantum res gerere, sed ipsos quoque Saracenos ad amplectendam fidem prudenter cautèque allectare. Erit quoque hunc in finem, ut opinor, utilissimum; si Patribus iisdem curam captiuos redimendi publicè Rex demandet; cum in ipso Redemptionis nomine & Maurorum terros liberè ingrediendi, & in iis pro libito diutius commorandi ius quoddam inesse videatur, quod non solum ab animis barbarorum remouere possit causas malè suspicandi, verum etiam iisdem illis, quibus talis cura commissa, securitatem præstet ad diuina commodiùs peragenda. Pro huiusmodi autem consilio, quod autumo rei Christianæ esse maximè salutare, hoc mihi à te præmij loco solui volo, ut pollicear, dum præfecti officio in Africa fungar, non auocaturum te in Lusitaniam ipsos patres, quorum discessu quàm grauius in his locis dāna passura sit Christi Respublica, ignorare nemo potest. Hæc ad Simonem Alfonso. Interim obtenta ab Aceno adcundi Tituanum facultate, Præfecti iussu quæsi viri tres secta

secta & genere Saraceni, probatæ tamen apud Lusitanos utcumque fidei, qui duces viæ & custodes Patribus essent. Horum in comitatu cum pluribus aliis, qui negotiandi causa in idem oppidum ibant, pridie Idus Septembres septa discessere. Quamvis autem breuissimum iter sit, non leue tamen vitæ periculum subiere, cum egressi è syluis latrones magno impetu irruerent, cumque & cædem handdubie facerent, nisi viatorum multitudine fuissent deterriti.

---

*Ioannes cum sociis Tituanum ingressus captiuorum commoda impensè curat.*

## CAPUT IX.

**T**ituanum, sicuti dixi oppidum est in Mauritania, cuius nulla, ut opinor, apud veteres Geographos memoria. Superioribus annis, post captam forte à Lusitanis Septam, crediderim, à Mauris conditum, vel certè confluentibus hincinde colonis ex paruo & ignobili pago ad oppidi magnitudinem excreuisse. Ad radices Atlantis iacet, loco maritimo & piraticæ vsui peropportuno. Leucas tantum quinque versùs Euronotum Septa distat, difficili tamen & infesto excursoribus itinere. Huc Patres, eo latronum periculo perfuncti, incolumes peruenere. Saraceni, quibus nihil pecunia carius est, cum eos scirent redimendorum captiuorum causâ illuc aduenisse falsis externæ beneuolentiæ signis verum atque intimum in Christianos odium occultantes, aduentum gratulantur, eodemque hospitio, quo recipi Christiani mercatores solent, simulata benignitate recipiant. Pueri tamen,

R 5 nondum

nondum per ætatem apti fingendi artifices , parentum animos factis suis prodidere. Nā vt rabiosi catuli, nostros, tamquam notos generis & superstitionis suæ hostes, furiosè adlatrare , insèqui , admordere , inque ipsos lethalem illam, quam cum lacte nutricis sugūt, aduersùs Christianos malevolentiam, ore, verbis, motu corporis, pugnis etiam expromere; sibi que videbatur beatus, qui illos poterat iniuriosa manu contingere. Insequente die, vt captiuos inuiserent , iisque aduentus sui causas indicarent , in varias oppidi partes discurrere. Repetti sunt , qui statim vellent peccatorum sarcinam deponere. Fuit in iis honestus sacerdos, gente Gallus, Mauri Sutoris mancipium, qui grauissimo fractus morbo vltimum agebat spiritum. Dum Camera , Gallicæ peritus linguæ , eius confessionem excipit , Barretus diligenter curat , vt vitæ pane reficiatur prius , quàm exeat è vita. Parat , quæ ad tanti mysterij venerationem cultumque eo loco necessaria. Inprimis quotquot in oppido sūt liberi Christiani, iis per nuntios induit, vt quamprimum veniant ad se. Ex ipsis deinde seligit , qui diuinis Psalmis decantandis visi aptiores. Tum faces multas & cereos accendit. Pompa demum , quantam tēpus locúsque ferunt, solemniter comparata , augustissimum sacramentum ad egrum defert. Nullus fuit Mahumetanorum, quem ad hoc spectaculum non disrumperet inuidia , & infana quædam rabies non laceraret. Nullus etiam Christianorum, qui lacrymas præ gaudio non funderet , summásque præpotenti Deo non ageret gratias, quòd in locis à vera religione alienissimis , atque inter medias frementium barbarorum cateruas sub ea specie vellet de perfidia triumphare. Expiato confessione, & resecto Eucharistia Galli sacerdotis animo, cætera



tera deinceps, quæ vel ad temporalem, vel ad æternam salutem conferre poterant, insigni à Patribus caritate rādiu exhibita, donec extremus hominem halitus cum vita defecit. Tum verò non minori diligentia procuratum, præter loci morem, sepulture officium. Effertur funere corpus, Lusitanorum humeris impositum, pèrque medium oppidum cum cantu & æris campani sonitu ( quod multis antè sæculis illic non visum ) summo Christianorum solatio, ne dispari Saracénorum stupore, ad destinatum locum deducitur, iustisque rete persolutis, communi parèti seruandum commendatur. Quàm misera verò, quàmque ærūnosa sub immaniissima illa Maurorum seruitute captiuorum conditio sit, in hoc vno, de quo dixi, Gallo sacerdote aliqua ex parte videri potest. Rem Ludouicus dū moribundo homini sorbitiunculam pararet, attentè obseruauit. Iacebat humi ferreis adstrictus & oneratus catenis: magnam sanguinis copiam continuò euomebat; tanto cibi potúsque fastidio premebatur, sex vt iam integros dies nihil omnino degustasset. In summa itaque vitæ desperatione animam exhalabat, cum Maurus Sutor morientis dominus, & quatuor alij vel quinque Saraceni mercatores ad ægrotum ingressi, vt eum emerent, & carius postea venderent, contemplari iacentis vultum, considerare morbum, experiri vires, cogere vt surgeret, & subsisteret in pedes. deque ipsa venditione agere inter se. Acuebat Maurorum avaritiam caritas nostrorum. Cùm enim eos viderent, eximia quadam sollicitudine ægri salutem procurare, suspicati virum esse aliquo illustrem nomine, cui viritales tanta diligentia subseruirent, lucri cupiditate pelli, spem magis victuri hominis, quàm viuum hominem volebant emere. Neque peior hu-

potne

ius,quàm reliquorū fors. Quo quisque creditur minori pretio redimendus, eo tractatur vilius ac sæuius. Estque illud istis illius ferè solemne , vt cum æger vi morbi eò perducitur, vt ne mouere quidem se possit; tum verò omni destitutum auxilio in ergastulo, vel loco simile relinquant fortunæ arbitrio expositum: quod faciunt maximè, cum iam ægroti vita omnino est desperata; hanc enim non pluris æstimant, quàm quantum ex ea lucri se percepturos sperant; nec aliter, quàm propriis commodis caritatem metiuntur. Adeò sordidissima ista auaritiæ mancipia obstrictos habent animos habendi cupiditate. Tanta per oppidū multitudo huc illuc errabat, vix vt eos caperent plateæ. Onusti omnes ferreis vinculis, pallidi, macilenti, deformes, fame prope enecti, cum die integro nihil ederent aliud, nisi tres breuissimos ex zetzena panes. Id senen est terrei coloris, insuane, parumque idoneum ad nutriendum obiurgationes, maledicta, probra, verbera, plagæ, & quæ eiusdem generis sunt, ea obsonij loco erāt. A luce prima vsque ad tenebras, sine vilo quietis interuallo, suis quisque operibus duriter exercebatur. In oppido multi frumentarias molas versare manibus, vectare onera, hortos colere, modisque aliis defatigari. Plurimi diurno tempore agris addicti; partim armentorum greges & pecora pascere, partim pro temporum varietate terram aratro proscindere, sementem facere, occare, sarrire, metere segetes, fruges colligere, & cætera rei rusticæ munia præstare. Hinc ergo durissimis exerciti laboribus, illinc media confecti, hominum potius simulachra, aut effossa cadauera, quàm veri homines videbantur.

*Ioannes*

*Ioannes & socij circa captiuos iuuandos sacerdotis Contreria exemplum imitantur. Oppressus morbo Camera Septam repetit.*

## CAPVT X.

**E**Rat illis in locis Hispanus sacerdos, loco natus honesto, virtutis fama admodum clarus. Eius eximia in captiuos caritas suo nos iure obstringit, vt ipsius hic priuatim meminerimus. Contreriam appellabant: id cognomen erat, nomen non proditur. Quinque hic primùm annos obsidis loco Tituani cōtinenter fuerat, quòd pro captiuis creditò redemptis, vltro fidem suam barbaris prætaret. Ipso deinde redemptionis negotio sponte suscepto, sæpius eundo ac redeundo, in eodem caritatis officio plures alios insumpsit annos. Hac vna erat per ea loca vox, Contreriam virum esse insigni quadam præditum sanctitate. Talem Christiani, talem Saraceni, talem Hebræi prædicabant. Tanta quippe excellentis cuiusdam virtutis vis est, vt nusquam latere possit, & ab iis etiam, qui teterrima scelerum obruti caligine honestatis lucem videre nequeunt, eius splendor & pulchritudo conspiciatur. Multa de hoc homine laude & prædicatione dignissima efferuntur: ex quibus illud, quod appetente nocte, quando à diurnis negotiis quies erat, solitus esset ad ergastula conferre se; rectè viuendì præcepta captiuis tradere; salutis curam commendare; ad patientiam ipsos atque ad omne probitatis studium adhortari; certo precum numero ac forma simul cum iis Numen sibi propitium reddere; denique quidquid somni ad laborum curarumque leuationem capiendum

dum erat, loco incommodo & aspero inter eosdem capere; inibi que ad exortum Solis perseverare, ardentius desiderabat, ut aliqui ex Societate illuc mitterentur, atque id ipsum, ut praefectus Norogna non optaret tantum, sed etiam peteret, & quoad posset, impetrare niteretur, magna ex parte suasionibus suis creditur effecisse. Cum primum igitur Patres Tituanum ingressi sunt, tanti viri fama, qua nihil tunc ibi celebrius, mirabiliter excitati, eius prorsus vestigiis insistere decrevere. Vnde factum, ut quod habebant inter mercatores hospitium, ultro defererent, & in ergastulis, nocturno saltem tempore, cum captivi esse mallent, quo possent facilius illa Contritæ opera imitari; rudes nimirum instituere, solari mæstos, desperatis & oppressis opem ferre, iratos coercere, dissidentes conciliare, omnes in officio continere, atque ad amorem Dei & ipem salutis languentes excitare. Vnâ cum illis pias in cœlum mittebant preces, quibus potissimum à Christo Opt. Max. suppliciter efflagitabant, ut non solum ab æterna animi, verum etiam à temporaria corporis servitute in utramque ipsos libertatem assereret; ne fortè immanissimæ demonum subiecti tyrannidi, aut acerbissimo barbarorum pressi dominatu, suavissimum divinæ obedientiæ iugum ferre ullo modo recusarent. Ad hanc rem supremæ matris auxilium multis ac magnis precibus implorabatur, ut quam, miseri omnes & quavis oppressi difficultate peculiari quodam iure adiutricem habent & patronam, eam ipsi maximè, qui omni humana ope carerent, & in miserrimo vitæ statu essent constituti, propitiam præ cæteris, secundamque experirentur. Acerbissimè tamen angebantur Patres, nec continere lacrymas poterant, cum viderent ingentem

Christia

Christianorum multitudinem subterraneis inclusam ac veluti sepultam cauernis, mœrentem, squalidam, sordidam, ad eò arctè angustèque compressam. Vix vllus erat, qui posset aut fessū corpus vlla ex parte voluere in aliam, aut contracta brachia, pedesve aliquantulum exporrigere; verum sic omnes ob angustiam loci inter se permixti, perturbati, confusi cogebantur esse, vt aliorum pedes villo sine discrimine aliorum vultibus adhærescerent. Iam verò grandes illæ ac poderosæ ex ferro catenæ, quibus colla pedesque miseri homines ligabantur, quouis motu corporis talem per opacos obscuri carceris meatus edebant strepitum, nihil vt cuiquam esse posset magis horribile, magisque formidabile. Hanc autem expressam ac plene viuam inferorum imaginem, tamque luctuosam miserimæ gentis conditionem non sine graui sensu doloris intuens Barretus, ipsa prima nocte, qua illuc cum fociis ingressus est, productis in medium ex Psalmo octogesimo septimo verbis illis, *Posuerunt me in lacu inferiori, in tenebris & umbra mortis*, concionem habuit ad vinctos admodum salutarem; in qua de miserrima eorum sorte, qui sua ob scelera perpetuis addicti sunt cruciatibus, primùm disseruit; ipsos deinde ad rectè viuendum, ne ad eadem detruderentur Inferorum supplicia, seriò adhortatus est. Facto finè dicendi, certa pecuniæ summa per singulos distributa. Habita peculiaris, infirmorum ratio; his enim ea quoque præstita, quæ visa idonea vel morbo leuando, vel sanitati recuperandæ, quæ verò cuique erant necessaria, tanta diligentia, tantæque animi voluptate Patres ministrabant, vt se in illis pauperrimis Christi seruis Christum ipsum omnium Dominum agnoscere & venerari apertissimè ostenderent. Non  
potue

potuere autem continere sese, quin fidei veritatem quibusdam Mahumetanis priuatim aperirent. Illos tamen præcipuè sunt adorti, qui à Christo defecerant; iisque & Mahumetanæ superstitionis sceditatem, & desertæ religionis pulchritudinem, & statutas desertoribus pœnas, & summam Dei in respicientes benignitatem ita probauere, vt tres statim deposito mentis errore susceptum scelus deplorarint; parati Christi fidem, omni vitæ periculo posthabito, vbique gentium apertè palàmque confiteri; & occasione oblata ad Christianorum terras primo quoque tempore remigrare. Horum ex numero adolescens erat patria Lulitanus, ex nobilibus parentibus Olisipone ortus; quem Camera ad veritatis viam reducere pro sua virili conatus, Dei tandem misericordia multam post operam reduxit. Dum hisce operosis negotiationibus Patrum animi destinentur, nec præterire quidquam sinunt, quod è captiuorum vtilitate, aut re Christiana esse intelligant, ex assiduis laboribus acuta febri Camera corripitur: & cum nulla essent Tituani medicamenta, nulli medici, visum Barreto, vt ex templo Septam deferretur. Acenus gubernator, siue quia in eo discessu aliquid insidiarum latere putabat; siue quòd timeret, ne sua sibi commoda minuerentur, incertum quo animo, non modicè tamen obstitit, ne focis relictis ægrotus proficisceretur. Tandem partim prece & ratione victus; partim quia sibi vtilius credidit, paucos ex Patribus, qui captiuorum vitam & salutem, hoc est, Aceni ipsius, & reliquorum barbarorum lucra, sua industria tuerentur, quàm nullos omnino habere, discedere Camera passus est. Ille Septæ ex Præfecti imperio impensè medicis commendatus, diligentiorum opera breuiter sanitatem recuperat. Vbi verò  
per

per eam licitum intermissa repetere negotia , cū ipso primū Præfecto agit de Christianæ religionis delictoribus, quorum ex variis nationibus ingens Tituani numerus est. Ab eodem deinde impetrat; vt iis , qui ad eam redire velint, publica fides detur , & liber in urbem Septam commeat. Post hæc aduocata concione inter varia salutis monita de captiuorum miseriis paululum disserit, ad easque ex parte subleuandas audientes adhortatur. Denique ipse per se, concione demissa, urbis vicos lustrat , & stipem cogit ostiatim. Cū libenter omnes, pro sua quisque facultate , aliquid erogassent , ea pecuniæ summa collecta est , vt miserorum inopiæ non mediocriter allatum sit adiumentum. Cogitabat Camera Tituanum ad socios reditum, cū inde literas accipit, quibus ei Barretus præcipiebat, vt quo primū tempore posset, Lusitaniam repeteret , & miserrimam captiuorum sortem Ioanni Regi coram exponeret , deque adhibendo remedio cum eodem sollicitè ageret.

---

*Profecto Camera, Ioannes Tituani remanens in  
iisdem persistit caritatis operibus.*

## C A P V T XI.

POST Ludouici Gonzaluij de Camera ex Africa discessum , quinque adhuc annos Tituani subsistit Barretus. Toto eo tempore ad ea procuranda , quæ captiuis siue ad salutem animi, siue ad vtilitatem corporis aliquomodo conducerent , tanto studio incubuit , vt eorum commodis nihil haberet potius aut prius. Frequenter ipsos suauissimo Eucharistiæ cibo

S            reficie

reficiebat; frequentius pœnitentiæ sacramento expiabat. Erant in his multi, qui ab annis circiter viginti inexplicabilibus scelerum irretiti nodis, ponderèque oppressi grauissimo, neque extricare se possent, neque planè consiliteret. Atque h, quo maiorem cum vitiis longinquitate temporis amicitiam contraxerant; eo ab iis auelli poterant difficilius: tantòque erant rerum cœlestium rudiores, quanto diutius sub atroci caco-dæmonis famulatu constituti, nec de Deo cogitabant vñquam, nec aliud, quàm quod terram saperet, sapiēbant. Eos igitur summo cum labore erudiebat, atque ad vitæ antea actæ odium, & renouandæ mentis dēfiderium, quantum poterat, incitabat. Multis Barreti opera restituta corporis libertas, cuius insana cupiditas degeneres nonnumquam animos ad nefaria impellit, longèque grauiori, quàm subiecta corpora sunt, subiicit seruitutis iugo. Eiusdem industria in multis cōseruata & stabilita fides, quæ rerum inopia & egestate veluti bellicis machinis sæpissime tentatur, sæpe nutat, non rarò etiam miseranda labitur ruina. Multi, quibus nulla ferè exeuindæ seruitutē spes erat, vt spe libertatis melioris Christi fidem firmiter retinerent, atque in aduersis patientiam, & constantem tum in vniuersa vita, tum in singulis actionibus æquabilitatem seruarent, inque ipsis, vt ita dicam, scelerum officinis sine scelere viuere conarentur, eius consiliis & monitis persuasi. Medici, & chirurgi, ac cæterorum, qui ad ægrorum curam, deputari solent, vnus ipse partes agebat. Si qui parum firmis erant viribus, nec sine vitæ aut sanitatis damno incumbere operibus poterant, ne quid à rigidis dominis paterentur, eorum ipse pensa peragebat. Sæpe sub noctem cum socio Ignatio collectas in ergastulo sordes

de



deportabat aliò, vbi captiuus noxtæ esse non possent. Dum in illo oppido fuit, ad omnia captiuorum com-  
moda ita ferunt animum adiecisse, vñ nullum perfe-  
ctissimæ caritatis officium vlla ex parte præterierit,  
verè vt dici queat, multo magis ipsum, quàm eosdem  
captiuos durissimæ seruituti fuisse addictum. Cæte-  
rùm licèt Barretus vitam degeret adeò difficilem, tot-  
que ac tantis animi & corporis exercitatum curis, ex-  
terris à patria, distractus à suis, inter immanes Chri-  
stianæ fidei & Lusitani nominis hostes, apud quos  
omnia ipsi erant sæua, nihil iucundum, nihil mite, ni-  
hil quod assiduos eius labores & molestias modo ali-  
quo lenire posset; à Deo tamen illum & causa Chri-  
sti, & captiuorum caritas hilarem lætúmque in eo  
loco tenebant, vt reliquam ibi ætatem exigere non  
solum ardentè cuperet, verumetiam vt obtineret,  
studiosissimè diligentissimèque curares. Sæpe enim  
hoc à Deo priuatim precatus, sæpe per literas à suis  
superioribus petiit. Cùm autem aliquando perce-  
pisset, Mahumetanos sectæ suæ timentes, de ipso ex  
illis locis eiiciendo aliquoties inter se deliberasse; idne  
fieret, quærendum sibi putauit ab Lusitania remediũ.  
Ad Simonem Rodericum super ea re scribit. Hoc  
inter reliqua vt possit consentientibus Mauris Titua-  
ni commorari, maximè sibi illud consilium probari,  
quod initio sui in Africam aduentus Præfectus No-  
rogna eidem Simoni per literas dederat. Oportere  
videlicet, ipsum Barretum in redemptionis negotio  
scribæ vel administrum, vel famulum assignari; sic  
enim fore, vt avarissimi homines, qui sacra omnia ac  
profana, omnesque religiones vñ pecuniæ postpo-  
nunt, suis allecti commodis, ipsum inibi perseuerare,  
& cum captiuis liberè agere paterentur. Summis igi-

tur precibus ab eo contendere, vt diligenter operam det, ne miseris captiuis hoc saltem vitæ subsidium auferatur. Multos enim quotidie ex magnis continuisque laboribus, alios ex inedia, alios ex ergastuli sordibus & pædore, causisque huiusmodi in graues morbos incidere, nec paucos ex iis diem obire. Cogitet proinde, quid sit futurum, si prorsus deferantur; nec tale solatium aut leuamentum habeant. Dubitari non posse, quin multo plures ægitudine corripiantur, acerbius afflicentur, in vitæ discrimen frequentius adducantur, morbi tandem potestate fracti extremum spiritum effundant. Consideret tursus, quā periculosum sit, gentem dissolutè ac licenter viuentem, nec ullis coercitam Christianarum legum repagulis, quale plerumque captiuorum genus est, absque pœnitentiæ & cœlestis panis remedio è vita decedere. Non ita pridem contigisse, vt Gaditanus homo à Mauris captus, & in urbem Fetium ductus, octo ibi & viginti annos fuerit, quin toto eo tempore Christianum sacerdotem repererit, cùm maximè optaret, apud quem peccatorum maculas confessione abstergeret. Hunc tandem, quæ Dei clementia est, sub vitæ finem, morbo valde inualecente, ductum fuisse Tituanum, ibi pœnitentiæ sacramento purgatum, sacro cibo refectum, suauissimis colloquiis recreatum, infinitis Deo actis & habitis gratiis, quòd hunc in locum tali tempore esset perductus, diem vitæ egisse supremum, ex hoc euentu rectè colligi, quantum rei Christianæ intersit, inter Europæos captiuos, veræ fidei alumnos, esse aliquem, qui difficillimis saltem temporibus possit ipsis Christiana sacra ritè ministrare. Ita in ea ad Simonem epistola Barretus, qui quantopere mortem pro Christo apud illos barbaros subire cuperet, quantaque

tâque animi voluptate inter captiuos degeret, cum multa alia, tum verba illa declarant epistolæ alterius, quam Tituano ad Coninbricenses socios in hanc formam scripsit. Quid retribuam Domino, fratres dilectissimi, pro omnibus, quæ retribuit mihi? Cum ego is sim, quem nemo vestrum non nouit omni indignum beneficio, nescio unde factum, ut primus ex Societate in hæc loca venerim, ubi possim inter immanissimam gentem & Christo maximè infestam atque inimicam, de Christi fide, deque Christianis moribus pro concione agere, Christianorum confessiones audire, vero Deo incruentam hostiam immolare, facta nostra, nostræque religionis cæremonias Christiano ritu liberè exercere. Utinam idem ipse clementissimus rerum moderator, qui immerenti mihi ac planè indigno tam insignem gratiam contulit, illud quoque benignè adiiciat, ut eius causa, vinculis, verberibus, atque omni supplicio excruciatum inteream, quo ipsius conspectu citius frui, & à mortali vitâ, quæ tam multis mortalibus immeritò carissima est, transferri possim ad immortalem. Hæc ibi. Summo illum studio omnes prosequabantur, eiusque sanctimoniam adedò suspiciebant, ut quoties in publicum prodibat, quod erat frequentissimum, ad ipsum cæteruatim confluerent, manumque alij deosculandam peterent, & inuito ac repugnanti arreperent; vestem alij venerationis ergò contingerent; ad eius se pedes alij proiicerent, multaque huiusmodi facerent, quibus & conceptam de homine opinionem, & eximiam erga ipsum beneuolentiam testarentur. Sex quæ Tituani erant ergastula, quotidie inuisebat; erat ipsi præcipua aduersus infirmos cura. De his quærebat diligenter, num Pridiani haberent melius? Num de nouo

aliqui decumberent? Num his aut illis ad vtramque salutem quidquam foret necessarium, aut commodum? Si quid sciebat esse, quo iuvare quemquam posset, tanta id caritate & diligentia præstabat, ut amorem sui atque admirationem in nostris, stuporem in Saracenis excitaret. Acenus ipse, cæteroqui non æquus sanctitatis æstimator, Barreti bonitate & beneficentia victus, quoties illum vel ad ergastula euntem, vel ex iis redeuntem, vel quidquam aliud agentem alicubi offendeat, faciem illi valde benevolam atque hilarem commonstrabat. Eius quoque filius natu maior ita eundem Barretum ob eandem causam admirabatur, ut semper ipse singularia quædam honoris & reuerentiæ signa exhiberet; cum etiam solitus esset dicere, talia opera, qualia Barretus patrabat, nec in vno quidem ex Mahumetanis suis, quantacumque is caritate & religione esset conspicuus, reperiri. Par labori & pietati fructus erat. Auctoritate sua omnem, ex ergastulis ludum pepulit, quem plerumque rixæ, dissidia, & mala huiusmodi, apud tenues præsertim homines, & parum sui potentes, comitantur. Abstulit peruersam iurandi consuetudinem, qua religioni & bonis moribus nihil est infestius. Si qui iurassent, & statim arguebant inter se, & postea apud Ioannem alij alios criminabantur. In maiori ergastulo fuit de iureiurando sancta quædam inter captiuos statuta, & vltro suscepta lex, paulo post ad ergastula minora facili rumore delata, & pia æmulatione retenta. Ea erat huiusmodi, ut si quis deprehenderetur, qui rei alicuius siue affirmationem, siue negationem sacra attestazione, quamquam verè, firmaret, is statim in genua prouolutus, salutationem primùm angelicam recitaret; tergo deinde nudato ter ab socio virgis quater

teretur, ut qui toties ab inimicis dominis nefarie verberabantur, ob causam, quæ iustissima esset, tantum flagello pulsari non æquo solum, verumetiam iubenti animo paterentur. Erat inter captiuos quidam ingenio aspero & ore petulante, atque ad maledicendum procliu; ob eamque rationem inuisus cæteris & exosus. Re cognita sensim Barretus in eius se familiaritatem insinuauit, & paucos post dies, sic ipsum eiusque naturam edomuit, ut mutatus homo, animo prius diligenti atque humili peccatorum confessione purgato, coram captiuis omnibus poplites flexerit, omniumque mortalium se pessimum confessus, ac supplicibus verbis veniam precatus, obnixè contenderit, ut eorum singuli, iustæ vindictæ loco, certum sibi plagarum numerum manu propria infligerent. Tantis virtutis ardor, tantumque rectè viuendi studium, reliquos etiam inuaserat, ut iam religiosi magis, quam captui viderentur. Ad confessiones & Eucharistiæ sacramenta frequentissime omnes accedebant. Non pauci quarto quoque die celesti mensæ accumbentes diuinis epulis pascebantur. Dicerè erant soliti, durissimos, status, seu labores, qui vel inuictissimos animos frangere possent, dum modo sibi parat Ioannes non deesset, nihili se omnino facturos. Hinc ortum, ut cum aliquando, vera an falsa fama, percepissent, decretum ab Aceno gubernatore, ut Ioannes Tituano excederet, & Septam remigraret, ad unum omnes proni in terram reciderint, fusisque lacrymis, & intimis precibus, supremum Numen obtestati fuerint, nequid tale fieri sineret, nève vllò modo pateretur, ut qui Barreti caritate & industria cõdeuenerant, ut sua iam crimina agnoscerent, eaque salutari fletu diluere inciperent, in ipso vel-

uti adquirendæ salutis articulo ab duce suo defererentur.)

*Suam quoque infidelibus operam Ioannes impendit.*

## C A P V T XII.

**Q**ui erāt à Christo alieni, desertores fidei, Mahumetani, Hebræi, tria pessima hominum genera, tanti viri exemplo, tamque præclaris excitati facinoribus, mentis oculos altius attollere, & cogitare secum, fieri ne posset, ut cum tali vitæ probitate doctrinæ error cohæreret; certum enim esse, morum præstantia commendari doctrinam; nec posse inanē ac superstitiosam esse eius religionem, in quo veræ virtutes sic splenderent. Multi ergo ad eum Mahumetani ventitabāt, ut de vera cum ipso fide, de vero Deo, deque tota colendi Numinis ratione seriùs agerent. Nonnulli turpissima Mahumeti superstitione relicta, Christianam veritatem sunt complexi. Idem & quibusdam accidit fidei desertoribus, qui nisi vesana quadam libertatis cupidine & viuendi licentia obæcari se sinerent, numquam inducere in animum possent, ut flagitiosissimam sectam, atque ex omnium scelerum colluione constatam sectarentur. Ad Hebræorum Synagogas itabat. Multa ibi de Christo ex diuinis monumentis doctè nervosèque differebat. Nec erat difficile ostendere, ipsum & verum esse Deum, verumque hominem, & iam olim, ut à peccati seruitute assereret homines, pauperem in terras, humilemque venisse; nec venturum amplius, nisi peracta

Et mundi periodo, quando ingenti gloria & maiestate sublimis cunctos mortales ad iudicium vocabit. Aliquando quamdam ingressus Synagogam, ludimagistrum reperit grandi septum puerorum caterua, quos ille aperto sacro volumine Hebraicos characteres noscere & legere docebat. Tum forte accepta quædam ex diuinis varibus oracula versabant ore, & insulso strepitu resonabant. Accedit propius Ioannes, cantum inturbat, cum ipso magistro, si is velit, de religione disputaturus. Antequam verbum proferat, tanta derepente confluit Hebræorum multitudo, ut repleta domus plures capere non possit. Ut quisque ingreditur procumbet pronus, atque inter precandum tam fœda superstitione. huc illuc caput agit, ut insanire videatur. Subridens Ioannes rogat, cur ea ratione precentur, turpe sibi videri, tali gestu cum Deo agere. Ad hæc ex ipsis vnus, nequire se villo modo tenere quietam capita, quin illis motibus agitentur; rem ignorantibus videri ridiculam, esse tamen maxime diuinam; illo enim eodem spiritu timoris Dei, qui maiores olim suos mirabiliter inuasit, cum lex Moyse in altissimo Arabiæ montis cacumine cœlitus data est, corripit etiam sese, quoties ad supplicationes accedit; eoque impellente ita capita cieri, ut liberum ipsis non sit vel tantis perquiescere. Respondere forsitan verius posset, traductam in se patris sui Caini veterem plagam. Ut enim illi à sæuissima innocentis Abelis cede, in pœnam suscepti sceleris horribilem toto corpore tremorem, atque etiam, si aliis assentimur, teterimum quoque fœtorem diuinitus contraxit: ita credi potest, relictas ipsis veluti ex hæreditate turpes illas capitum agitationes, illumque fœdum, quem vbi-cumque tetratum sunt, ferè semper exhalant ex corpore

poribus putotem; vt dum perfidè Christum negant, participes esse intelligantur immaniſſimi parricidij, quo se eorum parentes nefariè cohtaminarunt, cum vitæ auctori per ſuūmum, ſcelus vitam eripuerè. Inter eos, qui ad ſpectaculam concurrerant, vnus erat magno natu, Moſaici iuris apud ipſos peritiſſimus; qui & gradus auctoritate, & ſapientiæ opinione anteibat cæteris. Hunc Ioannes vt vidit, & legis Doctorem eſſe cognouit, relicto ludimagiſtro, ad certamen prouocat. Et mox Hispanica lingua, quam Mauritani iſti Hebræi negociandi cauſa addiſcunt, & apprimè callent; ex ſacris literis plurimæ protulit teſtimonia, quibus conſtant omnia, quæ ipſi de Chriſto impiè negant; nos piè & firmiter conſitemur. Cæterum dantur ſurdis verba, mentesque cæca errorum nocte offuſæ tanto obſcurantur magis, quanto veritatis ſplendor magnificentiùs nitet. Et Doctor idem, & cæteri, qui adſunt, audacter negant, quæ ſunt luce clariora; atque vt aſpides ſurdæ obturant aures, nec voces audiant venefici incantantis ſapienter. Non modò igitur Barreti argumentis nihil mouentur, ſed impudenter aſſerunt, in magna illud diuinarum rerum ignoratione verſari. Neque aliam aſſertionis ſuæ præter obſtinationem & peruiaciam, proferunt rationem. Tam Barretus vehementiſſimo quodam incenſus animi ardore, vocem contendit, & intrepidè aſſenerat eſſe ſe paratiſſimum pro fide Chriſti, quam proſitetur, milles, ſi toties poſſet, mortem apperere: ex ipſis autem he vnum quidè eſſe, qui velit, audeat, ve pro ſe lege ſua aut vitam a.mittere, aut ullo ſe periculo exponere. Quando verò apud ipſos rationes aliæ nihil valeant, ſi quis ſit, qui hoc vno modo concertare ſecum velit, vt pro tuenda lege, quam proſitetur, in



extremum se obiciat capitis discrimen, ecce se in medio esse ad omnia paratum, nihil formidare, nihil timere, in vno præpotentis rerum omnium Domini Iesu Christi auxilio tantummodo suffultum. Terrorem voces istæ pertinacissimis animis incussere, mentis tenebræ auctæ magis, quàm diminutæ. Post hæc Ioannes remissa voce mitius iterum agere, & veritatis aditum aperire. Faxit, inquit, Deus immortalis, ut quod ego mihi vehementer opto, id vobis diuino beneficio contingat. Sæpius huc, ut scitis, venio: nulla mihi alia viuendi causa, nisi vestrorum salus animorum, quam tanti facio, nihil ut ardentius cupiam. Nolite, obsecro, committere, ut conatus isti mei, atque hi labores amore vestro suscepti, irriti sint & inanes. Iterum vos atque iterum hortor, & precor, ut paululum consideretis, quo sitis in statu, quæve ista sit viuendi ratio, quam tenetis. Erit profectò, cum vos eius, sed incassum, vehementer pœniteat. Erit, nec longa mora, cum animi vestri corporibus egressi suam videant cæcitatem, & istius incredibilis obstinationis meritas pœnas æternis cruciatibus persoluant. Quid non perpenditis, quàm durè, quàm asperè, quàm ignominiosè à Mauris, à Turcis, à quacumque alia, quæ in toto orbe est, natione tractamini. Eratis olim Deo in amore & deliciis: vos ille gentem suam, electum populum & sanctum appellabat. Quot iam annos, quot secula, quot ætates inter externas gentes degitis sine rege, sine regno, sine republica, semper vagi, semper exules, omnibus despectui, & ludibrio? Atenim quæ potest huius tantæ calamitatis causa esse, post inauditum illud, atque omni sæculorum memoria detestabile flagitium, quod à maioribus vestris aduersum Dei filium commissum est, nisi vestra hæc pertinacia,

nacia, qua mentis oculos euangelico splendore tam sollicitè occluditis? Nonnihil hæc oratio audientium animos commouit; sed ex tam multis vnum dumtaxat flexit. Is fuit ille idem Mosaicæ legis Doctor, cum quo à Barreto in lituta disputatio. Non ausus ille victum se palàm fateri: sed abeuntem patrem à tergo insequitur, & in eandem se cum illo domum infert. Ibi remotis arbitris affirmat, affulsisse sibi veritatis lumen; nec dubitare iam, quin verissima sint, quæ de Christo ab ipso dicta; esse videlicet prolem diuinam, duas in vna persona complecti naturas; venisse iam ad nos olim habitu humili & abiecto; venturum postea, cum mûndo finis erit, summa sublimem gloria, & incredibili maiestate, benignum & mitem bonis, terribilem & metuendum malis; rectum inter utroque iudicaturum iudicium. Hæc sibi & id genus cætera tam ex ipsius Barreti oratione; quàm ex diuinis testimoniis, quæ ab eodem adducta, probè nota esse, ac tum quidem statim fuisse, cum audiuit disserentem; vano tamen compulsum metu, quod animo approbat, negasse ore: velle omnino ad Christi partes transire, idque haud dubiè mox facturum; cum duos liberos, quos habet, Septam tunc traduxerit. Christianis etiam mysteriis imbuendos. De vxore minus se esse sollicitum; nisi ipsa quoque velit agnoscere & venerari Christum, facile dimissurum. Post hunc alius quidam fuit Hebræus, qui clanculum ad patrem veniens, eumque de religione audiens tractantem errores detestatus est suos. Huic etiam Ioannis opera statim quaesita via, qua sine periculo vite, & libertatis detrimento, Septam Tituano migraret, Christiano lauacro expiatus. Cæteris quoque, etsi animis erant valde à Christo auersis, propter comitatem, modestiam, vitæ sanctimo

Simonium ita erat carus, ut ipsius causa efficerent multa; & conuersos ad fidem Mahumetanos, ne quid in itinere damni acciperent, Septam usque contarentur.

---

*Ioannes in Lusitaniam rediens, Aethiopiae Patriarcha designatur.*

### C A P V T XIII.

**A**Nnos complures Tituani Barretus fuerat, ita caritatis famulatus mancipatus, ut quamdiu vita maneret, nisi vel eadem caritas cogeret, vel obedientia auocaret, numquam inde esset egressurus; sic enim animo destinarat. Egredi tamen caritas coegit, & in Lusitania reduxit, ut miserrimam captiuorum conditionem, multo magis animis, quam corporibus perniciosam, per se ipse expresset atque ex fide Ioanni Regi declararet. Etenim permulti, quod essent pauperrimi, neque aliunde sperarent se pecuniam habituros, qua redimi possent, in summo semper tam religionis, quam pudicitiae amittendae discrimine versabantur. Et erat exemplum recens Christianae puellae, quae a spurcissimo domino ad turpe facinus vehementer incitata, cum acriter & animose resisteret, multis ab eo affecta contumeliis, & usque ad effusionem sanguinis verberata est. Actumque de foemina esset, nisi turpissimae beluae crudelitatem lucri cupiditas cohibuisset; vitae enim pepercit, ne redemptionis pretium amitteret. Puella haec, ut erat saucia, patris se in conspectum dedit, fuisseque lacrymis, quantum potuit, precata est, ut pudicitiae suae, quam habebat libertate & vita ipsa carior

rem,

rem,consultum vellet. Vix iam vllas sibi esse ad obistendum vires,cùm procacis hominis insania& turpitudine ipsa repulsa magis indies magisque irritarentur. Hœc spectaculo grauitèr vulneratus Ioannes non putauit amplius sibi differendam profectiõnem, ne miseræ genti remedium diutius differretur. Confestim igitur in Lusitaniam proficiscitur; & Ignatium Voga-  
dum socium Tituani relinquit,simul ne interim desit, qui iuuare captiuos ipsius loco possit; simul vt reditus sui,& pecuniæ, quæ pro quibusdam redemptis deberetur,ex fide in reditu soluendæ obses sit. Nonnullos enim,quorum castitas & religio tû propter ætatẽ, tum propter oris speciem certissimo erant in periculo , in ipso discessu creditò redemit,& in tuto constituit.Vbi Olisiponem peruenit , cum superiore suo cuncta primum maturè contulit; de eius deinde sententia & consilio,Regem adiit,vt ipsi proponeret,quid afferret noui ex Mauritania , qualisque illic Lusitanorû esset status,præterea vt de afflictâ captiuorum fortuna, certisque animorum periculis eundem faceret certio-  
rem. Eû Rex honorificè acceptum narrare ex ordine cuncta iubet,& attentè narrantem audit;nec mediocri capitur voluptate, dum in ipso narrantis ore & oratione eximiam prudentiam , integritatem , modestiam , & permulta alia sinceri cuiusdam & solidi animi ornamenta decoraque obseruat. Cùm Nonius narrationis suæ finẽ fecit,seriò à Rege petiit , iuberet pro sua clementia propositis à se rebus illicò prouideri, vt redire ad captiuos suos quamocyssime posset. Verùm hoc tã laudibile iuuandi miseros studium cum summa viræ probitatè coniunctum , quod erat per se à Rege in Nonio obseruatum, & aliorum prædicatione cognitum , eundem Regem impulit, vt ad partes alias remotiores,

motiores, multoque maiore oppressas laborum mole hominem destinaret. *Æthiopicum* illi Patriarchatum conferre statuit, eo quod Petrus Faber, qui ad id munus fuerat electus, è viuis excesserat. Rem Ioannes ab Rege non obscura significatione cognoscens, quamquam non ignorabat, nihil se omnino ex ea dignitate posse percipere siue honoris, siue utilitatis, quæ dno in hisce gradibus cupide plerumque & ambitiosè quærantur, ipso tamen dignitatis nomine ita deterritus est, ut statim ad eam declinandam omnibus se viribus compararit. Ad beatum igitur Ignatium ea de re epistolam scribit, qua in epistola totus in eo est, ut quidquid alicuius honoris speciem vel nomen habet, haberève potest, à se omnino remoueat. Intelligo inquit, in hac esse Regem mente, ut ad *Æthiopicum* me Patriarchatum velit deligere. Non sum nescius, Pater optime, quales istiusmodi dignitates habere debeant annuos redditus, quidve splendoris afferre queant iis, in quos cõferuntur. Quis enim ignoret, quidquid laborum & miseriæ fingi potest, totum id *Æthiopico* isti Patriarchæ, quicumque ille erit, singulis ferè momentis esse exorbendum, eosque ipsi apud illas *Abassinorum* gentes exhibendos honores, qui cû summis sæpe & pæne quotidianis iniuriis copulati sint? Cæterum quia me omni dignitate indignissimum esse certè scio, sic ipsum dignitatis nomen perhorresco, ut cogar, quantum possum, etiam atque etiam à te cõtendere, hoc ut mihi munus deferre nullo modo patiare. In *Æthiopiam* proficisci nihil prorsus recuso: quin potius illuc ex obedientia mitti & valde cupio, & obnixè peto; meque ipsius Patriarchæ socium ac famulum libentissimè offero: horreo tamen, formido, & tota animi contentione deprecor ipsum

ipsum gradum dignitatis , quo velim scias nihil mihi posse grauius & molestius cōtingere. His literis Ignatius mirificè est delectatus. Perspexit in iis Ioannis animum, & eximiam quamdam in eo cum singulari demissione alacritatem. Nec dubitabat, quin ad id munus, quo se indignissimum asserebat, esset aptissimus. Eo verò magis in hanc mentem ibat, vt hominis electionem non modò non impediret, verumetiam iudicio suo approbaret, & industria promoueret, quòd insignibus ostentis, Deiparæ Virginis opera, & insolito quodam atque admirabili modo ad Societatem, & ad maxima quæque vocatum recordabatur. Interim Barretus, tum quia credebat, quo à conspectu regis longiùs distaret, eo fore se à Patriarchatu remotiorem, tum quia captiuos reuifere & aliquod eis subsidium ferre peroptabat; de suo in Africam reditu cum Rege ipso, atque eius ministris sollicitè agebat. Cùmque propediem confectis rebus se profecturum speraret, literas accipit ab vrbe, quibus ei ab Ignatio imponitur, vt relicto quouis alio negotio, ad Æthiopicā se protinus expeditionem compareret; demandatum enim ipsi à Pontifice maximo Patriarchatus munus, quod æquum est moderatè ferat, & pro sua sapientia administret. Cùm verò dubitare non possit, quin à Deo sit, quod tanto Pontificis regisque consensu factum est, par sanè esse, vt ipsi quoque, qui nihil aliud velit, nisi quòd intelligat Deo esse acceptum, potius hoc esse gratum debeat, quàm graue. Missa cum his Ignatij literis duo Apostolica diplomata. Vno Pontifex Ioannem Nonium Barretum Æthiopiz Patriarcham creabat; altero ne cellatam sibi dignitatem recusaret, sua auctoritate adigebat. Hunc tamen honorem non minus ægrè Barretus tulit, quàm solent homines

*Liber II. Cap. XIII.*

homines grauissima quoque onera vulgo ferre. Ad  
pios animos, quos humilitas Christi sibi deuinxit, ni-  
hil est, quod acerbius pungat, quam isti ipsi, in quibus  
aliquid amplitudinis & splendoris videtur esse, gradus  
dignitatum. Qui solemnī ritu quatuor votis in Socie-  
tate se obstringunt ( quatuor votorum professionem  
vocamus) ij priuato in loco vota alia statim nuncupāt,  
ex quibus illud vnum, vt si Pōtificis maximi iussu (ne-  
que enim aliter fas est) ad aliquem extra Societatem  
euecti fuerint honorem, in iis rebus gerendis, quę ma-  
gni esse momenti videbuntur, generalem consulant  
Societatis Præpositum, vel alium ab eo constitutum,  
cuius sequantur sententiam, nisi aliud quidpiam, quàm  
quod consultus senserit, magis è re esse iudicabunt.  
Cùm Patriarchatum Barretus iniit, nondum erat vlla  
in Societate eius voti obligatio; non secus tamen,  
quàm si se illo obstrinxisset, & quia de se, deq; suo iu-  
dicio, quod paucorum est, humiliter sentiebat, & quia  
eo iam agebatur spiritu, qui Societatis proprius ac  
germanus est, mox ad Ignatium scripsit, vt quia pro-  
pter locorum distantiam consulere eum non poterat,  
aliquem sibi in India suo loco designaret, quo cum  
tractaret maioris momenti negotia, cuiusque aucto-  
ritatem & consilium sequeretur. Has Patriarchæ lite-  
ras, in quibus tam expressa raræ cuiusdam animi sub-  
missionis & excellentis obedientiæ signa compare-  
bant, magna cum approbatione legit Ignatius ipse  
per se non semel; nec legisse contentus, statuit vt ite-  
rum & sæpius coram aliis legerentur, fideique & au-  
thoritate publica firmatæ in Societatis tabulario, ad  
exemplum posterorum, & memoriam Nonij sempi-  
ternam seruarentur.

T

*Quam*

*Quamobrem missi in Aethiopiam Patriarchæ.*

#### C A P V T XIV.

**I**Ta res habet. Vbi per Europam increbuit, in illa Æthiopia, quæ ad orientem Africæ plagam sub Ægypto est, perque immensos tractus terrarum latè funditur, plurimos esse Christiani nominis populos, Turcis, Saracenis, Ethnicis vndique circūdatos, variisque & grauibz errorum tenebris inuolutos, statim Pontifices maximi (quod pastoris summi officium & ratio postulabat) ad eos iuuandos mentem adiecerunt. Cū ergo maturè considerassent, quidnam præstare possēt, quòd in tanta locorum distantia, atque in tam periculosa circumfusalum gentium vicinia, inque tam inueterata prauarum opinionum consuetudine illis populis conduceret, nihil iudicauere commodius, quàm si viros illuc mitterent exemplo vitæ & scientia præstantes, qui sinceram ipsis ferrent doctrinam fidei, viamque mōstrarent, qua redire possent ad lucem veritatis, & sub Romanæ sedis obedientiam, quam iam diu deseruerant, iterum redigi. Pro certo enim habebant, quod superiori libro ostensum est, illam Alexandrinæ Ecclesiæ partem suo cū capite iam inde à Magni leonis Pontificis maximi & egregij Imperatoris Martiniani tempore, rectam vitæ semitam reliquisse. Enimuero circa annū Christi nati quadringentesimum, cū celebratum est Chalcedonense Concilium, quo in Concilio impium Abbatem Eutychem Nestorij errorum æmulum sexcenti & triginta Episcopi, Abbates plurimi, & innumeri alij excellentes viri sententiis suis condemnarunt; Dioscorus, qui  
tunc



tunc erat Alexandrinæ sedis Patriarcha, cùm peruersa Eutychetis dogmata aduersùs eximium virum Flavianum Constantinopolis Episcopum acriter tueretur; nec vllò modo tanti Concilij auctoritate quiesceret, in rabiem versus à Romano se capite seiunxit, ac luciferi instar, eas, quas regebat, provincias secum in interitum traxit. Hoc Abassinorum Schismatis exordium fuit. In eo ipsi Romani nominis immemores tamdiu persisterunt, donec Lusitanorum opera factum est, vt Romanam esse in orbe Ecclesiam, cunctarum caput Ecclesiarum audirent. Nam, vt remotiora omittam, postquam Lusitani ad Erythræum mare ex India profecti Abassinorum terras penetrarunt; & inter eorum Imperatorem, qui tunc David erat, atque Emanuele Lusitanicæ regem, missis vtrunque legatis, constituta amicitia est, & inita cõmercia; cœperunt illi populi Romanæ Ecclesiæ consuetudines ac ritus, quantumque inter vtrosque interesset, paulatim agnoscere. Quamvis enim nomen Christianum semper tenuerint, & Christianâ inter Turcos, Saracenos, atque Ethnicos profiterentur religionem: quia tamen à Romana vrbe quamlongissime distabant, & Alexandrino obediebant Patriarchæ, plurimis erant, vt dictum est, impliciti erroribus, quos partim olim, nondum satis cognita putæ fidei doctrina, cum Baptismo coniunxerant, partim ab ipso hauserant impuro religionis suæ fonte, Alexandria, inquam, Antistite, à vera Christi Ecclesia miserè præciso. Quod vbi ex Lusitanis intellexit David Imperator, vt erat animo ad veritatis cognitionem propenso, hortante præsertim Emanuele Rege, atque etiam deprecante, non difficile adductus est, vt ad Clementē VII. qui tunc in Christiana Republica sacris præerat, legatos mitteret, ac

per eos suam illi, uti summo animarum pastori, obsequentem in omnibus offerret voluntatem; ab eoque peteret, ut viros probitate & diuinarum rerum cognitione præditos mitteret ad se, à quibus ipse & cæteri populi, quibus imperabat, de iis, quæ ad fidei rationem & salutem pertinerent, instruerentur. Ad Emanuelem quoque, atque illo vita functo, ad Ioannem tertium eius filium, Lusitani Regni heredem, literas misit, quibus precabatur, cum Pontifice ageret, ne suam in tanti ponderis negotio repelleret petitionem. Ioannes Rex, qui non minus paterni regni, quam pietatis hæres existerat, ut Davidis votis à Pontifice satis fieret, diligenter curauit. Interim David humanis rebus cedens, Claudio filio Imperium reliquit. Hic statim super eadem re scripsit ad Ioannem, in paterna insistens petitione. Ioannes igitur, & quia optabat Abassino Imperatori gerere morem, & quia res ipsa per se erat eiusmodi, ut à Catholico principe respui non deberet; per legatum suum, quem Romæ habebat, de Æthiopice gentis remedio cum Pontifice serè egit. Re diligenter & maturè considerata, inter Pontificem tandem & Regem conuentum, ut in illas oras viri aliquot deligerentur, qui auctoritate & imperio in iis, quæ ad religionem spectant, eos gubernarent. Placuit ut ex his vnus Æthiopice Patriarcha crearetur, duo deinde ipsi adiungerentur. Dignitate Episcopi, qui actionum, voluntatum, laborum, rerumque aliarum, essent socij, & in eodem Patriarchatus munere, vnus post alium decedenti succederent. Patriarcha fuit Ioannes Nonius Barretus; Episcopus vnus Andreas Ouiedus, alter Melchior Carnerius, de quibus postea. Fuerat iam antea à Romano Pontifice cum patriarchali dignitate in Abassiā missus Ioānes Bermudius Hispanus Sacerdos; qui

qui cū in Italicis trier mibus à Turcis prædonibus fuisset captus, p̄rque varios rerum cuētus delatus in Æthiopiam, aliquando ibi constitisset, & cuncta diligentius obseruasset, quodd videretur gentis mores & religionem probe callere, iudicatus est ad id muneris aptus. Sed hunc Claudius Imperator tamdiu palam honorauit, quamdiu cum Adelis rege Mahumetanæ sectæ insigni propugnatore bellum gessit. Metuēs enim, ne Lusitanos, quos in exercitu habebat, pulso aut male tractato Latino Patriarcha, irritaret, atque ex amicis & sociis sibi hostes crearet, ficto animo honorem homini extrinsecus deferebat. Vbi tamen extinctus rex Adelis est, illicò animum patefecit suum; ac præter alia, quæ contra Deum & homines suscepit facinora, vno excepto Alexandrino Patriarcha, nullum alium neque sui neque suorum agnoscere voluit pastorem. Hinc factum, vt ingens paulatim populi odium in Bermudium concitaretur. Nec verbis parcebatur, nec rebus. Furti etiam fuit insimulatus; & catatum vulgo, vas aureum, quod in templo erat, clanculum surrepuisse. Cū miser homo hunc in modum tractaretur, coactus est in Europam redire. Indiam ergo ex Æthiopia, ex India Lusitaniam venit. Eum nos pueri Olisipone vidimus, vbi confecto vitæ curriculo finem quoque laboribus imposuit. Sub hæc tempora Petrus quidā Abassinus, ex Magni Antonij ordine monachus, de quo non semel suprà memini, cum aliis eiusdem professionis hominibus, Romam ex Æthiopia ingressus est. Erat hic ingenio acri & industrio, atque ad captandam principum beneuolentiam natura compolitus. Latinam & Italicam linguam, variósque Romanæ Ecclesiæ ritus citò didicit; multaque de Æthiopicis rebus non iniucundè narrans, in mul-

torum se amicitias sensim insinuauit. Cum ergo ad ipsum quoque Pontificem, qui tunc erat Paulus III. Clementis successor, sibi aperuisset aditum, atque eius gratiam iniisset, cepit cum illo de alio Patriarcha in Æthiopiam mittendo sollicitè agere. Nam quòd Bermudius parum Abassinis fuerit acceptus, & malè etià tractatus, non debere impedimento esse, quominus ad eos alius mittatur; haud leues enim extitisse causas, cur in populi odium & maleuolentiam incurreret; neque eas Pontifici esse ignotas. Non dubitandum, quin ad partes cuiuscūque alterius Patriarchæ à Romano Patre missi, ubi is in Æthiopia pedem posuerit, omnes se ordines facile transferant, Alexandrino & eius Abuna penitus desertis; curandum tantummodo, ut qui illuc fuerit missus, ea habeat ornamenta animi, quæ tam excellens dignitas iure suo exigere videtur. Multa alia non semel in eandem sententiam dicens, in eandem tandem Pontificem traxit. Is cum Lusitano Rege rem per literas communicans deligendæ personæ ad id muneris idoneæ eidem regi potestatem demandauit; hoc enim ipsi meritò deberi, cuius auspiciis per immensa & periculosa maria patefactus esset, ex hoc orbe ad Abassinos accessus. Ioannes Rex approbato, ut decebat, de mittendo Patriarcha Pontificis consilio, non putauit sibi diu quærendum, quem deligeret. Cum enim ipse per se insignia Petri Fabri in omni rerum genere decora, summo digna loco, satis fuisset expertus, quamquam ille nec tunc præsens, neque Lusitanus erat, cæteris antetulit; & ad legatum suum Romam scripsit, verbis suis à Pontifice peteret, ut ratam haberet Fabri electionem, & ipsum, ne repugnaret, pro imperio cogeret. De Pontificis voluntate nihil erat dubitandum. Visum tamen  
aliter

aliter Regi seculorum immortalis, qui virum optimum pro Christi Republica tot tantisque exercitum ac fatigatum laboribus ad sempiternam vocauit tranquillitatem. At non quieuit Abassinus Monachus; cepit ardentius rem eandem urgere; & sollicitare Pontificem, precarique obnixè, ne illas Æthiopix oues, annos iam plus centum mille à Romanæ Ecclesiæ caulis miserè aberrantes, omnino defereret. Verùm nequid tunc fieret, Italiæ motus obstiteret. Intermissa proinde & ad quietiora tempora dilata res, anno millesimo quingentesimo quinquagesimo quarto optatum exitum accepit.

---

*Quæ de Patriarchæ Ioannis & sociorum missione à nono auctore scripta sunt.*

## CAPUT XV.

UT de veritate constet, opus iudicamus, proponere hoc loco, quæ de Patriarchæ Nonij, & sociorum in Æthiopiam missione nouus ille auctor, non sine graui eiusdem Patriarchæ & aliorum iniuria commentus est. Scribit ergo, Ioannem III. Lusitanie regem ob eam, quæ inter ipsum & Claudium Æthiopix Imperatorem erat, amicitiam valde optasse, ut aliquot Episcopi cum vno Patriarcha Româ in Abassiam mitterentur. Hac de re cœpisse agere cum Iulio III. sed ob eius mortem, quæ anno contigit millesimo quingentesimo quinquagesimo quinto, & propter obitum Marcelli, qui proximè Iulio successit, & in Pontificatu dies tantum viginti duos vixit, ad Paulum IV. Marcelli successorem delatum esse ne-

T 4

gotium,

gotium , qui iudicauit tantum Regem , iusta præfer-  
 tim petentem, non esse repellendum. Consentiente er-  
 go Ignatio Loiola Societatis Iesu fundatore, & eiusdē  
 Societatis generali Præposito , patres tredecim fuisse  
 ad hanc expeditionem electos. Ex iis Ioanni Nonio  
 Barreto collatum esse Patriarchatus munus : datos il-  
 li episcopali dignitate adiutores ac successores duos,  
 Melchiorem Carnerium Lusitanum, Andream Ouie-  
 dum Castellanum; illum Nicæ Bythinæ vrbis, hunc  
 Hieropoli titulo insignitum. Hos simul cum Patriar-  
 cha & reliquis sociis Roma profectos , Lusitaniam  
 peruenisse: liberaliter ibi à Rege, ac peramanter habi-  
 tos , breuīque rebus omnibus necessariis abundē in-  
 structos, simul cum Fernando Sofia, quem Rex lega-  
 tum ad Abassinum decreuerat, Olisipone soluisse; tan-  
 démque post immensos longissimæ nauigationis la-  
 bores ad Archicum appulsos, Æthiopiam intrasse; &  
 quamquam aduerso tempore ( Bello enim ardebant  
 omnia ) benignè tamen ab Imperatore Claudio fuisse  
 exceptos. Verùm paulo pòst variis de causis malè ipsi  
 cum Patriarcha & sociis conuenisse. Primùm enim  
 ægrè tulisse Imperatorem , Lusitanum Regem , ipso  
 incio & inconsulto, cum Pontifice egisse , vt Patriar-  
 cham ad se & Episcopos mitteret ; ac si vel Christum  
 prorsus ignoraret , vel à Romana sede esset diuisus ;  
 cùm & propriū Romæ haberet Abassinorum colle-  
 gium , ac quod istiusmodi negotia spectare videren-  
 tur ; & tamquam obsequentiſſimus filius Romanam  
 Ecclesiam coleret , sempérque coluisse; nec Apostoli-  
 co indigeret Nuncio, cùm antiquior Abassiæ Archie-  
 piscopus iam inde ab Eugenio I V. hoc Nuntij mune-  
 re vteretur , plurimis summorum Pontificum diplo-  
 matīs deinceps confirmato. Patriarcham tamen & so-  
 cios

cios ostendisse palam, quas habebant ab Apostolica sede facultates, iisque honorem debitum fuisse ab omnibus exhibitum. At non multo post rem accidisse, quæ omnes per vniuersam Æthiopiam ordines vehementer conturbarit. Duo enim, ut superiori libro retuli, esse apud Abassinos sacerdotum genera; quosdam virgines dici, quod castitatis se voto constringant, ut in Ecclesia Latina fit; alios coniugatos appellari, quod uxores ducant, quibus cum, instar aliorum, qui à sacris sunt absoluti, maritalem vitam degant. Igitur Patriarchæ decreto statutum, ne deinceps sacris initiarentur, qui matrimonij vinculo essent ligati, aut in posterum ligari vellent, vna ut ubique esset Christianæ Reipublicæ forma, & Latinæ Ecclesiæ exemplum cæteri fidellum cætus sequerentur. Nihil potuisse eo decreto ad commouendam Æthiopiam perniciosius contingere. Vniuersum mox imperium in duas sectum factiones; partim rem approbasse, partim acriter arguisse. Dum ista aduersis agitantur iudiciis, valdeque vulgo turbatum esset; aliam ecce ortâ maioris tumultus causam: statuisse quippe Noniû, ut ex annuis fructibus decimæ Ecclesiasticis soluerentur. Nouum enim uero & insolens visum omnibus statutum; nec modò Æthiopicis moribus contrarium, sed intolerabile ac noxium. Secularium ordinem eo audito sic in furorem raptum, ut facto agmine ad Imperatorem vndique ingentes hominum cæteruæ conuolarint, clamores terrificos in cælum sustulerint, & contra nouas leges furiatis mentibus exarserint. Vnam fuisse omnium vocem, Tolle tolle, ne patere, Imperator, vetustissimas nobis auferri consuetudines, & noua ac difficillima imponi onera. Tum Claudium externis satis oppressum bellis, ne in-

ternis quoque opprimeretur dissensionibus, vocasse ad se Patres, eisque mandasse, ut eas rem Christianam in suo imperio perdendi magis, quam promouendi artes protinus relinquerent. Coniugatos quidem sacerdotes nihil religioni incommodare; nec solum Græcis olim ab Ecclesia Romana, sed ipsis quoque Æthiopibus à Nicæno & Ephesino Conciliis fuisse permittos; nullam igitur esse causam, cur quæ quæta essent, & Christianis legibus consentanea, perturbare niterentur. Fructuum verò decimas Ecclesiæ deberi, non ite se inficias; magnam tamen consuetudinis & præscriptionis esse vim: quod enim ab ullo omnino homine decimæ in Æthiopia exigantur, rem esse aded inusitatam atque inauditam, ut nihil proferri queat Abassinorum auribus insensius. Solere Imperatores cum nouæ eriguntur Ecclesiæ, ex suis eas bonis ita locupletare, ut habeant Ecclesiastici non solum vnde vitam sustineant, sed etiam lautissimè viuant. Nam si decimæ quæ toto ex imperio colligi possunt, cum iis conferantur redditibus, quos Imperatores Ecclesiis liberaliter donarunt, multis illas partibus fore superandas. Cum ergo iis, quibus sacra curæ, nihil prorsus desit, quo minus decenter & large viuant, opus non esse de exigendis decimis verbum mutire. Ad hæc accessisse alia, quæ ad Imperatorem delata, impatientem eius animum sic in Patres irritarint, ut incomposita in eos verba & irarum plena venenato ore euomuerit. Ex his autem dissidiis ortum rumorem, totoque sparsum imperio, reliquorum quoque animos in eoldem patres concitasse. Denique post multa yltro citroque agitata, eò ventum, ut quas Patriarcha haberet à summo Pontifice facultates noscere vellet Imperator, & proferri Pontificias literas, ac diplo



diplomata iuberet; simulque contenderet, nullum Nonio ius esse ad mutandas consuetudines, quas ipsa-  
met Apostolica sedes multis sanctionibus confirma-  
set. Nunrium item Apostolicum habere se à Clemen-  
te VII. concessum, & à cæteris deinde Pontifici-  
bus stabilitum, quid alio opus esse? Eandem fuisse an-  
tiquioris Archiepiscopi querelam; grauitur enim  
questum, quod à sua dignitate immerito deturbaretur.  
Eandem Antistitem reliquorum, quibus videretur  
indignissimum, iniussu Romani Pontificis rem  
tam arduam tentari. Cum tam in suis regionibus ani-  
morum perturbationem cerneret Imperator, de Lu-  
sitano Rege, quod falsam, de Æthiopis rebus sum-  
mo Pontifici, & Ignatio Loiolæ opinionem iniecerit,  
cœpisse queri; simulque statuisset, ne Patres iis vteren-  
tur facultatibus, quas habere se dicebant, donec re-  
bus omnibus Apostolicæ sedi rectè ac ritè expositis,  
quid esset agendum, ab eadem sede decerneretur. Eos  
igitur sua spoliatos potestate in remotum ab vrbe lo-  
cum secessisse; ibique ædiculam, qua reciperentur,  
construxisse; terram demum cœpisse colere, legumina  
serere, suoque ex labore victum quæritare. Delatum  
deinde hoc ad Imperatorem, qui talem viuendi mo-  
dum in suam vergere infamiam prudenter aduertens,  
equites miserit Prætorianos, vt omnes ad vnum Pa-  
tres ad se reducerent. Id verò cum fieret, tantum ad  
eum locum, vbi erant, factum esse hominum concur-  
sum, vt Patres sibi persuaserint, adesse felicem pro  
Christo moriendi horam. Vbi in conspectum vene-  
re, fuisse ab Imperatore non mediocriter increpitos,  
quod inscio se & inuito abierint, eamque elegerint  
viuendi rationem: fidenter peterent quæcumque es-  
sent ad victum cultumque necessaria, nihil ipsis, dum  
in

in Abassia morarentur, defuturum. Denique inter has rerum vicissitudines Patriarcham Ioannem, magno hominem natu, cum viribus esset pæne consumptis, agere de discessu cum reliquis coepisse, necque difficile in suam eos pertraxisse sententiam, & quia insoliti cœli solique tædebat, & quia Lusitani erant, quod hominum genus rebus suis plus iusto deditum, vix à patria diuelli potest, & alienas terras ægrè admodum incolit, quod nihil esse in mundo credat, quod Lusitano solo conferri queat. Goam igitur omnes nauigasse, vno excepto Andrea Oniedo, qui se aliò iturum negarit, cum ad illam esset prouinciã ex obedientia delatus, quam nec mortuus quidem vellet deserere. Homo quippe, ut nouus auctor ait, Castellanus erat, firmus & constans, quique vel vnus tuendæ aut propagandæ veritatis causa, nullos omnino labores, nulla mortis pericula formidaret. Hunc enim sapienter & maturè considerasse, non esse prudentis magistratus velle confestim subditorum mores corrigere, atque inueteratas longo annorum interuallo consuetudines vno die extirpare Reliquis ergo ex Æthiopia discedentibus, solum Andream mansisse; lentoque passum in re tanta, ut par erat, procedentem, Patriarchatus officio, quod à Ioannis discessu statim accepit, ita functum, ut in summo omnium fuerit tum amore, tum honore; tanta insuper apud Imperatorem gratia & auctoritate valuisse, ut ad expedienda Europæ negotia, regius quidam Senatus, qui inter Abassinos Latinus dicitur, eius consilio sit institutus. Demum post vitam plurimis virtutum operibus sanctissimè actam, ab hominibus demigrasse, mirumque omnibus sui desiderium reliquisse. Eius funus eadem pompa & celebritate, atque iisdem, qui Imperatoribus exhiberi solent,

solent, elatum fuisse honoribus. Sepultum corpus in templo sancti Spiritus in monte Amara, presente Imperatore, & cum cætera Imperij nobilitate exequiarum iusta persolvente. Hæc omnia nouus auctor, & eiusdem generis plura tam promptè, quàm falsò, incertum quo animo, mandauit literis. At in tota hac narratione nihil pæne esse, quod veritatem sapiat, sine dubio constat. Non est mihi animus, vt iam dixi, omnia, quæ falsa esse scio, scripto refellere; sed ea tantum, quæ nostro obsunt instituto: & quoniam nemini ferè ignota res est, id faciam molli, vt dicitur, brachio, & quambreuissime.

---

*Quantum à vero absit superior narratio.*

## CAPVT XVI.

**A**B initio missionis, de qua proximè dictum est, initium sumam. Ait, nouus auctor, negotium de creando Patriarcha & Episcopis cum Iulio tertio à Lusitano Rege agi cœptam; ob Iulij tamen & successoris Marcelli obitum ad Paulum quartum delatum, & ab eo tandem absolutum. Hoc inprimis falsum est, cum constet eligendi & creandi potestatem ab ipso Iulio fuisse concessam, & ab eodem diplomata in Lusitaniam missa: licet Patres ipsi, sedente iam Paulo quarto, & rata diplomata habente, fuerint inaugurati. Ait deinde Patriarcham & Episcopos patriarchalibus ac pontificiis sacris Romæ fuisse initiatos. Sed hoc etiam commentitium est. Nonius enim & Ouiedus initiati sunt Olisipone, Carnerius Gor, quo vno ante vtrumque anno cum sociis aliis fuerat ex Lusitania

tania profectus. Ita in Societatis annalibus traditur, & aperta scientibus res est. Ait præterea, hos tres Antistites cum reliquis sociis acceptam à Paulo IV. Pontifice, & à B. Ignatio pace ac salute, Roma in Lusitaniam profectos, Olisiponem peruenisse; nauémque ibi ingressos, simul in Æthiopiam nauigasse. His in verbis, etsi pauca sunt, multa continentur falsa. Ioannes enim neque tunc Romæ erat, cum Patriarcha creatus est, neque, ut credo, fuerat umquam. Reliqui socij. Ouiedo excepto, an Romam viderint, ambiguū mihi plerosque ex iis non vidisse, certum. At Ouiedum, quamquam ab Neapoli euocatus Roma transierit, non ibi tamen, sed Olisipone consecratum, ut iam dixi, dubitari nequit. Cum ergo patres isti Romæ non fuerint, inde in Æthiopiam fuisse profectos, apertè falsum est. Sed neque ex Lusitania simul, neque, quod est consequens, in eadem naui, neque anno eodem, neque in Æthiopiam recta, sed in Indiam nauigant; neque eò omnes peruenere incolumes; sed eorum tres facto naufragio in itinere perire. Constat enim anno millesimo quingentesimo quinquagesimo quinto soluisse Olisipone Antoniū Quadrium, Melchiorem Carnerium, nòdum Episcopum, & nonnullos alios, qui Patriarcham in eadem vrbe ad grauius negotia relictum in annum insequentem Goæ præstolarentur. Illi quoque, qui tunc profecti sunt, in varias naues, ut fit, impositi, Monsambicum salui tenuere. Sed post dies aliquot in iisdem nauibus inde simul egressi, cum secundo vento in Indiam contenderent, naui vna, cui à Conceptione nomen, dum leucis circiter quingentis ab Indica ora distans cursum conficeret, per noctis tenebras in breuia impacta, vado hæsit, & paulatim dissoluta est. In exiguum pri

primùm insulam , quæ prope comparuit, se vectores  
 nautæque recepere. Dein pars maior partim scapha,  
 partim cymba ex naufragij reliquiis raptim confecta,  
 itineris ignara per immensam maris vastitatē & summa  
 pericula, regēte Numine, in Indiam nauigauit. Cæteri,  
 quòd Nullū tunc haberent nauigiū, quo vehi possent,  
 in Insula remansere; cum iis è Societate tres, Andreas  
 Gonzaluius Metinnensis, Pascalius cognomine & pa-  
 tria Cathalanus , Alfonsus Lupius Nauarrus , quibus  
 cum ad demigrandum liberaliter offerretur in cym-  
 ba locus , ne turbam in insula manentem defererent,  
 seipfos deseruere. Transactis nouem à naufragio mē-  
 sibus, cum nulla ex parte ostenderetur vitæ remedium,  
 iunctis inerter atque interligatis oblongis quibusdam  
 tabulis , quemdam veluti lintrem confecerunt , quo  
 cum triginta aliis consenso , post duos navigationis  
 menses insulam aliam rebus omnibus priori inferio-  
 rem repperunt. In hac ipsi cum paucis aliis inedia &  
 labore consumptis , cum ad meliora tentanda non  
 suppeterent vires , remanere coacti sunt, & breui, vt  
 creditur, interiere. Insequente anno, qui fuit humanæ  
 salutis quingentesimus quinquagesimus sextus supra  
 millesimum, Patriarcha Nonius , Episcopus Ouedus,  
 & alij ex Societate cum Fernando Sofia in Æthiopiā  
 legato , tertio Calendas Apriles Olisipone soluerunt.  
 Sofia inter nauigandum extinctus est , Patriarcha  
 cum sociis Goam appulit incolumis , neque inde vin-  
 quam, vt paulo pòst constabit, in Æthiopiam traiecit.  
 Ficta igitur sunt , quæ de eiusdem Patriarchæ in Ar-  
 chicum aduentu, de ingressu in Æthiopiam , de ipsius  
 cum Claudio colloquijs & dissensionibus , de nouo  
 clericorum cœlibatu instituendo , de exigendis deci-  
 mis , de Apostolicarum literarum facultatūque o-  
 sten

ſenſione, de diſceſſu ex *Æthiopia*, de reditu in *Indiam*,  
 deque ſexcentis aliis, cum ſumma & Patriarchæ iniu-  
 ria, & proborum hominum offenſione, & legentium  
 pernecie fuere narrata. Vbi nam eſt, quod auctor il-  
 le auſus eſt indicare, malè Patriarchæ, culpa ſua, cum  
 Imperatore Claudio conueniſſe? Mercenarij more o-  
 peram ſuam mercede locaſſe? ſordidè & auarè deci-  
 mas ſtatim exigiſſe? ſuis fuiſſe deditum commodis? rei  
 difficultate, & laboris metu deterritum oues pro-  
 prias reliquiſſe, & cum aliis Societatis religioſis, qui  
 cum fuerant comitati, in *Indiam* conſeſtim remeaſſe?  
 Iſta quidem, vt in re indigniſſima manſuetè agam, a-  
 pud nullum ſcriptorem auctor iſte legere potuit; cum  
 certiſſimum ſit, Ioannem Patriarcham per eam, quam  
 dicam occaſionem ad extremum uſque vitæ finem  
 Goæ perſitiſſe. Atenim quanta innocentiſſimo viro  
 ſit iniuria, cum adeò temere iis notatur vitiis, à qui-  
 bus, quantopere in tota vita abhorrerit, præclarifi-  
 ſimis testimoniis prædicant *Luſitania*, *Mauritania*, *In-*  
*dia*, quibus ille in locis ita vixit, nemo vt ipſum agno-  
 uerit, qui ſanctiſſimum eſſe, & ab omni ſcleris labe  
 alieniſſimum non fateretur. Cæterum quàm iniquè in  
 ſanctiſſimum virum hac in parte peccatum ſit, demo-  
 ſtrabunt ſequentia, quæ grauiſſimorum hominum li-  
 teris ac vocibus, ita ſunt ſtabilita, vt qui fidem neget,  
 temerariuſ planè atque impudens ſit. Ad hæc, quæ  
 de Episcopis, Archiepiscopis, & plurimis aliis eiufdē  
 generis ab eodem auctore, multis in locis magnificè  
 deſcribuntur, inania eſſe, ex dictis conſtat. Nam præ-  
 ter vnum *Abuinam*, de quo ſæpe memini, in toto *A-*  
*baſſinorum Imperio* alius non eſt, qui Episcopali vel  
 auctoritate polleat, vel dignitate excellat. Quæ de  
 Apoſtolico nuntio dicta, non falſa modò, ſed pænè  
 quo

quoque pugnacia sunt Apud quem infidelem principem Romani Pontificis nuntius est? Si quis tamen in Æthiopia sit, ibique Apostolicam habeat auctoritatem, quid opus est hominem cogere, ut in gravioribus negotiis vel Gæanum Antistitem, vel Lusitanum nuntium per literas consulat? Iam verò quis æquè ferat tanta cum indignitate, & contemptu tractari Ioannem III. Lusitanorum regem, virum prudentiæ, sanctitatis, & omnium virtutum laude suo sæculo tantum, ut neque inter æquales, neque multis retro sæculis ullus extiterit, quem ipsi vel nostra, vel patrum ætas iure anteponat? Quod dictum est de gente Lusitana plus iusto patriam amante, ipsique adeò addita, ut neque alibi possit commorari, neque ullam orbis partem præ illa æstimet, tam est verum, quàm sunt reliqua, in quibus ne minima quidem apparet ymbra veritatis. Nam si de religiosæ Societatis agitur, quis non videt, quantum verba illa absint à vero? Neque enim illi, qui maiorum suorum imperio suis, ab urbibus, & ab iis, in quibus educati sunt, collegiis, aut dormibus, atque à suorum conspectu & consuetudine abducti, ad Indos, ad Sinas, ad Iaponios, ad Molucos, ad Brachios, ad Guinzos, ad varias Æthiopum regiones; aliosque per orbem populos ex Lusitania proficiscuntur, nisi gravissima virgeant negotia, reuerti umquam in patrias solent; sed in iis ipsis locis, quibus eos obedientia semel addixit, ad vitæ finem constantissime perseverant. Hoc enim animo numquam amplius ad natale solum reuertendi conscendunt navim, è portu soluunt, in altum feruntur, ventorum se arbitrio committunt. Laus tamen ista, omnium Societatis religiosorum est propria. Quicumque enim ex ea, siue Lusitani, siue Bætica, siue Castellani, siue Itali,

Galli, Germani, Angli, Belgæ, Hiberni, cæterique Europæi ad portandam infidelibus Euangelij lucem in Africam, in Aliam, in orbem nouum destinantur, nisi eadem, quæ misit obedientia, reuocet, ibi, quod missi sunt finire solent vitam. Peculiare namque ipsis est, cætere patria, & ibi viuere, & vitam absoluere, ubi erit Deo acceptius. Atque ut à nonnemine dictum accepimus: Ibi patria est, ubi bene est; sic istud proprium est huius familiæ insignie: Ibi bene est, ubi eterno placeat Numini. Et quidem, ut omittam alios, ex toto eorum numero; qui à condita Societate ad hunc usque diem in Æthiopiam intrarunt, præter Gonzalum Rodericum, qui rediturus ierat, ut de Imperatoris Claudij proposito Indicum Præregem moneret, nullus est ad nos reuersus; sed omnes, quinque exceptis, qui adhuc supersunt, summa cum laude & gentis fructu extremum ibi diem obiecit. De Lusitana gente quid hæc in parte attinet dicere? Quæ nam alia est in orbe natio, quæ magis lustrat alienas terras? quæ magis toto mundo sit diuisa, quæ minus videatur patriam amare, & in pretio habere, cum tamen secus facere non iniuncta possit? Quas oras terrarum non adit? quis tam diffusus, tamque remotus in orbe locus, quem non penetret? quæ tam sterilis & inculta regio, quam non habitet? quis tam abstrusus aut reconditus in vlla provincia angulus, ubi non figat sedem, & domicilium? Quid fortas, quàm tota Africa, & Asia plurimas esse Lusitanorum colonias? Sub Æquetore sunt, sub ardente plaga per totam maritimam Guinæe oram ab Hesperio cornu siue Arsinatio promontorio, caput viride recedentes vocant, ad Congi usque & Angolæ regna locis multis diffunduntur, in Mosambico degunt, in Sofala, in Manomotapa, in ora Melindis, in Mon



Monbaza, apud Æthiopas Eoos, plurésque alias gentes lingua, moribus, rebus ferè omnibus dissimiles. In orientali India nulla pæne regio est, in qua non sint & Lusitani plurimi, & permultæ eorum coloniæ. In ora Peguana, in Sione, in Malacha, siue aurea Chersonello, in insulis Moluchis, in Cambaia, apud Sinas, apud Iaponios, apud populos vniuersos. Videat nunc auctor iste, quàm verè & rectè scripserit, Lusitanam gentem vix à patria diuelli posse, vix in alienis oris commorari, quæque his similia sunt, quæ nemo rerum sciens audire queat sine risu, vt inania, neque sine indignatione, vt temeraria, vt iniuria, vt perniciosas? Nec minus auctor iste in Ouiedum peccauit. Fuit ille quidem, vt postea videbitur, plurimis & maximis cumulatus virtutibus, quod neque hostes negare aut occultare potuerunt. Sed quòd inuito Patriarcha Nonio, eoque discedente in Æthiopia manserit; quòd statim ab eius discessu Patriarchæ sibi munus noménque arrogarit; quòd Latini cuiusdam Senatus instituendi consilium Imperatori dederit; quòd eidem Senatui ab eodem Imperatore fuerit præfectus; quòd denique multa alia præstiterit, quæ præstitisse scribit, ita abest à veritate, vt nihil ab ea possit fingi remotius. Etenim neque Ouiedus cum Barreto in Æthiopia vniquam fuit, vt dictum est; neque si fuisset eo inuito inibi remansisset. Quòd à Barreti discessu Patriarchæ sibi munus, noménque vsurparit, licentius scriptum est, quàm vt moderatè ferri queat. An aded erat nescius, vt ignoraret, quid sibi liceret? An aded iniquus, vt alienam inuaderet possessionem? Quid, si ipso viuente in Æthiopiam Nonius, vnde fingitur discessisse, mutato consilio reuerteretur? Elséntne eiusdem Ecclesiæ duo simul superstites & Catholici Pa-

triarchæ? Duo eandem uxorem simul haberent vitæ? An opus esset, ut eorum alter inuitus etiam & nolens, Patriarchatu se abdicaret? Itaque Ouiedus neque munere neque nomine Patriarcha fuit, nisi postquam è viuis abiit Ioannes, quod anno contigit salutis nostræ millesimo quingentesimo sexagesimo sexto. Vbi mortuus sit, vbi sepultus, dicam suo loco. Quæ de Latino senatu, de quæ aliis eodem spectantibus idem auctor finxit, aut ab alio ficta accepit, & quod non debuit, hiteris mandauit, iam supra redarguit, & eiusmodi sunt, ut ne rudissimum quidem, atque omnis ignarum historiæ fallere possint. Ad Ioannem redeo, cuius eximia in patriarchatu demissio multo ipsum, quàm eadem dignitas, fecit illustriorem.

---

*Quomodo Ioannes se gesserit, postquam Patriarcha creatus est.*

## C A P V T XVII.

**O**Lisipone in Templo sanctissimæ Trinitatis, quod domui sancti Rochi, vbi Societatis professi habitant, propinquum est, Patriarchali ordine Barretus, Episcopali Ouiedus summa omnium ordinum celebritate eodem tempore initiati sunt. Professæ enim Societatis domus nondum sanum habebat: tanto concursui accommodatum. Ioannes Rex, quod ad Patriarchatum elegisset virum talem, quem suspicerent omnes, ac mirarentur, summisque honoribus dignissimum iudicarent, adeo erat letus, ut de suo Patriarcha ipse sibi præ cæteris gratularetur. Quo vero illum sapius habere præsentem posset, & facienti

cienti assistere, voluit ut in regio Saccello solemnī ritu frequenter litaret. Præter alia verò, quibus optimus rex est, singularem in Deum religionem, & insignem aduersus Societatem, ipsūque Patriarcham beneuolentiam mirificè testatus est, munera addidit varia & pretiosa. Ad vsus sacros vestes dedit holosericas, damascenas, conchyliatas, opere vermiculato compositas, acū pictas, auro intertextas. Dedit cruces, calices, pyxides, & alia vasa ex auro & argento facta fabrilè, & magnificè, ac pretiosè cælata. Multam aliam præterea suppellectilem optimam & pulcherrimam, qualè vel ipsa Europa, cui ferè magna omnia prævaluiluerunt, non sine commendatione perspiceret. Volebat quippe Rex inclytus & religionis amantissimus, ut Abassinæ illæ gentes, ad quas Ioannes erat Patriarcha destinatus, vel ex ipso sacrorum apparatu agnoscerent, quantum Deo immortalī, cæterisque cœlitibus colendis Romana Ecclesia inter cæteras emineat; ut etiam inde in cupiditatem venirent cum suo vero capite, hoc est, Romano Pontifice se coniungendi. Atenim quod ad rem præsentem attinet, scio à magnis viris animaduersum, immensum illud Numen, quod regit & tuetur omnia, vniuersum genus hominum, atque ipsos inprimis veræ fidei cultores, quos semper in terris fuisse, nemq̃ ignorat, sua admirabili prouidentia ita solitum gubernare, ut per varias sæculorum ætates, temporibus diuersis, huic inferiori mundo alios atque alios dederit, sitque usque ad finem daturus, quorum partim exemplo, partim labore & industria vetus disciplina & collapsi mores restitui queant; quosque, cæteri mortales, velut expressa quædam virtutum exemplaria, suo quemque gradu & ordine, sibi proponant imitandos. Talem si

fuisse dixerò Ioannem Patriarcham, haud erit, credo, qui dicenti obsistat; si quis enim paululum consideret, qua ille ratione in sua illa patriarchatus dignitate se gesserit; necesse est, fateatur, idcirco fuisse à Deo ad hoc munus electum, ut esset, qui primos illos, quos suo in exordio Christiana Respublica Episcopos habuit, vita & moribus referret; & in quo splenderent omnia, quæ in quolibet Antistite pontificiam auctoritatem decorant maximè, & eximiè commendant. Summa in eo eminebat submissio, nec minor sui, rerumque suarum despicientia. Christi Opt Max. Pontificum principis vestigia insequens, aded non ferebat ullam sibi à quoquam exhiberi seruitutem, ut qui frequentius religiosis seruiret, esset nemo. Ipsis acumbentibus necessaria ministrabat. Continuus erat coqui adiutor. Lances, pyxides, ollas, & cætera coquinaria vasa, deposito episcopali anulo, cum cura & voluptate abluebat. Hæc ille & alia generis eiusdem tanta præstabat alacritate, ut ad similia exemplo suo facile reliquos pertraheret. Quis enim Ioannem Patriarcham videns aut torpori sederet, aut sectaretur grandia, aut non sponte curreret ad vilia? Qui auctoritate vel honore, aut quod minus est, natu inter alios antistant, intelligere debent, illorum mores totamque vitæ rationem habere se, ut ita dicam, in manu; cum in utramque partem firma iis viuendi sint. Neque illud ignorent, quod est satis exploratum, ut saluari ipsorum exemplo valde prouehitur, publicares; ita pernicioso maiorem in modum eandem pessumdari. Cum igitur omnes, qui in aliqua viuunt hominum Societate, curare diligenter debeant, nihil ut agant, quod aliorum æmulatione dignum non sit: iis certè, quos vel dignitas, vel ætas, vel quidpiam aliud, in quo excellunt,

conspi

conſpiciendos proponit, ſummopere elaborandum eſt, ita ſe in rebus gerant, vt auctoritatem ſuam probent reliquis, atque ad id, quod erit factu optimum, eos impellant. Hæc vna Ioanni meus ad Patriarchatum euectus. Plurima exercuit opera virtutum, quæ iure poſſet prætermittere; nec omiſit aliquid, quod ad aliorum imitationem laudabiliter trahi poſſet. Pœnitentiæ ergo ſacramentum tam aſſiduè miniſtrabat, vt ne iis quidem cederet, qui munus idem ex obedientia ſibi impoſitum, accuratiſſimè fungebantur. Ibat sæpe ad externos ægros, eorum exceptum conſeſſiones, ſi quando aliquis ad ipſos ex Societate conſeſſarius acceſſebatur. Nec verò curabat, nobiles eſſent, an ignobile, diuites an pauperes, domini an ſerui; æquè ipſum caritas rapiebat ad omnes, cuiuſcumque ſtatus eſſent & conditionis, ſiue domi ſux decumberent, ſiue in vinculis tenerentur. Res in hoc genere contigit, non indigna relatu. Vocatus aliquando eſt ex Societate aliquis, vt ægrum hominem conſitentem audiret. Negotium Patriarcha ſuſcepit. Vocantem ponè ſequens, cùm forte præter palatiū principiſ Ludouici, Ioannis regis fratris, ſimul cum ſocio pertransiret, viſus ab eo ex fenestra & cognitus eſt. Princeps id quod erat, ſuſpicatus, tantàmque hominis ſubmiſſionem & facilitatem admirans, vnum vocat ex famulis; iubet vt Patriarcham ſequatur, & obſeruet diligenter, quam ſe in domum inferat, & quid ibi agat. Gradum famulus accelerat, & Patriarcham inſequens tandem aſſequitur; tandiùq; à tergo comitatur, donec ad locum ventum, vbi cubiculum erat humile pæne ſubterraneū, atque inibi iacens Æthiopicum mancipium, grauî morbo correptum. Ingreditur Patriarcha, ægrum repperit, blandè alloquitur, ſolatur, & ad patientiam exci-

tat, aurēſque præbere incipit conſidenti. Quibus obſervatis ad principem ſuum homo regreditur celerigreſſus: ex ordine rem totam illi narrat. Ferunt principem ipſum, ut erat vir verè magnus, & æquiſſimus virtutū æſtimator, ire per ſe ad Patriarcham voluiſſe, ut cum ea, quæ tanto viro atque eius meritis & dignitate debebatur, magnificentia domum illum reduceret; abſtinuiſſe tamen certas ob cauſas, & ob eam maximè, quòd veritus ſit, nedum honorare Patriarcham cuperet, moleſtia afficeret, magiſque modèſtiæ ipſius eſſet oppugnator, quàm dignitatis deſenſor. Mulam ergo (carpentorum enim tunc uſus & id genus vehiculorum in Luſitania nondum erat) conſeſtim inbet præparari; eamque cum nobili equitum & peditum comitatu ad illum duci, ut qua decet ſtatus ſui exiſtimatione domum reuertatur. Properant, qui miſſi ad excipiendum & comitandum Patriarcham. Reperiunt adhuc audienda confeſſione præpeditum. Expectant, donec abſoluat. Ludouici verbis cum reliquo apparatu mulam ipſi offerunt ad regreſſum. Ingenuo ille pudore ſuffuſus ſereniſſimo principi gratias primum agit: tum ad eos, qui adſunt, ſibi mula & tali comitatu opus non eſſe; pedibus cum ſocio reuerſurum. Neque putare ſe, ullà fieri patriarchatui iniuriã, ſi id Patriarcha faciat, quod Princeps Patriarcharum ſummus, quod eius etiam Apoſtoli, magni & ipſi orbis terrarum principes ac Patriarchæ, dum apud nos viuerēt, fecere: eos dum imitatur, nihil ſe efficere vile, aut dignitati ſuæ repugnans. His dictis aulici dimiſſi; ipſe domum, ut ad ægrotum ierat, cum Socio reuertitur. Et verò tanta cum gravitate hæc ſubmiſſionis opera faciebat, ut ex abiectis huiuſcemodi miniſteriis Pontificia apud eum dignitas non modò nullam pateretur

pateretur auctoritatis iacturam, sed ingens potius acciperet incrementū. Molestè ferebat, vili se in mensa, in cubiculo, in re alia anteponi; nec accipiebat quidquam ad vsum, quod non esset omnibus commune. Pedes exhibat domo, cum exire opus, sine famulo, sine vllis parentibus pontificiæ dignitatis indiciiis, religioso tantum socio, ut quiniis alius comitatus. Nec apparatus maiori Conimbricam petiit, ut Conimbricenses socios inuiseret, & coram salutaret, vltimæque cum iis haberet colloquia, atque extremum vale diceret in Indiam profecturus. Sed & paucis illis diebus, quibus est Conimbricæ commoratus, non obscura aut pressa leuiter, sed illustria, solida, altèque fixa reliquit vestigia eximie sanctitatis. Ibi etiam de more sæpius ad coquum ibat, suam illi operam præstiturus. Vasa escaria, ollas, athena, lebetes, & cætera huiusmodi libens tergebat; nec omittebat quidquam rerum earum, quæ in eo ministerio sordidiores putantur. In triclinio cibaria accubentibus apponebat, iis præsertim, qui erant in tyrocinio; ex quibus cum videret quemdam humi sedentem, supràque genua mantile explicantem, ut ibi cibum sumeret, idem mantile suis ipse acceptum manibus extendit super humum; comiter & amicè monens, maioris id esse submissionis indicium, quæ ut parua & nullius esse momenti videantur, non solent tamen à magnis viris contemni; quibus certum est, nihil tam esse exiguum, ex quo & se & alios iuvandi captare nequeant occasionem; cum & in rebus minimis, nisi spernantur, magnarum sit commoda virtutū. Itaque cum Patriarcha plurima Conimbricæ valdeque insignia dedisset probitatis ac submissionis documenta, omnèque ad perfectionis studiū inflammasset, appetente Indicæ navigationis tempore Olisiponem reuersus est.

*Legatione missa exploratur quo animo sit Abassinus Imperator ad recipiendum Patriarcham, & socios.*

# CAPUT XVIII.

**P**RIUSquam in Æthiopiam Antistites cum sociis proficiscerentur, visum Ioanni Regi constanti Abassini tentare, ipsūque per legatos ad Patriarcham & socios excipiendos reddere promptiorem. Mandavit igitur Petro Mascategne Indico Protegi, ut Goa legatum mitteret in Æthiopiam, cuius opera Preteiannis exploraret animum, cūque ad Patriarchæ & sociorum aduentum præpararet. Sciebat facile mutari Æthiopa ingenia, nec in eodem diu proposito persistere. Ad hoc negotium deligitur à Protege Iacobus Diaz, vir nobilis; datur illi ex Societate comes Gonzalus Rodericus, probus, prudens, doctusque Sacerdos. Huic adiungitur Fulgentius Frerius, rerum multarum peritus homo, & experiens. Septimo Idus Februarias, anno millesimo quingentesimo quinquagesimo quinto duabus biremibus è Goano portu solvunt, & aliquot post dies appellunt ad Archicum, qui portus ad Abassini ditionem tunc temporis pertinebat. Terrestri inde itinere Imperatorem petunt, atque in cōspectum & colloquium admissi, Regis Lusitani epistola perlecta, quæ habent in mandatis, coram exponunt. Mutatam reperiunt Claudij voluntatem, longēque ab ea diuersam, quam & David habuit eius pater, & ipse initio aditi Imperij habere se per literas Ioanni Regi significauerat. Hic ille Claudius est,



est, ad quem antea Zeilano oppressum bello Stephanus Goma, Indicus prætor cum fratre Christophoro duce quadringentos miserat Lusitanos bellatores, quorum ope regem Zeilæ, qui frequenti Saracenorum atque Turcarum fultus præsidio, annis iam quatuordecim infesta in Abassiam arma inferens magnam ubique edebat stragem, fuso fugatoque exercitu interemit, & quas amiserat terras, pulsus hostibus recuperavit. Hic ille est, quem obedientem fuisse Romanæ Ecclesiæ filium falsò novus auctor prædicat, & quòd cum Saracenis dimicans ceciderit, auctoritate sua in Martyrum numero ferè reponit. Quæ enim auctor iste de recta Claudij fide, de rebus ab eo præclare gestis, deque ipsius gloriosa, ut vocat, morte scribit, apertè falsa sunt; quemadmodum & quod addit Ioannem Balthasarem Abassinum, cum Veronam Italiæ urbem fuisset ingressus, & cognovisset in collegio Societatis Iesu, quod ibi erat, habitare Masseium, illum cum duobus aliis nobilibus veris adiisse, & productis in medium multis, fidèque publica approbatis testimoniis, adedò apertè ostendisse, falsa esse, quæ de Imperatore Claudio scripserat, ut ipse Masseius veritate compulsus, coram collegij Patribus, qui omnes præsentès aderant, eundem Balthasarem benevolentiae & amoris ergò arctè sit complexus, & quòd tanto se errore liberarit, gratias egerit quammaximas, promittens se in alia operis sui editione omnia, ut in approbatis illis scriptis legerat, perspicuè traditurum. Hæc enim & superiora, quàm sint inania Gonzali Roderici patefacient literæ, quas anno insequente millesimo quingentesimo quinquagesimo sexto, Idibus Septembris, ex Æthiopia in Indiam reuersus ad Patres Societatis Goana ex urbe in  
Lusi

Lusitaniam misit. Autographum Olisipone in archiuo Societatis asservatur; ex eo, & ex epistolis alijs grauium virorum, qui de eadem re ex Æthiopia & India in Europam scripserunt, atque ex gestarum rerum monumentis accepit Maffei, quæ memoriæ commendauit. Quæ ex Gonzali literis ad rem præsentem spectant, quamquam multa sunt, lubet producere in medium latinè reddita; non enim aliunde certius, quàm ex ipsis cognosci res potest. Postquam igitur Gonzalus initio literarum recenset, quos mari terræque inter eundem ipse & socij perpassi sint labores, de quibus non habeo necesse dicere, ita scribit. Decimo sexto Calendas Iunias ad Æthiopæ regem peruenimus. Is in castris erat, plurimis vndeque circumdatus papilionibus. De nostro factus certior aduentu, præparari iussit hospitium, quo reciperemur. Altero statim die illum adiimus. Intra tentorium nobili stratum tapete & serico peristromate eleganter exornatum, thoro sedebat cortina aperto. Eò Iacobus accedens, quas portabat, regias literas sedenti porrexit. Iussit ut coram omnibus Lusitanis, qui in castris erant, alta voce legerentur. Ita factum. In iis præter alia scribebat Rex Ioannes, anno insequente missurum se ad illum ex domesticis suis vnum, & aliquot insuper viros religiosos, qui multis animi & naturæ dotibus essent præditi, vitæque & doctrina maximè excellerent. Vt ista Claudius audiuit, subito correptus mentis stupore frontem contraxit; & concepti animo fastidij certa ore atque oculis præbens signa, nihil respondit, quod ad rem faceret. Hoc modo ab eo dimissi, ad assignatum rediimus hospitium. Biduo vel triduo post ad innisendam auiam suam, quæ decem prope dierum itinere distabat, profectus est. Nos  
patente

patente in campo relictū, ne hominem quidem vnum habuimus, qui Imperatoris nomine quidquam egentibus offerret. Non fuimus tamen à Deo deserti; eius benignitate & prouidentia factum, vt Lusitani generis homo curam nostri susci-peret. Ille nos ad locum duxit, cuius erat dominus, tres circiter leucas distitum, domique suæ exceptos, ac suorum curæ commendatos cum reliquisset, Imperatorem insecutus est. Mensem ferè vnum hoc in loco traduximus. Quo tempore de Abassinorum erroribus, & Romanæ fidei veritate libellum composui, quem redeunti Claudio offerrem. Is enim, vt à Lusitano quodam, valde ipsi accepto cognoui, aperte dicebat, neque indigere se doctrina nostra, neque in animo habere Romanæ Ecclesiæ obedire. Vulgo etiam iactabatur, optimates quosdam palàm affirmare, facilius se iugo Saracenorum supposituros colla, quàm mores proprios cū nostris commutatu-ros. Qua etiam ex parte in ea magis firmabar sententia, vt quæ vellem, à nobis Imperator agnosceret, ea scripto potius, quàm ore traderem. Sic enim fore, vt ex eius respōsione elicerem quid in animo haberet, & consilium detegerem tanto nobis tempore dolose opertum. Cum primum igitur ad hæc loca rediit, ad castra nos cōtulimus. Ibi à Lusitanis militibus fuimus excepti. Imperator enim memoriam nostri penitus deposuerat, nec quo essemus loco, aut quid ageremus, scire amplius curauit. Quoniam verò libellum composueram idiomate Lusitano; & verūque in Chaldaicum oportebat, ab ipso per literas petij, vt assignari mihi iuberet monachos duos ex iis, qui peritiores viderentur, vt possent aliqua fidei Christianæ dogmata in Chaldaicum sermonem aptè vertere; vel, le enim me scripto ostendere quàm immerito Abas-

fini cum hæreticis numerent Romanæ doctrinæ sectatores, & peiores esse asserant Mahumetanis; hoc enim ipsos palam dicere & prædicare. Quoniam verò sciebam, esse apud eos librum, quem Francorum vocant adulterium, ab Alexandrinis schismaticis compositum, in quo & Chalcedonense reprobatum Conciliū, & multa nobis mendacia affinguntur; ab Imperatore etiā petij, ut iuberet illius mihi copiam fieri. Librū negavit; monachos concessit; qui tamen cum vertere opusculum cœpissent, siue quoddam ita haberent in mandatis, siue quoddam aliquid timerent, siue qua alia occulta causa, cœptū opus continuare omnino recusabāt. Necesse fuit ut Lusitanorum militū præfectus semel & iterum ea de re cum Pretēianne ageret, cuius tandem iussu effectum, ut à monachis opus absolueretur, versionem faciente Lusitano quodam, honesto viro, & Chaldaicæ linguæ non mediocriter gnato. Cū rursus opera indigerem alicuius, qui rectis characteribus traducta transcriberetis ab eodem Imperatore & petitus, & concessus. Vix tamen operi manum admoverat, cum in iram versus Imperator, misit statim, qui scribam repeteret, suisque mihi nuntiaret verbis, haud opus esse morari, vel compositionem libellum siue rectè, siue secus esset scriptus, ipsi exemplo mittere; vel talibus negotiis supersederem. Ne igitur res amplius differretur, neve Imperator ullam postea peccati sui excusationem posset obtendere, necessariū duxi; libellum; sicut erat malè exaratus, & lituris infectus, illi ostendere, ceterum ad id assignans diem, qui fuit Augusti vigesimus. Vbi dies hic advenit, cum Lusitanorum præfecto & septem aliis octove Lusitanis hominem contēnio. Salute dicta, breui quodam sermone adventus mei causam incipio exponere. Vetat ille ulterius

terius progredi, & aliò sermonem transferens, ictus omnes, quibus se impeti sentit, callidè declinat. Tum ego omittens cætera, libellum offero, quem legere incipiens tantum paulatim concepit furorem, ut inclusum animo virus continere nequeat, & foras euomat. Facultatem, inquit, à me petisti, ut libellum conficeres, in quo fidei declarares veritatem; & monachos etiam, qui Chaldaicam in linguam illum transferrèt. Vtrumque à me concessum. Ecce aliud actum à te. Neque enim fidei explicas veritatem, sed errores illis impingis, qui longè absunt ab erroribus. Oportuit etiam scire te, quantum hoc, quod aggredieris munus, à conditione tua, qui simplex sacerdos es, sit alienum. Nescis ista Episcoporum esse propria, nec nisi ad magnos pertinere Antistites? Quid ausus es in alienam messem immittere falcem? Falsus sum hominem me esse exigui momenti; nihil tamen fecisse, quod à mea esset conditione alienum; cum ea scripserim, quæ in libro Euangeliorum, & sacris Conciliis aperte continentur; quæque sunt Christiano homini omnino credenda. Multos, inquit, mihi ac meis errores obiiicis, quibus nullo modo implicamur. Quid de tua, inquam, fide sentiendum sit, Imperator, non decerno. Tuos certè Abassinos à vera religione aberrare, dubiū mihi non est. Nihil enim illis falsò impono. Si placeat re experiri, monachos tuos, & quos toto imperio habes literatissimos, iubeas huc cōuenire; eos ego erroribus iis, quos in opusculo notavi, irretitos esse, ita palam aperteque ostendam, nemo ut audeat ire inficias. Ille ad hæc, disputationum se odisse tricas, & propriū esse Ethnieorum superstitiones suas committere questionibus; Christi cultoribus, præsertim veteribus, id prorsus cautum. Annos iam transisse plusquam mil-

le

le, ex quo illam profitebantur fidem; si quid in ea inerat à vero abhorrens, quam ob causam tot per annos nemo fuerit, qui tales ipsis exprobraret errores, & id faceret, quod ego modò audentem facere? Ad hoc ego, Deum prauis hominum operibus irritatum, sæpe eos sinere hæc in mala ruere. Ageret propterea & haberet eidem Deo immensas gratias; quòd tali tempore, ipso nimirum viuente, & imperante, in Æthiopiam mitteret, qui sinceræ fidei monstraret viam. Tunc ille, In quatuor, inquit, Christi Ecclesiâ disiecta sedes est. Nos vni ex his sumus ab initio suboliti, ab ea nunc separari fas & iura vetant. Assentior, inquam, patriarchales, vt vocant, sedes quatuor ab initio fuisse: Romana tamen diuino statuto cæteris est præposita, vti omnium caput, mater & magistra. Cum defecerint aliæ, quicumque illis contra Romanam obediunt, perduelles sunt, & à suo capite miserabiliter diuisi. Meum consule opusculum, in eo difficultatum omnium, quas mihi proponebas, solutiones reperies. Caueas tamen diligenter, ne propheticum illud,  *noluit intelligere. ; vt bene ageret*, tunc tibi apretur. Denique verbis multis vitro citòque prolatis, Lusitanorum præfecto interprete, ad extremum addidi, me eo consilio libellum illum composuisse, vt scirem, vellènt erroribus depositis Romanæ sedi parere; & religiosos illos ac doctos viros recipere; quos ad ipsum mittebat Rex Lusitanus: si enim eos apud se habere, & audire noller, haud vllam esse causam, cur adire Æthiopiam deberent, qui nihil in ea aliud quærerent, præter Abassinorum salutem. Respondit suis se in regnis viros habere religiosos ac literatos, non indigere proinde vt aliunde alij ad se mitterentur; nec sibi vmquam fuisse in animo, se aut gentem suam Romano subicere Pōtifici.

tifici. Quod enim Gaspar Magalinius apud Lusitanum Regem nomine suo fecerat, Arabici cuiusdam Monachi, qui literas suas conuertit, errore fuisse factum; non enim mentem intellexisse suam. Tandem præter Alexandrinum Patriarchâ, cui semper fideliter obedierit, nolle se ullum prorsus alium agnoscere in sacris superiorem. Quapropter cum obstinatissimum hominis animum molliri posse diffidere, accepta venia, discessi. Ille abeunte me, Lusitanorum intuens præfectum, qui cum ipso remanebat, summis laudibus meam doctrinam extulit, asserens valde mirari se, quomodo possem tam iuuenis tanta pollere scientia. Agnoui postea libellum meum integrum perlegisset semperque illud habere in manibus, & sæpe matri, sæpe fratribus, aliisque imperij principibus ostendere. Illud etiam mihi renunciatum, Abunam, cum rectè sciret, quid ipso libello contineretur, eius lectionem graui anathemate prohibuisse. Ob eam causam altero ab interdicto die missus ad eum est à Preteianne nuntius, qui legendi facultatem suo nomine postularet. Cum Abuna negasset, versus in rabiem Imperator multa in hominem probra & contumelias iactauit, multa contulit maledicta, vocauit hæreticum & Mahumetanum, qui cum nequissimi pseudoprophetae Alcoranum legeret, tam sanctum libellum, & à tali compositum auctore, legi videret. Addidit insuper hoc, quandoquidem in eas venerat Abassiarum terras, ut Abunæ Doctorisque munere fungeretur, quamptimum ad ea responderet, quæ simplex sacerdos, & nulla præditus dignitate opponebat. Negauit Abuna, ullam se suscepturum aduersum me disputationem; cum non ad disputandum, sed ad conferendos ordines in Abassiam venisset. Interim cum tota in aula de re

X

nulla

nulla magis quam de hac homines vulgo loquerentur, atque ex aulicis quidam nobis, aduersæ parti fauerent alij, iudicauit Imperator consultatione opus esse. Nonnullos ergo monachos accersit, qui putabantur literis & sanctitate præstare; iisque præcepit, vt libellum meum purè & correctè transcriberent. Valde timui, ne omitterent aliqua, quæ sciebam ab Imperatore, neque rectis legi oculis, neque æquis auribus auscultari. Hoc de genere erant illa, quæ de Leone Romano Pontifice, de Dioscoro Alexandrino Patriarcha inferueram. Dioscorum enim virum, sanctum, Leonem pessimum fuisse, in animo & in ore Abassinis est; & hunc quidem tanto aduersantur odio, vt nec ipsius nomen absque horrore percipiât. Chalcædonensæ quoque reprobant Concilium, & in fide errasse dicunt, atque iniuste Dioscorum condemnasse. Ab huius ergo Concilij tempore, cuius omnes sanctiones decretaque reiciunt, à Romana Ecclesia sunt diuisi. Sequuntur etiam Sergij Pauli & Pyrrhi hæresis à sexta Synodo Constantinopolitana improbatam, & permultos alios errores. Vbi tempus aduenit, cum mihi Imperator, vt promiserat, responsurus erat, contuli me in aulam, misique ad illum qui nuntiaret, adesse me, & responsum expectare. Ad hoc ille, Patris, inquit, mei legatus decem in Lusitania annos fuit, nec potuit tam longo tempore negotium suum conficere; æquum igitur est, vt Lusitani Regis legatus responsum meum patienter expectet. Intellexi, quò ista tenderent, nec amplius morandum ratus, facultatem per internuntium petij in Indiam redeundi. Callidè rem distulit: neque enim decere, vt qui tantus essem vir, tanta redirem celeritate; præsertim cum illuc venissem de summis rebus acturus: neque posse  
me



me alibi fructuosius, quàm audiendis illic Lusitanorum confessionibus operam impendere. Si tamen omnino discedere statuerem, mensis adhuc vnus spatium ipsi concederem ad respondendum; eo finito quamuis nihil responderet, datam fingerem respon- sionem, & quò luberet, abirem. Post hæc, quarto Nonas Octobris misit ad me Imperatoris mater fa- mulum quemdam, qui diceret, optare se mecum lo- qui, & calicem videre, quem Goa portaueram; valde enim extolli inter suos, vti rem præclaram & dignam visu. Accepto nuntio profectus illicò sum cum ali- quot Lusitanis, quos ipsa voluit vnà mecum ingredi ad se omnes. Paucis præmissis, vbi ad Religionis ne- gotium ventum est, ita dixit: Cùm vestra nostraque fides nihil prorsus differant, sed vna atque eadem sit, quid, quæso, oportuit, hac de re quidquam scribere, & quietos animos sine causa sollicitare? Ad hoc sic ego breuiter: Nū Abassini tui rectam teneant verita- tis viam, ex iis quæ scripsi, poteris agnoscere. Hoc ti- bi Augusta, verissimè affirmo, quamuis errore alio non teneremini, vnus ille, quoddà Romano Pontifice Christi in terris Vicario separati estis, satis vobis su- pèrque esset ad sempiternum interitum. Respondet, se, & gentem suam Petro ac Paulo Apostolis, ipsique imprimis Christo subditam esse. Negauit Christo sub- iici qui eius Vicario non subiicitur; cùm idem Chri- stus dicat, *Qui vos audit, me audit; qui vos spernit, me spernit.* Quoddà si verum est, quod ex eodem Domino Euangelista Ioannes refert, vnum fore ouile, & vnum pastorem, quem nam crederet, cum esse pastorem? Respondit, S. Petrum. Si hic, inquam, vnus ille pastor est, oportet vt tale munus iis quoque competat, qui eidem Petro ordine succedūt. Iterum illa: Neque ego,

inquit, neque mei sancto Petro obedientiam negamus. In eadem nunc sumus fide, in qua fuimus ab initio: ea si recta non erat, cur per tot ætates ac sæcula nemo repertus est, qui nos errantes commoneret? Hic ego, non potuisse Romanum Pontificem, qui totius Christi Ecclesiæ pastor est, præteritis retro annis Doctores in Abassiam mittere, eo quod Mahumetani omnia circumdarent, nec ullum ad ipsos aditum relinquerent. Nunc verò aperta iam maritima ad Æthiopiam via, id præstare, quod nequiuit prius. Sciret Christi Rempubicam, vbicumque terrarum sit, vnicum esse mysticū corpus, quod in cœlo habeat Christum caput; in terra Christi Vicarium, qui Christianorum omnium caput est. Dubitari non posse, quin membra capiti debeant subiici, atque ab eo dirigi & gubernari. A condita Christi Ecclesiā vsque ad annum quadringentesimum octogesimum octauum apud Abassinos, & in toto Alexandria patriarchatu rectè rem habuisse; exinde cœpisse in interitum ruerè. Si assequi salutem vellent, iterum se cum suo legitimo capite coniungerent, & vnum cum eo corpus efficerent; ipsum enim Christum voce sua asseruisse, vnum tantum in Ecclesia esse ouile, & vnum tantum pastorem: at corpus vnum, nisi valde monstrosū sit, vnum dumtaxat caput habere: esse autem Christi corpus perfectissimū, atque ab omni alienum sceditate. Tunc illa, Tantum, inquit, opus, quantum istud est, vt nimirum cum Romano capite membra cætera coniungantur, nihil ad te, neque etiam ad me pertinet, necesse est, vt alij Patriarchæ cum Romano congregati de re tanta deliberent, & quid faciendum sit, auctoritate sua decernant; veteres enim mores ac ritus priuato consilio deferere, nouosque suscipere, res est pericu

periculi & offensionis plena. Ego contrā, perantiqua  
 esse, quæ vera fides docet, neque in iis noui quidquā  
 reperi, propterea tollere potius offensiones debere,  
 quam concitare, quidquid ex fidei præscripto fiat. Post  
 hæc, & huiusmodi alia, sic deinde in eadem epistola  
 Gonzalus. Paucos post dies castra mouit Imperator  
 ad locum bidui itinere distantem. Secuti euntem su-  
 mus. Cū in quodam campo essemus, tres ad me  
 monachi venere, ex iis vnus literatus habebatur, ma-  
 gnūque mei videndi & alloquendi tenebatur deside-  
 rio, vt de religione ageret. In ipso sermonis exordio  
 falsus est, omnia nostra sibi mirificè placere; probare  
 tamen non posse, quod neque sabbatum seruauimus,  
 neque à porcina carne & leporina abstinere. Cū-  
 que ad hæc adderet alia, magnam euomuit, veneni  
 copiam. Afferuit enim iustorum hominum ex hac vi-  
 ta decedentium, animas, etsi nihil purgandum ha-  
 beant, nō ideo tamen statim in cœlo recipi, vt Deum  
 videant, sed ad terrestrem duci paradysum, mundi fi-  
 nem expectaturas. Spiritum sanctum à solo Patre  
 procedere. Filium esse, Patri quoad humanitatem æ-  
 qualem. Mahumetanos tantū & Ethnicos post  
 mortem detrudi ad Inferos, vt ibi perpetuū sint; Chri-  
 stianæ legis professores, qui flagitiosè viuunt, tandiu  
 gehennæ igne torquendos, donec peccata purgent;  
 omnes enim qui Baptismatis caractere erunt signa-  
 ti, ad beatitudinem tandem rapiendos; atque id aper-  
 tē constare ex illis Christi verbis; *Qui crederit, & ba-  
 ptizatus fuerit, saluus erit.* Verū hos ego errores tum  
 rationibus, tum Scripturæ testimoniis ita coargui, vt  
 propius accedens significarit factum sibi satis. Ne ve-  
 rō eius socij, qui idiotæ erant, quidquam audirent, ipse  
 mihi insurrexit; Vera sunt, quæ doces; ea ego omnia

animo seruabo meo. His dictis abiit. Intet hæc exactus est mensis, quem Imperator ad parandam responsionem petierat. Eum adiij, simulque responsum & facultatem petij ad discedendum. Liberum, inquit, tibi sit, cum libuerit, discedere. Quod attinet ad religiosos, quos Ioannes Rex tuus ad me mittit, cum Mazuam peruenerint, præstò ibi erit, qui venientes excipiat, & conducat ad me: lubenter eos audiam de fide differentes. Tum ab eo discessi. meque statim in viam dedi. Ex itinere aliqua inuisi Lusitanorum oppida. In iis multorum excepi confessiones; quosdam à pellicatu ad legitima traduxi coniugia, pellicibus primum, quæ genere & secta Abassinæ erant, Romana doctrina instructis, & ad fidem reuocatis. Quoniam huius regionis sana schismaticorum sacris dicata sunt, neque aras habent nostris vñibus accommodatas; altare nobiscum portabamus ad rem diuinam faciendam. Cum in vno essem ex hisce oppidis, quidam illuc me salutatum venit. Misit hic erat ab insigni quodam Archimandrita, qui ad sex circiter miliaria duobus magnis præerat cœnobiis, quorum in vno Monachi, in altero moniales morabantur. Illi Belibanos seu Plurimanes nomen, per ea loca satis celebre. Ab eo enim exit quidquid est in tota Abassia credendum; quoniam ibi putatur esse regula fidei: & ob hanc causam Cœnobiarcha ipse summo apud omnes in honore est. Congruum iudicaui, hæc inuisere cœnobia. Profectus ad ea sum simul cum Lusitanis itineris sociis. Aberat Archimandrita. Cœnobia breuiter lustraui. Tam ipsa, quàm Monachi longè à nostris differunt. Suam quisque habet ædiculam ab aliis seiunctam, suam habet agri partem, quam sibi colit. Sic omnes & habitatione & occupatione diuisi sunt,

sunt, ut non cœnobium vnum, sed pagum exiguum te videre credas. Quamquam verò ex parte vna Monachi, ex alia habitent Moniales, non adeò tamen separati sunt, quin multi inter eos filij dicantur gigni. Horum familia nec Franciscana est, nec Dominicana. Teteleay Manot vocatur. Hoc institutoris nomē fuit; quod apud eam gentem fidei columnam sonat. Magnam hic habet inter Abassinos sanctitatis opinionem. Multa dicitur patrassē miracula. Illud præ cæteris celebratur, quod occiderit serpentem ab Ethnicis habitum pro Deo; atque ipsos deinde Ethnicos ad Christi primum fidem; ad hanc deinde viuendi sortiam multos eorum conuerterit. Hæc omnia in suis litteris Gonzalus. Labet nunc alia in hanc eadem sententiam seorsim addere.

---

*Qualis fuerit Imperatoris Claudij in Romanam Ecclesiam, & ad recipiendum Patriarcham animus.*

C A P V T XIX.

**A**lfonsus de Francia homo fuit Lusitanus, honesto natus loco, qui inter Imperatorem & Gonzakum egerat interpretem. Is à Gonzali discessu de iisdem rebus longam habuit cum eodem Claudio disputationem. Quid in ea sit actum, in epistola collegit; quam ad ipsum postea Gonzalum Goam misit. Sic orditur. Imperator eadem mihi, quæ tibi, Gonzale, tetendit retia, ut quia te non potuit, me saltem caperet istiusmodi rerum minus scientem. Coram o-

manibus Lusitanis mihi inprimis obiecit, quòd ego &  
 ipsum, & Dioscorum, & totam Abassinorum gen-  
 tem hæreseos damnarem. Respondi liberè, ab annis  
 plusquam mille (sic enim à doctis audiveram,) Abassi-  
 nos Dioscoro auctore ac duce à Romana Ecclesia, ac  
 proinde à vera fide defecisse. Eos verò à recto aber-  
 rare, & ex Scriptura sacra, & Sanctorum auctoritate,  
 Conciliorum optime probari posse. Ad hæc ille: Si  
 vestra, inquit, scriptura ita sentit de nobis novit Deus  
 quid de vobis sentiat nostra. Certò, inquam, scio Ro-  
 manæ fidei sectatores in hæreticorum numero à suis  
 Abassinis reponi, & Nestorianos haberi, quasi duas  
 in Christo admittamus personas, licet duas admitti-  
 mus naturas; id enim mihi frequenter ab ipsis falsò  
 & cum probro obiectum. Si ut nobiscum credas, quæ  
 credimus, satis ea non sunt, quæ de fidei veritate sunt  
 à Gonzalo doctè & copiosè scripta, conice oculos,  
 Imperator, in tot reges ac principes potentissimos &  
 maximos per univèrsam Europam unius fidei vincu-  
 lo coniunctos. Intellige facilius esse te unum, quàm  
 tot alios à vero deflectere. Iterum ille ad hæc, huc-  
 usque se cum Europæis regibus ac principibus Chri-  
 stum agnoscentibus pacem & Societatem conseruas-  
 se; me causam esse, cur iam inciperet aduersum ab eis  
 animum habere. Atqui ego, inquam, à Romano Põ-  
 tifice & Lusitano Rege ad se missus sum, ut hanc ti-  
 bi, quam proposui, veritatem patefacerem. Nihil est,  
 quòd pro ea confutenda non feram libenter; mortem  
 quoque, si oporteat, alacriter oppetam. Neque com-  
 mittam unquam, Deo iuvante, ut quod legi Christia-  
 næ, quam sequor, quod regi meo, à quo sum missus,  
 me debere sentio, villo metu aut vitæ periculo omit-  
 tam. Questus præterea de me est, quòd dixerim, ipso-  
 rum

rum Abuam à Turcarum Imperatore ad hæc loca mitti. Ad quod respondi, certum esse, non mitti illum à Pontifice Romano, qui omnium est maximus, & solus habet ius mittendi. Si adeò, inquit, Romano nomini ac Romanæ fidei addictus es, quamobrem hominem huc misisti, qui verbis tuis à me peteret, ut curam alicui demandarem Baptismi & Eucharistiæ sacramenta tibi ministrandi? Negavi constanter, vniquam me ab eo aut ab ullo alio Baptismum petiisse, cum octavo ab ortu die, Christiano more, sacra vnda fuerim lotus; Seiamque nefas esse hoc sacramentum, semel ritè collatum, iterum conferri aut suscipi. Eucharistiæ quidem pabulum postulasse, cum vicinus morti essem; quod à peritis didicissem, talibus in euentis, si Catholici desiderentur ministri, haud esse illicitum hoc diuino pane ab hæreticis cibari atque ex hac doctrina iterum me id facturum, si ad idem deuenerim vitæ discrimen, nec catholicum habeant sacerdotem, qui eo me viatico ad instantem mortem queat præparare. Tum ille, ideo notuisse se Eucharistiæ ministrum mihi petiti concedere, quia scriptum à Paulo est, *Vna fides, unum Baptisma*. Si ita, inquam, Paulus scripsit, quæ, obsecro, causa est, cur annis singulis baptizaris? Hæc illi interrogatio vehementer stomachum mouit. Verba igitur iactans plena furoris, gladium minaciter arripuit. Persisto immotus & animo intrepido; si quod, inquam, supplicium merui, ne inferre differas, Imperator: quælibet aduersa pati paratus sum. Nullæ me ullius terreni regis minæ, nulli terrent cruciatus; quominus summi Regis Christi prædicem veritatem. Nec alium metuo regem, præter eum, cui cum Propheta dicimus, *Domine ne in furore tuo arguas me, neque in ira tua corripas me*; qui que

potest animam & corpus perdere in gehennam. Tu, si placet, sæui, torque, occide, rem mihi feceris gratissimam. Hæc ego magna vocis contentione & vultu imperterrito. Cum talem in me animum esse cerne-  
ret, qualem nunquam antea fuerat expertus, disputa-  
tione relicta, aliò secessit. Ego Gonzale, sic existi-  
mo, Imperatorem hûc multo libentius sub durissimo  
Saracenorum iugo, quàm sub Romani Pontificis leni  
mitique imperio futurum. Et hæc semper mihi fuit  
de ipso opinio: nolui tamen prius mentem meam ti-  
bi aperire, ne aliquomodo vota tua retardarem. Ha-  
ctenus Alforisus. Ex his verò qualis fuerit, qualis ho-  
die sit Abassinorum religio, perspicuum est. Sed iam  
ad Patriarchæ profectionem.

---

*Patriarcha cum Ouiedo Episcopo & aliis sociis  
Olisipone in Indiam soluit.*

## C A P V T XX.

**T**ertio Calédas Apriles, anno salutis nostræ quin-  
gentesimo quinquagesimo sexto supra millesi-  
mum Ioannes Nonius Barretus Æthiopix Patriar-  
cha, Andreas Ouiedus Episcopus Hierapolitanus, &  
alii Societatis religiosi Olisipone soluentes varia-  
fortuna in Orientem nauigarunt. Patriarcha vehebatur  
illa ipsa naui, qua Ioannes Menesius Classis præfe-  
ctus, nomen ipsi nani Flos maris. Cum extanti vi-  
còsortio plurima commoda Menesius percepit; tum  
inprimis illud, quod cum fœda tempestas derepente  
excitata, perque dies aliquot furiosè sæuiens, nauim  
ipsam atque omnium vitâ in summum discrimen ad-  
duxi



duxisset, Patriarchę precibus absque ullius damno sedata est. Acceptam enim in vase aquam, solitis Ecclesię verbis linteatus benedicens, & partim in tumētes maris fluctus, partim in velā ac rudentes, aliásque náuis partes certa precationis formā iniiciens, effecit, vt positis ventis quiescerent maria, pacémque nauigantibus & lætitiā restituerent. Reliqua vsque in Indiam nauigatio nec citatior cursu, nec successu felicior esse poterat. Post menses enim quatuor & dies decem, quod pæne inauditum est, cum dies etiam duo de triginta, iactis anchoris in Mosambico morati essent, Goam incolumes tenuere. Inter nauigandum ægrotos, qui semper in hisce Indicis nauibus solent esse permulti, frequentissimè Patriarcha inuisebat; eorūque non verbo magis, quàm opere, labores, molestias, indigentiam, alleuabat. Si quid enim siue ad recuperandam sanitatem, siue ad leniendum dolorem, siue ad mœsticiam depellendam, cuiquam opus erat, id nullo modo ei deesset, impigritè procurabat. Confessionibus vectorum audiendis, tam eorum, qui prospera, quàm qui aduersa utebantur valetudine, sic erat intentus, vt mercede magis ad id munus conductus, quàm illud sponte obire videretur. Sæpius omnium, quotquot illa naui vehebantur, qui & numero plurimi, & conscientię ac vitę ratione erāt valde dispares, magno quidem labore, sed non minore utilitate, cum altero Societatis sacerdote excepit confessiones. Is erat Franciscus Rodericus Lusitanus, qui tum propter singulária animi ornamenta, quibus mirificè excelluit; tum quia in eadem nauigatione operam suam cū Patriarchę opera coniungens illustrem fecit Societatis caritatem, iure me adstringit, vt aliquam ipsius hoc loco memoriam relinquam. Vir fuit notę apud omnes

mnes probitatis & prudentiæ laude clarus. Non Physicas tantum & mathematicas, sed utramque etiam apprimè calluit Theologiam, & quæ speculatrix dicitur, & quam moralem, appellant. Olisipone in collegio sancti Antonij Abbatis primus ex Societate, cōscientiæ, ut vocant, castus, & splendor scientiam publicè professus est. Concionandi munus tum in Lusitania, tum in India magna omnium approbatione & fructu multos annos exercuit. Multos quoque Goanum collegium rexit. Summo ardebat & Ethnicos ad fidem & ad iustitiam impios perducendi desiderio: neque omittebat quidquam, quod crederet ad utroque salutem attinere; quo etiam nomine ita erat cognitus, ut quamvis pedum vitio præpeditus nunquam Goa egredieretur, nemo tamen alius per vastas illas orientis orbis oras illo tunc esset fama celebrior. Erat utroque captus pede; nec sustentare rectum corpus, nec mouere sine aliquo adminiculo poterat. Domi quibusdam utebatur ligneis furculis (Cruces Itali, Lusitani Muletas vocant) quibus innixus deambulabat. Iumento insidens exhibat foras, cum erat opus. Hominum manibus ponebatur in suggesto. Huiusmodi cum esset, diu multumque laborauit, ut ad Indos mitteretur; cumque illi à superiore quodam fuisset aliquando responsum, satis constare, ipsum ad talem missionem esse ineptum, desineret proinde incassum fatigari, qui ne passum vnum quidem posset absque furculis conficere. At ego, inquit, non ambulandi peto facultatem, sed nauigandi. Hæc res cum vento & velis, non pedibus fiat, satis constat, posse me ad illam sine pedibus iudicari aptum. Denique pulsus ab aliis, à B. Ignatio, cum quo tandem ea de negotio per literas egit, factam sibi proficiscendi copiam tanto gaudio est

est amplexus, ut apertissimè significarit, nihil sibi gratius concedi potuisse. Cum iam hominum humeris deportatus nauim conscenderet, actis Deo pro singulari illo beneficio palàm gratibus, ad socios, qui aderant, conuersus, Vellem, inquit, Patres, si possem, horum adminiculorum, atque horum etiam pedum effigiem aliquam in Lusitania veluti monumentum relinquare; non quidem, ut esset vllus, qui huius vilissimi homunculi sempiterna digni obliuione, vel momento temporis recordaretur; sed ut nemo vmquam esset, qui talem intuens imaginem desperaret, id se assequi posse, quod ego sum assecutus; omnesque tæci, claudī, aridi, debiles, manibus & pedibus capti, quocūque affecti corporis vicio, quacumque notati deformitate certò scirent, esse sibi in hac piscina remedium, nec ab ea aliàs excludi, quàm qui voluntate sua excludi volunt. Dum erat in nauī, simul cum Patriarcha, suis fultus furculis, corpūsque per tabulata, perque foros & per gulas trahens à vectoribus cogebat stipem, qua egenos ægrōsque ex parte iuuaret. Cum Mosambicum venit, Saracenos adiit, insulæ habitatores, ut aliquam eis, si posset, Euangelij lucem impertiret. Habuit cum eis de religione quæstiones, & contra nequissimum pseudopphetam sic egit, ut Mahumetani cū plurima dicerent deuia & pugnantia, tandem, quod impudentium hominum proprium perfugium est, rem totam risu soluerent, per ludibris iactantes stare non posse, quæ homo diceret captus pedibus; nec posse quidquam rectè ab eo concludi, qui pæne truncus esset; ac sic de re ageretur, quam manibus aut pedibus, non ratione & voce confici oporteret. Cum verò pedum vitium eo magis obiicerent illudentes, quo se victos fuisse ferebant ægrius,

Videte,

Videte, inquit Franciscus, vter deformior sit, egone, qui tantum pedibus careo, an Mahumetus vester, ipsa nequitia nequior, qui sectam vobis tradidit nec pedes habentem, nec caput. His illi puncti verbis, à risu in indignationem versi à conspectu recessere.

---

*A Mosambico Patriarcha Goam peruenit, & ibi manet, missio in Aethiopiam Oniedo.*

## C A P V T X X I.

**V**NO ferè mēse in Mosambico exacto. refectisque per eam quietem viribus, cū navigationis continuandæ tempus adesset, ad nauim Patriarcha & socij recepti, soluunt è portu, & fauoniis spiritantibus pandunt vela, cursūque prospero ac proporo immensam maris vastitatem inter Africam & Asiam tractu longissimo interiectam superantes, Goam perueniūt. A Petro Mascaregna Indico Prorege, & à cæteris, qui alicuius erant in ea vibre nominis, cum summa beneuolentiæ & honoris significatione exceptus Patriarcha est. Ipsi potissimum canonici, qui per eos dies Episcopo carebant, magnam ex eius aduentu cepere lætitiæ voluptatem; quod præter cætera haberent, qui mūnia exercere possēt Pontificalia. quorum tunc vsus maximè erat Goæ & Goanæ diocesi necessarius. Cæterum vix Goanum solum Patriarcha tetigerat, cū statim ingens quædam tristitiæ procella in hominem irruens, quod ex omnium ordinum studio & beneuolentiæ gaudium conceperat, ab eius pectore longè populit. Ex Gonzali Roderici literis agnouit, Abassinorum Imperatorem ita suis hæere erroribus, vt eos se-

cus,

cus, ac promiserat, pugnacissimè defenderet; & pertinaciter negaret, villam se vmquam Romano Põtifici obedientiam præstiturum. Res ista magis, quàm dici potest, sanctissimi viri animum afflixit; quòd hac vna ratione videret, suæ sibi Æthiopix adeundæ vel omnino interclusam esse viam, vel tanto obseptam impedimento, vt in ea aperienda satis superque sibi esset desudandum. Postquam sæpius de negotio tanto & cū Patribus Societatis primùm, & cum ipso deinde prorege multa in vtramque partem priuatim disseruit; ad multorum iudicia rem putauit deferendam. Petiit igitur à Prorege, vt auctoritate sua Concilium cogat sapientium, quorum quid in præsentī difficultate sit agendum, consultationi cõmittat. Placet petitio. Satim Prorex ad se acciri iubet tum ex religioso, tum ex senatorio ordine non paucos, prudentia & probitate insignes, qui rem ancipitem suis agitent sententiis, & quod factu optimum cuique visum, in medio ponant. Congregata in prætorio concione, ita Patriarcha primus dicere orsus est. Optimè tenes. Prorex inclyte, nec vos latet, viri clarissimi, quanto sèper studio Ioannes Rex inuictissimus & maximus contenderit, vt Abassinorum populis à recta fide aberrantibus aliquod veræ lucis subsidium per suos suppeditaret; quātūmq; iam inde ab eo tēpore, quo ignotæ terræ & ignotiora maria Lusitanorum industria & armis aperiri cœpta, & sua & Pontificis maximi auctoritate effecerit, vt miseram gentem ab suo capite pestifera diuisione seiunctam ad coniunctionem reduceret; pntreque ac putidum membrum adhibito concordix medicamento redderet sanitati. Rem ab exordio repetere, & aures vestras longa narrationum serie obtundere, animus mihi non est. Velim tantummodo considere-

tis, quid in re præfenti agendum fit, quod & Christianæ Reipublicæ dignitati, & Lusitani Regis auctoritati consentaneum videatur. Scitis Claudium Abassinorum Imperatorem accepturum se Catholicas leges, & Romano Pontifici submissurum caput ( quod pater eius David facere antea decreuerat) nō ita pridem promississe eamque fuisse causam, cūr non solum nōus ad eum destinatus sit Patriarcha, cuius opera auulsis hæresum erroribus ad sanam doctrinam & antiquæ fidei sinceritatem redire cum suis posset; sed magnifica etiam cum pretiosissimis donis decreta legatio, quam qui obiturus erat, Fernandus Sosa, vir prudentia & nobilitate nemini vestrum ignotus, magno meo dolore, ne minore rerum nostrarum incommodo, vitæ prius, quàm nauigationis finiuit cursum. Fefellit Claudius datam Pontifici & Regi fidem: spes nostras & vota elusit. Suas sic amat, vt ferunt, tenebras, ipsos vt acerbissimè oderit nuntios veritatis; periculūque sit, nec infernis agitur furiis, eosdem vi ferrōque absumat. Vereor, vt ad illam colluuiem scelerum, ex quibus aiunt esse constatum, quidquam aliud ad extremum addat, quo & sacrosanctam Romanæ Ecclesiæ amplitudinem, & Regis nostri maiestatem offendat. Ego quidem, quod ad me a tinet, adeò Æthiopiam adire non reformido, nihil vt ardentius appeteram, quàm eò deferri, vbi inter mihi commissas oues & viuere possim, & mori. Quid enim vllis deterreat aut laborum incommodis, aut vitæ periculis, cū ante oculos mentis Christum habeam pastorem summum, qui post infinita mala indignissimè tolerata animam tandem suam posuit pro ouibus suis: Vehementer igitur à te peto, optime Mascaregna, vt parari mihi quamocysime nauim iubeas, qua  
ad

ad meos traiciam Abassinos, cum quibus viuam & moriar. Eos ego, si ad sanam mentem reuocare, & Romanæ Ecclesiæ restituere non potero, debito saltem dolore, & lacrymis, dum vita erit, coram prosequar, & cum diem extremum egero, hoc vnum mihi erit inter cætera solatium, quod inter eos, qui meæ fidei crediti sunt, ad vltimum vsque spiritum firmiter perstiterim. Nemo in concione fuit, cui non visum, & à maiestate Romanæ sedis, & à Lusitani Regis grauitate alienum esse, tantum ac talem virum, tam sublimi decoratum dignitate, sine valido armatorum hominum comitatu ad eas oras proficisci, in quibus ex maximis suis laboribus, difficillimo illo tempore, fructum alium capere non posset, nisi iniquissimæ gentis probra, maledicta, illusiones, ludibria, ad quæ vulgo proclues sunt, qui religionem Christi, quam profitentur, falsis opinionibus deprauant. Fuere igitur qui sentirent, proficiscendum quidem esse Patriarchæ, sed dandam illi septingentorum saltem militum egregiam manum, qua & personæ suæ dignitatem tueri posset, & barbaro principi terrorem incutere, nequid contra ipsum impudenter machinaretur. Multo maior concionis pars eò inclinauit, vt crederet donec Ioannes Rex de mutata Claudij mente, deque statu rerum fieret certior, suamque super his indicaret voluntatem, haud esse decens, Patriarcham Goa efferre pedem. Hæc approbata sententia est. Ne tamen aut timore aliquo, aut vlla forte negligentia deserui videretur ea prouincia, quæ tanto summi Pontificis & Ioannis Regis studio fuerat suscepta, communi consensu statutum, vt relicto Nonio Patriarcha, Andreas Ouiedus cum aliquot ex Societate religiosæ Æthiopiam peteret, remque ipse tentaret per se, & cum per-

fido Imperatore liberius ageret de religione, de qua idē Imperator Gonzalum Rodericū, quodd nulla præditus esset Ecclesiastica dignitate, secum egisse; iniquè tulit, & conquestus est: ut verò ex eo decreto non modicam Nonius tristitiam, ita summam Andreas concepit animo voluptatem. Neque enim quidquam ipsi peterat optabilius accidere; cum immensam quādam sitim, qua perpetuò æstuabat, & mortales omnes iuuandi, & durissima quæque pro Christo perferendi, non alibi melius, quam apud barbaras illas Æthiopum gentes explere se posse speraret. Paucos igitur post dies consociis è Goano portu soluens in Abassiam latus discessit.

---

*Vita presenti præclaris virtutum operibus exercita finem Patriarcha imponit.*

## C A P V T   X X I I .

**E**Xtremus vitæ Ioannis Patriarchæ actus sex circiter continetur annis. quibus Goæ corpore, in Abassia animo fuit. Toto hoc tempore, donec ad metam ventum, rem Æthiopicam supremo rerum moderatori, & Indico Proregi, suo cuique modo, ardentissime commendauit. A Deo precibus assidue petit, ut illam gentem amicis oculis despiciat è sublimi, eamque Romanæ matri firmissimo incorruptæ fidei vinculo coniungat; nec patiatur tamdiu sibi ad oues suas intercludi aditum. Proregem frequenter & sollicitè precatur, ut si aliud aut non possit, aut certè nolit, vnum sibi saltem iubeat parari caturem (exigui & parum tuti nauigij genus est) quo in Æthiopiam vehatur,



hatur, nec discessum suum, suâque optata tamdiu remoreretur : se à Deo & à Pontifice maximo Christi Vicario datum illis populis pastorem ac ducem; æquū non esse, ut tam longo ab iis tempore, tantoque locorum intervallo sit disiunctus. Si quid periculi, siue à Tūrcis occurrat in mari, siue ab ipsis Æthiopibus in terra, id subire se & velle libenter, & iure debere, ne contra Christi præscriptum boni pastoris partes & officium deserat. Ipsum igitur per æterni Numinis maiestatem, perque omnes cœlites immortales orare & obsecrare, ne vllam sui aut dignitatis suæ habere velit rationem; abire se permittat sine classe, sine militum præsidio, sine vllò comitatu, satis per se tutum esse, quem ipsa pericula & res aduersæ, quo plus afferunt damni, eo faciunt illustriorem. Cū Prorex, quia sciebat Abassinorum Imperatoris ac totius illius populi voluntates ipsa obstinatione ruere in peius, & portus illos, ad quos appellere nostri ex India poterant, Turcarum armis occupari, omnesque ad terram aditus eorundem classibus præcludi, hisce aliisque talibus Patriarchæ precibus flecti se nequaquam lineret; tentauit Ioannes Patriarchatus dignitate se abdicare: & ea super re ad Ludouicum Gôzaluiū de Camera, veterem in Africana missione socium, in Lusitaniā scripsit. Eius epistolæ hæc sunt verba, ad rem præsentem attinentia, ex Lusitano sermone in Latinum fideliter conuersa. Obsecro te propter Deū, mi Ludouice, ut qui magna ex parte causa fuisti, cui graue hoc Patriarchatus onus, quo pressus planè succumbo, hisce debilibus humeris imponeretur, eius quoque alleuandi mihi causa sis. Eris autem, si diligentissimè cures, ut à serenissimo Rege ad Indicū prætorem mittantur literæ, quibus ipsi præcisè man-

det, ut eo modo, quo iudicabitur fieri Deo gratias, nostram ad Abassinos profectionem quamprimum expediat. Quod si & Rex ipse, propter præsentem rerum statum, in eadem, in qua eius prætor, sententia sit, nobisque nulla ratione in Æthiopiam eundū putet; duo reliqua sunt, quæ ab ipso mihi impetrare totis viribus conabere. Primum, ut per legatum suum, quem habet in vrbe, à summo Pontifice petat, ab hoc me pastoris munere omnino eximat; mihi que ut ab eo me abdicem, faciat potestatem. Alterum, si Æthiopica liberet procuratione, quod, nisi fallor, Patris nostri Ignatij consilio & consensu fiet; nullo modo alia mihi demandetur. Imò etiam & à te & à cæteris omnibus Societatis nostræ religiosis per ipsa Christi vulnera, perque acerbissimam mortem, quam est in cruce passus, summè contendo, ut Regem ab hac mente quam longissime auertant, nec patiantur tanto me salutis periculo exponi. Cur enim ero hac in parte aliis inferior, ut potuerint illi eas effugere, ad quas expectebantur dignitates, nō possim ego, qui sum prorsus ad omnia ineptus, atque ut ab huiusmodi me exoluerem curis, Societatis institutum sum amplexus? Debebantur ista quidem, non infiteor, peccatis meis, propter quæ, ut nihil est tam durum, quod pati non merear, ita etiam, ut debitas eorum luam pœnas, iustissimum est. Et verò satis luo; cū innumerabiles oues fidei meæ curæque sint commissæ, quæ neque pasci possunt à me, neque volunt. Hæc ex illa Ioannis epistola. Interim ille, dum ex Lusitania responsum, aut aliquem ex Æthiopia lætiorem nuntium expectaret, cum seruabat vitæ modum, qui quanto erat ab omni honoris specie remotior, tanto maiorem ipsi conciliabat apud omnes beneuolentiam, maiorem

excita

excitabat admirationem. Nullus præteribat dies, in quo rem sacram non faceret. Sex quotidie horas diuinarum rerum contemplationi dabat. Veluti vnus de cætero sacerdotum numero, absque vlllo ordinis & dignitatis discrimine tam Indorum, quàm Lusitanorum confessiones in templo audiebat. A prandio, cum tantisper à grauioribus negotiis quiescendum erat, ægros, si qui domi essent, inuisebat, & dulcibus colloquiis recreabat. Interdum eodem tempore culinam petebat, vt si quid tunc esset agendum, coquum iuaret, vel vtilis de iis, quæ spectant ad animum, sermones cum illo conferret. Suis ipse manibus vestes suas, cum erant detritæ, refarciebat. Cubiculum suū, & domum reliquam, vt quiuis alius, scopis munda-  
bat, & sordes colligebat, atque ad destinatum locum deportabat. Peregrinorum frequenter, nonitiorum verò statis diebus, flexo genu lauabat pedes. Cupiebat maximè, proque sua virili conabatur, vt quàm optima esset prima tyronum educatio, quod ab ea reliquam religiosæ vitæ institutionem, & totum ferè progressum pendere crederet: & ob hanc rem quà exemplo, quod vires habet ad mouēdos animos magis efficaces, quàm consiliis & monitis ad omnium virtutum, atque imprimis ad veræ cuiusdam ac solidæ animi submissionis amorem, propriique odij studium eos incitabat. Legum omnium, morum, consuetudinum, atque institutorum, quibus gubernari Societas solet, erat obseruantissimus. Qui præter Pontificem maximum neque in Societate, neque alibi vllum habebat magistratum, ceteri parere aliqua lege teneretur, sic vnumquemque venerabatur, vt obedientiæ iure omnibus videretur subiectus. Nec verò solum Indiæ provincialem, & Gbani collegij rectorem ac mini-

strum mirabili obseruātia reuerbatur; sed etiam domesticarum rerum adiutorem quemdam, quoddam ministro esset, quoties videndi occurrebat occasio, ipsi assurgere, caput aperire; & aliis externis intimæ demissionis signis ita officio se colere, ut homo ille, ne verecundari toties cogeretur, Patriarchæ cōspectum, quoad posset, deuitaret. Otiosa, & superflua, quæ ad animi vtilitatem non conducerent, aut dixisse aut fecisse, à nullo vñquam animaduersum. Neuinem ipse nec iocosè vñquā perstringebat, neque ut quiscumque coram se quemuis alium, siue præsentem, siue absentem vel leuissimè perstringeret, vlla ratione patiebatur, ex Hieronymo dicens, detractoris & detractionem probantis parem esse culpam. Quamquam erat à Societatis magistratibus statutum, ut habita ratione dignitatis, in victu & cultu à cæteris distingueretur; ipse tamen nulla vñquam in re quidquam vsurpabat, in quo vel à minimo quouis domestico videretur differre. Quidquid habebat ex annuis redditibus, totum id, nulla sibi parte retenta, ad subleuandos pauperes atque ad alia pietatis opera conferebat. Externa illi oris ac totius corporis compositio rata fuit. Vix vñquam visus est alicuius vultum rectè aspiceret. Cùm loquebatur cum aliquo, quisquis is esset, oculos tenebat moderatè depressos, & ad omnem modestiam religiosè compositos. Talis Ioannes Patriarcha fuit. Neque de eo quidquam à nobis dictum, quod ab aliquo acceperimus incertæ fidei auctore, sed ab iis ipsis, qui probè hominem nouere, eiùsque amicitia & familiaritate in Lusitania & in India multum diùque vsi sunt. Aderat tempus, cùm summo Imperatori placitum, transferre militem suum de laboriosa mortalis vitæ statione ad æternam quietem. Siue igitur

igitur Patriarcha à Deo fuerit præmonitus, extremū sibi instare diem, siue id atcano aliquo instinctu præsenferit (humanus enim animus euentuum sibi suorum certus esse vates aliquando solet) siue, vt immensas, quibus assidue angebatur, Ecclesiæ suæ sollicitudines aliqua ex parte releuaret, secretiūs agens cū Deo; transmissō Goano fluuio in Chioranum, vicinam insulam, vbi Societatis templum est, solitarius secessit. Eo loco cū se totum ac penitus ad contemplationē rerum cœlestium atque ad preces & supplicationes conferret; magisq̃ue gemitibus & lacrymis, quā cibo alio pasceretur, ex malè affecto iecinore acutissimam febriū morbūmq̃ue lethalem breui contraxit. Medicorū iudicio ad Goanum collegiū reductus, paulatim viribus & vitali vigore cœpit destitui. Tum confessionis, Eucharistiæ, & extremę vnctionis munitus sacramentis, à Melchiore Carnerio Nicæno Episcopo ritè ministratis; verbis suauissimis compellans Christum, ab eoque peccatorū veniā & misericordiam implorans, inter circūstantiū sociorū fletus & singultus, relictis in medio corporis exuiis, liber in cœlum euolauit, decimo tertio Calendas Ianuarias, anno à partu Virginis millesimo quingentesimo sexagesimo secundo. Funeris exequias magno omnium ordinum concursu & dolore profecutus est Goanus Antistes apparatu pontificio: lignea capsula serico cōtecta stragulo cadauer excepit; adque in Goano Societatis templo conseruat ad extremum mundi diem glorioſo animo fideliter redditura.

*Libri secundi finis.*



DE  
PATRIARCHA ANDREA  
OVIEDO, ET SOCIIS,  
LIBER TERTIVS.

---

*De ingressu Ouiedi in Societatem & in virtutibus progressu.*

CAPVT I.

**A**NDREAS Ouiedus patria Castellanus fuit, Ileschæ natus, quod oppidum est in agro Toletano ab ipsa Toleti vrbe quindecim prope, & à Mantua Carpetanorum, quæ nunc Madritium dicitur, totidem ferè milliaribus distans. Adolescens Louanij in Belgio Philosophicis & Theologicis literis accuratè operam dedit, & egregiè profecit. Cùm Petrus Faber à Paulo III. Pontifice maximo ad Alemanicos conuentus cum Mutinensi Episcopo missus Louanio transiret, hunc Andream reperit, quem cum octo Belgis in re literaria bene instructis, atque ad negocia

cia Christianæ religionis idoneis, in Societatem recepit, & ad Simonem Rodericum in Lusitaniam misit. Belgarum nomina hæc sunt: Hermes, Leonardus, Iacobus, Daniel, Cornelius, Thomas, Maximilianus Capella, Ioannes Couillonius, is quem postea serenissimus Boicorum Dux ad Concilium Tridentinum Theologum suum delegavit. Ad eos additi insuper Hispani duo, Moses Ioannes Aragonius, & Franciscus Strada Castellanus. Hunc Neapolim ex Hispania euntem, ut aulicam disciplinam, quam deseruerat, cum bellica commutaret, B. Ignatius ex Cassinate monte Romam rediens, obuiam habuit in itinere; & breui quidem, sed efficaci mollitum sermone transtulit ad militiam Christi. Illum Faber ipse ex itineris socio, instituti quoque sui socium effecit. Cum enim ex oppido Ocagna Toletum proficisceretur, Maria & Ioanna Caroli V. Imperatoris filiae, quarum prior Maximiliano Cæsari II. posterior Ioanni Lusitaniz Principi, Ioannis II. filio, in matrimonium postea locatz sunt, Mose Ioanni mandarunt, ut se Fabro Toletum usque comitem daret. Ille mandata exequens, ita suauissima Fabri consuetudine captus est, ut cum ab eo diuelli non posset, à principibus fœminis, quibus & à sacris erat, & valde carus, facultatem impetrarit in Germaniam Fabrum comitandi, & eius viuendi rationem suscipiendi. Omnes igitur hi, de quibus Oniedi causa memini, anno salutis millesimo quingentesimo quadragesimo quarto fuere à Fabro missi Conimbricam, quod tunc, uti in commune quoddam sociorum receptaculum, ex omnibus ferè Europæ partibus plurimi concurrebant, ut literis & virtutibus abuti, in varia orbis totius loca inde postea diuiderentur. Ita inter cæteros Andreas emi-

nebat, ut submissione animi, odio sui, corporis maceratione, humanarum rerum contemptu, cederet nemini. Eius sanctitatis fama non Lusitanis conclusa limitibus est; Romam breui peruasit, & Ignatij Loiole implevit aures. Hinc factum, ut cum B. Pater virum quaereret idoneum, qui Gandiensis Collegij prima iaceret fundamenta, Andream ad id munus destinarit; cuius & assignatione iussuque Fabri, qui tunc in Hispania erat, anno insequente Gadium perit, Collegium inchoat, primus eius rector instituitur. Inter cetera virtutum opera quibus in ea urbe rem Christianam magnopere iuuit, illud vnum fuit, quod est omni mortalium generi valde salutare, ut non seculares tantum personas, verumetiam religiosas, & potissimum moniales, sumpto ab iis, quae praeerant, exordio, coelestium rerum meditationibus diligenter exercuerit. Quam vberes vero animorum fructus hac ex re collecti sint, inde notum; quod alioquin bene morata ac bene instituta ciuitas in aliam transmutata vix seipsam agnosceret. Tale autem tamque ad reparandas & augendas animi vires opportunum remedium, quod aliis Andreas adhibebat, haud patiebatur deesse sibi. Frequenter igitur cum paucis tantum panibus, & simplicis aquae amphora, abdebat se in cubiculo; ibique dum vigiliis, flagris, ieiuniis extenuabat corpus, diuinis epulis animum saginabat. Ferre hoc, humani generis hostis, qui bona semper opera inique fert, nulla ratione poterat. Saepius hominem inuadebat diuina meditantem, eo immanius, quo magis erat contemplationis captus dulcedine, ignominiosis increpabat verbis, tundeat pugnibus, arrepto flagello duriter verberabat, tantaeque atrocitate in eum sauebat, ut clamores aliquando ab inuito extorqueret.

Qui



Qui prope erant, & ipso furentis dæmonis strepitu, & patientis hominis vocibus excitati, accurrebant nonnūquam ad cubiculum, operam illi suam, quacumque in re opus foret, pollicentes; quos ipse vultu blando & grato animo excipiens, ita ab se remittebat, vt facile significaret, eo tibi cum hoste certamen esse, qui sola vi cœlesti superari posset. Quæ ad ista Ouiedus addebat, vt corpus animo perfectissimè subiiceret, etsi erant admiranda, fuere tamen ipsi per totam vitam communia, nec semel tantum à nobis memoranda erunt. Tamdiu Gandiæ fuit, donec Franciscus Borgia Gandiensium dux, vt sociorum numero ab B. Ignatio adscriberetur, ipso comite Romam petiit. Eò vbi cum Duce Andreas peruenit, statim ab eodem Ignatio Neapolitani Collegij rector creatus, paucos intra dies vrbe relicta Neapolim discessit.

---

*Creatus Andreas Episcopus & Nonij Patriarchæ successor mira præbet submissionis animi exempla.*

## C A P V T II.

**P**ER id tempus, quo Andreas Neapolitanum Collegium Rector administrabat, Ioannes III. inuictissimus Lusitaniæ rex, renouata Æthiopiciæ expeditionis sollicitudine, viros ex Societate quærebat, vitæ sanctimoniam & literis præcellentes, quos in Abassiam cum fructu mitteret. Potestatem à summo Pontifice acceperat, Æthiopiciæ Patriarcham deligendi, & vnum insuper, vel alterum, qui esset Patriarchæ, dum viue

viueret, adiutor, quique mortuo in eadem dignitate & procuracione succederet. Re cum Ignatio Loyola per literas communicata, rex ipse in Lusitania Ioannem Nonium Barretum, quem ex Mauritanica missione & aliunde probè norat, Patriarcham creat, successorem nominandi curam Ignatio relinquit. Is cum Andreæ Ouiedi virtutem multis iam in rebus exploratam perspectamque haberet, nec dubitaret, quintalis esset vir, cuius neque summissio in dignitate periclitaretur, nec laborum magnitudini animus subcumberet, eum ad Episcopatum legit, & socium ac successorem Patriarchæ Nonio adiunxit. Ne verò oblatum recusaret honorem, pro imperio & potestate mandauit. Andreas, etsi ipsum dignitatis titulum nimis quidem grauare, quæ tamen cum eo munere coniuncta esse mala præuidebat, labores, æramnas, sollicitudines, pericula, & cætera generis eiusdem libentissimè amplectens, sine vlla contestatione Ignatij iussis obtemperauit. Neapoli igitur in Lusitaniam quamprimum profectus Olisiponem peruenit. Ibi simul cum Patriarcha Barreto, anno millesimo quingentesimo quinquagesimo quinto, in eo, cuius supra meminimus, sanctissimæ Trinitatis templo, Hierapolis titulo insignitus ad pôtificiam euehitur dignitatem. Quæ supra Barretum diximus post gradum Patriarchatus ad hominum exemplum & vtilitatem, domi forisque præstitisse, eadem prorsus post honorem Pontificium præstitit Andreas; tanto vterque ardore & alacritate, ut de caritate in Deum & homines, de submissione animi, de virtutibus cæteris inter se contendere viderentur. Itaque pœnitentiæ sacramentum & in templo valentibus, & ægris in sua cuique domo, locisque aliis frequentissimè Ouiedus ministrabat. Cum ire foras

foras opus, non secus ac quiuis alius de Societate pontificiis insignibus communi pallio rectis, vno tantum socio ibat comitatus. In triclinio cibos accumbentibus apponebat, vt reliqui; coquinæ officia obibat tanta facilitate, quanta vix alius; sternebat ægrotis lectum; vertebat domum; cætera domestica ministeria, quæ erant natura aut æstimatione viliora, maiori studio prosequabatur. Aliorum pedes abluere magno habebat in pretio, eo quod munus illud Christus optimus maximus, summus Pontifex, tum maximè præstitit, cum Apostolos suos creauit Episcopos; exemplo docens episcopalem dignitatem ex re tali decorem capere, non turpitudinem. Aded verò abluendorum pedum ministerio & delectabatur simul & honorabatur, vix vt vllus aliunde ex sociis adueniret, cui id officium ab alio exhiberi pateretur. Carebat eo tempore Olisiponensis domus aqua ad potum vsusque alios necessaria; eam ipsi religiosi foras quæsitum ibant ad vicinum puteum, ex quo ferreis haustam situlis, in fistiles deinde amphoras infusam, dorsoque impositam, onerati asportabant. hoc se in opere cum reliquis sociis Hieropolitanum Antistitem, cum ad abluendos hospitum pedes indigeret aqua, iterum & sæpius exercuisse, multoque ex eo magnificentius ac studiosius ab omnibus habitum, nobis compertum est. Aded mentis submissio in dignitatibus eminens conciliat animos, vt quod se magis demittit dignitas, maiori simul in honore & amore habeatur.

*Andreas*

*Andreas Eborensē diœcesim, Henrici principis rogatu, cum fructu & exemplo lustrat.*

## CAPVT. III.

**C**VM illo ipso anno millesimo quingentesimo quinquagesimo quinto nondum in Lusitania parata essent illa, quæ ad Æthiopicam expeditionem censebantur necessaria, Patriarchæ & Episcopi profectio regis imperio in annum insequentem reiecta est. Hinc Henrico Cardinali, regis fratri, principi æterna digno memoria, qui tunc Eborensis erat Archiepiscopus, data occasio ab Andrea postulandi, vt Eborensē diœcesim lustrare vellet, & eos, quibus esset opus, sacro confirmationis Chrismate inungere. Cognita ille tanti principis voluntate, nihil est cūctatus. Olisipone profectus Eboram venit. Sacris ibi ordinibus multos primū initiat, ad cætera deinde diœcesis loca iturus, vnum sibi dumtaxat, eūque ex Societate, itineris comitem feligit, & vile accipit iumentum, quo ferre libros aliquot & quandoque suam ac socij lassitudinem leuare possit. Valde laboratum ab Henrico est, vt mulas & equos atque eū acciperet famulantium comitatum, qui videretur Episcopum decere. Ad eū rei vtrique firmus restitit, vt mitissimus princeps, tum ne carissimum sibi hominem, quem ob sanctimoniam vitæ summopere suspiciebat, aliqua molestia afficeret, tum vt singulari noui Antistitis exemplo memoriam refricaret Pōtificum eorum, quos Christi Ecclesia, cū ab ortu suo progrediens feliciter

ter adolefceret, ſanctiſſimos habuit & integerrimos, omni cohibita violentia tam piæ tandem conſtantiz cedendum putauerit. Siquis erit, qui ſacris hiſce dignitatibus adimere velit externum illum rerum apparatus, quo ipſæ eminere vulgo ſolent, credâtque pauperes, humiles, opibus & copiis omniſque potentia deſtitutos debere eſſe Eccleſiæ principes, is ſanè iniquiſſimè ſentiat; cùm ad ſplendorem ordinis, ad commendationem muneris, ad obſervantiam dignitatis, ad refrænandam impiorum ſuperbiam, audaciã, pertinaciam, atque ad omnes furentium impetus & conatus cohibendos, vi ſæpe opus ſit & potentia, quã niſi timeant, & quandoque experiantur improbi, animos manûſque ab ſcelere nequaquam abſtineât. Submiſſi tamen cuiuſdam animi, atque hæc, quæ magna & excelsa putantur, deſpicientis ad continendos in officio ſubditos vis tanta eſt, vt quod nonnumquam violentiſſimis potentiz armis fieri nequit, inermi iubentis principis modestia facile obtineatur. Et verò opus erat Ouedo, in eà, ad quam fuerat euectus, Epifcopi dignitate, huic humili viuendi rationi aſueſceret, ne ab amplitudine poſtea deiectus ferre æquo animo non poſſet. quæ ipſum, ſtatim, vbi in Æthiopia veſtigium impreſſit, omnis generis mala cateruatim inualere. Sed de his in loco dicendum. Illum modò per Tranſtaganam comitemur regionem, pagos & oppida luſtrantem. Cùm igitur videret Henricus Andree conſtantiam in admittendo Pontificio apparatu vinci non poſſe; ne nonnemo eſſet, qui teſtificaretur miſſum à ſe ad cõferendum Chriſma, quique conferenti miniſtraret, vnum illi adiunxit Capellanium, cui etiam ſecretò præcepit, daret diligenter operam, ne vlla in re Epifcopo deceſſet, nèc aliter illi, quàm ſibi ipſi,

ipsi, ubi opus esset, famularetur. Hinc inter Andream & Capellanum assidua quædam erat, sed vtrique ex parte pia atque laudabilis, contentio, ac propriè dissidium. Capellanus Episcopum præire, hortari populum, ut venientem exciperet, Ecclesiasticos, ut domum ab officiis redeuntem comitarentur; comòdum illi hospitium, & necessaria ad victum præparare. Andreas contra nihil horum pati, nihil vel honoris, vel commoditatis admittere; socium monere, ut homines doceat, dum cum ipso loquentur, à splendidis titulis, & ab omni honorifica appellatione abstineant, satis esse, veluti simplicem Sacerdotem reuerentiæ ipsum vocabulo appellare. Vicit in omnibus inuicta Episcopi modestia. Toto enim in itinere numquã ephippiato equo vel mulo, aliquoties citellato iumento defatigationis lenandæ usus est. Numquam permisit aut solemni pompa (uti solet) venientem se excipi, aut ad diuersorium redeuntem à clero deferri. Ad còmunia semper diuertebat pauperum xenodochia; cum pauperibus semper sumebat cibum; neque vllus vnquam aut tam vilis, aut tã sordidus ab ipso habitus, quem indignum æstimaret, qui in eadem secum mensa assideret. Neminem, ne temporis quidem puncto coram se aperto capite esse patiebatur, cum apud animum suũ tanti omnes faceret, ut nulli se crederet anteferendum. Diebus singulis priusquam exire è loco, in quo noctu fuerat, rem diuinam faciebat. Toto deinde itinere effundendis precibus, & diuinis rebus meditandis occupabat animum ac tempus. Eos, ad quos diuenerat, antequam abiret, mercedis loco ad rectè viuendum breui sermone hortabatur, optimis consiliis aduersum scelera muniebat, ad excitandum in animis studium pietatis aliquot deprecationunculas edoce

edocebat. Confirmationis sacramentum in omnibus parochiis, quibus erat opus, ministrabat; dum iter faceret, si quam domum, aut viculum videbat ab eo, in quo sistendum erat, loco seiunctum, illuc ex itinere conferebat sese, & vocem contendens, omnes monebat, ut templum peterent, in quo esset Chrismatis sacramentum celebrandum. Quàm verò accuratè in hoc munus incubuerit, illud argumento est, quòd ne quis non vinctus relinqueretur, sæpe ad altam vsque noctem in templo erat, donec esset omnibus factum satis. Id etiam tunc evenit, cum iam de loco vno ad aliud descessurus afino insideret, audiens adductum de nouo puellum, qui posset facile in tempus aliud differri, nihilominus subito desiliens templum repetiit, & sacro Chrismate puerum confirmavit. Antequam inungendi aggredieretur ministerium, omnes, qui aderant, paucis hortabatur ad frequenter scelerum expiationem. Persuasit multis, quibus intellexit opus esse, ut à prima ætate repeterent confessiones, idque ut facilius facerent & utiliùs, ad Eborense illos collegium expiandos misit, & erudiendos. Inter alios, quos reperit animi sui perniciosè oblitos, Æthiopica ancilla fuit, planè stupida, nec hebes minus, quàm pecus. Quindecim erant anni, cum facto fuerat mundata lauacro: animi sordes pœnitentiæ sacramento numquam prorsus deteraserat. Hanc ille maximo cum labore & molestia fidei primùm institutis imbuìt; ad confessionem deinde præparauit; tunc confitentem audiuit; ad extremum sanctæ confirmationis oleo roborauit. Cætera quæ in hoc genere à diligentissimo quoque fieri solent, sic ille, quocumq; in loco fuit, studiosè & exquisitè perfecit, ut nec optari quidem amplius posset. Sed operæ erit, quædam hinc meminisse, quæ in hoc itinere ipsi

contingere. Quodam in oppido magnopere laborabant primates quidam, ut ad hospitium diuerteret, quod ipsi, ut in tali loco, magnificè apparauerant; cum firmiter resisteret, & pernegaret alibi se, quàm cum pauperibus habitaturum; mirari illi, atque etiam dicere, non solere Episcopos in huiusmodi verticulis hospitari. At ego, inquit, scio, xenodochium esse locum valde honestum & splendidum, cum domicilium sit sanctissimæ paupertatis, cuius hospitio conditor ille rerum, cum ad homines homo venit, excipi voluit. Sed agè, demus vobis ad hæc communia mendicorum, hospitia non solere Episcopos diuertere, quid obsecro vel publicæ rei, vel priuatæ cuiuspiam damni erit, si ab vno me hæc incipiat consuetudo? Obmutuere nobiles illi viri, non ratione magis, quàm Episcopi modestia victi. Aliquando sub noctem ad oppidulum quoddam ignotus peruenit. Is, qui xenodochio præerat, affirmabat lectum ibi non esse, in quo posset quiescere, pergeret proinde aliud, non defuturum ipsi locum commodiotem. De lecto, inquit, nulla tibi cura sit; quando alibi non potero, inter ipsos ero medicos: nam & ego vnus ex illis sum. Non dixit tantum, sed etiam fecit; cum illa enim hominum facie, vili ac sordido lectus stragulo, humo pro culcitra, librorum sarcina pro cervicali vtens, noctem integram lectus transiegit. Alio loco, vbi quoque ignotus erat, nullis precibus impetrare à Xenodochio poterat, ut admitteretur. Instabat supplex, capite aperto, se quolibet exiguo domus angulo esse contentum, nec velle amplius, si hospitium illud ad recipiendos pauperes esset institutum, se pauperem esse; si lectus desit, posse se in rudi tegere, vel etiam nuda humo cubare; ne cui verò fastidio aut in re vlla impedimento sit, diligenter operam

da



daturum. Dum sic Andreas tenebroso iam ac pluuio  
cœlo cum Xenodocho ageret, manu vna pileum, al-  
tera iumentum capistrum tenens, quidam accessit, cui  
à Capellano præparandæ domus imposita cura erat.  
Hic leuiter primùm hospitium Episcopum inuitare; de-  
in repugnantem urgere; tandē omni rationum & pre-  
cum ope uti, ut in præparatam domū illum pertrahat.  
Sed nihil effectum. Obtinuit Andreas, quem opta-  
bat, inter pauperes locum, pro quo non illum dumtaxat  
hospitium, sed magnificatissima Regum palatia  
floccipendebat. Cū iam Transaganae regionis non  
exiguam partem hoc modo perlustrasset, princeps  
Henricus, ad quem & multorum literarum, & longè latè-  
que vulgata per eam prouinciam fama rem omnem  
detulerat, reputans haud æquum esse, tantum virum la-  
bore tanto, tantisque incommodis sua causa vexari,  
vnum mittit ex suis, hominem industrium & rei pe-  
ritum, cui strictè mandat, ut inuito etiam ac repu-  
gnanti paret, & subministraret omnia, quæ non modò  
necessaria, sed etiam commodà videbūtur; nec omni-  
no patiatur, vel in re minima quidquam ipsi euenire,  
quod pontificiæ dignitati, & Andreæ meritis consen-  
taneum non sit. Præstò se homo ante Episcopum si-  
stit, & cur veniat, quæve sit principis sui voluntas, ex-  
ponit. Sed neque hac ratione quidquam efficitur. Af-  
firmat Andreas non aliter se, quàm ut antè egerat,  
deinceps acturum; frustra ergo de se esse sollicitum;  
neque ullam maiorem sibi ab eo posse molestiam in-  
ferri, quàm si sua causa ullam suscipiat molestiam: nō  
esse putandum, velle Henricum, ut ipse ab instituto  
suo recedat, plūsve corpus curet, quàm animum, aut  
suar potius, quàm communi utilitati, & Dei honori  
deseruiat; haud par esse credere, æquissimo principi-

gratum fore, vt oblatam sibi de Deo deque hominibus benemerendi materiam aut omnino tollat, aut aliqua ex parte imminuat. Itaque si sibi commodè esse velit, desinat de ipsius commodis cogitare. Hac Ouiedi oratione sic obstructum hominis os, & ligatæ manus, vt non sit ausus quidquam amplius hac de re mutire, aut agere. Admiratione igitur obstupescens ad Henricum redit, sanctissimi viri constantiæ & virtutum reliquarum assiduus prædicator. Interim Andreas, quod erat procurationis suæ reliquum, pari cura & vitæ exemplo perficiens, diuinis & immortalibus meritis cumulatus Olisiponem redit, paulo post in Indiam profecturus.

---

*Ex Lusitania Goam, inde in Aethiopiam Ouiedus proficiscitur.*

#### C A P V T IV.

**P**atriarcham Nonium, Andream Episcopum, & alios de Societate, numero duodecim, pluribus distributos nauibus, anno à partu Virginis millesimo quingentesimo quinquagesimo sexto, Olisipone in Orientem soluisse, iam suprà à nobis commemoratum est. Quo autem modo inter nauigandum se Ouiedus gesserit, qualis in se, qualis in vectores fuerit, cogitent, qui volent. Meminerint tamen robustas ac valentes eius animi virtutes nihil fuisse maritimis laboribus debilitatas, sed multo firmitus stabilitas, perque beneagendi occasionem creuisse in eo caritatem, despicientiam sui, iuuandi alios studium, tolerantiam casuum aduersorum, contemptionem fortunæ, magna

gnanimitatem, constantiam, cætera animi decora, & prælidia; nec in mari, quàm in terra minora dedisse omnium documenta virtutum. Si dixerò omnibus in rebus, quæ rectè fieri in naui possunt, nemini fuisse inferiorem, superiorem plurimis, parem summis, nihil dicam fide indignum, neque eam mihi difficile habebit, cui Andreas notus. Quidquid enim excogitari potest, quod vel ad disciplinam morum, vel ad remediũ & solatium ægrotantium, vel ad commodum valentium, vel ad ullam sanctimonix partem, conferre censeatur, id ab ipso cumulatè & eximiè præstitum, literarum monumentis proditum est. Quare ne sapius eadem vel affinia reperantur, nauigationem totam silentio prætereo, qua ille peracta Goam tenuit. In ea vrbe cum paululam quiesset, expeditionis Æthiopice plenus spe, quæ audissimum animum nequaquam fefellit, in concilio plurium grauiũque virorum à Prorege habito decretum est, vt Patriarcha Nonius in India maneret, ad Abassinos Andreas cum quibusdam aliis proficisceretur. Talis ego decreti causas, & rei totius seriem libro superiori, cum de Barreto agerem, quantum ibi visum, explicauì. Anno igitur insequente millesimo quingentesimo quinquagesimo septimo, Idibus Februarij, cum quinque aliis ex Societate religiosi, moribus & vita probatis, atque ad subeundas superandasque aduersarum rerum procellas inprimis idoneis, armatam biremem conscendit; ac simul cum classe ad maris custodiam missa ex Goano portu in Æthiopiam soluit. Sociorum nomina hæc, Antonius Fernandius Societati in India adiunctus, Emanuel Fernandius, Andreas Gualdanes, Gonzalus Cardosus, Frãcisus Lupius ex Lusitania profecti. Extremi duo in ipsa postea Æthiopia sacris ordi-

nibus

Z 3

nibus initiati sunt. Præter hos erant in Andree comitatu viginti circiter Lusitani, quos Proregis consilio acceperat, ut apud gentem illam in hoc qualicumque apparatu aliqua esset commendatio pontificiæ dignitatis. Omnia tam quæ ad viam, quàm quæ ad rem diuinam necessaria, Episcopo & sociis Prætoris imperio ex regio æratio satis superque suppeditata. Et à Turcis prædonibus prospera, & ab impetu ventorum tuta vsi nauigatione, in ipso Erythræi freti sinu portum tenuere, Arquicho oppido coniunctum: ubi exscensione facta, pacificè & beneuolè ab incolis recepti sunt. Ut autem in Æthiopiam tunc ierint, cursumque secunda nauigatione confecerint, ac sine periculo & difficultate portum appulerint, singularis quidam fuit diuinæ benignitatis fauor, & demonstratio. Nam si dies dumtaxat quinque serius peruenissent, tentare Abassiae ingressum absque euidenti vitæ discrimine nequirent. Quarto enim Nonas Aprilis insulam maris rubri Mazuam, quam Ptolemaidam ferarum olim dictam dixi, ingenti armatorum manu Turcicæ classis præfectus occupauit. Ferebat hic suppetias regulo Zeilæ, nactusque opportunam ea loca inuadendi occasionem, non solum Mazuam, sed & oppidum Arquichum è regione positum, quod solum ex maritimis Abassino parebat, facile cepit, atque ita milite & arce muniuit, omnesque oræ illius aditus & exitus interclusit, ut annos plurimos aut illuc ingredi, aut inde egredi, neque Lusitano, neque alteri Christiani nominis professori concessum fuerit. Minus æquè de diuina prouidentia sentire videbitur, qui non sentiat peculiari eius consilio & nutu factum, ut cum Goæ tam variæ tamque discrepantes extiterint optimatum de hac profectione sententiæ, multique omnino

omitten

omittendam , plurimi in tempus aliud differendam dicerent, statutum tamen sit, iis ipsis , qui statuerant, pæne inuitis ac repugnantibus , vt quamprimum cum sociis Andreas proficisceretur : quod nisi tunc fieret, necessum fore , vt illæ nostratium Christianorum reliquiæ, quæ tunc apud Abassinos erant, & quasdam quasi inter mortuas veræ fidei scintillas egrè fouebant, illorum erroribus oppressæ tandem extinguerentur. Effectum igitur summo Dei beneficio , vt eo maximè tempore Ouiedus & socij Abassiam tenuerint , ne per annos insequentes Lusitanorum posteris ad conseruandam augendamque quam à parentibus acceperant, Christi fidem, necessaria deesset institutio. Nihil enim, quamdiu Patres illi in viuis fuere, non sunt aggressi, & passi, vt inter tot tamque noxios superstitionum vepres, multiplici & erratico serpentes lapsu , vineam illam non ita quidem tunc latè diffusam, sed paulatim increscentem, ab omni contagione puram illæsamque seruant. Quos autem labores, quas difficultates, quæ vitæ pericula, & in hac Lusitani generis propagine excolenda , & in ipsa Abassinorum gente ad frugem meliorem, atque ad fidei veritatem reuocanda ; quoad cuique vita fuit, subierint , narratu difficile est. Traiecit rei fama immensam Oceani vastitatem , & vniuersas Orientis oras, longo maris terræque interuallo disiunctas, ingentis rumore penetrauit ; atque Alexium Menesium Gozum tunc Antistitem, Indiarum primatum, nunc Archiepiscopum Bracharensem, primatem Hispaniarum, virum cum genere & literis , prudentiæ & pietatis laude clarissimum vehemèter mouit, ne tam suauem & gloriosam talium virorum memoriam iniuriis temporum sineret obliterari. Ergo Michaeli Syluio, suo in

illis Æthiopiarum partibus generali Vicario commisit, ut in Andrea & reliquorum à Societate sacerdotum vitam morésque diligentissimè inquireret, curarétque ab incorruptis atque integris testibus recognoscere quas res præclare gesserint, qualè humanarum rerum cursum decurrerint, quidquid denique esset, à quorum sanctimonia habere posset apud Deum & homines commendationem, hoc Syluius accuratè & ex fide præstitit; multaque reperit, quæ verè testantur sic eos in illo durissimo Æthiopiarum exilio traduxisse vitam, ut dubitandum non sit, quin inter summos viros, atque omni memoria & immortalitate dignissimos reponi debeant. Quæ igitur ab eisdem illis testibus tradita, & iureiurando firmata sunt, quæque ex multorum hominum, quorum grauitas & autoritas fidem faciunt, partim literis, partim narratione accepimus, proponenda nobis erunt, ut qualis & quantus vir Andreas fuerit, agnosci queat.

---

*De ingressu Andrea in Aethiopiam, de accessu ad Imperatorem, & qua inter illos gesta.*

## C A P V T V.

**Q**Uæ hoc loco dicam, ex literis constant Emanuelis Fernandij, qui cæteris erat Societatis religiosus in Abassia præfectus. Is ad Iacobum Lainem, generalem eiusdem Societatis præpositum, anno millesimo quingentesimo sexagesimo secundo hac de re epistolam scripsit suo & reliquorum Sociorum nominibus subscriptam. Hæc prima fuit, quæ ab Oviedi ingressu ex illis locis in Europa recepta est. Placet, rem,

ut

ut est ab Emanuele scripta, sed verbis Latinis ex fide proponere. Anno, inquit, salutis humanæ quingentesimo quinquagesimo septimo supra millesimum, mense Martio, ipso die, qui Deiparæ virginis annunciationi sacer est, peruenimus Baroam, urbem nobilem. Cùm Barnagassus, qui ibi erat, factus esset de nostro aduentu certior, obuiâ exiit venientibus, & Andream inprimis cum eximia quadam honoris & beneuolentiæ significatione excepit. Mira fuit populi Episcopum videntis exultatio. Ad manus osculum accedebant omnes cū ingenti lætitia & alacritate. In ea urbe viginti & amplius dies permansimus. Incidit tunc patientis Christi cōmemoratio. Illius ergo sacrationis hebdomadæ mysteria, quanta potuimus pietate, peregimus. Feria sexta pompam instituimus, ut in illis locis, magnificam. Quo verò incolarum beneuolentiâ, & nobis sacrisque nostris existimationem conciliaremus, è templo nostro ad eorum templum supplicantes processimus. Magnus per illos dies factus est ad nos omnium ordinum concursus, Romanos ritus approbantium, & cum admiratione prosequentium. Bonam temporis dedimus partem audiendis Lusitanorum confessionibus, & rebus aliis ad rem Christianam salutemque animarum pertinentibus. Multi eorundem Lusitanorum filij seruique sacro Chrismate ab Episcopo sunt inuncti. Eum sæpius, dum hîc fuit, Barnagassus ipse, ac principes alij salutandi & confabulandi causa adiere. Semper tamen Andreas de religione inferebat sermones, eosque, quamquã frustra, ad Romanæ Ecclesiæ obedientiam hortabatur. Vere iam appetête, cùm ea Barnagassi loca Turcarum metu turbari inciperent, Baroa relicta ad Imperatorem contendimus. Quinquaginta in itinere consumpti

Z 5 dies,

dies, causa fuit, quod omnibus ferè in locis Lusitano è genere multos haberemus obuios, quibus sacramenta ministrare erat opus. Dies ferè octo ante nostrum ad Imperatoris castra accessum, missus ab eo ex primoribus quidam, qui verbis ipsius Episcopum saluaret. Mularum insuper oneribus vehendis multitudo ingens còducta. Die pæne extremo nuntius aduenit, qui Imperatoris nomine diceret, ne absque nouo ipsius mandato vltius progredieremur. Duos tamen post dies facta prosequendæ viæ facultas. Cùm parum distarem à castris, Imperatore per nuntium iubente, tetendimus tabernacula, in quibus nox ea peracta. Die insequente, sub meridiem, multi regio ex sanguine aliique non pauci ex prima nobilitate, exquisitis induti vestibus, equisque optimis insidentes conuenere nos, in ipsis adhuc tētoriiis commorantes. Duo inter hos autoritate eminebant, quibus data ab Imperatore vocandi ad se & deducendi Episcopum cura. Interim ipse Imperator cum matre & fratribus in editum conscendit locum, vnde aspiceret venientes. Vbi peruentum, statuit Preteiannes, vt honoris gratia primùm in atrium, præter aulae consuetudinem, equites ingrederemur. Ante ingressum atrij secundi in quo erat Augustale, ex equis descendimus. Ad ostium tentorij vtrique ex parte plurimi erant nobilitate & senio venerandi, optimo ordine dispositi, ac scipionibus innixi. Paululum hoc loco substitimus. Tunc egressi duo ( vnus Isacus Barganassius erat ) non modica totius corporis demissione salutauere Episcopum, & nobis comitantibus ad Imperatorem introducere. Is quoque non exigua honoris & amoris signa præstitit venienti. Postquam mutuis colloquiis nihil temporis consumptum; quas Oviedus ab Indico



Prorege à Patriarcha Ioanne, & ab alijs acceperat in India ad Imperatorem literas, protulit in medium. Lectæ confestim sunt coram omnibus, qui aderant. Eas Imperator audiens non mediocriter turbatus est, nec celare potuit apertam à Romana Ecclesia voluntatem: sed qua erat prudentia, & bene affecto in Lusitanos animo, conatus est, quoad potuit, erumpentem mœstitiâ compescere, vultûque hilaritatem simulare. Id ita fecit, vt aperta nihilominus ostenderet perfidie indicia. Atenim quamquam sic erat in suis erroribus obstinatus, vt eos relinquere numquam in animum induxerit; in his tamen initiis semper Andream bene habuit, ipsique ac sociis necessaria abundè suppeditauit. Nec erat vllus, qui re aut verbo lædere nos auderet, quos sciret Principis beneuolentia esse munitos. Si perfidiam excipias, in toto Abassino Imperio erat nemo, quem Claudius Imperator prudentia, magnanimitate, cæteri, que regis virtutibus non superaret Vrbani- & comitate erga Episcopum utebatur eximia, tantoque illum prosequabatur studio, vt numquam reducendi sui spem ipsi ademerit. Vbi de religione agi cœptum, petiit ab eo Ouiedus, vt simul cum his, qui apud Abassinos docti haberentur, adesse vellet disputationibus. Annuit ille, & cum magna literatorum caterua sæpe audiit Episcopum de rebus fidei differentem. Præ Claudio muti erant eius factione reliqui. Vnus ipse & dicendi ardore, & studio vincendi superabat omnes, quos in certamen adducebat secum; tanta etiam ingenij dexteritate errores suos nonnumquam tuebatur, vt nobis nonnihil faceretur negotij. Ceterum licet ex congressu semper Ouiedus reportaret victoriam, aduersarij tamen (qui pertinacium animorum mos est) cachinnis & incôdi-  
tis

tis clamoribus victores se prædicabant. Cùm igitur Episcopus videret, nihil se hac disputandi via proficere, scripto collegit praua dogmata Abassinorum, & rationibus ac testimoniis confutata obtulit legenda Imperatori. Accepit ille, & legit, atque ad singula, vt potuit, scripto respondens, pertinaciter asseuerat, nūquam se Romano Pontifici præstiturū obedientiam, neque à parentum suorum vestigiis in iis, quæ de religione sunt, recessurum; eam velle tenere fidem, quā iidem tenuere; ipsam proinde vt aliquo modo relinquat, frustra ab vllō mortalium laborari. Inter hæc cœpit etiam quædam aduersus Andream ostendere indignationis signa; palàmque asserere, ingratum sibi esse eius conspectum. Is ergo, ne hominis impotentis in se ac suos irritaret furorem, ratus temporibus cedendum, Imperatore relicto, ad inculcandā aliis veritatem se conuertit. Hæc omnia in epistola Emanuel.

---

*Quid postea inter Oviedum & Claudium actum,  
deque morte Claudij, atque eius  
successore.*

## C A P V T V I.

**Q**Uamquam in respuenda sana fidei doctrina pertinax erat Imperatoris mens, nonnulli tamē reliquo de grege partim plebei, partim nobiles, & monachi Andree ac sociorum opera ab errorum tenebris quotidie transferebant sese ad lucem veritatis. Delata ad aures Claudij fama, vehementer eius animum concitauit. Erāt non pauci, præsertim ex cœnobiar-  
biarchis,

biarchis , qui lamentationibus & querimoniis stimulos adderent ultro furenti. Cohibere igitur iram nequit Imperator; vocat Andreā ad se, alperē & acerbē increpat, eīque seuerē præcipit, vt cum suis, si velit, Lusitanis ac Lusitanorum posteris agat de rebus fidei; cum Abassinis ne verbum mutiat de religione; néve ab Alexandrini Patriarchæ & Abunæ obedientia quemquam eorum audeat abducere. Ad hæc Andreas, Ego, inquit, inclyte princeps, missus huc sum, vt tibi ac tuis Abassinis ostendam salutis viam, à qua longè aberratis; denuntiēque deflectere à recto, quicumque Pontifici Romano, Petri Apostoli successori, & Christi Vicario debitam non exhibet obedientiam. Tu ipse, quæ es prudentia, iudica, an tanto in negotio silere debeam; cuius mihi parendum sit, Deo ne, an homini? Ego non dubito, quin diuinum Imperium anteponendam sit humano; neque adducar vquam, vt quod mei munus est, vlla de causâ præteream. Quid enim respondere olim potero præpotenti Deo de vestro interitu mecum expostulanti, si mea culpa intereatis? aut vllō debilitatus metu inculcare desinam, quæ debeo? Minare, si placet, manus iniice, percutere, eripe vitam; citius ista patiar, quàm vt te ac tuos pernicioso silentio in barathrum sinam ruere. In extremum furore actus hisce verbis Imperator, mox iniquo ferro Andreā de medio sustulisset, nisi mortem, quam vir pius maiorem in modum optabat, hostis hominum inuidisset. A cæde igitur abstinēs, ignominiosis verbis ab se hominem repellit, & itacundè imperat, ne coram se amplius compareat. Addit insuper hæc: Scias in re, de qua agis, operā te & tempus perdere; neque vquam futurum, vt Romani Antistitis iugum mihi aut meis imponi sinam. Acta hæc sunt

sunt anno reparati mundi millesimo quingentesimo quinquagesimo nono, ineunte Ianuario. Haud multum dilata ultoris Numinis vindicta. Intra duos menses meritas perfidiæ pœnas dedit impius Imperator. Sub initium enim insequentis Februarij irruere in ea loca ij Saraceni qui Malachales dicuntur, Amalecitarum forsitan posterii. Proximo deinde Martio, feria quinta sanctioris Hebdomadæ, cõmissum est inter Abassinos & Mahumetanos prælium; in quo metus maior, quàm hostium vis Imperatoris castra inuadens, copias fudit fugauitque. Imperator ipse media in acie à suis relictus, lethali vulnere accepto, miserrimè occubuit. Duo de viginti Lusitani milites, cum ipso cecidere. Caput Imperatoris ab humeris abscissum & hasta appensum ad Adelis regem, quo cum crudeles gerebat inimicitias, magno cū ludibrio ac dedecore, deportatur. Saracenorum Dux vt inspiratam victoriã soli Deo referret acceptam, ex equo supersticiosè defiliit, & consensu a fello triumphauit. Claudio interfecto, cūm liberos non haberet, successit in Imperio eius frater Adamas Seguedus, homo ingenio ferox, moribus pessimus, Catholicæ fidei sæuissimus oppugnator. Fuerat hic à Saracenis in bello captus, & in Arabiam ductus, vbi abiurata Christi religione Mahumetanæ se impietati addixerat; sed ab eodẽ Claudio, rebus Imperij Lusitanorum ope restitutus, postea redemptus, ad Abassinos rediit errores. Ad hunc Andreas, quamquam eius animum & naturam probè norat, gratulandi causa statim adiit, à quo & bene tunc habitus, & cum nonnulla honoris significatione dimissus.

*Sauit*

*Sauit in Andream Adamas, cùmque in exilium eiicit.*

## CAPVT VII.

**V**T omnis libido impotens est, ac præceptis, non multum fuit, quin Adamas animi sui virtus expromeret, iniquissimam occasionem ex æquissima causa accipiens. Quosdam Andreas per id tempus, non ignoti nominis homines, Romanæ Ecclesiæ obedi-  
dientes fecerat. Hoc vnum Tyranno satis. Iubet pro imperio, quàmprimum ad se Andream adduci, vt commissi facinoris rationem reddat. Nihil ille cunctatus coràm compareret, non vultu mæsto, non trepidus, sed lætitia & spe plenus. Tyrannus contrà ignominiosis ac minacibus verbis excipit ad se ingressum; & furentis more, Quid, inquit, tragœdiarum excitator maxime, quiescere me & gentem meam non sinis? tanta tibi in tuis artibus fiducia? Quamdiu hac abute-  
re impunitate, quæ tibi liberè peccandi illecebra est? hucosque flagitia tua desidiosius magis, quàm æquis animis tulimus: nō erimus deinceps ignaui. Per quid-  
quid sacrum ac sanctum vsipiam est, pèrque auorum meorum & vtriusque parentis Manes iterum atque iterum iuro, non minore tibi mercede, quàm ipsa vita soluendum, si quod posthac scelus contra religionem nostram ab hoc puncto temporis commiseris. Tunc  
Andreas, Mortem mihi, inquit, minitatis? An nescis, nihil posse animo meo gratius euenire, quàm vt pro Christo aut ferro collum submittam, aut obiciam feris corpus? Agè, Imperator, sæui in me, vt lubet; veritatem vt timidè aut ignauè suppressam, nullis minis,  
nullo

nullo mortis metu efficiens. Hæc ubi dixit, ingenti correptus spiritus ardore, demittit ex humeris pallium, oculos cum manibus attollit in cœlum, proque vēræ fidei prædicatione ac defensione conceptis verbis Deo immortalī caput suum ac sanguinem deuouet. Nihil tunc fieri potuit, quod Adamas ferret acerbius: tanto percitus furore est, ut actum esset de Andrea, nisi impotentissimi hominis pugionem vis diuina tenuisset. Sæuissimas tamen in illum manus tanto impetu iniecit, ut tunicam homini absciderit. Tunc verò huc & illuc violenter impulsus, verbisq; asperimis indignissimè tractatum reiicit à se; atque ut in montem editissimum, incultum, sterilem, feris obnoxium, vnà cum socio Francisco Lupio exulatum eat, nec inde iniussu exeat, pœna mortis proposita, seuerissimè mandat. Addit & huic flagitio aliud exulibus molestius, quo non contentus sæuire in corpora, simul etiam in animos sæuiat, ne scilicet litare queat, iubet auferri calicem, non dubitans ea se ratione multo eos durius, quàm vllō corporis cruciatu afflicturū. Omnia illi sedato ferunt animo; & iniquæ sententiæ promptè obtemperantes, illicò in exilium secedunt, Octo ibi menses translegere. Quæ & quanta sint mala passi, vix queam dicere. Fames, sitis, temporum iniuriæ fuere leniora. Erant pro ædibus subterraneæ specus; dura ac nuda saxa pro lecto; syluestres herbæ gustui ingratae præbebant cibum; & in summa rerum difficultate mors ante oculos perpetuò obuersabatur. Eum namque in montem excursores latronesque permulti, quibus regio abundat, interdū abdebant se; ut inde de improviso egressi, qui prope facerent iter, incautos adorirentur, occiderent, spoliarent. Ingens ab istis & continuū erat Andrææ & socio  
peri

periculum; nec erat dubia mors, si essent reperti. Latabant ergo, & diuina latentes contemplabantur, atque ad perferenda exilij incommoda à cœlo vires auxiliũque petebant. Nec minus Tyrannum ipsum, totũque imperium commendabant Deo: ac demũ pijs inter se colloquijs suos interdum labores & ærumnas solabantur. Dum hæc agerent, aliarum rerum ignari, ecce tibi primaria quædam fœmina vinculo consanguinitatis Imperatori coniuncta, domo egreditur; illum in montem, cuius ipsa domina erat, vt Andream inuisat, diuino absque dubio acta impulsu, p. operè contendit; ad speluncam accedens, in qua latent exules, ingenti eam cernit circumfusam luce, tamque fulgentes ipso ostio euomẽtem radios, vt intuitus oculi splendore perstringantur, vehementi primũ admiratione obstupefacta subsistit. Non modico dein perculsa metu gradũ retro refert; domũque repetens, quacumque transit, insignem exulum prædicat sanctitatem. Nec mora, Imperatorem adit, atque vt Andream & socium exilio liberet, sollicitè precatur. Victus ille precum vir, redeũdi facit potestatem: sed tamen ea lege, vt si cum aliquo Abassino vlla de re agant, grauissimis sint plectendi supplicijs.

---

*Abassinos suos Adamas persequitur, & Andream iterum in exilium mittit.*

### C A P V T V I I I.

**N**ON solum in Andream, sed etiam in eos, quos ille ad veritatis agnitionem adduxerat, acriter est ab Imperatore Adama animaduersum. Illuc inprimis

A a      Tyran

Tyrannus vires intendit, ut quotquot erant Abassino ex genere, qui Andreæ & sociorum opera Romanis se legibus subdidissent, ad schismaticos ritus & pristinos gentis mores confestim redirent. Ex his quidam declinandæ mortis causa solum vertere; alij nihil agere palam, ex quo quid profiterentur, agnosci posset, retenta animo, sed non publica fide: nonnulli divina roborati constantia, non intus tantum, domique, sed in omnium oculis & auribus Abassinos damnare errores, & Romanæ Ecclesiæ prædicare veritatem. Ex his aliqui ad Tyrannum adducti, nullis deterriti minis, nulla allecti præmiorum spe, firmi, fortes, infractique persistere. Longeuos aliquot senes toto pulso Imperio in externas ac longè diffitas regiones amandat. Iuvenes ætate florentes & genere claros obtruncat. Miris alios sævisque modis usque ad internecionem persequitur. Res inter hæc traditur mirabilis, magno testium consensu & approbatione firmata. Quinque erant, qui coram impio Tyranno Romanam fidem tanta libertate prædicauerant, ut eius in se furorem vehementius incitauerint. Iubet hos leonibus fame prope enectis deuorandos immitti. Bestiæ siue metu perturbatæ, siue amore delinitæ, deposita feritate succumbunt pronæ; nec magistrorum audiunt voces, nec vultus agnoscunt; magisque mitescent, quo magis irritantur. Re Imperator audita stupet, & horret, sed recrudescit timendo furor. Breuem sanctis hominibus inuidet mortem, ut intolerabili eos exilio conficiat, ac diutius torquendo vitam reddat morte sæuiorem. Ergo & hos quinque, & quotquot eadem de causa habebat in vinculis, & cum iis Andream in remotas terras & accessu asperas exterminat, additque trucem militum custodiam,

ne



ne quis toto exulum de numero secus, faciat ac iussus. Omnes igitur iter aggrediuntur permolestum ac perdifficile, deserta & æstuosa via, nulla ipsis ad corporis sustentationem cibaria; res nulla ex iis, quibus vitam tue mur. Neque enim ullus per eam regionem erat, qui subleuare egenos posset, locis quippe propter asperitates saxorum, montiumque altitudines, & rupium sterilitatem, prorsus incultis. Processerant aliquantulum; sed cum iam lassii vix possent firma ponere in solo vestigia, neque esset quidquam, quo vires reficerent, consilium aliqui, alij in terram ruere; sic omnes fame confici, ut parum abessent ab interitu. Tunc Andreas tam lugubri commotus spectaculo à clementissimo pauperum patre remedium per preces sibi querendum ratus, ad genua procumbit, cor, & oculos, manusque leuat in sublime, atque ingentem profundens vim lacrymarum, Vbi, inquit, sunt misericordie tue antiquæ, Domine? Vbi illi tui pleni clementiæ & benignitatis oculi, quibus soles miseros respicere? Hebræorum olim populum ex Ægypto egressum, perque vastas terrarum solitudines aberrantem tot modis ac tanta prouidentia aluisti. Illos tres quondam reges Iudæ, Israelis, Edonis, eorumque exercitus siti pæne consumptos in desertis & aridis Idumææ campis grandi aquarum copia satiaisti. Longo deinde post tempore, multiplicatis insigni miraculo paucis panibus & paucioribus piscibus, multa hominum millia iuxta Betsaidæ lacum, in loco deserto largiter pauisti. Numquid nunc oblitus tui aut tuorum es? Anne deest tibi facultas, qua valeas, aut benignitas, qua velis, seruis tuis tua causa laborantibus, & extremum iam spiritum trahentibus præsentiope succurrere? Intuere misericordibus oculis hunc

gregem tuum, non quidem numero, sed fide magnū, qui ne tuas caulas defereret, ad has redactus est, quas vides, & animi & corporis angustias. Huc homines istos non aliqua egit voluptatis illecebra, non honoris aut gloriæ studium, non opum rerūve humanarum vlla cupiditas; sed tuarum legum defensio, honoris tui propugnatio, tuæ veritatis confessio adegerunt. Noli igitur, amantissime hominum parens, filios tuos penitus deferere. Quos à Tyranni gladio liberaſti, ne eos patere in hac solitudine fame interire. His dictis, extemplo flumen ingens, præter quod tūc erat exulibus iter, sicut olim ad illius mysticæ Arcæ conspectum Iordani contigit, qua parte rapidior ferebatur, cursum continens, siccum alueum reliquit, tantāque in eo piscium multitudinem, vt statim quibusdam, partim assis, partim elixis, famem omnes depulerint: & ex iis, qui superfuere, ad futurum com meatum multos mulos onerant. Vbi recepti pisces, reductæ iterum ad propriam naturam aquæ, atque in alueum effusæ, mirabili celeritate solitum cursum instaurare. Milites, qui erant in comitatu, tanti miraculi nouitate attoniti, in partes varias versabant animum. Quidam vix oculis credebant, & videbantur sibi somniare magis, quàm repressum amnem & reuolutos liquores re ipsa videre. Alij vim diuinam extollebant, exulum causam & pietatem probabant; de Andræ ac sociorum conquerebantur iniuriis; Adamæ tyrannidem & nequitiam execrabantur; Romanæ Ecclesiæ concedebant primas. Exules in fide crescebant, ac firmius roborabantur; summo Deo decantabant laudes; immensāsque agebant gratias, quòd opem tulerit laborantibus; quòd à lethi faucibus pereuntes eripuerit; quòd nominis sui gloriam celebra

lebrarit;quodd denique tam insigni portento & sanam Catholicorum doctrinam stabilierit, & Æthiopicam, falsitatem confutarit. At res ipsa tunc statim in regiam curiam & Imperatoris aulam delata; pérque vniuersam latè regionem breui diffusa, grandi stupore omnium aures animósque occupauit; & Barbarorum mentibus adedè hæsit, vt quo tempore de rebus ab Andrea gestis Syluius quærebat, fuerit nemo, qui non illam summa cum admiratione in medium protulerit. Et tunc etiam reperti duo, qui præsentés adfueré, cum patratum miraculum est. Vnus ex iis erat, qui pro veritatis defensione in exilium ibant: alter ex numero militum, quibus fuerat exulum custodia à Tyranno demandata. Hic eo tunc ostento permotus ad partes transiit Catholicorum. Tam portentosi autem euentus fama, simulque multa & præclara Andree in quosdam optimates promerita, eosdem adegere, vt de ipso ac sociis restituendis enixè agerent cum Imperatore; à quo tandem, vt redeundi facultatem concederet, impetrarunt. Accepto exules de libertate nuntio, in domos quisque suas rediere.

---

*Tertium Andreas cum Catholicis exilio mulctatur, & variis modis affligitur.*

## C A P V T IX.

**A**Ndreas ab exilio reuocatus, antequam oppidum ingrederetur, obuios habuit quotquot in eo Catholici erant; qui acceptis de reditu eius nuntiis exultantes ac gestientes foras exeunt, in agrósque effusi non minori alacritate, redeuntem excipiunt, quàm

prioribus olim sæculis Athanasium , Chrysostomum alióque sanctissimos Antistites ab exilio reuertentes ab Alexandria , Byzantio, & urbibus aliis , exceptos, literarum monumentis traditum est. Inter cæteras virtutes, quas in Andrea sūmas esse nemo dubitabat, illa inprimis inaudita patiētia, qua tot labores, tótque non dubia vitæ peticula tam frequenter, tāmque intrepidè & animosè subibat , præcipua quadam commendatione per omnium ora ferebatur. Et verò hæc vna virtus (quæ sicut optima parens altrixque probitatis est, ita admirationis & beneuolentiæ est egregia conciliatrix ) tantopere Barbaris illis hunc hominem commendabat, vt variis è locis hãc vnã ob causam magnus ad eum fieret Abassinorum concursus. Aderant cum reliquis monachi non pauci , quos partim tanti viri videndi & audiendi cupiditas, partim etiam indagandæ veritatis studium concitabat. Nulli Andreas in re vlla deerat: cunctos ad timorem Numinis atque ad omnem hortabatur iusticiam. Monebat potissimū, vt Romanam Ecclesiam agnoscerent , eius fidem sequerentur, & ad Catholicos mores vitam instituerēt, Dei magis quàm Adamæ , vel alterius Tyranni iram formidarent, sæuire homines posse in corpora: Deum neglectum & corpora torquere & animos: humanæ crudelitatis vim, & tempore breuem esse, & potestate infirmam ; at vindictam Numinis , quæ scelestos apud inferos torquet, nec sæculorum terminis claudi, nec vlla ex parte imminui: oblatam sibi salutis suæ occasionem ne incassum abire sinant ? Dei inuisentis se ac vocantis agnoscant beneficium; hoc sibi tempus ad pacem dari; metuant meritò ne frustra elapso bellum exurgat magis animis, quàm corporibus exitiale: Hierosolymæ meminerint , Christi monita & prædictio

etiones respuentis ; intelligant nullam esse causam, cur magis ipsi, quàm veteres Hebræi ferri & expectari debeant à diuina bènignitate. Hæc & talia quædam cùm Andreas non minori tunc libertate , maiori prope ardore, quàm antea Abassinis inculcaret , multosque eorū veritatis luce perfunderet, ac Romani Pontificis iugo subiiceret, defertur ad Imperatorem, quiescere non posse Europæos Sacerdotes ; minus quietum reliquis eorum Episcopum Andream, qui hominum corda sollicitaret, permisceret omnia , Æthiopicos ritus dānaret, Romanos mirabiliter efferret, multos deciperet, atque ad suam traheret factionem. Ni adhibeantur extrema, breui futurum, vt in Romanam religionem Æthiopica vertatur. His Imperator stimulis maiorem in modum commotus , venire ad se Andream iubet, cuius aspectu in rabiem actus, Quod exilium, inquit, repetitum non efficit, ferrum efficiet; hoc tuæ imponet finem pertinaciæ. Nescis mortaliū pessime , truncandi tui mihi esse potestatem ? Quid tam impudenter meam abuteris & lædis clementiam? Tibi ne in regnis meis, an mihi parēdum? Nihil iniquius, quàm specie religionis Imperatoriam violare maiestatem. An non multo maxima religionis pars est, reuereri principes , iisque dicto esse audientem? Quid agis? Quid à me atque à sanctissimis maiorum meorum legibus gentem meam auertis? Hocine ferendum? Quin ego tibi hoc ense vitam eripio? Hæc dicens, ensē amens liberat è vagina , furiosè petit innoxium collum , quod Andreas , brachiis prius in modum crucis ad pectus conformatis, tautisper inflexerat, & percutere tentanti aptarat. Verū ictu irritō cadit ferrum è manu Tyranni, omnibus, qui aderant, vehementer stupentibus. Solus Adamas nihil euentu

motus (adèd furentis animus cæcus est) arrepto rursum gladio innocentis collum denuo impetit. Tum Augusta, quæ & ipsa præsens erat, tam attonita successu, quàm Andree commiseratione concussa, ictum exceptura mediam se inter utrumque infert, & horribilem attollens vocem acriter Imperatorem increpat, manumque sceleratam & conatum cohibet: Non te pudet, inquit, cum Imperator sis, carnificem agere? Hoc tu facinus regia dextra dignum puras? Hanc Lusitanis, quibus tot nominibus deinctus es, pro acceptis beneficiis rependis gratiam? Quid ageres, si quis ex tuis simili correptus infania talem virum, tantis illustrem virtutibus, tanta decoratum dignitate, non confoderet destrieto ferro, sed leuiter dumtaxat manu percuteret? Quod tu in nullo tuorum, ne amantissimo quidem, patereris, id propriis manibus per summum scelus efficere conaris? Pudeat te sine causa furere, & virtuti esse iniurium. Hæc Augusta. Alia pro Andrea alij viri primarij, sed mitius & precantium more Imperatori subiecere; intèrque reliqua summo pere conati sunt eius animum à cæde auocare. Tunc ille indignationem corde premens, vultuque simulans lenitatem, ab se Ouiedum dimisit; & quosdam secretò monuit, ut illum qua possent arte, è viuis auferrent. Sed Imperatoris nequitia cognita, ab iisdem illis optimatibus curatum sedulo, ut eius monita fierent irrita. Cum igitur videret, valde sibi esse difficile, optimo Pontifici vitam eripere, nec suum aduersus ipsum odium satis posset exsaturare, ab se, eoque ab loco quamlongissime ablegare statuit. Tertio igitur Andream mulctat exilio; & socios illi adiungit Lusitanos omnes; atque hos sine vxoribus ac liberis iubet proficisci, asserens liberos ipsos seruitutis iure sibi esse

esse addictos, & mancipio ac nexu proprios; quamuis ad eam diem passus sit, usu & fructu parentum fuisse. Cur verò vxoribus vetuerit viros sequi, incertum. Fortè quòd Abassinorum de genere essent; vel vt miseris hominibus diuiorem efficeret exilij pœnam. Tyranni Imperium adeò vrgebat, vt nec tergiuersandi daretur locus, nec tutum esset, paululum cunctari. Omnes quamprimum se viæ committunt. Andreas, & qui ab eius latere numquam discedebat, Franciscus Lupius, quia nihil habebāt carius, quàm vt pro Christi fide vexarentur, ibant admodum læti, & hilares. Cæteri etli per summum nefas à charissimis vxoribus liberisque abduci morte grauius ferebant; mœrorem tamen suum Andreæ præsentia & conspectu lenientes, eo exilij calamitatem amplectabantur libentiùs, quòd se viderint in tantì viri societate, Dei causa malè mulctari. Illos igitur pius Antistes vt equo animo ærumnas tolerarent, atque ad eos casus, quibus humana vita subiecta est, firmis conscientie præsidiiis munirentur, omnesque Tyranni iniurias & cruciatus spernerent, vt firmam denique atque stabilem in vno Deo spem ponerent, eique agerent gratias, quòd ipsos vellet esse de numero eorum, qui ab hostibus fidei religionis causa aliquid patiuntur, grauib. & efficacibus verbis hortabatur. Nec verò, inquit, vxorum vestrarum & liberorum cura vos nimium torqueat, commilitones mei & optimi Christi milites, præstò aderit & optatum vobis ab diuina misericordia remedium, & debitum Tyranno à diuina iustitia supplicium. Pergite alacres & erecti; exiguum post tempus in domos vestras reuersuri. Vbi ad exilij locum peruentum, miles quidam, cui creditus Andreas cum præciso mandato, vt curaret dili-

genter, ne aliò se ferret, ipsum aggreditur, postulatque ut pro suscepto tam longinquæ tamque asperæ viæ labore meritam persoluat mercedem. Ego, fili mi, inquit, operam tuam non conduxi; ecquam tibi debeo siue itineris, siue custodiæ mercedem? quamquam verò nihil me tibi ob hanc operam debere, sentio, (Illustrissimi Martyris Cypriani exemplo, qui viginti nummis aureis tortorem suum donauit.) libenter tibi darem, siquid haberem; sed habeo nihil, quod dare queam. Nihil ille his verbis motus, iussit & virget; atque aliquod sibi laboris sui extorquere præmium, omnino statuit. Videns autem perdere se petendo tempus, manus iniicit, & sacrum linteum ac stolam vi rapit. Animo Andreas nihilo secius tranquillo ac sedato, ne verbo quidem raptorem perstringit; oculos tamen ad cælum tollens, has ab imo pectore semel & iterum voces profert: Ah Domine Deus, ah Domine Deus, vix iniquus raptor duo confecerat passuum millia, cum subito aliena vi correptus, refert è via pedem cursuque præcipiti ac volanti magis, quam currenti similis, Andream repetit; propiusque accedens, nescio quid mussitando, ad eius pedes quæ abstulerat, proiicit. Tum pernecitate pari eò se prorapiens, vnde venerat, sic evanuit, ut visus amplius à nullo sit. Quadraginta prope agebantur anni, quando Michael Sylmus rem à testibus accepit, qui non solum iureiurando affirmarunt, miserum hominem à suis expectatum & diligenter quæsitum numquam deinceps apparuisse; verum etiam locum fecisse dicto, quod apud Abassinos hodièque proverbij vice per illam plagam usurpatur, nemo ab inuito Lusitano vestimenti quidpiam abripiat, nisi velit ipse venti instar per inane abripi.



*Graui bello scelerum suorum pœnas luit Imperator Adamas, Andreas cum sociis diuinitus seruatur.*

## CAPVT X.

**T**anto Adamas Romanam fidem insequabatur odio, vt cùm certò sciret, plurimè se cum externis, tum domesticis hostibus esse vndique circumseptum, nullam tamen in rem incumberet diligentius, quàm vt Catholicos miris modis & immaniter diuexatos ad vnum omnes deleret. Quare quam eius frater Claudius concesserat facultatem, vt Abassinæ foeminæ Lusitanis nuptæ Romanis viuere possent legibus, eam ipse continuò reuocauit, pœnis etiam acerbissimis vetuit, ne quis Abassinus, cuiuscumque sexus & conditionis esset, Catholicam profiteretur religionem, nève Lusitanorum adiret templa. Ex quo factum, vt aliqui eo de genere, quod secus fecissent, in vincula fuerint coniecti, & flagellis cæsi. Fuere etiam, qui mortis metu compulsi à suscepta fide defecerunt. Nec in suos tantùm, sed etiam in externos ob eandem causam impius Imperator furorem effudit. Armenij erant ex Schismaticis Catholici, quos, quia ad pristinos redire errores recusabant, partim exilio, partim mortis pœna multauit. Dum ergo in omnem nequitiam ac sæuitiam effrænate raperetur, essetque cum aliis in exilio Andreas; summus ille rerum moderator, qui neque vmquam pios omnino deserit, neque patitur malos diutius florere; & afflictis succurrere exulibus, & meritis perfidiæ ac scelerum pœnas

pœnas ab Adama repetere, iustissimè decreuit. Ita res habet. Barnagassus Illacus, & plurimi alij principes viri, insanam pessimi Imperatoris crudelitatem morésque intractabiles exosi, communi consensu in eius pernitiem conspirantes, Betancum Zarcarum fratris natu maioris vita iam functi, ex illegitimo thoro filium Imperatorem creatunt. Adamas coniuratione cognita, quamocyssime delectum habet, collectisque viribus exercitum parat, ut tempus fert, copiosum. Quo verò Lusitanorum sibi conciliet voluntates, eosque habeat in bello socios, Andream cum reliquis acciri iubet ab exilio, & in castra venire. Ter reperio inter aduersas factiones acie fuisse decretum. Primo prælio Adamas victus è campo recessit. Altero Zarcarum viuum cepit & obtruncavit. Tertio Barnagassus Illacus alium legitimum Zarcari fratrem Imperatorem nominans, vocatisque in auxilium Turcis irruentem Adamam vi tormentorum territauit, castris exiit, cum toto exercitu vertit in fugam, & quidquid aduersum aut obuium fuit, igni ferroque absumpsit. Patres, qui cum Adama erant, ut cuique commodum, in diuersa effusi loca, præsentem se periculo eripuerunt. Solus Andreas cum Lupio, & quodam alio ex familiaribus, patente in campo relictus, dum militaris adhuc furor saeuiret, prædæque & cædi victor exercitus incumberet, manus ac mentem ad Deum erigens, inter media Turcarum & Abassinorum furentium tela cum utroque socio saluus & incolumis permansit. Vim ibi diuinam agnouere socij, & se Andree precibus à nece liberatos confessi sunt. Haud dubitarim, renouatum in hoc euentu vetus portentum, cum Elitæo deprecante Syrij regis milites cæcitate perculsi, quæ ante oculos & in conspectu erant,

non

non conspexere. Huc illuc hostes crujoris auidi ferebantur; non sexui, non ætati, non conditioni parcebant. In medio Andreas cum duobus illis erat, non abditus in tenebris, non vlllo in recessu aut latebra clausus, sed obuius furentibus, & hostili crudelitati palàm expositus; non minus tamen ab omni belli periculo & iniuria liber inuicèrque euasit, quàm si editissimo tutissimòque ex loco spectasset pugnam. Simul atque precandi finem fecit, Lupiū intuitus, Laudetur, inquit, Deus immortalis; reliqui Patres in potestate hostium sunt; sed nihil timendum; propitio Numine res prosperè cedent: nostris interim obsecrationibus ipsos inuemus. Haud dubia prædictio fuit. Erant tunc Patres cæteri à Turcis capti, spoliati, iniuriis affecti, periniquè tractati; sed non multo pòst nobili Abassino petente, donati libertate ad Andream rediere. Rebus pæne compositis cum se ad Lusitanorum vicum socij reciperent occurrit in via ex factione contraria Abassinus miles. Hic turbido adhuc ex dimicatione animo, Andream verbis asperis & minacibus laceffit, adeoque rabidè furit, vt parum absit, quin sancto viro manus iniiciat, & cædem faciat. Mula Andreas vehebatur; ex ea vt statim defiliat, trux homo imperat. Paret ille sine mora, nec impatiens, nec queribundus, & quod itineris reliquum est, pedibus conficit. Miles præda lætus mulam ascendit, malique ignarus futuri, mortem miser domum defert. vix limen tangit, cum subitò & vxor & duo liberi exanimati cadunt; vnúmque rapinæ scelus triplici soluit interitu infelix raptor. Agnoscit tamen ultorem Deum, grauique dolore pressus, quærit Andream; largè lacrymans ad eius se abiicit pedes, mulam restituit, veniam rogat, & obnixè petit, vt precibus suis  
itati

irati Numinis vindictā arceat; valde enim timere se, ne qui solus auctor delicti fuerit, cæteris interemptis, acerbius puniatur. Hominem Andreas blande acceptum monet inprimis, ut susceptum excutatur flagitium, quantum potest; bono deinde animo esse iubet, omnesque suas in clementissimo parente spes & rationes collocare; tandem tuta omnia pollicetur. Is deinceps, quamdiu ei per vitam licuit, verbis, ac rebus aded se Ouedo deuinctum, obnoxiumque præbuit, ut solitus sit salutandi gratia ipsum frequenter conuenire, & munuscula deferre, beneuolentia magis, quam pretio, æstimanda.

*Quid in Imperio, quid Ouedo acciderit mortuo Adama.*

## C A P V T XI.

**A**Nnus agebatur ab ortu salutis millesimus quingentesimus sexagesimus secundus, cum Adamas à Bernagasso ac Turcis victus, à locis maritimis malè constantes copias ad interiora regni retraxit. Anno deinde insequente plurimis & maximis afflictus bellorum calamitatibus excessit è vita. Mox turbari magis imperium, & varias in partes discindi cœpit. Qui ab Adama erant, eius filium creatunt Imperatorem. Illum Zarcarifratem, quem suprâ memini, Barnagassus sequebatur. In partes alias vertebantur alij. Andreas, qui anno illo sexagesimo secundo, mortuo Goæ Nonio in Patriarchæ titulum successerat, cum maiori Lusitanorum parte ad Tygrium regnum contulit se, ibique prope eum locum, vbi celebre est Abbaguarima

rima cœnobium, humilem abiectumque incolat vicum, cui Fremona nomē: atque in eo annos sedecim, quibus cum viuis fuit, commoratus, nullum deinceps vidit Abassīæ Imperatorem. Toto enim hoc tempore sic omnia bellorum motibus æstuarunt, vt quamuis Abassini fuerint, qui erroribus depositis, ad Romanam conuersi sint veritatem; cum quo tamen de Abassīæ totius reductione agi posset, nemo extiterit. Nam Malaseguetns Adamæ filius non nisi septemdecim post obitum parentis annos, & Illāco Barnagallo iam defuncto, imperium obtinuit. Interea dum Abassini per domesticas ciuilesque seditiones pertinaciæ suæ poenas pendunt, Castrum illorum, quos Galas vocant, vis ingens suis ab sedibus profecta eorum terras ingreditur, agros vastat, oppida diripit, ac diruit, quoscumque aduersos habet, sine mœnibus bellum propulsent, sine ad obsistendum copias in acie educant, ferro flammisque domat, & horribilem vbi-cumque pedem ponit, stragem edit; tanta demum & facilitate & felicitate Barbari illi in Abassinum Imperium se intulere, vt plusquam centum regiones, maiorem quippe imperij partem, breui temporis spatio victricibus armis occuparint. Qui in eodem vico Catholici cum Andrea erant, in tanta rerum difficultate cœpere grauitèr angī, cū viderent, neque eo in loco vitare se hostilem furorem ac necem posse; neque vllam esse alibi sedem à Galarum iniuriis tutam, ad quam ipsis foret liberum commigrare. Turbati igitur ac trepidantes Andream adcunt, ab eoque & consilium in dubiis, & remedium in malis petunt. Iacentes animos erigit vir Deo plenus, & nutantes confirmat. Iubet bene sperare de diuina benignitate, haud esse dubitandum, quin Numinis præsidio inter medias

mediis hostium turmas, interque districtos enses non modò tuti esse possint, verumetiam securi. Ab his dictis solitam ad arcem recipit sese, rem quippe diuinam facit, & quid sibi ac suis sit agendum, à Deo litando sciscitatur. Res mira, vox auditur de cælo lapsa, bis repetens Fremonam. Intelligit haud dubie, non oportere aliò discedere, tutam ibi esse stationem. Peraçto sacrificio ad expectantem populum, & pauore defixum egreditur; monet, ne quis loco moueatur, vllòve sollicitetur timore; cunctos Fremonæ omnem vim belli sine dāno vitaturos. Sic euenit; summaque omnium animos tanti euentus tenuit admiratio. Cuncta circum oppida, castella, vicos, & Mapalia Galæ Turcæque pererrarunt: nulli rei hostium immanitas pepercit. Æquati solo muri, diremptæ atque euerse domus, quotquot in his locis reperti mortales, miserabili cæde strati. Fremona, vicus exiguus, vidua ab aliis distans milliaria, patente in campo atque in militari situs via, nullis naturæ, nullis artis septus præsidiiis, hostili expositus furori, cæterisque pagis ad iniuriam promptior, sine vllò detrimento fuit. Tam insigne Dei beneficium Andree precibus acceptum Fremonenses retulerunt; quorum nonnullis Lusitano de genere magno per id tempus constitit, non habuisse fidem viro sanctissimo salutaria præmonenti. Ad bellum isti, quod alio loco gerendum erat, nulla adacti necessitate, sed vltro parabant sese. Eis Andreas, ne illud petant, seriò suadet, addens, si secus faciant, ad vnum omnes interituros. Insana illi bel-landi, aut qua alia obcæcati cupiditate ad bellum profecti, occumbentes sensere, haud spernenda esse, quæ probatæ virtutis viri prænuntiant futura. Post hæc hostes varij armata manu Æthiopiam ingressi, res

Abaf

Abassinorum adeò cōtriuere, vt Imperium redactum sit ad extrema. Turcz imprimis à maritima ora, quam vi occupant, ad interiora sæpius penetrantes, multos mortalium partim dederunt neci, partim in seruitutem abduxere. Ad Catholicos etiam, qui regnum Tigrum incolebant, belli calamitas pertinuit. Multis ij modis duriter vexati, oppidis quoque hostili flamma incensis ac disruptis, ad Dambez regnum coacti sunt commigrare. Pauci eodem in loco, ne defererent Andream iustis de causis inibi remanentem, vltro perstitere.

---

*Inbetur Andreas à Pio V. Pontifice maximo Aethiopiam relinquere, & ad Iaponios ac Sinas proficisci.*

## C A P V T XII.

**P**ER id tempus Andreas summa rerum omnium difficultate pressus, plurimæque & maxima, à Turcis, & Saracenis, à Galis, atque ab ipsis etiam Abassinis passus incommoda, valde ærumnosam ac miseris plenam ducebat vitam. Inerat etiam in illis schismaticis tanta cordis durities, vt perexiguus esset animorum fructus, quo vir sanctissimus vtcumque lenare posset labores suos. Id ex literis eorum, quos secum Patriarcha habebat, in Europam & Indiam missis cum Sebastianus Rex cognouisset, rei indignitate cōmotus per legatum suum, qui erat in Vrbe, agere serid cum Pontifice cœpit, vt quia nulla tunc Abassiarum reducendæ videbatur esse spes; alia verò ex parte apud

Iaponios multa hominum millia, neglecto idolorum cultu, Christianis se ouibus idemtidem coniungebāt, iuberet pro imperio, vt Andreas Patriarcha ex Æthiopia in Indiam traiciens conferret sese ad Iaponicas insulas, vbi cum maiori & dignitatis suæ splendore, & industriæ fructu posset rei Christianæ operam nauare. Pius V. egregius æquè & prudens, Pontifex (is tunc Romano in solio sedebat) re probè cognita, & diligenter examinata, anno millesimo quingentesimo sexagesimo sexto, quarto Nonas Februarij, Pontificiū diploma ad Andream in Æthiopiam misit; quod etsi omitti à nobis iure posset, cum ab aliis scriptoribus referatur, quoad ea tamen, quæ huc pertinent, iisdem verbis exscribendum duximus. Venerabili fratri Andree de Ouiedo Patriarchæ Æthiopiæ, venerabilis frater salutem, &c. Ex literis carissimi in Christo filij nostri Sebastiani Portugaliz regis illustris, ad oratorem ipsius, qui apud nos residet, missis, & ab aliis, quibus fidem meritò habuimus, cognouimus, paternitatem tuam in istis Æthiopiæ partibus, ad quas, à sede fueris Apostolica missus, vt istos populos ad fidei Orthodoxæ agnitionem, & ad vnitatem Ecclesiæ Catholicæ reduceres, inter tot annos, quibus isthic mansisti, propter duriciam cordis eorum, & in vetustis erroribus suis retinendis animi pertinaciam, opera & pia industria tua nihil proficere potuisse; quòd si ad Insulam, quæ Iapam appellatur, & in Sinarum regionem, quæ à Gentilibus incoluntur, mittaris, in quibus Prouincijs Domini nostri Iesu Christi fides magna deuotione suscipi cœpit, sperandum esse, Deo adiuuante, vt illic opera tua valde sit utilis; propterea quòd messis illic multa sit, operarij autem paucissimi. Quibus auditis fraterna, sanè caritate tibi compassus sumus;



sumus, qui tot tantorumque laborum, & tam diuturnæ peregrinationis fructum optatum capere minime potueris: sed si opera tua illis fuit populis inutilis, non tu tamen, qui tam multa, & tam graua pro Christo Domino nostro passus es, frustra laborasti; pietatis enim, & obedientiæ, & caritatis tuæ præmium à Domino habebis. Quia igitur in hac sancta sede, licet sine nostris meritis constituti, omnibus nos agnoscimus debitores, & pro commisso nobis officio debemus inferuire omnipotentis Dei honori & gloriæ, & animarum saluti consulere, fraternâ caritate salutantes te, de cuius pio zelo & propagandæ Catholicæ religionis studio grauissima testimonia habuimus, hortamur in Domino, & in virtute sanctæ obedientiæ, atque in remissionem peccatorum, iniungimus, vt postquam has literas acceperis, cum primum tutè potueris, & nauigandi facultatem habueris, ad Insulam Iapam, & ad Sinarum regionem te conferas, & in illis locis verbum Dei iuxta doctrinam sanctæ Romanæ Ecclesiæ, omnium Christi fidelium matris ac magistræ docendo & prædicando, & sacramenta, quæ Pontificalis sunt officij, ministrando, quamplurimas poteris animas lucrari studeas, diuinæ fretus misericordiæ auxilio. Hæc in diplomate, & quædam similia. In eo volo, obseruentur potissimum duo, quibus nouus ille auctor, de quo sæpe supra memini, abrogare fidem veritus non est. Primum, Gentem Abassinam certo, atque indubitato Pij Pontificis iudicio, ab Romana fide esse auersam, plurimisque maiorum suorum inuolutam erroribus; ideoque à sede Apostolica in Æthiopiam missum Andreæ, vt illam ad agnitionem veritatis, & Catholicæ Ecclesiæ obedientiam reduceret. Alterum, affirmare Pontificem, se illam, Andræ

ex *Aethiopia* ad *Sinas* ac *Iaponios* migrationem non ob id solum decreuisse, quod de misero *Andree* statu atque *Abassinae* gentis duritie à *Lusitano Rege* factus fuerit certior (quamquam ut decerneret, id erat satis) verum etiam, quod rem eandem ab aliis cognoverit, quibus meritissime fidem habuerit. Hisce enim verbis planum fit tam esse certum pontificium illud diploma non fuisse fraudulenter extortum; quam certum est, ipsum Pontificem debitam in hoc negotio diligentiam prudentiamque adhibuisse. Et tamen est, qui asserere audeat, deceptum fuisse Pontificem, & ob eam causam quod expedit diploma nihil habuisse momenti. Sed quid *Patriarcha* responderit, iam videndum.

---

*Oviedi Patriarcha circa suum ex Aethiopia exitum responsio.*

### C A P V T XIII.

**P**ontificium diploma anno superioris seculi sexagesimo septimo, mense Martio receptum à *Patriarcha* in *Abassia* est. Iunio statim insequente ad summum Pontificem, ad *Sebastianum Regem*, ad *Iacobum Laynem* Praepositum generalem Societatis *Iesu* literas dedit, simulque ad *Regem* & ad *Indicum praetorem* tum *Andree* socij, tum *Lusitanorum militum* in *Abassia* praefectus, & quotquot ibi erant alicuius nominis *Lusitani* de re eadem scripsere. Inter eos nemo fuit, qui scriberet quidquam iis contrarium rationibus, quibus Pontifex motus diploma expedit. Si quid enim in eo poneretur à vero dissidens, haud

haud erat dubium, quin in tanto grauium, piorumque hominum numero, vel vnus reperiretur, qui aut Regem aut Pontificem, de deceptione moneret. Quin etiam Patriarcha ipse, qua erat fide & religione, non sinderet circa rem tantam, vllō Pontificem in errore esse, aperteque assereret, aliter rem habere, atque in diplomate sibi misso cōtineretur. Possem omnium hīc epistolas proponere; sed nec vacat, nec opus est. Vna ipsius, Andreæ ad Pontificem scripta rem totam explicabit. Ita ferè habet. Beatissime Pater, hoc anno millesimo quingētesimo sexagesimo septimo à Goano collegio Societatis Iesu literas accepi; cum iis Pontificij cuiusdam sanctitatis vestræ diplomatis exemplum, in quo erat, vt quo primo tempore tutò possem, Æthiopia relicta, siquidem nulla eius reducendæ spes esset, omni religione & conscientiz vinculo exolutus ad Sinas & Japonios transferrem me. Quia ipsum diploma acciperem, si mihi missum fuisset, eadem eius exemplum veneratione accepi; animūque ad obediendum quamprimum applicui. Quominus tamen Æthiopiam deferam, multa obstant. Ipsa imprimis difficultas nauigandi; fieri enim non potest, vt absque certissimo vitæ periculo discessum tentem. Nam cum in Mazuano portu, ex quo mihi erit necessarium proficiscendum (cum alius vnde id facere queat, non sit) plurima reperiantur Saracenorum nauigia; nullum propterea est, cui me tutò possim committere, tanta est eius gentis perfidia, tanto in Christianos ardent odio. Quoad reliqua ita sentio. Primum si quingenti dumtaxat ad nos ex India mittantur Lusitani milites, quos iam diu & votis omnibus optamus, & vehementissimè poscimus, & adhuc fauente Numine habituros speramus; non erit dubium, quin non so-

lum ad Romanæ Ecclesiæ obedientiam rebelles Abassini, verumetiam ad Christi doctrinam multi Ethnicorū populi venturi sint. Habitant enim hanc Æthiopiam gentes innumeræ inanum cultrices simulacrorum, quas & adire nullo traiecto mari, & ad fidem nostram perducere non difficile possumus. Certò scimus ex regno Damutis, quod aiunt ad Mosambicum vsque, atque ad Sofalam, pertingere, multos ad Imperatorem venisse, qui Christianis sacris imbui cuperent, idque ut sibi concederetur, supplices precarentur, quos tamen impius princeps ob priuatas repulit vtilitates, malens eos habere conditione mancipia quàm religione fratres. Fuerunt etiam tres ante annos ex regione Sinaxi (sic appellant) qui cum principe quodam Imperatoris propinquo, à quo animis armisque dissidebant, inire pacem vellent, atque ad tributa soluenda, nostramque religionem amplectendam offerrent sese: sed isti quoque fuere reiecti, odio & avaritia caritatem superantibus. Infiniti prope sunt ex circum vicinis Ethnicis, quos Saraceni mercatores emunt, Turcisque vendunt, omnes isti libenter darent Christo nomina, nisi malesuada habendi cupido principes ipsos, à quibus res pendet, transuersos ageret. Obstat hisce malis possent quingenti illi, quos dixi, Lusitani milites, cum magno & rei Lusitanæ commodo, & Indicæ ditionis stabilimento. Nam si Turcæ, quod proclive est, Æthiopiam priores occupent, vix dici potest, quantum inde rebus Indicis inferre damnum queant; cum parata in his locis habeant, quæ ad instruendas ornandasque classes censerentur necessaria; ferrum ad arma, alimenta ad exercitum, seruitia ad opera, & quæ sunt generis eiusdem. Imperator ille, qui hostiliter Romanam fidem insequere

quebatur, functus vita est. Filius successit ætate adolefcentis, iudicio parum firmus, & nomine magis, quàm potestate Imperator. Eosdem enim habet, qui in eius parentem conspirauerant, aduersarios; qui & nobilitate inter Æthiopes primi, & complures numero sunt. Quamobrem adeò turbata sunt omnia, ac ciuiliū dissensionum, externorumque bellorum tempestatibus concussa, nihil ut cuiquam sit optabilius, quàm ut aliquod habere possit consequendæ fruendæque pacis perfugium, quod in Romana fide constitutum esse, plerique norunt. Deinde etsi communiter Monachi, & ex nobilibus multi doctrinam nostram acriter oppugnant, nostrosque Catholicos impie insectantur: ipsa tamen plebs, ad veritatis agnitionem eo promptior, quo rerum humanarum vinculis minus est irretita, Romana probat laudatque instituta. Sunt etiam viri primarij non pauci, quos eadem tenet sententia. Vtrorumque saluti damus operam; & publicis priuatisque, quæ disputationibus, quæ concionibus volgamus veritatem; scriptis etiam scripta refellimus; nec proficimus nihil. Aliqui enim se nobis fide coniungunt; & coniungerent plures, nisi pœnarum obstaret metus, atrox in abiectis animis veritatis hostis hæc causa est, cur in his maximè locis armatam Religio desideret manum; ut ad Catholica castra accedant intrepidi, qui velint; & firmi persistant, qui accesserint. Existimo, Pater sanctissime, hoc Æthiopieum negotium eorum esse de numero, quæ ad Catholicæ religionis amplificationem & splendorem summo opere conferunt; propterea nulla esse de causa omitendum; quamuis, quod res magnæ habent, plurimis videatur implicatum difficultatibus. Quinetiam, ni valde fallor, vix vlla hodie offerri poterit expeditio;

quæ Romanæ Ecclesiæ maius ornamentum, vel maiorem Catholicis rebus afferre queat accessionem. Hic ubi nunc sum, in regno Tigrio, ducenti circiter & triginta habitant Catholici, duobus diuisi oppidulis, quæ non ita pridem eam ob causam ædificauimus, ut qui antea cum magno rei temporalis damno, maiori animorum periculo, peregrinorum more per varias vagabantur Æthiopiz partes, fixam habeant sedem, ubi commodè possint salutaribus imbui fidei documentis, & Christiana sacra frequenter suscipere. Veniunt ad nos ex diuersis locis alij, augeturque in dies singulos grex Christi. Nec pauci alibi sunt, qui ut huc possint sine periculo commeare, opportunitatem expectant. Oues istas deferere & lupis relinquere deuorandas, haud humanum est; longèque abest, à caritate summi Pastoris Christi Iesu, qui ne vnâ quidem perire passus est; sed nonaginta nouem in tuto relictis, errantem quæ siuit, suisque impositam humeris in ouile reduxit. Si gregem hunc tot inter feras relinquam, ecqua mihi reddenda erit Iudici Christo muneris mei ratio? Quid in ipso mortis puncto respondebo Deo de tanta crudelitate mecum expostulanti? Qui enim vni Thomæ ne periret, vulnera obtulit, non videnda solum, sed etiam tangenda, & digicis ac manibus contrectanda, quas à me pœnas repetet, si non hominem vnum, aut paucos, sed prope infinitos, meæ curæ fideique commissos negligenter deferam, eosque in barathrum sinam ruere. Pater sanctissime, ad te quoque oues istæ pertinent; tuo etiam ex ouili sunt: ne illas patiari ab stygiis lupis discerpi. Hoc vnicum est, quod secundum Deum adhiberi ad earum salutem remedium possit, si ad hæc loca illam, quam sæpius dixi, militum manum Rex Lusitanus

mit

mittat. Vt verò quod sentio, vno verbo semel dicam; tam pia hæc Æthiopiz causa nullo modo videretur deferenda. Hoc tamen ita dico, vt si vestrz sanctitati aliud videatur, submittam caput, idque putem placere Deo. Cæterum, si omnino statuatur, vt hinc abeamus, opus erit prægrandem ad nos classem mittere, vt tuti à Saracenis ac Turcis, qui in Mazuano portu plurimi sunt, multasque habent præsidiarias naues ad bellum egregiè instructas, trajicere in Indiam possimus. Hæc habeo, quæ proponam. Si quid aliud erit, quod sanctitas vestra nobis faciendum iudicet, quomodocumque id significabitur, promptissimè exequemur. Quod ad me priuatim attinet, velim scias, ita ad omnia paratum esse, vt quascumque ad gentes, siue Iaponios, siue Sinas, siue Mauros, siue Turcas, siue quem alium truculentiorum orbis populum ire iubeas, nullo negotio sim profecturus. Imò verò si Patriarchali me exuas dignitate, & ad abiectissima quæque munera addicas, nihil me, quæ Dei gratia est, experire repugnantem. Hæc ad Pontificem Andreas. Paria ad regem, paria ad Præpositum generalem Societatis, quæ propterea referre supersedeo. Probatæ Pontifici atque Regi Patriarchæ rationes; & vtrisque visum, Catholicæ rei interesse, vt in Æthiopia Patriarcha cum sociis maneret; neque illam desereret vineam, cuius colendæ ac propagandæ causa tantopere ad id tempus laborauerat. Itaque, quoad vixit, Fremonam incoluit oppidulum, vt dixi, in regno Tigrio perexiguum; nullam interim præteriri passus occasionem, in qua de sexcentis illis aut quingentis militibus Lusitanis in Abassiam mittendis ad eisdem principes atque ad Indicos prætores non scriberet. Anno enim millesimo quingentesimo septuagesimo.

sexto, cum Æthiopicus Imperator super eodem militum præsidio nuntium in Indiam destinaret; iterum Patriarcha eadem de re scripsit ad Pontificem, multas enumerans, quæ inde ad stabilien- dam in illis regnis sinceram fidem denuari possent, utilitates. Anno rursus insequente septuagesimo septimo, sexto Idus Iunias, aliam dedit, quæ vltima fuisse videtur, ad Pontificem Epistolam, in qua erat præsentire se vitæ suæ finem; reliquos item Socios, quos secum habebat, declinare ad senectam, nec posse diutius superesse; vehementer igitur eius sanctitatem precari, ut eò mitterentur alij, quibus traderent lâpada; ne si ipsi absque successoribus decederent, illæ quoque extinguerentur, quæ tunc erant, Catholicorum scintillæ, atque ita de tota actum esset Æthiopia.

---

*De quibusdam Andrea Patriarchæ virtutibus.*

C A P V T X I V.

**L**icet Ouiedus apud Abassinorum Imperatores, quorum aliquos diuersis temporibus vidit, & quoad poruit, ad Romanam fidem hortatus est, nihil omnino efficeret, in reliquis certè suæ Catholicis instituendis & confirmandis, siue schismaticis ab errore auocandis non infructuosam, quamdiu vixit, operam collocauit. Cum verò apud vtrumque genus hominum monendo exhortandoque non parum proficeret, Catholicos ramen & hæreticos nulla se magis, quam præclaræ vitæ exemplo alliciebat ad sese. Illi patentem habebant, & pastorem; isti virum fatebantur omni cumulatam genere virtutum: vtrique non  
homi



hominem vnum de cæteris, sed lapsum de cælo prædicabant. Princeps quidam generis propinquitate Imperatori coniunctus, de Andrea rogatus, quid sentiret, respondit, cum in ipsa hominum frequentia, rerumque omnium confusione ac turba videri sibi per similem iis, qui initio surgentis Ecclesiæ ab oppidis remoti vastas incoluere solitudines, diuinamque magis, quam humanam vixere vitam. Ad eum verò eius se virtutes admirari, ut ipsius quoque fidem & doctrinam non dubitaret absque vlla cunctatione sequi, multosque alios in eandem sententiam pertrahere, nisi insaniissimi Imperatoris crudelitatem timeret; fieri enim non posse, ut tam sancti, tam pii, tam religiosi mores cum falsa religione cohærent. Idem de illo erat Æthiopum monachorum iudicium. Ex iis vnus audiens nonnullas Catholicorum terras à Turcis esse occupatas, scripsit viro cuidam, qui ex illis vnam incolabat, quamdiu secum haberent Andream, nihil prorsus formidarent; neque enim aduersus hostium iniurias vllum esse præsidium firmius posse. Caueant igitur, ne illum permetterent aliò transmigrare: nam si casu aliquo inde abesset, tum verò iure timendum, nec iratum ob scelera Numen hostibus faceret potestatem crudeliter in ipsos sæuendi. Religiosus alter summæ apud Abassinos auctoritatis, ac toto in Regno ab Imperatore secundus, Andream sanctitatem eo habebat in pretio, ut ægrè pateretur ipsi decesse, quæ erant ad vitam necessaria. Cum ergo aliquando nosset, maxima illum premi rerum egestate; primum quemdam ac locupletem hominem hortatus est, ut egenti succurreret, nec sineret eum perire, cuius precibus Imperium staret. Ille etsi à Romana Ecclesia dissidebat, multa tamen sæpe ac satis largè misit

indi

indigenti munera, non alia ab illo petens volensque actionem gratiarum, quam ut, cum litaret, precareturve, aut modo alio ageret cum Deo, tantisper sui meminisset. Huic eidem verò postea accidit, ut cum de morte Ouedi nec opinatò nuncios accepisset, barbam sibi præ triticia velleret, & colaphos impingeret, flebiliter adiiciens, Abassinorum Imperium cum Andrea cecidisse. Reliqui omnes, cæteroque Romanæ veritatis hostes, eam quoque de ipso conceperant opinionem, ut si quod inter se magni momenti negotium essent transacturi, quod valde firum fixumque vellent esse, ad sepulchrū defuncti Patriarchæ simul pergerent, ibique ad seruandam fidem iureiurando se adstringerent; existimantes, haud impune futurum ei, qui ab ea perfidiosè recederet. Quamquam Andreas cunctis in rebus ita se hostiliter insequabatur, ut nihil esse, quod infentius odisset; abstinentiam tamen tantopere coluit, ut à statu mortalium longè abesse videretur. Iuratus testis, qui sub eodem cum illo tecto pluribus annis vixit, absolute affirmavit, nihil carnis, quod edi posset, non modò in eius os, sed ne domum quidem, toto eo tempore fuisse ingressum; solum semine quodam velici insuauis & amaro, cuius ex farina placentas, quibus victitat, conficit vulgus inops. Quæ aliquando à viris nobilibus dono accipiebat, ea confectam distribuebat in pauperes, nec partem sibi minimam, ut totus à Deo penderet, retinebat; eandemque ob causam, quoad fieri poterat, nihil rerum earum, quæ in quptidiano solent esse vsu, à die vno in alterum conseruabat. Nihil ipsi pauperum causis videbatur carius; aded non al. eriger tantum, sed hilariter etiam eas tractabat; sibi que quàm illis necessaria deesse, multo æquius ferebat. Bouem

habe

habebat vnum, quo solebat vti, quemadmodum illis in locis moris est, ad deportandam ex templis quibusdam ad alia templa sacram supellestem, cum erat pontificio apparatu sacrificaturus; sciens pagi cuiusdam incolae fame vexari, animal iussit occidi, diuidi in frustra, & per singulos particulatim distribui. Valde tunc quidam ex domesticis contendebat (is ipse est, qui rem hanc proprio firmavit testimonio) ne bove suo ad ea, quae dixi, munera, atque ad plura alia tātopere necessandū se p̄tueret; Sine, inquit, fili, sine obsecro, occidi animal, & opem ferre indigentibus, cras enim, ne dubita, optimus ac beneficentissimus patens gratiam rependet. Euenit, quod praedixit. Nobilis enim quidam & pecuniosus homo quamquam Catholicae religioni contrarius, audiens Andream summā inopia laborare, quadraginta ipse vaccae, octoginta lineos pannos, quorum illic esse solet ad res varias vsus, magnam eduliorum copiam die insequente dono dedit: quibus ille rebus per dies plures & suam & aliorum subleuauit egestatem. Locanda cuidam in matrimonio erat puella, orba parentibus. Deerat dos; eam ob causam res differebatur. Vbi id cognouit Andreas, vnam, quam solum ad longiora itinera habebat mulam, misit ad sceminam. Hoc autem in genere eius caritas eō prouecta est, ut quod legimus fecisse olim Antistites quosdam, insigni notos virtute, id Andream fecisse certum sit. Aliquoties quae erant dicata sacris, ut aliquos à vitæ periculo liberaret, fertur vendidisse; indeque non semel effectum, ut alba veste careret, qua rem diuinam faceret. Nec solum se spolians sua dabat indigentibus, verum etiam ad eos sustentandos saepe pagos circumuicinos, octo ac decem, pluraque inter se distantes milliaria pedibus per

peragrans, ostiatim mendicabat, quæ à singulis colligebat, propriis imposita humeris, asportabat domum, & conuenientibus illuc pauperibus distribuebat. Nō Catholicorum tantum subueniebat miseris; sed iis quoque suam impendebat operam, qui Romanæ Ecclesiæ erant infensi. Accepit schismaticum quemdam eiusmodi grauari morbo, qui & contagione noceret, & intolerabilem ex se exhalaret foetorem; atque eadem causa ab ipsis etiam propinquis esse derelictum, quod nemo illum, nec sine nausea, videre, nec sine salutis periculo tractare posset. Hunc adiit Andreas, ipsique atque eius saluti totum se ac penitus addixit: & accuratius necessaria ministravit, quam si illi esset vel natura patens, vel officio seruus. Cibum ægroti parat, suisque manibus in os infert: lectum sternit; versat hominem; mutat, mundat; verrit domum, pannos & linamenta lauat; nec prætermittit quidquam, quod vel ægroti, necessitas, vel ægritudinis conditio statúsque desideret. Hac ratione, Deo auxiliante, utrâque infirmo restituit sanitatem. Is enim tanta commotus visûsque Catholici Antistitis caritate, supremam Romanæ sedis potestatem cōfiteri adactus est; ultroque illi ceruicem submitit. Quid Andreas egerit, ut schismaticos, quod in opus sollicitè incumberebat, cum Romano capite copularet, difficile dictu & creditu est. Id ut ipse per se facilius, quam per interpretes, præstaret, homo natu grandis summato in perdiscenda Abassinorum lingua adhibuit diligentiam; idemque ut socij facerent, etiam curauit. Ut autem eos nouit qualemcumque adeptos peritiam fuisse, in pagos statim ac vicos misit, quo veræ fidei lucem ostenderent incolis, eisdemque sanis moribus & Catholicæ Ecclesiæ congruentibus instituerent.

Ipse—

Ipse quidem tantum in eius linguæ cognitione profecit, ut familiariter cum Abassinis colloqueretur, confitentes audiret, conciones haberet, aptè demum ex linguis aliis in Abassinam transferret multa, quæ Catholicis, ut in fide perseverarent, & hæreticis, ut errores suos agnoscerent, atque execrarentur, valde conducebant. Transferendi labori ita se dabat, ut omnem prorsus curam deponeret sui. Dum quædam attentius aliquando converteret, sic abstractam à rebus aliis habebat mentem, ut ad levandam fistim, qua fortè premebatur, plenum oleo vasculum ori per imprudentiam admoverit, & oleum biberit pro aqua. Nec tunc agnovit factum, neque agnosceret postea, nisi Franciscus Lupius vas vacuum reperiens, & quid actum esset de oleo rogans, errorem patèfecisset. Cæterum tam singularem Abassinis iuvandi Patriarchæ laborem multiplici fructu solabatur Deus, & aliquando ostentis cœlestibus faciebat illustrem. Per ea enim tempora visus infomnis est hominì hæretico, qui locum incolebat vnus circiter mensis itinere à Catholicorum pagis distantem. Hic cum duos post annos è fortè venisset, vbi Andreas erat, simulatque ipsum est introitus, agnovit ex facie, & illū esse dixit, qui sibi antè fuerat per quietem conspectus. Quamobrem diuino incitatus impulsu, adit secretò Patriarcham; quid viderit, narrat; quid deinceps facturum sit, ut rectè viuat, eius arbitrio committit. Catholicis illum præceptionibus vir sanctus instruit, & in Romana fide ita roborat, ut grauissima postea eius conseruandæ pressus difficultate, constans firmusque permanferit. Nam à Turcis captus, sæpiusque, ut ad Mahumeticam nequitiam transiret, vi magna impulsus, obnixè resistit. Dùmquo libertate omiſſa ferreis onustus

onustus catenis, laboribus oppressus, propéque ene-  
ctus fame, & mœstitia. planè consumptus, mortem  
magis, quàm vitam optaret, ad Andream misit, qui  
nuntiaret, quo esset in statu, verbisque suis ab illo pe-  
teret, ut libertatem sibi, & in vera religione constan-  
tiam suis à Deo precibus obtineret. Plurima quidem  
se & maxima pati mala, sed nullo affligi acerbius,  
quàm immani illa & intoleranda importunitate, qua  
ut a Christo deficiat, ab ipsis Christi hostibus instiga-  
tur. Eum igitur iterum atque iterum obsecrare, ut  
quoad pòtest, precibus suis misero succurrat, cōfidere  
enim, si causam suam suscipiat, Numen se propitium  
habiturum; & quādo aliud nihil, in recta fide ad mor-  
tem usque constantem permanfurum. Pro signo au-  
tem suæ in ipsum fiduciæ, pileum mitteret; id enim so-  
lum è suis bonis sibi esse relictum, quod mittere  
queat. Accepto Ouedus sub noctem nuntio, vehe-  
menter indoluit; statimque in preces effusus, liberta-  
tem homini breui impetrauit. Eadem quippe nocte  
à vinculis euadendi oblata est captiuo occasio; cū-  
que esset omnino ignarus nandi (nare enim ad fu-  
gam oportebat) nou exiguum maris tractum nando  
traiecit; quantæque posuit diligentia ad Patriareham  
contendit, & ad eius prouolatus pedes, rem ordine  
narrans, suam ipsi libertatem retulit acceptam.

---

*De aliis Andreae virtutibus, & obitu.*

C. A. P. V. T. XV.

**V** Arii sæpe modis, vi, quoque interdum adhibita,  
tum Abassinorum Abuna, tum Abassini mona-  
chi

chi tentarunt, ut Lusitanorum vxores, quæ ex Abassi-  
no erant genere, templa & sacra frequentarent hæ-  
reticorum. Verùm Malac Seguetus Adamæ filius, quã-  
vis contumaciâ patri non impar, mitior tamen in cæ-  
teris, cum apud ipsum ea de re nostri conquererentur,  
non solum Abunæ & Monachorum importunita-  
tem coercuit, sed assignauit certa Catholicis loca, vbi  
cum vxoribus ac liberis catholico ritu viuerent, tem-  
plâque ædificarent, in quibus à reliquis separati sua  
sacra peragerent. Hæc loca Ouiedus quamdiu super-  
fuit, sedulo lustrabat; fidei morumque doctrinam in-  
colis tradebat; illis conferebat sacramenta, & reliqua  
eiusmodi summa cum beneuolentia & caritate dili-  
gentissimè procurabat. Licet autem hisce continere-  
tur exiguis oppidulorum terminis, neque ad remo-  
tiora, nisi rarò digrederetur oppida; ferebatur tamen  
per longinquas regiones cum illustri commendatio-  
ne eius sanctimonie fama, qua multiplex genus ho-  
minum hinc inde commotum ad ipsum turmatim  
ventitabat. Ex iis verò nemo ferè explicatam ab ipso  
veritatem non agnoscebat; multi agnitam amplecte-  
bantur; non pauci etiam metu, aut quo alio impediti  
affectu respuebant. Ita tamen omnes, tam qui fideles  
Christo erant, quàm qui à vera fide aberant, de illo  
sentiebant, ut non dubitarent ea ab ipso petere quæ  
sola effici naturæ potestate non possunt. Hoc verò  
& ex aliis quæ iam dixi, & ex his colligitur, quæ nunc  
dicam. Cum die quadam litaret, templum ingreditur  
hæreticus homo, filium paruo natu portans vlnis, o-  
mnino desperatum ac pæne mortuum. Eum suppo-  
nit litantis pedibus sanitati restituendum; nec dubi-  
tat, quin sanum recipiat. Ita fit. Puellum Patriarcha  
ante pedes despicit moribundum; intelligit vitam illi

à patre & sanitatem quæri. Rem à Deo petit, & ob-  
 net; sacroque peracto integrum reddit filium paren-  
 ti, villo absque signo pristina infirmitatis. Ex Catholi-  
 cis alter filium item habebat nondum rationis com-  
 potem, oculis captum, & pessima affectum constitu-  
 tione corporis; optabat cum potius mortuum, quam  
 vivum; ut ea ratione magno filius labore, non minore  
 pater ipse doloris sensu eximeretur. Petiit igitur ab  
 Andrea, ut si talem miser infans vitam esset victurus,  
 precibus ipsi suis mortem à Deo impetraret; id enim  
 utrique utile & gratum fore. Nec verò, inquit, time-  
 ne quam fortè iniuriam inferas, innocenti, dum ei  
 mortem procurabis; conferes haud dubie beneficium;  
 siquidem non tam finiet moriendo vitam, quam lon-  
 gam mortem cum brevi commutabit. Rem divinam  
 Andreas peregit; idemque & sacrificij & puelli finis  
 fuit. Mox enim ex hac mortali creptis cæcitate, men-  
 tisque oculos diuino perfusus lumine aperiens, æter-  
 na pulchritudinis splendorem est intuius. Cum ali-  
 quando tanta vis locustarum ad ea loca conuolasset,  
 ut instar densæ nubis obtegerent cælum, ramósque  
 arborum, quibus insidebant, ipso pondere frange-  
 rent, & vasta strage omnia latè devastarent, nihil de-  
 nique in agris relinquerent, quo sustentari homines  
 possent, hæretici simul & catholici consensu ad An-  
 dream accurrerunt; opem imploraturi. Congregatis  
 ille in templum Catholicis Deiparam Virginem, æ-  
 terisque cœlites immortales litanis invocavit. Ob-  
 servatum est, ut paulatim preces fundebantur, ita sen-  
 sim locustarum exercitum minui, aliasque super alias  
 mortuas in terram cadere; finita denum prece, tunc  
 tanto ex numero ferunt ne vnam quidem supersuis-  
 se. Illud etiam diuino tunc effectum beneficio est.



vt quamdiu postea Patriarcha vixit, tale genus calamitatis, quod natium & quasi domesticum erat, nunquam ea regio fuerit experta. Cæterum cum ciuilibus discordiis ita res Abassinâ turbata esset, vt multa passim per totum Imperium bella fierent; qui de Lusitana gente erant, coacti sunt, domo relicta, in diuersa se conferre loca, in iisque accepto stipendio signa sequi principum diuersorum. Tum verò tantam Andreas rerum necessariorum passus est egestatem, vt virtute magis diuina, quàm humano subsidio sustentari crederetur. Vestibus tempore vsûque magna ex parte consumptis, quo se tegetet, vix habebat. Eò deuenit, vt cum opus esset de Æthiopis rebus Sebastianum Regem per literas monere, quoniam aliam, in qua scriberet, chartam non habebat, ex initio Breuiarij primum folium, in quo nihil erat descriptum, ad scribendum abstulerit. Cum rursus de se, deque statu rerum Pio V. Pontifici maximo rationem esset, per literas redditurus, ex eodem, quo ad recitandas horas utebatur, Breuiario extremas abscidit foliorum partes, inque iis ad modum libri filo colligatis scribens, docuit sublimia dignitatum decora nihil deprimi paupertate, sed illustriora effici, maioremque apud bene sentientes admirationem sortiti. Hanc eius epistolam Pius Pontifex in manus postea accipiens, neque legere, neque videre sine lacrymis potuit, considerans, quantus vir quantam esset ad inopiam redactus. Denique postquam viginti annos eo modo, quo dictum est, in illa Æthiopica vinea laborauit, summis calculi cruciatus doloribus ad metam peruenit. Cum sub extremum spiritum vi morbi acerbissimè torqueretur, miseratione, qui aderant, permoti, precari Deum cœpere, ne permitteret, tam innocen-

tem, tamque immerentem virum tam grauitè afflicti; solueret potius ærumnosæ vitæ laqueos, & animum ad se reciperet cœlestibus gaudiis recreandum. Eos ille audiens, A verbis, inquit, talibus abstinete, filij; non mortem mihi, sed patientiam, qua dolores istos æquo animo feram, ab immortalī Deo vestris precibus deposcite. Ego enim si qua ratione vobis utilis esse queam, in hisce grauissimis doloribus triginta adhuc & amplius annos libentissimè viuam. Sinite Deum efficere, quod ipsi placet. Absit, vt ego velim aliud, quàm quod vult; aut dolores istos finire morte cupiam, quibus ipsi placitum vt viuens cruciet. His dictis, ad Deum conuertitur, ei quo sese in omnem euentum offert; iubeat mori aut viuere, vexari doloribus, aut iis liberari; nihil se vniquam recusaturum; animum tantum & vires sufficiat. Dum per hæc & similia se Deo vouet, cum prius esset salutaribus Ecclesiæ sacramentis ritè munitus, inter summos cruciatus expirauit, mense Septembri anno à partu Virginis millesimo quingentesimo septuagesimo septimo. Vt mortuum viderunt, qui assistebant, ingentem edidere eiulatum; quo foris audito incredibilis comploratio toto pago excitata, graui mœrore omnium animos impleuit. Mortis fama frequenti rumore per loca alia diffusa ab ipsis quoque Schismaticis dolorem & lacrymas extorsit. Non in monte Amara, vt à nono auctore fictum diximus, sed in ipso, quod Catholicis Fremonæ erat; per exiguo templo, maiori Fremonensium pietatè, quàm exequiarum apparatu corpus eius sepultum est. Ea hæreticis de ipso fuerat existimatio, vt cum firmissimè sibi persuaderent, demortui animum cum beatissimis patriæ cœlestis ciuib; æquo frui sempiterno, ad sepulchrum, in quo ossa

ossa quiescebant, sæpiissime concurrerent, ibique vti fieri in Abassia iis solet, qui sunt beatitate donati, frumentum offerrent, thuráque & alios odores venerabundi incenderent. Multa ad idem sepulchrum ab eius statim obitu ferunt edita miracula, ex quibus sequentia sunt, quæ iurati narrauerunt testes. Fœmina erat ex genere regio, cuius vitam difficillima ægritudo adduxerat in discrimen. Hæc paululum terræ ex Patriarchæ tumulo sibi allatæ immiscuit aquæ, quam vt bibit, depulso morbo repentè conualuit. Cuidam homini artis medicæ perito diuturnum ac permolestum erat in latere vlcus, cui multa incassum adhibuerat medicamenta. Visus iste sibi est vocem huiusmodi in somnis audire: Mitte hæc remedia, quæ malo tuo tam frequenter adhibes; si recuperare sanitatem vis, terram capito ex Patriarchæ sepultura, efficito ex ea emplastrum, vlceri tuo illud impone, sis confestim sanus. Ita accidit. vbi terra vulnus tetigit, quidquid infirmum erat, noua carne restituta, solidè confirmatum. Ideo ipse medicus, cum de mandato Imperatoris quamdam se in arcem conferret, captus est à Turcis, & in vincula coniectus, die insequente transfigendus palo, quòd explorator crederetur. In hoc vitæ periculo, cum ab Andrea, quem viuentem nouerat, auxilium obnixè peteret, visus ecce ipsi multa circumfusus luce. idem Andreas, eiusque apprehendens manum, leuat è terra procumbentem, & his verbis omnem ex afflictò animo pellit timorem. Ne metue quæ impendere tibi videntur ab Turcis mala; euades omne vitæ discrimen; & die crastino, quo te mactandum putas, sine damno exibis è custodia. Dixit, & ex oculis subitò euauit. Vbi postera illuxit dies, aperto præter morem à Turcis carcere, data homini

exeundi, & abeundi, quò vellent, libera facultas. Tanta aliquando ob pluuiæ defectum illis in locis siccitas fuit, vt arescerent segetes, & facile apparetet, annum non solum homini, sed etiam pecori fore exitiosum. Conueniant inter se quotquot ibi reperti, de querendo remedio deliberaturi; & quamquam à Romana fide alieni, statuunt tamen ad Patriarchæ sepulturam, tamquam ad aram confugere. Eò gregatim pergunt; simul attollunt voces, & magna cum fiducia hunc in modum precantur: Patriarcha sanctissime respice hos agros, ex quibus victus nobis & vita. Cerne vt ariditate sterilecant; & frugum inopia extremum nobis minentur exitium. Auerte, quæ imminent mala. In cœlo nunc degens cum Deo, ne illud nobis auxilium nega, quod libenter præstabas, cum apud nos degebas in terris. Si opem fetas perditis rebus, quam nobis tradebas fidei doctrinam, iam nunc corde, & eum oportebit, ore & opere palàm profitebimur. Hæ preces tantus statim consequutus est aquarum imber, vt omnem sterilitatis metum ex agrestium animis abegerit.

---

*Quales Andrea socij, quomodo vitam finierint.*

## C A P V T XVI.

**N**E immensus ille sanctissimi Patriarchæ labor tot per annos tanta caritate pro Abassinis susceptus eius morte peteret, à Patre misericordiarum clementissimè prouisum est. Quinque eius socios superstites esse, & in eadem vinea colenda ita exerceri voluit, vt quod ipsi hæretici confessi sunt, ad insignem quendam euecti fuerint gradum sanctitatis. Iurati testes dixe

dixere, eos plenam rectè factis, & verè Apostolicam vixisse vitam, quam admirari quidem possent, satis explicare non possent. Cùm salutem omnium enixè procurabant, tum vel maximè in pertrahendis ad veritatem Monachis, vehementer insudabant, quòd viderent ab his, qui apud eos habentur cæteris doctiores, nobilium æquè & ignobilium conuersionem pèdere. Omnes, quibus cum ipsis erat de religione disceptatio; nullo negotio convincebant; non tamen admodum multos, nec sine magno labore ( tanta inueteratæ consuetudinis vis est) ad amplectendam agnitam veritatem compellebāt. Ex his quinque sociis, tres sacerdotes erant, reliqui duo nullis initiati sacris, ad rem domesticam iuuandam in Societatem admissi. Hos Patriarcha, ut suum post obitum plures Catholicis relinqueret sacrorum administratos, quos necessarios fore animo prævidebat, aptè prius instructos, nò multo ante, quàm diem obiret, ad ordines promouit, & sacerdotes creauit. Id diuino factum esse consilio, euentus ostendit. Lupius enim, qui vnus fuit ex illis, & sociorum vltimus excessit è terris, vllò absque socio Catholicam in Abassia fidem doctrina & exemplo diu conseruauit, donec vno ferè post eius mortem anno ab Alexio Menesio, Goano tunc Antistite, in Æthiopiam missus est Michael Syluius, de quo suprà dixi, insigni sacerdos pietate, qui vineam eandem, ne errorum spinis omnino syluesceret, ad aliorum vsque aduentum diligenter excoluit. Moriens Patriarcha reliquis sociis Antonium Fernandium præfecit, virum cùm rebus aliis excellentem, tum verò omnium instructum virtutum apparatu. Caritate & tolerantia ferunt fuisse admodum singulari. Primus sociorum fuit, quem ab illo exilio ad sedes beatas Deus auoca-

uit, illum consequutus est Gonzalus Cardofus, de quo hæc accepimus præter alia, quæ ipsi fuere cum reliquis communia. Dies noctesque Catholicis æquæ & hæreticis infatigabilem præstabat operam. Labores & pericula ipsi erant delectationis materia. Alienarum videbatur arbiter voluntatum. Magna facilitate conciliabat discordes; atque in hoc genere, quo quemque vellet, nullo negotio flectebat. Mortem suam diuinitus prænouit, ac prænunciauit. Cùm in pagum quædam quindecim dierum itinere distantem, Francisco Lupio comitante, mitteretur, ut Catholicos loci incolas sacramentorum pabulo & doctrina pasceret, Patri mittenti ita fertur dixisse: Læto atque hilari animo hoc iter suscipio, quod obedientia, quæ mihi vitæ carior est, suscipiendum præcipit. Scias tamen neque me peruenturum Dambeam, neque ad te amplius reuertiturum. Haud plura his, mox se cum socio in viâ dat. Partem itineris confecerant, cùm Cardofus Lupium monet, instaret tempus moriendi; ipsum quoque in eodem futurum periculo; consulat tamen diligenter sibi, & ad communem vtilitatem seruet vitam. Non multo post, cùm si. nul pergerent, latrones quidam è sylvis egressi imparatos adoriuntur. Lupius vulnere accepto in secretum se locum abdit, & vitam tuetur. Cardofus primo ferè ictu mortuus cadens oraculi patefecit veritatem, Tertius ad cælum abiit Andreas Gualdarus. Tantus huic inerat mentis ardor, & amica veritatis simplicitas, ut dici de eo soleret, quod de Nathanaele dixit Christus, verum esse Israelitam, ab omni alienum dolo. Cùm summo iuandi Abassinos desiderio æstuarer, simulatque ea loca tetigit, ingenti conatu ad perdiscendum gentis idioma applicuit animum, illudque sine doctore intra sex menses

ses adeò perfectè calluit, vt multa ex nostris ad Religionem spectantia aptè traduxerit, quæ & Catholicis ad conseruandam fidem, sectandamque pietatem, & hæreticis ad errores depellendos magno vsui fuere. Mors ita contigit. Præfecti sui iussu Mazuam petens, in Turcas incidit, quibus ex vestitu proditus, cū Christianus & sacerdos esse agnosceretur, vnà cum Lusitano alio, quem habebat itineris comitem, Barbarorum telis confossus viam & vitam felici exitu absoluit. Quarto loco discessit ad superos Emanuel Fernandus. Hic adulta iam ætate & sacerdotio decoratus, anno salutis millesimo quingentesimo quinquagesimo tertio in Conimbricensi Collegio nomen dedit Societati. Ante Religionis ingressum Cardinali Henrico erat cognitus, & in prudentium atque piorum hominum numero habitus. Hanc ob causam aliquot non exigui momenti negotia ab eodem principe agenda suscepit, & fideliter ac sedulò administravit. Apud Abassinos cū multis in rebus, tum in eo maximè eius virtus enituit, quòd ad sacra infirmis ac valentibus ministranda plurimos longèque distantes Christianorum pagos pedibus lustrabat; adeò quidem assiduè, vt in via magis, quàm vllò certo in loco domicilium haberet. Nec pauca nec modica in hisce itineribus subibat vitæ discrimina, quibus tātum abest, vt à proposito retardaretur, potius vt ad eam ipsam rem difficultatibus ipsis promptior fieret, & alacrior. Multa ferunt diuino instinctu vaticinatum. Hæc à iuratis testibus accepimus. Cū Monachus quidam hæreticus Imperatorem, apud quem auctoritate & gratia valebat, vehementer sollicitaret, vt quotquot Abassini essent, qui ab Alexandrini Patriarchæ factione ad Romani Pontificis obediētiam transissent,

eos ut seditiosos ac perduelles interfici iuberet; rem  
 fama ad Catholicos detulit, & tanto eos perculit ti-  
 more, ut quo possent modo imminēs periculum eda-  
 dere, solliciti & anxie quærere cœperint. Ex his unus  
 quid ageretur, Emanuēli nuntiavit. simul & consilium  
 in te difficillima petiit. Sedato ille vultu hominem in-  
 tuens, Vade, inquit, meis verbis Catholicos roborā. &  
 metu solue. Certò pronuncia, nullum ab hac parte  
 esse periculum; neque enim iniqua suasionē mouen-  
 dā Imperatoris animum. Eum verò, qui vobis mo-  
 liur interitum; intra duos menses auferendum ē vita.  
 Ita euenit, ut ab Emanuele prædictum. Cū discede-  
 ret quodam ex loco, videretque hoc discessū nonnihil  
 amicū hominē turbati, Obsecro, inquit, te, ne fe-  
 ras ægrè me hinc abire; iam ad viuendum vocor Re-  
 gionem, & optatū adest tempus, quo terram hanc,  
 quam baiulo, deponam in terra, euolēq; in cœlum.  
 Ad templum confeto me, in quo sanctissimi Patriar-  
 chæ requiescunt ossa, ut prope ipsum sepeliar. Abiit;  
 ad designatū peruenit locum; paucis post aduētum  
 diebus animam egit. Cū moriturus decumberet,  
 quemdam rogauit ex iis, qui assidebant, quantum di-  
 staret dies Christi natalitiis sacer? Haud procul abest,  
 inquit ille. Tūc Emanuel, hunc diem expecto, ut mū-  
 do moriens nascenti in terris Christo viuere in cœlo  
 incipiam. Vbi dictus illuxit dies, Catholicos, qui in  
 loco erant, vocari iussit ad se, simul cum iis rei diuinæ  
 interfuit, sacrificio finito data acceptaque mutuo sa-  
 lute, dulcibus verbis domum quemque remisit suam.  
 Vestra, inquit, tecta repetite, reficite cibo corpora; hæc  
 frequentes à prandio adeste. Faciant, quod iusseras,  
 futuri ignari. Cibus sumunt; pransi, conueniunt, simul  
 ad Emanuelem redeunt; corpus reperunt exanime,  
 rigant



rigant lacrymis, venerabundi osculantur, supremæ reginæ aspectu creditur in obitu recreatus. Conuersus enim ad vnum cubiculi angulum, intermortuis quidem, sed iucundissimis vocibus clamare cœpit, Ah domina mea, ah domina mea! Tunc Franciscus Lupius, qui aderat morienti, agnoscendæ rei cupidus, quid viderit, interrogat. Vidi, inquit, Virginem deiparam diuina mirabilem pulchritudine; sine me abeuntem sequi. His dictis, migrat è corpore.

---

*De Francisco Lupio, Patriarchæ socio, qui omnium  
postremus diem obiit.*

## C A P V T XVII.

**V**Ltimus ex sociis mortalem vitam Franciscus Lupius reliquit, anno millesimo quingentesimo nonagesimo septimo, mense Maio. Vix scribi possunt, quæ de hoc viro à iuratis testibus tradita sunt. Eum summis equauere cœlitibus. Affirmarunt, nullam esse partem veræ germanæque sanctitatis, in qua non excelluerit. Ego pauca quædam & leuiter attingam. Illud primum sit. Lupium per annos viginti Ouiedi Patriarchæ fuisse in Æthiopia domesticum socium, eodémque cum ipso labores, & easdem subiisse difficultates; atque in omni genere virtutum sic illum esse imitatum, vt expressa quædam viuæque eiusdem Patriarchæ imago extiterit. Ita corpus verberibus, inediam, modisque aliis exetenuauit, vt solis ossibus constare videretur pelle tectis. Solitus erat dicere, vitam hanc non ob alium à Deo nobis concessam finem, nisi vt laborando assequeremur æternam, tritum Iobi v-  
surpans

surpans verbum: Homo nascitur ad laborem, vt ad volatum auis. Hinc erat, nulli vt vniquam labori parceret. Cæteris sociis vita functis, mox egenis disper-  
tuit, quidquid erat domi; & ad reliqua pallium adiecit scissum in partes, vt ad plures pertingeret. Denique & ipsam tunicam, quam sibi ex vestitu exteriori solam reliquerat, in frusta quoque diuisam distribuic pauperibus, interno tantum amictu, quod illis in locis indecorum non est, nuda tegens membra. Cū tamen hyeme varios Catholicorum pagos erat lustraturus, ad propulsandas frigidi cæli iniurias aliqua pelle utebatur. Reperit aliquando fœminæ vita functæ nudum atque inhumatum in via cadauer; mox in secretum se recipiens locum, exiit subuculam, mortuum corpus deceter operuit, & terræ mandauit. Nuda humo cubabat. Cū ab homine quodam saccum accepisset, quem supponeret corpori, illum confestim dedit ægrotō, qui frigida quoque ac dura in terra iacebat. Ad eam deuenit rerum penuriam, vt cū ē vita cessit, nihil sit apud ipsum repertum, præter frustum laceri ac triti corij, cui incubuit ægrotans, vt eo cadauor tectum sepulturæ daretur. Visus sæpe est, cū sacrificium faceret, cūque secretō diuina contemplaretur, tanto perfusus splendore, vt Solis instar intuentium oculos perstringeret. Idem qui videre testati sunt; idque erat crebris inter Catholicos peruulgatum sermonibus. Fuit ex ipsis, qui affirmaret, sæpe sibi à parente suo dictum: Fili, hunc Franciscum Lupium, qui nobiscum est, quēque frequenter videre & alloqui possumus, ne tamquā vnum de cæteris hominibus existimes esse; summa præditus est sanctimonia. Illum ego aliquoties vidi, cū faceret sacrum, seque ad circumstantem populum verteret, oculis & ore  
flam

flāmas iaculari, ac toto capite luce mirabili splendescere. Quod reliquum est, curabis, summo cū habere in pretio, & eximie venerari. In morbum incidit: cū haberet in dies peius, ingens Catholicos de iactura tāti viri incessit sollicitudo. Cōsumebātur mœrore, quoddum sibi viderent auferri, cuius ē vita pendeāt. Summis ergo precibus & multis cum lacrymis à Deo petunt, ne velit illum mori, sine quo ipsi nequeunt vivere. Placuit Numini pia deprecatio, & restituta egro sanitas est. Vno vel altero à recuperata sanitate die pergit in tēplum, vt sacrificet; conueniunt etiam frequentes Catholici, vt facienti intersint. Peracto sacrificio, ita illos dicitur allocutus. Ad finem laborum venerā, Deo vocante. Mihi quidem nihil esse optatius poterat, si mea commoda respicerem, quā vt dissoluerer, & cum Christo essem. Audite preces vestræ à clementissimo Domino sunt. Duos adhuc vobiscum commorabor annos; sic illi placet, qui vitæ & necis Dominus est. Si velit, vt multo longius proferam viuendi terminos, nō recuso; siue enim viuō, siue morior, ipse sum. Vestra etiam, fratres mei, causa valde me in hac ægritudine anxium habebat. Quī possem enim non maximè angi, cū viderem post obitum meum vos futuros sine magistro, sine pastore, sine sacerdote? Quī possetis item vos, vestrique liberi ita deserti inter Romanæ religionis hostes in vera fide constantes integrique persistere? Gratias igitur agite & habete benignissimo Patri quāmaximas, & quod in vos contulit beneficium, sæpius vobiscum recognoscite. Quod attinet ad me, quamquam exacta iam ætate, viribus affectis, hebetato etiam magna ex parte animi vigore, nihil tamen his duobus annis prætermittam, quod vobis vtile esse iudicabo. Deum precor immortalem,

quam

quam noscit virtutem mihi opus esse, largè suppeditet ne cuiquam defim. Hæc effatus, concionē dimisit. Reliquo vitæ tempore sic egit omnia, siue, quæ corporis, siue quæ animi robur deliderāt, vt apparetet vtriusque partis vires non ægritudine perditas, aut ætate immutatas, sed morbo potius illo, vti salutarī medicamento fuisse instauratas. Vbi tandem ad metam ventum. octo ante dies, quàm exiret è vita, iussit Catholicos conuenire, ad quos plenam optimis consiliis habuit concionem. Principio eos monet, elapsū esse, quod diuino munere acceperat biennij tempus, nec iam plus quàm septem vitæ dies superesse; orare se & obtestari omnes vehementer, ne de diuina misericordia desperent; fore, vt vnum circiter post annum illuc veniat, qui diligenter eorum curam gerat; si quid interim habent, quod præstare ipsum velint, ne morentur proponere. Deinde hortatur quanto, poteit animi ardore, vt in Ecclesiæ Romanæ doctrina & obedientia firmissimè perseuerent; à colloquiis & consortio, nedum à connubiis hæreticorum abhorreant ac fugiant; Iusticiam, pietatem, virtutes reliquas sectentur; nullam iis, qui foris sunt, ansam præbeant malæ de ipsis sentiendi; pacem denique inter se & concordiam seruent; atq; ita viuant, vt verè Catholici & verè fratres esse videantur. Post hæc definito die, summo omnium Catholicorum dolore, mortalis vitæ molestias curasque cum corpore relinquens, ad quietem abiit sempiternam. Nondum exacto ab eius obitu anno Melchior Syluius Mazuam appulit, indeque ad Abassinos confestim transiens, fidem à Lupio Catholicis vaticinando datam aduentu suo liberauit.

FINIS.









